





Bibliotheca  
majori Coll. Rom.  
Societ. Jesu


III. 14. f

8661  
10  
12  
E

III  
9  
D.









C. R.

SIBRANDI LVBBERTI  
DE PRINCIPIIS  
CHRISTIANORVM  
DOGMATVM

LIBRI SEPTEM,

Scholasticè & Theologicè collati cum  
disputationibus Roberti Bellarmini

Iesuitæ Romani,

ad

Johannem Jacobum Gryneum

Theologum & Philosophum.

CONSILIO



SINIS

BIBLIOTECA NAZ.  
ROMA  
VITTORIO EMANUELE.

FRANCKERAE.

APVD AEGIDIVM RADAENV

ORDINVM FRISIAE TYPOGRAPHVM

in Academia Franckerana.

CID. MD. XCI.

PHILIPPVS MARNIXIVS

*Lectori S.*

Veritatis simplex est oratio, inuestigatio ardua. Sed procliuiorem reddit diuinum illud ratiocinationis Organú, quod Analytica methodo & Sophistarum fucos abstergit, & illius nudam faciem coram spectandam exhibet. Id cum alijs omnibus in rebus præclarum est & laude dignum, tum certè in Theologia diuinum, quippe quæ summos bonorum fines, gloriam nempe Dei & hominum salutem attingit.

Laudandum itaq; Sibrandi Lub. studium qui Analyticè eam proponit, vt vel à rudioribus, & minus exercitatis non cerni modò, sed propè manibus possit contrectari.

Quare quisquis es lector veritatis cupidus, site nuda orationis simplicitate, quæ proprius est, & γήραις eius cultus contentum hos libros euoluere non pigebit, hand magno certè negotio illam & ex abditis Democriti Cryptis erueris, & à Sophistarum anfractuosis paralogismorum pedicis vindicaris. Vale.

P R Æ F A T I O  
S I B R A N D I L V B B E R T I  
A D I O H A N N E M I A C O B V M  
G R Y N Æ V M Theologum & Philosophum.

**M**ULTI viri docti, Iohannes Iacobe Grynæ,  
papistica dogmata scribendo propugnarūt.  
Tandē exortus est Robertus Bellarminus,  
qui ex ijs omnibus, qui ante eum scripserūt,  
corrasit, quod Papatui stabiliendo esse iudicauit, idq; in  
vnum volumen congestum tanta calliditate concinna-  
uit, vt papistis suum studium, nobis sōphis Cicam proba-  
rit. Nam quod est Sophistarum proprium, quas præ-  
missas controuersas esse sciuit, eas magno silentio præ-  
terit, & quas vt ex extra controuersiam positas concedi-  
mus, eas innumeris immensisq; allegationibus confir-  
mauit, atq; ita vno eodemq; labore suis admirationem,  
indoctis stuporem, nobis risum concitauit. Exemplo vno  
atq; altero hoc lectori ostendam. Primo libro docet li-  
bros apocryphos esse Canonicos, quia in Ec-  
clesia leguntur, & qui patres ex ijs testimonia  
citant. Virumque probat multis allegationib. At neu-  
trum negamus. Verū quod probari debuit, nempe eos  
omnes libros, qui in Ecclesia leguntur, & ex quibus pa-  
tres testimonia citāt, esse canonicos, magno silentio oc-  
cultatur. Libro secundo docet vulgatam versionem  
esse authenticam, quia mille annis in Ecclesia  
vsurpata est. Hec item sollicitē probat. Sed neq; hoc  
valde controuersum est; & quod à nobis negatur, nem-

pe authenticum esse, quicquid Ecclesia mille annis usur-  
pauit, silentio præteritur. Libro tertio docet legitimā  
Scripturarum interpretationē à Papa Roma-  
no petendam esse, quia Christus pro Petro ro-  
gauit, ne ipsius fides deficeret, idq; operose pro-  
bat. At hoc nemo negat. Verū quod controuersum est,  
nempe in Papam Romanum competere, quicquid de  
Petro rectè dici potest, magno cum silentio tegitur. Li-  
bro quarto docet consuetudines Romanæ Syna-  
gogę esse principium Christianorum dogma-  
tum, quia Christus volebat multa dicere, sed  
discipuli non poterant ea portare. Id etiam an-  
xiè probat. Sed neq; hoc quisquam negat. Ac quod con-  
trouersum est, nempe papisticas Traditiones, siue con-  
suetudines Romanæ Synagogę esse ea, quę Christus di-  
cere volebat, & quę discipuli portare non poterant, in-  
genti silentio premitur. Deinde quod magis ridiculum  
est, disputat de principijs Christianę Religionis, ac licet  
palam fateatur non posse disputari, nisi prius  
in aliquo communi principio cum aduersariis  
conueniat; & res ipsa loquatur principia non debe-  
re vnius partis propria, sed vtriq; communia esse; neq;  
ignoret libros apocryphos, vulgatam versionem, Papę  
interpretationem, & consuetudines Rom. Synagogę à  
Protestantibus Ecclesijs multorum errorum accusari:  
tamen sui & Logicę oblitus hæc omnia pro principijs ob-  
trudere, eaq; in tanta doctrinæ luce tam leuibus & futi-  
libus coniecturis asserere non erubescit. Has ego impos-  
sturas

*sturas detegendas esse censui. Nam si quis contra Iu-  
 daeos disputaret, & eos Nouo Testamento vrgeret, in-  
 sanire iudicaretur. Item si quis Paganos Prophetica &  
 Apostolica auctoritate conuincere studeret, is Anticyram  
 ablegandus esset. Nemo igitur, qui memis compos est,  
 nos libris apocryphis; vulgata versione, Papæ interpre-  
 tatione, & Romana Synagoga consuetudinibus vrge-  
 bit. Ea enim omnia esse incerta, dubia, controuersa,  
 multis erroribus cōtaminata, & humana, non ignoramus.  
 At quæ talia sunt, illa utiq; non possunt istius Re-  
 ligionis, quæ certa, immutabiliter vera, & diuina est,  
 principia esse. Equidem si quis Papistam Geneuensis  
 Ecclesiæ consuetudinibus vrgeret, risum ei meritò mo-  
 ueret. Quid igitur de huiusmodi papisticis disputationi-  
 bus posteritas iudicaturā sit, ipsi viderint. Vt autem has  
 strophas commodè detegerem, statum controuersię an-  
 te omnia diligenter indagaui. Deinde Bellarmini ar-  
 gumenta omni sophistice nudata dialecticè proposui, &  
 refutaui. Refutationes sæpe ab alijs mutuatus sum, &  
 cum aliorū responsiones mihi minus plenæ viderentur,  
 excogitaui nouas. Post hæc Orthodoxæ Ecclesiæ senten-  
 tiā monstraui, & argumentis firmaui. Omnia hæc feci  
 stylo scholastico absq; acerbitate & cōtumelia. Et si mi-  
 hi imprudenti verbum vllum acerbū, vel quod aduer-  
 sarius in suam contumeliam interpretari potest, excidit,  
 id ipsum ego damno, priusquam in vllas hominum ma-  
 nus perueniat. Non n. conuitiari, sed ratiocinari; non  
 litigare, sed disputare volui. Imò odi omnem caninam*

facundiam, eamq; in nostris doctoribus defleo, in Papistis  
rideo. In illis defleo: sæpe n. lectorem, quem firmare de-  
bebant, per eam labefactāt. In his rideo: Nam cum pas-  
sim calumnias, conuitia & mendacia suis scriptis ad-  
spargunt, hoc efficiunt, vt lectores reliqua oīa ex eodem  
fonte profecta esse iudicēt, ex quo calumniæ, conuitia &  
mendacia manarunt. Quoniā verò non ita oculati su-  
mus in rebus nostris, vt esse debebamus; ideo hos libros  
iam confectos ad D. Philippū Marnixiū omnium nobi-  
lium doctis. mihi quidem Christiana amicitia iunctū,  
sed de facie ignotū misi, & ab eo petij, vt eos legere, ac  
cum Bellarmini libris conferre vellet, idq; ea conditione,  
vt, si me alicubi à scopo aberrare, vel Bellarm. argu-  
menta non candidè proponere, vel non rectè respondere,  
vel quicquā acerbius scribere animaduerteteret, hoc can-  
didè & liberè significaret. Atq; ille hæc omnia diligen-  
ter præstitit. Sæpe n. me reuocauit, aliquādo confirma-  
uit, interdū etiam viā monstrauit. Quod propterea à scri-  
bo, vt lector intelligat, nihil mihi fuisse propositū, quàm  
veritatē modestè & candidè patefacere, & vt D. Sanct.  
Aldegundio, magna ex parte acceptum ferat, si aliquid  
commodi ex his libris perceperit.

Cæterū aduersarij sibi & suis rebus malè consulūt.  
Dum n. hoc modo disputant, palam ostendunt se suam  
doctrinā legitimā disputatiōe defendere nō posse, ac circa  
controuersa principia languere, ne vnquā ad iustam dis-  
putationem adigi possint. Et quod turpius est, dum ita a-  
gunt, etiam omne iudicium sibi vendicāt, ac in propria  
causa Accusatores, Iudices, & Testes esse volunt. Hoc

autem



autem non tantum Theologis & Iurisconsultis displicet;  
sed etiam à Politicis ridetur. Rectè Iustus Lipsius in  
epistola ad Esychium. Idē quod mirere, in re sua  
Accusatores, Iudices, Testes. Sed ne sic quidem su-  
um regnum defendere possunt. Ideo in suos aduersarios  
instigant principes civiles, vt eos flammis & incendijs  
persequantur. Hinc illa calamitosa & funesta bella in  
Gallia & Belgica. Benè idē Lipsius Toti in eo sunt,  
vt litem ex lite serant, ne cocat vnquā, & con-  
spiret Christianū hoc corpus. Sed Deus suae Ec-  
clesiae misertus in Gallia excitauit Henricum quartū  
re & nomine Christianissimum. In Belgica Mauricium  
Principem Auricae, & Gulielmum Ludovicum Co-  
mitem Nassouiae, vt per illum Galliam, per hos Bel-  
gicam à tam crudeli persecutione liberaret. Rex Gal-  
liae Domini opus facit diligenter. Princeps Mauricius  
& Gulielmus Comes Nassouiae propter aetate hactē-  
nus ab hoste spreti, nuper, spatio duodecim dierum duas  
potentissimas vrbes Sutphaniam & Dauentriam, Deo  
duce & auspice, ex Papislica tyrannide in Christianam  
libertatē asseruerūt. Deinde exercitu in Frisiam Gro-  
ningensem traducto, multa maximi momenti propu-  
gnacula, eaq; munitissima, pari celeritate Frisco impe-  
rio adiecerunt. Deus armipotens qui solus regna trans-  
fert, & stabilis, protegat hos principes suo Spiritu, & opus  
suum per eos feliciter inchoatū ad optatum exitū perdu-  
cat. Sed iam ad ipsam disputationem de Principijs Chris-  
tianorum Dogmatum accedamus.

IN ἀκροβολισμὸν SIB. LVBBERTI  
Theol. Doctoris cum Papa Romano.

**O**ETHEVM perhibens, post plurima monstra subacta,  
Tandem Hydram aggressum Sangary ad latices.  
Nam quum pestiferum ructasset in aera virus,  
Perdidit hoc fruges, sustulit atq; homines.  
Ergo nodosa tam noxia sibila flantem,  
Hic claua, & ferro perdomuitq; face,  
Crescentem per damna liquet Quo munere diua  
Regina heroi munera magna dedit.  
Quin etiam aeterno st affectus honore, & eumq;  
In numero clarus ab Ioue numen habet.  
Quas igitur Sibrande tuis sudoribus auctas  
Laudes, atq; decus nominis esse putas?  
Qui monstrum horrendum, tricarenum, ad Tybridis undam.  
Quod multis seclis maxima damna dedit:  
Atq; animas orco mersat, & dira vomentem  
Excetram studio fascina contuderis?  
Qui toties victa de Colchide ritè triumphas  
Hesperia, excisa flamine & ore sacro?  
Te reges igitur decorent, tibi pramia summus,  
Convexa meritò donet ab arce Deus.

Ioannes Arcerius Th.  
Graecæ linguae professor.

Ad Sibrandum Lubbertum.

**H**OC fera cessabunt certamine BELLA peracto  
Viribus ingenij culte Sibrande tui.  
Nam sava ARMATA tuo, quæis sacrum est hostis adortus  
Ipse Dei verbum, robore fracta iacent.  
Nilq; nocere MINÆ poterunt tibi, strenuus ito,  
Quippe simul vinces BELLAQVE & ARMA, MINAS.  
Nam sine BELLO ARMISQVE MINAE savi hostis amaro  
Felle carent, ullum nec quoq; virus habent.  
Quare de tanto BELLO gratatur honore  
Christicolum ipsa cohors, parta trophæa tuo.  
ARMATA tibi ex alta figet testudine templi,  
Nec dabit hostis acres amplius ore MINAS.

Ioannes Arcerius, fil.



# SIBRANDI LVBBERTI

liber primus

De

*Principiis Christianorum dogmatum.*

C A P. I.

*Qualia principia esse debeant.*



OMNES artes, omnesq; disciplinæ & scientiæ habent quædam principia, ex quibus firmas rationes, & præceptiones deducunt. Geometria enim, Arithmetica, Physica, & reliquæ omnes artes ex certis quibusdam principiis totum opus suum exstruunt, & formant. Rectè igitur dixit Bellarminus & Theologiam habere sua principia, neq; posse in ea ullam disputationem de rebus controuersis rectè institui, nisi constet ex quibus principiis firma argumenta immotæq; rationes duci possint. *In præf. sine.* Hoc quoniam ab illo verè dictum est, ostendam qualia principia in Theologia requiramus. Debent autem esse vera, immediata, i. summè necessaria, priora, notiora, & causæ omnium dogmatum in christiana religione. Hæc etsi manifesta sunt, vno tamen

A atq;

atq; altero argumento à me probabuntur. Et ne de re ignota disceptem, ostendam priùs quid per Principia intelligam. Alijs igitur significationibus posthabitis principium nobis est illud, per quod primò rem cum mentis discursu intelligimus, & in quod omnis mētis discursus vltimò resoluitur. *Metaphys. lib. 5. cap. 1.* Philosophis dicitur principium Essendi & cognoscendi. Iauellus definit illud esse in ordine primum, ante quod nihil tale est, & ad quod omnia principiata sequuntur. *Epitom. in libr. 5. Metaphys. Tract. 1. cap. 1.* Hæc principia asserimus esse vera. Nam si non sunt vera, falsa esse necesse est, & proinde nil nisi falsum ex ijsdem efficietur. *Poster. Analyt. Lib. j. context. 10.* Nunquam enim ex falso verum, nisi per accidens colligi potest. *Prior. Analyt. lib. 2. cap. 2. de potest. 2.* Neq; hoc tantum, sed & immutabiliter vera esse debent. Per quod enim illa, quæ immutabiliter vera sunt, cognoscimus, illud ipsum immutabiliter verum esse necesse est. Principia enim, quia per se talia esse cognoscuntur, magis vera, aut saltem æquæ vera esse debent, atque illa, quæ per principia cognoscuntur. *Poster. Analyt. lib. j. cont. 17. & ibi Zabarella.* Sed christiana dogmata, quæ sunt immutabiliter vera, per principia Theologica cognoscuntur. Ergo ipsa principia debent immutabiliter vera esse. Deinde principia hæc asserimus esse immediata. Nam si meditum habent, erunt alia principia priora, & illa rursus si medium habent, erunt alia priora, idque in infinitum. Sed hoc est absurdum. *Poster. Analyt. lib. 1. Context. 10.* Ergo statuimus principia esse immediata & indemonstrabilia. Deinde si medium haberēt,

non

non essent in ordine prima, neque verum esset, nihil ante ea esse tale, neq; omnia principiata ad ea reducerentur. Sunt igitur immediata, id est, prima, & Indemonstrabilia, ac proinde necessaria. Nulla est enim propositio immediata, quæ non sit necessaria, ac per se, & cuius termini non necessariò cohæreant. *Poster. Analyt. lib. 1. Con. 9. & ibi Zabarella.* Deniq; omnia dogmata in Theologia sunt necessaria. Ergo & ipsa principia sunt necessaria. Fieri enim non potest, ut necessitas principiorum sit minor necessitate conclusionis. Illa enim semper vel maior est, vel æqualis. *Poster. Analyt. lib. 1. Cont. 48.* Postremò quod non est necessarium, illud quandoq; est, & non est, & potest non esse. Sed dogmata Christiana necessaria semper sunt, & non possunt non esse. Si igitur principia in Christiana religione essent non necessaria, tum illud quod non est, posset eius quod necessarium est, causa esse. Sed hoc est absurdum. *Poster. Analyt. lib. 1. Cont. 18.* Quod enim non existit, haud sanè potest alterius, quod existat, causa esse. Relinquitur igitur principia esse necessaria. Tertiò dicimus Principia Theologica esse omniũ dogmatũ causas. Nam propter principia dogmata sunt, & per Principia dogmata scimus. Nemo tamen hîc somniet causas Physicas, per quas accidens subiecto inhæret, illas relinquimus Philosophis, & loquimur de ijs causis, per quas Christiana dogmata tum in se vera sunt, tum etiam nostris mentibus ita obfignantur, ut certò sciamus ea vera esse, & aliter se habere non posse. Porro hæc Principia sunt causæ Essendi, & Cognoscendi, vel, ut apertius dicam, sunt causæ rei

& cognitionis. Rei, Nam propter hæc Principia, Christiana dogmata necessariò vera sunt. Cognitionis, Nam propter eadem Principia, scimus Christiana dogmata vera esse, & aliter se habere non posse. *Post. Analyt. lib. 1. Context. 11.* Quartò dicimus eadem Principia esse notiora, & priora. Priora, Sunt enim causæ & Rei. Notiora, Sunt enim causæ Cognitionis. Deinde dogmata sunt, & noscuntur propter principia. Ergo hæc magis & sunt, & noscuntur. *Post. Analyt. lib. 1. Cont. 18.* Neq; tantùm Principia antè cognosci debēt, quod sunt: sed quod vera sunt. Nam si principia incerta sunt, etiam dogmata incerta erūt. Non enim plus certitudinis habent, quàm à principijs acceperunt. *Post. Anal. lib. 1. Context. 11.* Vnde sequitur Principia debere esse certa, ante concessa, non ambigua, neque controuersa. Rectè Basil. in psalm. 115. *ἀνάγκη ἰστέως μαθήσεως ἀνέξτεσθαι εἶναι τὰς ἀρχάς.* Nam quod ante non concessum, & adhuc controuersum est, illud non est notius: Sed principium est notius. Deinde principium est certum, & necessariū: Sed ambiguum & controuersum neq; certum, neq; necessarium est. Denique principium est extra controuersiam positum: sed controuersum est illud, de quo contenditur. Postremò quod in controuersiam cadit, non potest eius, quod in controuersiam cadit, principium esse. Nihil n. est sui ipsius Principiū, neq; ambiguum per ambiguum demonstrari potest. Hoc docet Augustinus *lib. 3. cap. 14. contra Maximinum.* Excipit enim contra concilium Ariminense. Nam erat sibi controuersum. Et promittit se Maximinum concilio Niceno vrgere nolle. Nam hoc illi controuersum

uerfum erat. Has esse veras caussas manifestum est. Disertè enim dicit, se illud facere, ne quis præiudicio prematur, & addit se velle auctoritatibus scripturarum certare. Illas enim non esse vnus partis proprias, sed vtriq; communes. Vnde sequitur, illa, quæ non sunt vtrique parti cõmunia, sed alterius, siue vnus partis propria, principia esse non posse. Id Tertullianus, Arnobius, & Lactantius, cùm contra gentes disputant, suo exemplo probant. Tantùm enim argumenta ducunt ex ijs principijs, quæ non erant apud gentes controuersa. Quin ipse Paulus, cùm *in principio ad Rom.* contra gentes disputat, affert argumenta ex ijs principijs, quæ vtriq; parti erant cognita, & iam ante concessa, *ad Rom. cap. 1. vers. 20. et sequentibus.* Neq; est necesse, vt hoc multis argumentis probem. Nam ipsa ratio docet, eum ridiculũ esse, qui id, quod incertum est, conatur probare per id, quod æquè incertum est. Qui verò non vult cum aduersario in disputationem descendere, nisi eum prius ad Controuersa, & iniqua Principia adegerit, eum cum ratione insanire testatur omnes homines.

Adde ipsum Bellarminum fateri, *non posse quenq; cum aduersario disputare, nisi in aliquo cõmuni Principio cõueniant.* In Præfat. in fine. Sed quod cõtrouersum est, in eo nondum cõueniunt. Colligo igitur Principia debere esse certa, præcognita, vera, necessaria, antè concessa, & extra controuersiam posita. His addo Principia non debere *ἐς τὸ ἄλλο γίνεσθαι μεταβαίνειν*. Nam vt inquit philosophus, *ἐκ τῶ αὐτοῦ γίνεσθαι ἀνάγκη καὶ τὰ ἄλλα καὶ τὰ μὲν ἄναι.* *Poster. Analyt. lib. 1. cont. 59.* Nam si dogmata erunt necessaria, termini erunt cum medio per



se coniuncti, ac proinde eiusdem generis. Si verò media sumuntur ex alio genere, termini non per se, sed per accidens cohærebunt. Cùm igitur dogmata Theologiæ sint diuina, sequitur principia, ex quibus illa exstruuntur, tantùm diuina esse posse.

## CAPVT II.

*Quodnam sit secundum Bellarminum tale in Theologia principium?*

**S**Vperiore capite ostēdimus, qualia principia esse debeant; sequitur vt videamus quodnam secundum papistas in Theologiā sit tale; Bellarminus dicit libros Propheticos et Apostolicos secundum mentem Catholica Ecclesiæ, et in Concilio Carthag. tertio, Can. 47. et in Tridentina Sessione 4. explicatam, esse Verbum Dei, et certam ac stabilem regulam fidei, lib. 1. Cap. 1. de Verbo Dei. Catholicam Ecclesiā accipit pro Romana. Hæc sententia est ambigua, potest enim sic accipi, *Prophetici & Apostolici libri secundum mentem Romana Ecclesiæ explicati sunt verbum Dei et regula fidei.* Vel sic, *Illi libri, qui sunt in istis concilijs approbati, sunt verbum Dei et regula fidei.* Nos vtramq; sententiam repudiamus. Sed quoniam Bellarminus integrum librum conscripsit de vera mente Canoniarum scripturarū: Ideo priore sententia hîc prætermissa in secundam inquiremus. Bellarmini igitur sententia est, non tantùm eos libros Veteris Testamenti, qui reuera Canonici sunt, et omnes libros Noui Testamenti: sed præter eos etiam additiones Danielis et Esther, libros item Baruch, Iudith, Tobix, Sapientiæ, Ecclesiasticum, & Machabæicos duos esse principium Christianorū dogmatum, vel quod idem est, esse certam ac stabilem



CHRISTIAN. DOGMATVM. Cap. 3. 7  
lem Regulam fidei.

CAPVT III.

*Quodnam sit secundum Orthodoxos tale in  
Theologia principium.*

**O**Rthodoxi verò dicunt omnes & solos Propheticos & Apostolicos libros esse principium Christianorum dogmatum, vel esse certam & stabilem regulam fidei. Vult enim Paulus ad Ephes. cap. 2. vers. 20. *Concines sanctorum et Domesticos Dei adificatos esse super doctrinam Prophetarum et Apostolorum.* Prophetici illis sunt hi: 1, Genesis. 2, Exod. 3, Leviticus, 4, Numeri. 5, Deuteronomium. 6 Iosua. 7, Iudicum cum Ruth. 8, Samuelis duo. 9, Regum duo. 10, Esaias. 11, Ieremias cum lamentationibus. 12, Ezechiel. 13, Daniel. 14, Duodecim propheta minores uno libro comprehensi. Ozeas, Joel, Amos, Abdias, Ionas, Micheas, Nahum, Habacuc. Sophonias, Aggeus, Zacharias, Malachias. 15, Iob. 16, Psalterium. 17, Proverbia. 18, Cantica. 19, Ecclesiastes. 20, Paralipomenon duo. 21, Esdra duo. 22, Esther. Non plures, neq; pauciores. Apostolici verò sunt hi: *Euangelium Matthæi, Marci, Luca, Iohannis, Acta Apostolorum, Epistola Pauli ad Romanos una. Ad Corinthios due. Ad Galatas una. Ad Ephesios una. Ad Philippenses una. Ad Collossenses una. Ad Thessalonicenses due. Ad Timotheum due. Ad Titum, Ad Philemonem, singula. Deinde Epistola ad Hebræos. Epistola Iacobi. Petri due. Epistola Iudæ. Iohannis tres, eiusdem Apocalypsis.* Non plures, neq; pauciores. Lyra Præfat. ad Tobiam. *Libri Sacre Scriptura, qui Canonici nuncupantur, loquuntur de ijs omnibus & solis, quos suprâ posui, tante sunt auctoritatis, quod, quicquid ibi continetur, verum tenetur.*

netur firmiter et indiscusse, et per consequens illud, quod ex hoc concluditur manifeste. Nam sicut in Scripturis philosophicis veritas cognoscitur per reductionem ad prima principia per se nota: sic in scripturis à Catholicis Doctoribus traditis veritas cognoscitur, quantum ad ea, quæ sunt fide tenenda, per reductionem ad Scripturas sacras Canonicas: quæ sunt habita reuelatione diuina: cui nullo modo falsum potest subesse.

## CAPVT IIII.

*Status Controuersia proponitur, & argumenta, quibus Bellarminus probare conatus est, Additiones Danielis, et Esther, libros item Baruch, Iudith, Tobia, Sapientie, Ecclesiasticum & Macchabæicos esse principium Christianorum dogmatum, siue regulam fidei, refutantur.*

**Q**Uæstio igitur est, an hi sex libri (Machabæicos accipio pro vno) cum tribus istis additionibus sint principium Christianorum dogmatum, vel an sint regula fidei? Bellarminus ait, nos negamus. Hæ duæ sententiæ ex diametro pugnant. Ergo simul veræ esse non possunt. Ille probat suam sententiam septem argumentis, quæ ordine expēdemus. Primum, Quia ita statutum est in concilio Carthaginēsi tertio *Can. 47.* Priusquam ipsas rationes attingo, concedo quosdam ex his libris à Carthaginēsi lib. admissos esse. Sed nego eos propterea esse Verbum Dei, & regulam fidei. Nulla n. Cōcilia habent istam auctoritatem, vt ex libro non Canonico possint facere Canonicum. Nam si oīa concilia, quæ à tempore Aaron, vsq; ad ætatem Papæ Sixti, in Ecclesia Christiana, & Iudaica habita sunt

sunt, statuisſent fabulas *Æſopi* eſſe Verbum Dei non tamen propterea eſſent Verbum Dei. Neq; igitur hi libri propterea ſunt Verbum Dei, quòd in eo Concilio ita ſtatutum eſt: ac proinde incertum probatur per incertum. Sed iam ipſas rationes analytice excutiemus. Hi libri (inquit) ſunt Canònici. Quia ita conſtitutum eſt in Concilio Carthaginienſi tertio. Argumentum tale eſt.

Quicquid eſt decretum in Concilio Carthaginienſi tertio, hoc eſt verum. Sed in illo Concilio decretum eſt, hos ſex libros eſſe Regulam fidei. Ergo hi ſex libri ſunt Regula fidei.

Bellarminus in hoc, & in ſequentibus omnibus argumentis eas præmiſſas, quæ non ſunt controverſæ, immodicis allegationibus probat; & illas, in quibus *αἰτιολογία* eſt, præterit. Sed nos, Bellarmine, negamus Maiorem, neq; ipſe eam concedere audes. In eodem enim concilio Can. 26. decretum eſt, *Nu-  
llum Episcopum vocandum eſſe principem ſacerdotum, aut  
ſummum ſacerdotem.* Si reſpondes in hoc Canone non valere concilij auctoritatem, colligis ex puris particularibus. Colligendum enimerat. Aliquod in eo Concilio decretum, eſt verum. Hoc autem in eo decretum eſt. Ergo verum. Quod vt eſt ineptum; ita ridiculum eſt, nos à vobis huius Concilij auctoritate vrgeri, qua ipſi teneri non vultis. Sed ad rem. Cōcilium Carthaginienſe tantum eſt prouinciale. Ergo non poteſt totum mundum obligare. Aut ſi poteſt, ſic argumentor. Quicquid in prouinciali Synodo conſtitutum eſt, hoc eſt per totum mundum obſeruandum. Sed in Concilio Laodicensi Can. 59. ſta-

tutum est, nullum ex ijs sex esse Canonicum. Ergo per vniuersum mundum credendum est, eos non esse Canonicos. Præterea Laodicenum est approbatum à sexto Oecumenico Constantinopolitano, *Distinct. 16. cap. Quoniam.* Et hoc approbatum est à Papa Adriano. *C. Sextam. Distinct. eadem.* Ergo Laodicenum est eiusdem auctoritatis cum sexto Oecumenico. Quod enim in prouinciali Synodo statutum, & ab Oecumenico Concilio atque à Papa approbatum est, hoc habet eandem vim, quam illud, quod ab Oecumenico Concilio à Papa approbato decretum est. Vnde sic argumentor: Quicquid in Oecumenico Concilio à Papa approbato constitutum est (disputo ex hypothesi) hoc est immutabiliter verum. Sed Laodicensis Synodus, in qua statutum est, hos libros non esse Canonicos, est ab Oecumenico sexto, & à Papa approbata. Ergo hos libros non esse Canonicos immutabiliter verum est. Ratio est manifesta. Conciliū n. vniuersale à Papa approbatum, iuxta vestram Theologiam, errare non potest. Et ut paulò propius accedam, sic disputo. Quicquid in Oecumenico Concilio à Papa approbato determinatum est, hoc secundum eandem hypothesein est immutabiliter verum. Sed Laodicensis Synodus, in qua hi libri extra Canonem relictī sunt, est à tali Concilio approbata, patet ex prioribus. Et Carthaginensis Synodus, quæ hos libros in Canone ponit, ab eodem Concilio approbata est. *C. Quoniam. Distinct. 16.* Ergo si Oecumenicum Concilium à Papa approbatum errare non potest, sequitur eosdem libros esse Canonicos, & non esse Canonicos, hoc est, duo contradictoria esse simul

mul vera. Præterea quicquid in Concilio Carthaginenſi ſtatutum eſt, hoc eſt verũ. Sed in Cõcilio Carthaginẽſi ſtatutũ eſt, eſſe libros Salomonis Canonicos. Errat igit̃ vniuerſa Eccleſia. Nam illa tantũ tres Salomonis libros agnoſcit. Deniq; in Concilio Carthaginẽſi Baruch & Machabęici extra Canonẽ relictĩ ſunt. Iidẽ à Tridẽtinis in Canone poſiti ſunt. Si igit̃ verũ eſt, quod in vtroq; concilio decretũ eſt, ſequit̃ rursus, eundẽ librũ eſſe Canonicũ, & nõ eſſe Canonicũ, hoc eſt, duo contradictoria eſſe ſimul vera. Poſtremò & minor nõ eſt ſimpliciter vera. Baruch n. & Machabęici in iſto Canone p̃termiſſi ſunt. Hinc apparet auctoritatẽ Concilij Carthaginenſis non aptẽ cõtra nos allegari, neq; propter illius auctoritatẽ librum non Canonicum fieri Canonicũ. Altera ratio eſt auctoritas Concilij Tridentini. Argumentũ tale.

Quicquid decretum eſt in Concilio Tridentino, hoc eſt verum. Sed in eo Concilio decretũ eſt, hos 6. libros cum tribus iſtis additionibus eſſe Regulam fidei. Ergo hi ſex libri cum tribus iſtis additionibus ſunt Regula fidei.

Nos conſeſſa Minore negamus Maiorem. Tridẽtinum enim Concilium contra omne ciuile & eccleſiaſticum ius celebratum eſt. Neque vlla iuſtitie formula in eo obſeruata eſt. Ac primũ non eſt legitimo loco celebratum. Eſt enim contra proteſtantes inſtitutum. Cũ igitur Germani eſſent Rei, debuit in Germania celebrari. Reus enim extra prouinciam producendus non eſt. 3. Q. 5. C. ibi. Diſertẽ enim Fabianus dicit, *Ibi eſſe cauſam agendam, vbi crimen admiſſum eſt.* Crimen verò, quod proteſtantibus

tibus objiciebatur, in Germania admissum erat. Deinde, idem Fabianus statuit, *ut ultra provinciam accusandi licentia non progrediatur: sed omnis accusatio intra provinciam audiatur, & a comprouincialibus terminetur.* C. *ultra.* C. *Peregrina.* C. *Leges.* C. *vbi crimen.* C. *qui crimen.* Eadem. 3. Q. 9. C. *Nec extra.* Et 3. Q. 6. C. *Neminem*, disertè dicitur, *Actorem debere rei forum sequi.* Cùm igitur reus extra provinciam trahendus non sit, & ibi debeat causa agi, vbi crimen admissum est, & Actor debeat Rei forum sequi: Illa verò omnia in hac Synodo neglecta sint, manifestum est, eam legitimo loco celebratam non esse. Deinde in eo concilio sententia lata est aduersario non audito, vel non præsente. Protestantes enim ad audientiam admissi non sunt, neque poterunt impetrare, ut suam sententiam in Concilio proponerent, multo minus ut eam legitima disputatione assererent. *Sleidanus lib. 23.* Et tamè condemnati sunt. Sed hoc diuino & humano iuri aduersatur. Vtroque enim iure veratur *quenquam damnari, quin prius sui legitimam defendendi potestatem habuerit.* Damasus enim disertè iubet, *ut accusatores, et accusati equa audiantur ratione.* 4. Q. 4. C. *Nullus.* Eleutherius etiam iubet, *ut absente aduersario sententia non feratur,* 3. Q. 9. C. *Caueat.* Thelephorus, & Calixtus decernunt, *ut reo absente accusator non audiatur.* C. *Accusatorij,* & C. *absente,* eadem. Et si quid in absentem gestum est, hoc Cornelius euacuandum censet C. *omnia.* Eadem. Quin & Marcellus & Damasus decernunt, *neminem damnandum vel iudicandum esse, antequam accusatores canonicè accusatos præsentes habeant, locumq; defendendi*

*sendendi accipiant, C. non oportet, &, C. non habetur. Eadem. Denique in eo Concilio vnus & idem accusator & Iudex fuit. Papa enim protestantes hæreseos accusabat, idem Papa hoc concilium conuocauit, Idem in eo per legatos suos præfuit, vel præfedit. Atq; ita simul accusator, Iudex, & Testis fuit. Cùm tamen Fabianus disertè dicat, neminem simul accusatorem, Iudicem vel testem esse posse, 4. Q. 4. C. Nul-  
lus. In omni enim iudicio quatuor distincta personæ esse debent, Iudex, Accusator, Testis, Reus. Si quis obijciat Pontificem non immediatè per se, sed per legatos concilio præfuisse. Respondeo hoc idem esse. Perinde enim est, siue per te, siue per alium agas. Deinde Vicarius in Episcopi causâ iudex esse non potest. Episcopus enim, cuius vices gerit, potest ei imperare. De Appellat. C. Postremo. Præterea, si contra venerandas leges est, de Iudicis domo testem, vel accusatorem producere. 4. Q. 4. C. Contra. Certè multo magis est contra venerandas leges, ex accusatoris & capitalis hostis domo testem, & iudicem producere. Huc accedit, Iudicem in hoc concilio fuisse Rei capitalis hostem. Iam sæpè enim illum condemnauerat, proscripterat, eius libros exusserat, eumque bello persequutus fuerat. Et hæc omnia indicta causâ. At canonica patrum decreta iuberit, vt accusatio vel testimonium eorum, qui vel inimici, vel suspecti sunt, nullo modo recipiantur, 3. Q. 5. C. omnes. Quin etiam disertè docent, Inimicos et suspectos Iudices esse non posse, 3. Q. 5. C. Quod suspecti. Deinde qui Consultor, vel patronus alterius partis fuit, ille neque deliberatoriũ, neque consultorium suffragium ea in causâ, cuius con-*



consultor, vel patronus fuit, ferre potest. At omnes legati, Marias, Marcellus, & Polus alteram partē suis scriptis oppugnaverunt, alteram verò ijsdem defenderunt, ob eamque causam ab ea summa beneficia expectabant. Duo etiam ex ijs pontificiam sedem, pro qua certabant, obtinuerunt. Theologi verò & Episcopi maxima ex parte Itali, & Hispani fuerunt, ijque omnes sua beneficia precariè obtinebant à Papa, cui & per iuramentum obstricti erant. Cùm tamen *Iudex è domo sua neque testem, neque accusatorem e-mittere debeat*, 4. Q. 4 C. Contra. Imò ferè nulla patrum congregatio fuit, in qua dicti Theologi, & Episcopi non acerbis, & virulentis concionibus protestantes perstrinxerint, vt palàm ostenderent, se nō vtriusque partis iudices: sed vnius patronos, alterius hostes esse. Postremò oīa concilia debent esse libera. In hoc verò non licuit protestantib. causam suā proponere, neq; licuit causam defendere, *Sleid. l. 23*. Deinde non licuit quicquam proponere, nisi ex legatorum voluntate, neq; licuit aliter proponere, quàm legati iussissent. Neq; quicquam in eo determinatū est, nisi quod prius Romæ à Papa in collegio Cardinalium cūsum, & Roma Tridentum missum erat, adeò vt in prouerbiū abierit, *Spiritus Sanctum Roma per bullam mitti Tridentum*. Deinde non licuit aliud suffragium ferre, quàm ad ista decreta, quæ Romæ à Papa cūsa erant, & per bullam Tridentum mittebantur, dicere *PLACET*. Imò ne libera quidem vox in isto concilio ferri potuit. Iacobus enim Nachiantes Clodiæ fossæ Episcopus, cū diceret se non probare decretum, quo statuebatur *Traditiones*  
*esse*



*esse cum verbo scripto eiusdem auctoritatis*, per Marcel-  
lum ex concilio pulsus est. *Balaus fol. 422.* Domi-  
nicus item Wilhelmus Venetus cum diceret in con-  
cilio Basiliensi decretum esse, *Concilium esse supra Pa-  
pam*, ex concilio pulsus est. *Balaus fol. 423.* Imò cum  
quidam Episcopus diceret sibi absurdum videri, *Deū  
vocari Sanctum, Papā verò vocari Sanctissimum*, vocatus  
est à Papa Romam, & Episcopatu priuatus est, idèd  
quodd sanctissimæ illius beatitudini conuiciatus fue-  
rat. *Balaus fol. 423.* Quin & Paulus Vergerius ex eo  
concilio pulsus est, nullam aliam ob causam, quàm  
quodd quidam suspicabantur, cum non satis acrem  
fore in Lutheranos. Et quod omnium iniquissimū  
est, ferrinon potuit, vt Vida Cremonensis Episco-  
pus pro eo apud Papam intercederet. *Balaus ibidem.*  
Cum igitur hoc concilium non sit habitum idoneo  
loco, & vnus atque idem in eo fuerit accusator, testis  
& Iudex, & reus non auditus condemnatus sit, Iu-  
dex etiam fuerit Rei capitalis hostis, omnes denique  
interlocutores & deliberatores fuerint vnus partis  
patroni, alterius hostes, neque vlla libera vox in eo  
audiri, vel tolerari potuerit: manifestum est, ne iu-  
stitiæ quidem vmbram in eo obseruatam fuisse; ac  
proinde eius auctoritate neminem yrgeri debere.  
Tertium argumentum. Quia Innocentius Papa eos  
*epist. ad Exuperium* approbat.

Quicquid statuit Innocentius Papa, hoc est verū.

Sed Innocentius Papa dicit hos 6. libros esse  
Canonicos, Ergo hi 6. libri sunt Canonici.

Respondeo Maiorem esse falsam. Idem enim In-  
nocentius in eodem Canone numerat. 4. *epistolas  
Iohannis:*

*Iohannis*: Sed in Canone tantum sunt tres epistolæ Iohannis. Idem Innocentius numerat *quinque libros Salomonis*: Sed in Canone tantum sunt tres Salomonis. Verba Innocentij sunt hæc, in primo Tomo Conciliorum, Anno 30. Coloniae per Quentel. edito, fol. 173. in epistola ad Exuperium, cap. 7. *Qui verò libri recipiantur in Canone sanctarum Scripturarum, brevis annexus ostendit. Hac sunt ergò, quæ desiderata moneri voce voluisti, Mosi libri quinque, id est Genesis, Exodus. Leviticus, Numeri et Deuteronomium, nec non et Iesu Naue, et Iudicum, et Regnorum libri quatuor, simul & Ruth, Prophetarum libri sedecim, Salomonis libri quinq; Psalterium, item historiarum Iob liber unus, Hesther liber unus, Iudith unus, Machabaorum duo, Esdra duo, Paralipomenon duo. Item Noui Testamenti Euangeliorum libri quatuor. Pauli Apostoli Epistolæ quatuordecim. Epistola Iohannis quatuor. Epistola Petri duæ, Epistola Iudæ, Epistola Iacobi, Actus Apostolorum, Apocalypsis Iohannis. Cetera non solum adspicienda, sed etiam damnanda sunt. Deinde & Minor non est simpliciter vera. Innocentius enim Baruch prætermittit, ut et Tobiam. Si igitur quæcunque Innocentius reiicit, abijcienda & damnanda sunt, tum & hi duo abijcendi sunt, & dampnandi. Quartum Argumentum, quia Gelasius Papa ita statuit.*

*Quicquid statuit Gelasius Papa, hoc est verum. Sed Gelasius Papa, dicit hos sex libros esse canonicos. ergo hi 6. libri sunt canonici.*

*Respondeo. Maiorem esse falsam. Idem n. Gelasius numerat tantum unum librum regnorum, & Samuelé præterit. At vniuersa Ecclesia, Samuelis libros inter Canonicos*

canonicos numerat, Deinde & Minor non est simpliciter vera. Gelasius n. vnum *Machabæorum*, et *Baruch* extra Canonem relinquit. Deniq; omnia hæc argumenta sunt ridicula. Nulli enim libri propter Papæ auctoritatem sunt Canonici. postremò hi duo Papæ ex diametro inter se pugnant. Innocentius enim numerat *Quinque libros Salomonis*: Gelasius tantum *tres*. Innocentius numerat *duos libros Machabæorum*, Gelasius non nisi *unum*. Innocentius numerat *quatuor libros Regnorum*, Gelasius non nisi *unum*. Innocentius numerat *duos Esdra*, Gelasius non nisi *unum*. Innocentius *Tobiam* reprobat, Gelasius eum approbat. Innocentius numerat *quatuor Epistolas Iohannis*, Gelasius non nisi *tres*. Quæ omnia si simul vera esse possunt, tum Papa efficere potest, vt duo contradictoria sint simul vera. Deinde si hæc omnia vera sunt, tum Papa potest librum non Canonicum Canonizare, & Canonicum ex Canone expungere. Et quod hætenus simpliciter impossibile iudicatum fuit, potest facere, vt idem liber sit Canonicus & non Canonicus, idq; eodem tempore. Quintum Argumentum. quia Augustinus ita docuit.

Quicquid dicit Augustinus, hoc est verum. Sed Augustinus dicit hos sex libros esse Canonicos.

Ergo hi sex libri sunt Canonici.

Quia magna est Augustini in Ecclesia auctoritas, ideo hoc Argumentum paulò diligentius expendendum est. Augustini verba sunt hæc: *Totus Canon scripturarum his libris continetur, Quinq; Moseos, id est, Genesi, Exodo, Levitico, Numeris, Deuteronomio, et vno libro Iesu Nave, vno Iudicum, vno libello, qui appellatur*

*Ruth, deinde quatuor regnorum, et duobus Paralipomenō. Deinde iuxta & alij, ut Iob, & Tobias, et Hesther, et Iudith, et Machabæorum libri duo, et Esdra duo. Deinde Prophetæ, in quibus David, unus liber Psalmodum: et Salomonis tres, Proverbiorum, Cantica Canticorum, Ecclesiastes. Unus qui Sapientia, & alius, qui Ecclesiasticus inscribitur. Duodecim Prophetarum libri singuli, Hosee, Ioël, Amos, Abdias, Ionas, Micheas, Nahum, Abakuc, Sophonias, Haggæus, Zacharias. Malachias. Deinde Esaias, Ieremias, Ezechiel, Daniel. His quadraginta quatuor libris Veteris Testamenti terminatur auctoritas. De Doctr. Christ. lib. 2. Cap. 8. Nos dissimulata Maiore, respondemus ad Minorem, duas tantum esse vias cognoscendi librum Canonicum: Vnam per testimonia Prophetæ. Qui enim prophetico spiritu præditus est, ille potest librum propheticum à non prophetico distinguere. Alteram per testimonium eorum, qui vixerunt, cum liber ederetur, vel (quod idem est) à testimonijs eorum, qui illud à prioribus testibus acceperunt. Augustinus contra Faustum lib. 3. cap. 6. Unde constat, quid cuius sit, nisi quia his temporibus quibus ea quisque scripsit, quibus potuit, insinuavit, atque edidit, & inde in alios atque alios continuata notitia, latiusque firmata ad posteros, etiam usque ad nostra tempora pervenerunt, ita ut interrogati cuius quisque liber sit, non hæsitamus, quid respondere debeamus. Priori viâ hoc Augustinus cognoscere non potuit. Ipse enim non fuit prophetâ, nec eo tempore prophetâ fuit, à quo hoc discere potuerit. Debit igitur hoc cognoscere ex testimonio eorum, qui vixerunt, cum hi libri ederentur: vel ex testimonio eorum, qui hoc à prioribus*

bus testibus acceperunt. Sed non didicit ab ijs testibus, qui vixerunt cū hi libri ederentur. Ex ijs enim omnibus nemo Augustini ætatem attigit. Relinquitur igitur testimonium eorum testium, qui hoc à prioribus testibus acceperunt. Illi verò sunt vel Christiani, vel Iudæi. A Iudæis non didicit. Iosephus enim lib. 1. contra Appion. contrarium testatur, disertè enim dicit tantum 22. libros *Veteris Testamenti* esse *Canonicos*, eosq; omnes scriptos esse ante *Artaxerxis* ætatem. Et ut nulla dubitandi materia esset, diuidit eos in quinque libros *Mosis*, & in *tredecim prophetarum*, & in alios quatuor, qui continent hymnos erga Deum, & precepta morū. Dicit præterea ex ijs que post *Artaxerxen* scripta sunt, nihil habere *Canonicam auctoritatem*, idq; ob eam causam, quod ab eo tempore non fuerit certa prophetarum successio. Hæc est cōmunis omnium Iudæorum sententia, neque quisquam est ex ijs omnibus, qui contrarium sentiat. Non potuit igitur Augustinus à Iudæis, neque ab ijs qui tempore prophetarum vixerunt, neq; à subsequentibus discere, hos libros esse canonicos. Didicit igitur à Christianis. Christiani duplices sunt. Alij sunt prophetæ, alij non sunt prophetæ. Prophetæ, vt Apostoli. Hi absque errore potuerunt iudicare, quinam libri sint canonici. Non prophetæ, vt reliqui Christiani. Hi potuerunt de hoc Apostolorum iudicio testari. Si igitur Augustinus hoc à Christianis didicit, tum didicit hoc vel ab ipsis apostolis, vel ab ijs, qui Apostolos sequuti sunt. Si ab Apostolis: tum vel ipse hoc immediatè ab ijs audiuit, vel in eorum scriptis legit. At non audiuit ab Apostolis. Apostoli enim omnes longè ante

Augustini ætatem mortui sunt. Neque in illorum scriptis legit. In ijs enim nihil tale extat. Ergo ab Apostolis non accepit. Proinde si à christianis accepit, accepit ab ijs, qui Apostolos sequuti sunt. Sed neque ab ijs accepit. Ex omnibus enim patribus (supposititios Clementis Canones excipio) qui inter Apostolorum, & Augustini ætatem vixerunt, nemo est, qui se hoc ab Apostolis audiuisse testatur. Eusebius enim *lib. 3. Eccles. Histor. cap. 8.* Testimonium Iosephi supra laudatum, ijsdem verbis quibus Iosephus illud descripsit, approbat. Quod utique non fecisset in communi Ecclesiæ historia, si contrarium ab apostolis traditum fuisset. Inde enim apparet Iudæos & Christianos eo tempore de libris Canonici idem sensisse. Et ut res plenè intelligatur, ostendam quid singulis seculis Ecclesiæ doctores ab apostolis vsque ad Augustinum de hac re iudicauerint. Et sequar istum ordinem, quem Canisius in sua Chronologia annotauit. Ille in prima ætate, qua & apostoli vixerunt, inter scriptores Ecclesiasticos (loquor de ijs, qui Canonis scripturarum meminerunt) ponit Iosephum. Sed ab illo Augustinus hoc discere non potuit. Iosephus enim non quadraginta quatuor, Sed tantum viginti duos libros canonicos esse asserit, ut ostendimus. In secunda ætate ponit Melitonem. Sed nec ab eo Augustinus hoc discere potuit. Melito enim apud Euseb. *lib. 4. Eccles. Hist. cap. 26.* Scias ergo, inquit, perrexisse me vsque ad orientis locum, ubi predicationis nostra cepit exordium, & ubi gesta sunt illa omnia, qua leguntur scripta, ibiq; diligenter de omnibus explorasse, quæ essent Veteris Testamenti volumina.

*Ibi igitur quæ cum omni inuestigatione comperi, hæc sunt: Moysi libri quinque: Genesis, Exodus, Leuiticus, Numeri & Deuteronomium. Tum deinde Iesu Naue, Iudicum, Ruth, Regnorum libri quatuor, Paralipomenon libri duo, Psalmi David, Salomonis Proverbia, quæ & Sapientia. Nota meum codicem inter Prouerbia Salomonis, & Sapientiam non distinguere: sed numerare pro vno & eodẽ libro, Ecclesiastes, Cantica Canticorũ, Iob. Propheta autem Ezaias, Ieremias, Ezechiel, Daniel. Prophetarũ duodecim liber vnus, Esdras. Vbi præter cætera notandũ est, Cũ Melito tam diligẽter ab orientalibus didicerat, quĩnam libri sint Canonici, et tamẽ non alios quàm hos numeraret: nõ esse verisimile, vt Apostoli iudicãrĩnt hos libros esse Canonicos. Ea enim res in Libya, vbi Melito erat, & in Oriente, vbi Apostoli docuerant, simul incognita esse non potuit. Tertia ætate ponit Origenem. Sed nec ab illo Augustinus hoc discere potuit, Origines n. apud Euseb. Eccl. Hist. lib. 6. cap. 25. tantũ numerat viginti duos libros canonicos in veteri testamento. Non ignorandũ, inquit, Viginti duos esse libros in Canone Veteris Testamenti, sicut Hebræi tradunt, secundũ numerum elemẽtorum, quæ apud ipsos habentur. Et paulò post addit: Hi sunt aut viginti & duo libri: Genesis, Exodus, Leuiticus, Numeri, Deuteronomium, Iesu Naue, Iudicũ, Regnorum primus et secundus, vnus liber est apud illos, quẽ nominat Samuel, item tertius & quartus vnus est apud ipsos, quem appellant Regnũ David: et Paralipomẽnon primus et secundus in vno habentur. Esdras primus et secundus in vno est. Item liber Psalmorũ, Salomonis Proverbia, et alius Ecclesiastes, et tertius eiusdem Cantica Canticorũ. Sed & duodecim Prophetarum liber v-*



nus est. Ezaias Propheta, Ieremias una cum Threnis &  
 epistola in uno est, Ezechiel, Daniel, Iob, Esther. In his  
 cōcludunt Canonem diuinorum librorum. Machabeorum  
 verò libros extrinsecus habent. Eadem ætate ponit Cy-  
 prianum. Sed nec ab eo hoc discere potuit. Cypri-  
 anus enim in symbolo, *Et ideo, inquit, quæ sunt Noui,*  
*ac Veteris Testamenti volumina, quæ secundum Maiorum*  
*traditionem per ipsum Spiritum Sanct. inspirata creduntur,*  
*& Ecclesijs Christi tradita, competens videtur in hoc loco,*  
*evidenti numero, sicut ex patrum monumentis accepimus,*  
*designare.* Itaq; Veteris Instrumenti primo omnium quin-  
 que Moysis libri sunt traditi, Genesis, Exodus, Leuiticus,  
 Numeri, Deuteronomium: post hoc Iesu Naue, Iudicum  
 simul cum Ruth, quatuor posthac Regum libri, Paralipo-  
 menon & Esdre libri duo, qui apud illos singuli compu-  
 tantur, & Hesther: Prophetarum verò Ezaias, Ieremias,  
 Ezechiel, Daniel: præterea duodecim Prophetarum liber u-  
 nus: Iob quoque, & Psalmi David libri singuli: Salomo-  
 nis verò tres Ecclesijs traditi, Prouerbia, Ecclesiastes, Can-  
 tica Canticorum. In his concluderunt numerum librorum  
 Veteris Testamenti. Et paulò post. Sciendum tamen est,  
 quod & alij libri sunt, qui non Canonici, sed Ecclesiastici à  
 maioribus appellati sunt. Vt Sapientia, Ecclesiasticus, Iu-  
 dith, Tobias, & Machabeorum libri. Quarta ætate po-  
 nit Eusebium. Sed nec ab eo hoc Augustinus discere  
 potuit. Eusebius enim per Iosephum, Melitonem &  
 Origenem contrarium testatus est, vt ex locis suprà  
 citatis manifestum est. Eadem ætate ponit Athana-  
 sium. Sed nec ab eo Augustinus hoc discere potuit.  
 Athanasius enim in Synopsi, *Omnis, inquit, nostra, qui*  
*Christiani sumus, scriptura diuinitus inspirata est. Libros*  
*habes*



habet non infinitos, sed finitos, ac certo Canone comprehensos. Et Veteris quidem Instrumenti sunt isti, Genesis, Exodus, Leviticus, Numeri, Deuteronomium. Iesus Naue, Iudices, Ruth, primus & secundus Regum in unum computantur volumen, Tertius & quartus Regum pro uno computantur volumine. Esdras prior & posterior in uno comprehenduntur volumine. Psalterium, Parabola Salomonis, Ecclesiastes, Canticum Canticorum, Duodecim propheta uno volumine comprehensi, Ezaias, Ieremias, Ezechiel, Daniel. Præter istos autem sunt adhuc alij Veteris Testamenti libri non canonici, qui Catechumenis tantum leguntur, Sapientia, Ecclesiasticus, Additiones Estheræ, Iudith, Tobias. In eadem ætate ponit Hilarius. Sed nec ab eo Augustinus hoc discere potuit. Hilarius n. Præfat. in Psalm. in viginti duos, inquit, libros lex Veteris Testamenti deputatur, ut cum literarum numero convenirent, Qui ita secundum traditiones Veterum deputantur, ut Moysi sint libri quinque, Iesus Naue sextus, Iudicum & Ruth septimus. Primus et secundus regnorum in octavum. Tertius & quartus in nonum. Paralipomenon duo in decimum. Esdra in undecimum. Liber Psalmorum in duodecimum. Salomonis Proverbia, Ecclesiastes, Canticum Canticorum in 13. 14. & 15. Duodecim propheta in decimum sextum. Ezaias deinde, Ieremias cum Lamentationibus & epistola, sed & Ezechiel & Daniel, & Iob & Esther viginti et duorum librorum numerum consumment. Quibusdam autem visum est additis, Tobia & Iudith viginti quatuor libros secundum numerum 24. literarum Græcarum connumerare. In quinta ætate ponit Nazianzenus. Sed nec ab eo Augustinus hoc discere potuit. Nazianzenus enim in carmine de S. Scripturæ libris, inquit,

primus Genesis, deinde Exodus, Leuiticumque, deinde Numeri, deinde secūda lex, deinde Iesus, & Iudices, Ruth octauus, at nonus decimusq; liber Gesta regum, & praetermissa, vltimum Esdras habes. At carminei quinque, quorum primus quidem Iob, deinde David, deinde tres Salomonis, Ecclesiastes, Cantus & Prouerbia. Et quinque similiter spiritus prophetici, vnā quidem sunt in scripturam duodecim, Osee, Amos, & Micheas tertius, deinde Ioël, deinde Ionas, Abdias Naumq; Habakucq; & Sophonias, Aggeus, deinde Zacharias, Malachias, vnus quidem hi, secundus autem Esaias, deinde vocatus Ieremias ab infanti, deinde Ezechiel, & Danielis gratia, Antiquos quidem posui duos & viginti libros hebraeorum scriptis oppositos. In eadem ætate ponit Hieronymum. Sed nec ab eo hoc Augustinus discere potuit. Hieronymus enim in Prologo Galeato: *Quomodo igitur, inquit, Viginti duo Elementa sunt, per quæ scribimus hebraicè omne quod loquimur, & eorum initijs vox humana comprehenditur. Ita Viginti duo Volumina supputantur, quibus quasi literis, & Exordijs in DEI doctrina tenera adhuc & lactens viri insti eruditur infantia. Primus est Genesis. 2, Exodus. 3, Leuiticus. 4, Numeri. 5, Deuteronomium. 6, Iosue. 7, Iudices cum Ruth. 8, Samuel. 9, Regum. 10, Ezaias. 11, Ieremias. 12, Ezechiel. 13, Duodecī Propheta minores. 14, Iob. 15, David. 16, Prouerbia. 17, Ecclesiastes. 18, Canticum. 19, Daniel. 20, Paralipomena, 2. 21, Esdras. 22, Esther. Et paulò post. Quicquid, inquit, extra hoc est, inter apocrypha ponendum est. Igitur Sapietia, Syrach, Tobias, Iudith non sunt in Canone. Quod idem de Machabeorum libris affirmat. In eadem ætate ponit Concilium Laodiceum. Sed neq; ab eo hoc Augustinus discere potuit.*

Laodi-

Laodicenum enim Conciliū canone 59. *Quæ*, inquit, in auctoritatem recipi debent, sunt hæc, *Genesis, Exodus, Leviticus, Numeri, Deuteronomion, Iosue, Iudicū, Ruth, Regnorū libri quatuor, Paralipomenon libri duo, Esdra primus & secundus, Psalmorū liber, Proverbia, Ecclesiastes, Canticum, Iob, Hesther, Duodecim propheta minores, Ezaias, Ieremias, Ezechiel, Daniel.* In eadem ætate ponit Epiphaniū. Sed nec ab eo Augustinus hoc discere potuit. Epiphanius enim Hæresi. 8. habebant Iudæi, inquit, usque ad reditum à captiuitate Babylonis libros, & Prophetas hos: 1, *Genesin.* 2, *Exodum.* 3, *Leuiticum.* 4, *Numeros.* 5, *Deuteronomium.* 6, *Librum Iesu Naue.* 7, *Iudicum.* 8, *Ruth.* 9, *Iob.* 10, *Psalterium.* 11, *Proverbia Salomonis.* 12, *Ecclesiasten.* 13, *Canticū Canticorū.* 14, *primū librū Regnorū.* 15, *secundū Regnorum.* 16, *tertiū Regnorum.* 17, *quartum Regnorum.* 18, *primum Paralipomenon.* 19, *secundū Paralipomenon.* 20, *Duodecim Prophetas.* 21, *Ezaiam.* 22, *Ieremiam cum Lamentationibus,* & *Epistolis ipsius ac Baruch.* Nota in Baruch errare Epiphaniū, hunc enim Iudæi nunquam habuerunt pro Canonico. 23, *Ezechielem.* 24, *Danielem.* 25, *Primum Esdra.* 26, *Secundum Esdra.* 27, *Esther.* At hi sunt viginti septem libri à Deo Iudæis dati. Verū viginti duo secundum numerum Hebraicarum litterarum numerati; propterea quod decem libri in quinq; duplicantur. Idē in libro de ponderibus: Sunt libri, inquit, genuini quinq; legales, *Genesis, Exodus, Leviticus, Numeri, Deuteronomiū.* Deinde alter *Quinarius* habet appellatas scripturas, & sunt hæc, *Iesus Naue, liber Iudicum cum Ruth, primus Regnorum cum secundo, Tertius Regnorum cum quarto, primus Paralipomenon cum secundo.* Tertius deinde *Qui-*

narius habet versus scriptos libros, Librum Iob, Psalteriū, Prouerbia Salomonis, Ecclesiasten eiusdem, Canticū (anticorum eiusdē. Quartus Quinarus est propheticus, duodecim propheta liber vnus. Ezaias, Ieremias, Ezechiel, Daniel. Manserunt autem extra hunc ordinem alij duo libri ipsius Esdræ, qui pro vno reputantur, & alius liber Esther appellatus. In eadē ætate ponit Cyrillū Hierosolymitanum. Sed nec ab eo Augustinus hoc discere potuit. Cyrillus enim Cathecheli 4. dicit in Veteri Testamento viginti duos l. bros, quos & nos agnoscimus, esse Canonicos, & addit, nos non debere plures quærere, Apostolos enim & veteres Episcopos, qui nobis prudentiores fuerunt, hos tantum nobis pro Canonicis commendasse & tradidisse. Præter hos ex patribus, qui ante Augustinū vixerunt, nemo (supposititios Clementis Canones excipio) est, qui Canonem descripsit. Dum igitur Augustinus, quem Canisius post Cyrillum ponit, numerat quadraginta quatuor libros Canonicos, aut sentit cum prioribus Ecclesiasticis doctoribus, aut ab ijs dissentit. Si sentit cum ijs, salua res est. Si verò ab ijs dissentit, æquum est, vt illorum omnium auctoritatem potiùs sequamur, quàm vnus Augustini. Præsertim cum Augustinus hic nō plus fidei mereatur, quàm à prioribus testibus acceperit, docet hoc ipse Augustinus contra Faustū lib. 33. cap. 6. vt suprā docuimus. Vno verbo. Si Augustinus id Canonikum eodem modo accipit, vt reliqui omnes patres: tum Maior est simpliciter falsa. Reliquorū enim omnium patrum testimonium vnus Augustini testimonio meritò præferimus. Si verò id Canonikum aliter accipit, atque reliqui patres, tum frustra  
contra

contra nos allegatur. Et ut res totarectius intelligatur, Dico vocem τὸ *Canonicum* esse æquiuocam. Potest enim illud Canonicum dici, quod in Ecclesia tanquam morum canon legitur. Deinde & illud est Canonicum, quod est Christianæ fidei canō & norma. Caietanus in fine comment: ad hist. vet. test. *Ne turberis, inquit, Nonitæ, si alicubi reperiatis libros istos inter Canonicos supputari, vel in sacris concilijs, vel in sacris doctoribus. Non autem sunt Canonici. i. regulares ad firmandum ea, quæ sunt fidei. Possunt tamen Canonici. i. regulares dici, ad adificationem fidelium, utpote in Canone Biblia ad hoc recepti. Cum hac distinctione poteris discernere dicta Augustini, & scripta in concilio provinciali Carthaginensi.* Si igitur Augustinus τὸ *Canonicū* de moribus intelligit, nos eum recipimus. Sed tum sunt vel quatuor termini, vel nihil contra nos concluditur. Nam si τὸ *Canonicum* de moribus tam in Maiore, quàm in Minore intelligitur, tum nihil contra nos statuitur. Ita enim hos libros posse Canonicos dici, non negamus. Si verò de Canone fidei intelligitur, tum Maior est falsa, ut suprà ostensum est. Si denique Maior de Canone morum, & Minor de Canone fidei intelligitur, tum sunt quatuor termini. Deinde ipsum Augustinum hoc non de Canone fidei intelligere certū est. Omnes enim libri canonici fidei in vet. Test. sunt apud omnes Christianos in æquali auctoritate. Sed libri ab Augustino nominati, ne quidem secundum ipsum Augustinum sunt in pari auctoritate. Ergo omnes isti libri ab Augustino nominati non sunt Canonici fidei. Maior certa est, quia in omnibus Canonicis libris par, & eadem est fidei auctori-

auctoritatis causa, nēpe Spiritus Sancti, quī eos inspirauit, perpetua, & vbiq̃ue indubitata auctoritas, & eam etiā probat ipse Bellarminus. Minorem verò ponit Augustinus eodem illo, quem citauimus, loco, de Doctr. Christ. lib. 2. cap. 8. *Tenebit igitur, inquit, hunc modum in scripturis Canonicis, ut eas, quae ab omnibus recipiuntur Ecclesiis Catholicis, praeponat eis, quas quadam non accipiunt. In eis verò, quae non accipiuntur ab omnibus, praeponat eas, quas plures grauiorēq̃ accipiunt, eis, quas pauciores, minorisq̃ auctoritatis Ecclesiæ tenent.* Idem docet Gratianus *Dist. 19. C. in Canonicis.* Vbi tamen non dissimulo, verba Augustini esse à Gratiano à sacris litteris ad epistolas decretales detorta. Idem docet Glossator ad dictum locum. Deinde ad marginem annotatum est, *Scriptura Canonica non sunt in eadem veneratione*, nec ab hac sententia dissentit præfator ad glossam ordinariam. Præterea ipse Augustinus testatur hos libros controuersos ideo à se Canonicos dici, quòd in Ecclesia leguntur. Nam cū liber Sapientiæ, quem hīc Canonicum dixit, exploderetur, reddit causam quare hoc fecerit, lib. 1. de Prædest. Sanct. cap. 14. *Quia cū ita sint*, inquit, *non debuit repudiari sententia libri Sapientiæ, qui meruit in Ecclesia Christi de gradu lectorum, tam longa annositate recitari, & ab omnibus Christianis, ab Episcopis vsq̃ ad extremos Laicos fideles, pœnitentes & Catechumenos cum veneratione diuinæ auctoritatis audiri.* Hinc apparet Augustino idem esse Canonicum, atque Ecclesiasticum. Sed quando Canonicum hoc modo accipitur, tum non negamus os esse Canonicos, multa enī egregia morū præcepta

pta in ijs continentur. Interea tamen cum tota antiquitate negamus, eos ita Canonicos esse, *ut fides ex ijs in rebus controuersis probari possit.* Hęc licet ita se habeant, nō tamen erubescit Bellarminus dicere, veterem Ecclesiam ab Apostolis didicisse, hos libros esse Canonicos. Sed hoc falsum esse ex testimoniis suprà citatis manifestum est, & ratio ipsa hoc docet. Nam si Christus & Apostoli sciuerunt hos libros à Iudeis repudiatos, esse Canonicos, & non reprehenderunt tam nefarium facinus, non fideliter functi sunt suo officio; Sed hoc dicere absurdum est & impium. Ergo illud, ex quo hoc consequitur, est absurdum & impium. Consequentia est manifesta. Illorum enim officium erat omnes corrūptelas corrigere, & veram doctrinę formam instituere. Sed sex integros libros à diuino volumine refecare, nefanda impietas erat. Et eosdem libros agnoscere, maximè pertinebat ad doctrinæ institutionem. Ergo sine neglectione officij à Christo & Apostolis negligi non potuit. Iam verò nusquam legimus, Christum vel Apostolos insimulasse Iudæos mutilati, vel deprauati Canonis. Ergo necessariò concludo, falsum esse Bellarmine, quod dicis, Augustinum & reliquos ab Apostolis didicisse, hos libros esse Canonicos. At dicis, patres in Concilijs congregatos, affirmare se ab Apostolis didicisse, hos libros esse Canonicos. Argumentum tale.

Quicquid aliqui Patres ab Apostolis se accepisse dicunt, hoc docuerunt Apostoli. Sed aliqui patres dicunt se ab Apostolis didicisse hos libros esse Canonicos. Ergo Apostoli docue-



runt hos libros esse Canonicos.

Respondeo, Maiorem esse saltam. Sæpè enim accidit, vt cùm Patres rem aliquam volunt diligenter commendare, vel quando eius originem ignorant, eam ad Apostolos referant. Iustinus in *Dialog. cum Tryphone* errorem Chilistarum defendit nomine Apostolicę traditionis. Irenęus *lib. 2. cap. 39.* dicit se ex traditione habere, Christum vixisse in terris, 30. annos. Basilius in *oratione de natiuitate Domini* dicit se ex traditione accepisse, Zachariam ideo inter templum & altare à Iudæis trucidatum esse, quòd asseruisset, Mariam post partum mansisse virginem. Polycarpus apud *Euseb. lib. 5. cap. 24.* dicit se ex traditione habere Christianos debere pascha celebrare cum Iudæis. Similia passim apud Patres. Atqui hæc omnia tamen falsa sunt. Ergò non quicquid patres dicunt se ex traditione Apostolica habere, illud Apostoli docuerunt. Deinde & Minor falsa est. Hieronymus n. in Prologo Galeato dicit eos *inter Apocryphos ponendos esse*. Cyprianus in Symbolo negat eos esse in *Canone*. Nazianzenus in carminib. de genuinis S. Scripturę libris, dicit eos non esse *in ymnis*, Cyrillus Catechesi 4. dicit, *Apostolos non agnouisse plures, neq; nos plures agnoscere debere, ne ipsis & Apostolis sapientiores esse velle videamur*. Athanasius in Synopsi negat item eos esse *Canonicos*. At hi Patres non negarent eos esse Canonicos, si ab Apostolis didicissent eos esse in Canone. Cùm igitur neque Maior, neque Minor, vera sit, manifestum est hanc obiectionem apud cordatos non multum ponderis habere posse. Sextum Argumentum. Quia Isidorus



dorus *libr. 6. cap. 1. Etymolog.* Cassiodorus *lib. 1. di-  
minarum lectionum*, & Rabanus *lib. 2. de institut. Cle-  
ricorum*, testantur hos libros esse Canonicos.

Quos libros Isidorus, Cassiodorus & Rabanus  
dicunt esse Canonicos, illi sunt Canonici. Sed  
illi dicunt hos quinque libros esse Canoni-  
cos. Ergo hi quinque libri sunt Canonici.

Respondeo hoc Argumentum posse rejici. Vi-  
xerunt enim hi tres Patres post ætatem Augustini.  
Sed eo dissimulato, dico Maiorem esse falsam. Non  
enim quicquid Isidorus, Cassiodorus & Rabanus  
dicunt, hoc verum est. Deinde & Minor vel est  
ambigua, vel non prorsus vera est. Isidorus enim  
*lib. 6. cap. 1.* prorsus numerat eosdem libros, quos  
nos numerauimus. Prætereà idem Isidorus *lib. 6.  
cap. 3. Etymolog.* dicit tantum. *22. libros ab Esdra  
in Canonem relatos esse.* Rabanus de institutione *cap.  
54.* dicit totum vetus testamentum *ab Esdra in 22.  
libros distributum, ut tot libri essent in lege, quot haben-  
tur litteræ.* Doceat igitur Bellarminus, ubi, quando,  
& per quem libri ab Esdra præteriti in Canonem  
relati sint, quod si facere non potest, desinat, à Pa-  
trum auctoritate, quam contra se esse videt, contra  
nos disputare. Denique ex Augustino, iure Cano-  
nico, & Caietano docuimus Canonicum esse mul-  
tiplex. At de Canone morum posset concedi, de  
Canone fidei non item. Statuimus n. cum Hierony-  
mo præfat. ad libros Salomonis, *Ecclesiam ea legere, non  
ad auctoritatem dogmatum Ecclesiasticorum confirman-  
dam, sed ad plebis adificationem.* Septimū Argumentū  
quia iidem Patres dicunt hos libros diuinos esse.

Quod

Quod aliqui Patres dicunt, hoc est verum, sed aliqui Patres dicunt, hos libros diuinos esse. Ergo sunt Canonici.

Respondeo Maiorem esse falsam, Multi enim patres multa affirmant, quæ etiam ipsi papiste falsa esse fateri coguntur. Deinde & Minor est falsa. Canones enim Apostolorum dicunt *tertium librum Machabæorum*, duas epistolas Clementis, & eiusdem octo libros institutionum esse *βιβλία τεύχεα καὶ ἄγια*. Ambrosius *quartum Esdra* vocat librum diuinum, de bono mortis capite decimo, & libro secundo in Lucam, de nomine *præcursoris*. Non igitur quemcunque librum aliquis pater diuinum esse dicit, ille est Canonicius. Postremò aliud est in conclusione quam in præmissis; tantum enim sequitur hos libros diuinos esse. At hoc, licet non propter eas præmissas, concedimus; fatemur enim esse libros diuinos, sanctos, sacros, & Ecclesiasticos; & tamen non esse Canonicos. Hoc cum te Chemnitius doceret, effugium esse respondebas, ac ut videas hanc respon- sionem non esse effugium, sed esse ipsam veritatem, ostendemus Ecclesiam ita semper & dixisse & sensisse, Cyprianus in symbolo dicit, *eos non esse Canonicos, sed Ecclesiasticos à maioribus appellatos*. Idem dicit *eos legi in Ecclesia, sed non proferri ad auctoritatem fidei ex his confirmandam*. Epiphanius in lib. de ponderib. dicit eos esse *χρησίμους καὶ ἀφιλίμους ἀλλ' οὐκ ἀκριβοῦς τῶν ῥητῶν ἐκ ἀναφίξεσθαι*. Hieronymus in Prologo ad lib. Salom. dicit, *Ecclesiam eos legere ad plebis informationem: sed inter Canonicas scripturas non recipere*. Prefator glos- se ordinariæ: *Boni sunt, inquit, & utiles, nihilq; in eis*

is, quod Canonici obuiet, inuenitur, ideo Ecclesia eos  
egit, & permittit, ut ad deuotionem, & ad morum infor-  
mationem à fidelibus legantur, eorum tamen auctoritas  
ad probanda ea, quæ veniunt in dubium, & ad confir-  
mandam Ecclesiasticorum dogmatum auctoritatem non  
videtur esse idonea. Lyra ad Prolog. Hieron. in Tob.  
Hi libri recepti sunt ab Ecclesia, ut ad morum formationē  
in ea legantur, tamen eorum auctoritas ad probanda ea,  
quæ in contentionem veniunt, minus idonea indicatur.  
Hinc manifestum est, Ecclesiam habuisse eos libros  
pro sanctis, sacris, & Ecclesiasticis, neque tamen pro  
Canonicis agnouisse. Atque hæc sunt vniuersalia  
Bellarmini pro his libris argumenta, quæ prolixius  
refutaui, & moneo ut posthac nostram sententiam,  
nō tam superbè reiiciat; ne vel primitiæ, & sequentis  
Ecclesiæ sententiam ignorare, vel veritatem con-  
tra conscientiam oppugnare videatur.

## CAPVT V.

*Additiones Danielis, & Esther, liber item Baruch, To-  
bias, Indith, Sapientia, Sirach & Machabeici non  
sunt principium Christianorum dogmatum.*

**N**unc immotis argumentis ostendemus eos non  
esse, neque posse esse principium Christianorū  
dogmatum. Ac primum sunt dubij, & in controuer-  
siæ positi. At principia sunt certa & extra controuer-  
siæ posita. Deinde non sunt utrique parti commu-  
nes, sed unius proprii. at principia non debent unius  
partis propria, sed utrique communia esse. Præterea  
principia debēt esse vera, & quidem immediatè vera,  
At in his libris sunt multa falsa. Deniq; principia de-

bent esse *anēitara*. At hi libri à multis Ecclesijs non recipiuntur. Atq; hæc sufficerēt hominibus doctis, & moderatis. Sed quoniam nobis cum contentiosis, & obstinatis negotium est, ideo paulò diligentius hanc rem probabimus. Ac primùm dicimus eos non esse à Prophetis scriptos, Solos verò libros prophetarum in V. T. esse Canonicos. Christus enim ex ijs tantum suam doctrinam contra Iudæos probat. Luc. 24, 27. & incipiens a Mose, & ab omnibus prophetis, interpretabatur illis, in omnibus scripturis, quæ de se scripta erant, Luc. Cap. 24. vers. 44. *neceſſe eſt impleri omnia, quæ ſcripta ſunt in Lege Moſis, & Prophetis, & Pſalmis de me.* Præterea Apoſtoli ita attemperarunt suam doctrinam, ut nihil docerent, nisi quod esset in libris prophetarum Act. Cap. 26, 22. *Nec quicquam dicens extra ea, quæ propheta & Moſes predixerant.* Act. 24, 14. *Ut qui credam omnia, quæ in Moſe & prophetis ſcripta ſunt.* Denique Christus & apostoli relegant omnes ad doctrinam prophetarum. Luc. 16, 19. *Habent Moſen & prophetas, audiant eos.* 2. pet. 1, 19. *habetis firmissimum sermonem propheti-cū, cū, rectè facitis, quòd attendatis.* Postremò Berhoënse s laudantur, quòd sermones Pauli ad scripturam examina-verint. Act. 17, 11. Atqui tum nulla alia erat scriptura, quàm Prophetarum. Ex his omnibus concludo, omnes & solos libros propheticos, in veteri testamēto, esse regulā fidei. Sed hi sex libri, & hæ tres Additiones non sunt libri prophetarū. Nulli n. prophetarū libri sūt originaliter scripti grecè. Sed Additiones Danielis & Estheræ; itē liber Baruch, alter Machabæorum, & Sapientiæ sunt citra omnem controuersia originaliter scripti grecè. Deinde oīm piorum com-

munis

munis sententia est, Malachiam esse oīm prophetarum vltimum, neq; post eum quidquam propheticum, in Ecclesia Iudaica, editū esse. Sed Additiones Danielis & Estheræ, Liber item Ecclesiasticus, Sapientię & Machabęicus vterq; sunt citra omnem controuersiam post Malachiam scripti. Præterea Iosephus lib. 1. cont. Appion. *testatur nullū librum, qui post Artaxerxis ætatem editus est, habere auctoritatem parem libris Prophetarū.* Idem Eusebius iisdē verbis asserit, lib. 3. *Ecclesiast. Hist. cap. 10.* Rationem vterque hanc reddunt, quòd ab eo tempore non fuerit *ἡ χρυθὴς διὰ δόξαν τῶν προφητῶν.* Atque hæc est omnium doctorum communis sententia. Sed Additiones Estheræ sunt scriptæ post ætatem Artaxerxis. Capite enim 11. ver. 1. fit mentio *Ptolomei & Cleopatra.* Ecclesiasticus item post eam ætatem scriptus est. In præfatione enim vers. 8. fit mentio *Ptolomei Euergetis.* Sed & Sapientiæ liber est post eam ætatem editus, omnes enim eum fatentur esse *Philonis.* Philo verò est Apostolorum coætaneus. Machabæorum etiam ambo post eam ætatem scripti sunt. Historia n. Machabæorum, quam illi continent, longo tempore post Artaxerxen contigit. Deniq; nulli libri Prophetarum sunt fabulosi. Additiones autem Danielis sunt *fabulosæ*, Auctor Hieronymus in *Præfat. ad Danielelem*, neque vlli libri prophetarum sunt vitiosi. At liber Iudith est *vitiosus* Hieronymus *præfat. in Iudith*, *Lyra in præfat. Hieronymi.* Postremò omnes docti testantur Esdram post reditum à captiuitate prophetico quodam spiritu omnes libros propheticos collegisse, ordinasse, & eorum Canonem constituisse, *Euseb. lib. 5. Ecclesiast. cap. 8. Chrysost.*

*sof. ad Heb. Homilia 8. Isidorus lib. 6. Etymolog. cap. 1. & cap. 3. Tertullian. de habitu mulierum cap. 3. Theodoretus præfat. in Psalm. Irenæus lib. 3. cap. 25. Bellarminus lib. 2. cap. 1. de Verbo Dei. Rabanus in Institutione Clericorum cap. 54. Hos aut. 6. libros, & 3. additiones in canone non posuit. Hinc apparet eos non esse à propheta scriptos. Deinde hi libri non sunt in Canone Iudaico, neq; vnquam in eo fuerunt. Ab Esdra enim non sunt in Canonem relati, nam tum nondum erant scripti. Quin & Iosephus lib. 1. Contra Appion. tantum numerat. 22. libros Veteris Testamenti. Idem facit Euseb. lib. 3. Ecclesiast. Hist. cap. 10. Et ex omnibus scriptoribus Iudaicis, qui ante Christum vixerunt, nemo est, qui contrarium sentiat. Manifestum igitur hos libros non esse, neque esse potuisse in canone hebræo. Præterea hi libri tempore primitiæ Ecclesiæ non fuerunt in canone Christiano. Origenes enim apud Euseb. lib. 6. cap. 18. tantum numerat viginti duos libros Veteris Testamenti. Idem facit Melito apud Euseb. lib. 4. Cap. 26. Totidē numerat Athanasius in Synopsi, Cyprianus in Symbolo, Hilarius in præfat. Psalm. Nazianzenus in Carminib. de genuinis Sacra Scripturæ libris. Concilium Laodicenum Canone 59, Hieronymus in prologo galeato. Cyrill. Catech. 4. Neque ante Augustinum quisquam est ex omnibus patribus (Supposititium Clementem excipio) qui contrarium asserat, quemadmodum capite superiore ostendimus. Manifestum igitur eos tempore primitiæ Ecclesiæ non fuisse in canone christiano. Ad hoc respondet Bellarminus, eos patres non Christianum, sed Iudaicum Canonem describere, Sed hoc est*

est falsum. Origenes enim apud Eusebium non tantum Veteris, sed etiam *Novi Testamenti* libros describit. Patres Laodicensi describunt eos libros, qui pro Canonicis *in Ecclesia legi debent*. Athanasius in Synopsi recenset eam scripturam, quæ *Christianorum est*, & quæ *Catechumenis legitur*. Hieronymus in prolog. Galeato describit eos libros, qui ad *Ecclesiam pertinet*. Cyrillus recenset eos libros, qui ab apostolis *nobis commendati sunt*. Aut igitur libri *novi Testamenti*, *Ecclesia*, *Christiani*, *Catechumens*, quod ab apostolis traditum est, & similia, non pertinet ad Christianos; aut falsum est eos Iudaicum canonem, & non Christianum describere. Deinde Christianus canon ex Iudaico constitutus est. Melito apud Euseb. lib. 4. Eccles. Hist. Cap. 26. *Scias ergo, inquit, perrexisse me usque ad Orientis locum, ubi predicationis nostræ cepit exordium, & ubi gesta sunt illa omnia, quæ leguntur scripta, ibique diligenter de omnibus explorasse, quæ essent V.T. volumina*. Hieronymus præfat. in Esdram, *procul abiicienda esse docet, quæ non sunt apud Hebræos*. Origenes apud Euseb. lib. 6. cap. 18. ex *Hebræorum* sententia canonem V.T. constituit. Quin ipse Eusebius in communi Ecclesiæ historia lib. 3. cap. 12. librorum V.T. canonem ex *Iosepho* recenset. Hinc colligo canonem Christianum V.T. esse ex hebræo canone descriptum. Si igitur hi libri non fuerunt in canone Iudaico; sequitur eos in canone Christiano esse non posse. quod enim Iudaicus canon non habet; hoc Christianus canon ab eo accipere non potest. Neque hinc Bellarminus obijcere potest canonem Iudaicum fuisse imperfectum, vel fuisse à Iudæis mutilatum: Iudæis enim fuerunt



diuina oracula commissa, *Rom. cap. 3. vers. 2.* & illi ea diligenter conseruarunt, hoc testatur Iosephus lib. 1. cont. Appion. *Nam cum tot, inquit, secula intercesserint, neque addere quis unquam, neque auferre, aut immutare quid ausus est.* Idem docet Euseb. *Eccles. hist. lib. 3. cap. 10.* Eandem Iudæorum in libris sacris conseruandis diligentiam prædicat August. *ep. 3. & Ep. 59.* & passim omnes patres. Deinde Christus & apostoli nunquam reprehenderunt Iudæos, de vilo libro vel reiecto, vel mutilato, cum tamen Christi, & apostolorum officium esset, omnes errores arguere, & veram doctrinam instaurare. Legimus quidem Christum accusasse Iudæos, quod scripturam malè explicassent; quod verò scripturam reiecissent, vel mutilassent, eos à Christo accusatos nunquam legimus, cum tamen credibile non sit, Christum & apostolos, qui suum officium tam fideliter administrarunt, voluisse ad tam horrendum flagitium conniuere. Prætereà, vniuersa Ecclesia, quæ ante Christum incarnatum fuit, & singula eius membra hos libros vnanimiter reiecerunt. Si igitur hi libri tum reuera fuerunt canonici, & tamen à Iudæis reiecti, tum tota & vniuersa Ecclesia, quæ eo tempore fuit, errauit: at hoc falsum esse dicet Bellarminus. Ergo falsum est, ex quo hoc necessariò sequitur. Sed quid ego hæc disputo, Christus, & Apostoli approbarunt Canonem Iudaicum. Remittunt enim nos ad eam scripturam, quæ tum erat Iohan. 5, 39. *Scrutamini scripturas, Luc. 16, 29. Habent Moysen & prophetas, eos audiant.* Hinc necessariò colligo canonem hebræum esse integrum, & incorruptum. Ad quod enim Christus & apostoli nos remittunt



nittunt, hoc approbant. Remittunt autem nos ad  
 canonem scripturarum, quieo tempore erat, ergo  
 canonem approbant, & per consequens sta-  
 uunt eum esse integrum, & incorruptum; nisi enim  
 talis esset, non debebant nos ad eum relegare, sed è  
 contrà nos monere, vt ab eo nobis caueremus. Idem  
 Primitiua Ecclesià iudicauit. Chrysost. in cap. 6. ad  
 Heb. Homil. 8. *Christus suscepit eas* (loquitur de ijs  
 scripturis, quas Esdras reparauit) *& apostoli eas disse-*  
*minauerunt.* Cyrillus Cateches. 4. *Apostoli & Episcopi*  
*susceperunt eos libros, loquitur tantùm de ijs, quos nos*  
*recipimus, neque nos alios suscipere debemus, ne ijs doctio-*  
*nes esse velle videamur.* ipsa verba Cyrilli non pono, li-  
 brorum enim nunc non habeo penes me. Cyprianus  
 in symbolo dicit *se ex patrum monumentis accepisse, hos*  
*22. libros secundum maiorum traditionem, esse canonicos.*  
*reliquos ecclesiasticos non canonicos esse.* Cùm igitur  
 Christus & Apostoli nunquam accusarint Iudæ-  
 os mutilatæ scripturæ, imò cùm illi canonem Iudæi-  
 cū approbauerint, sequitur Canonē Iudaicū esse in-  
 tegrū & incorruptū. Et per consequens nunc nullū  
 librū in canone V. T. esse posse, qui tempore Christi  
 & Apostolorū in eo nō fuerit. Hinc rectè colligi po-  
 test, apud Christianos & Iudæos eundē esse Canonē  
 Veteris Testamēti. Omnes en. illi quicūq; ante Au-  
 gustinū descripserunt canonē V. T. illi ita eū descri-  
 serūt, vt Iudæi: neq; vnus ex ijs omnibus inueni-  
 ri potest, qui hos libros controuersos inter canoni-  
 cos recenseat. Deinde nunquam auditum est ante  
 Augustinum, alium esse canonem Veteris Testamē-  
 ti apud Christianos, quàm apud Iudæos. Quin ipsi

Patres disertè *ad Hebræos redendum* esse dicunt, Hieronym. præfat. in Paralip. *Et esse abijcienda, quæ non sunt apud Hebræos*, præfat. in Esdras. Melito, Origenes, Hieronymus, & alij ab Hebræis didicerunt, quinam libri V. T. sint canonici, imò ipse canon Christianus ex Hebræo constitutus est, vt antè ostendimus. Manifestum igitur apud Christianos, & apud Iudæos vnum & eundem canonem esse Veteris Testamenti. Et ob eam causam vniuersa primitiua Ecclesiæ eos in canone esse negauit. Ex omnibus enim primitiuæ Ecclesiæ doctoribus, qui canonem Ecclesiasticum describunt, nemo est, Clementem semper excipio, qui eos inter canonicos recenseat, vt iam sæpè diximus. Hinc sequitur aut eos nunc in canone esse non posse, quod enim tempore primitiuæ Ecclesiæ canonicum non fuit, hoc nunc canonicum esse non potest: aut vniuersam primitiuam Ecclesiam errasse, quòd eos extra canonem posuerit. Deinde *duæ sunt tantum viæ cognoscendi librum Canonicum. Una ex testimonio alicuius, quem constat Prophetam vel Apostolum esse; Altera per certa testimonia eorum, qui vivebant, cum liber ederetur, qui testentur libros illos à Prophetis vel Apostolis editos, & quorum testimonia per successionem hominum ijs libris utentium ad nos usq. deuenierint. Prima via hoc tempore locum non habet; non enim nunc Propheta, vel Apostoli in terris viuunt: ergo secunda via progrediendum est, & ex testimonijs primitiuæ Ecclesiæ debemus de libris Canonicis statuere.* At prima & vniuersa Iudæorum Ecclesia hos libros repudiavit, vniuersa item primitiua Apostolica Ecclesia eos extra canonem ponit, vt antè ostendimus.

stendimus. Sequitur igitur eos nunc canonicos esse non posse. Ad hæc excipit Bellarminus, *Ecclesiã de istis libris dubitasse, posse duobus modis intelligi, vel quod ita dubitauerit, ut nulli homines eius temporis essent, qui testari possent, eos libros à Prophetis vel Apostolis, editos esse: vel quod ita dubitauerit, ut non ipsa Ecclesia, sed tantum aliqui homines dubitauerint.* Accipimus hoc ipsum, Bellarmine. Verum respondemus, vniuersam Ecclesiam, quæ vixit, cum hi libri ederentur, & singula eius membra non tantum dubitasse de his libris, sed eos prorsus extra canonem posuisse. Nisi fatearis, produc vnum ex omnibus istis, qui vixerunt, cum hi libri ederentur, qui contrarium testetur. Addo vniuersam primitiuam Apostolicam Ecclesiam, & singula eius membra, vsque ad Augustinum, supposititium Clementem rursus excipio, eos extra canonem posuisse, ut antè ostensum est. Nisi hoc concedat Bellarminus, producat vnũ ex omnibus patribus, qui canonem recenseat, & eos in illo collocet. Si igitur valet hæc Bellarmini responsio, tum hi libri non sunt canonici, reprobantur enim à tota & vniuersa primitiua Ecclesia. Exemplũ quod Bellarminus de *Enoch* adducit, hoc est contra illum. Tertullianus enim de *habitu mulieris, cap. 3.* eum disertè approbat. Si igitur quicunque liber ab aliquo patre testimonium habet, canonicus est, tum Enoch est canonicus. Alterum exemplum de *Iudith* est falsum. Nicena enim Synodus eam in canonem non retulit, quemadmodum suo loco ostendemus, neque vnquam hoc ex Hieronymo probabit Bellarminus. Tertium exemplum de *libris N. T.* est dissimile.

mile. Athanasius enim in *Synopsi* eos inter Canonicos recenset, idē facit Cyprianus in *Symbolo*, & Hieronymus in *Catalogo*. Manifestum igitur vniuersam Ecclesiam de istis libris non dubitasse. At omnes in vniuersum Iudæi, omnes item Christiani, in primitiua Ecclesia, hos libros reprobarunt. Ad hæc respondet Bellarminus, *potuisse tum quosdam libros ab alijs non recipi, quia tum ista res generali concilio non fuit definita.* & paulò post dicit Hieronymū fuisse in ea sententia, nempe in qua nos sumus, *quia generale concilium nondum statuerat aliquid, de his libris*, lib. 1. cap. 10. de verbo Dei. Si hoc strictè intelligis de concilio, concedo, nullum enim concilium, quod post Apostolorum ætatem fuit, constituit canonem, neque constituere potuit. Si verò generaliter de canonis certitudine intelligis, tum est falsum. Iam tum enim fuit certus canon in Ecclesia. Eusebius enim lib. 3. cap. 10. ex Iosepho dicit, *non innumera apud nos volumina haberi, sed duos tantum & viginti libros esse, qui diuinitus esse inspirati creduntur.* Simile docet Melito apud Euseb. lib. 4. cap. 26. Et Origenes apud eundem lib. 6. cap. 18. Hieronymus viginti duos libros in prologo *Galeato* canonicos esse asserit, & dicit, *quicquid extra hos est, inter apocrypha ponendum esse.* Nazianzenus numerat eosdem viginti duos libros, & addit, *quicquid extra eos est, non esse in ymniois.* Athanas. in *Synop.* *Omnia nostra*, inquit, *qui Christiani sumus, scriptura diuinitus inspirata est, Libros habet non infinitos, sed finitos, ac certo canone comprehensos.* Cyprianus in *symbolo* eundē numero recenset ea omnia, quæ diuinitus inspirata, & Ecclesiæ Christi tradita fuerunt, & cum illa recensuisset,

et, in his, inquit, concluderunt librorum numerum *Veteris Testamenti*. Idem docet Cyrillus catech. 4. Manifestè igitur falsum est, quod dicit Bellarminus, tū eam rem non fuisse determinatam. Deinde hæc responsio implicat contradictionem: eodem enim capite docet *Apostolos declarasse hos libros esse Canonicos*. *Etsi enim*, inquit, *non habentur testimonia a Synagoga Iudaica, habentur tamen ab Ecclesia Christiana, & hoc sufficit. Apostolici enim poterant sine alijs testimonijs declarare libros illos esse canonicos, quod & fecerunt, &c.* At hæc duo simul vera esse non possunt, aut enim falsum est *Apostolos hoc declarasse*, aut falsum est *patrum memoria istam rem non fuisse definitam*. Deinde omnes patres contrarium testantur. Cyprianus enim in symbolo negat eos *Ecclesia pro canonicis traditos esse*. Idem docet Cyrillus Catechej. 4. Athanasius in synopsi. Hieron. in prologo Galeat. Nazianzenus in carmine de lib. Can. Melito apud Euseb. lib. 4. cap. 26. & reliqui patres idem affirmant. Falsum igitur est, quod inquit Bellarminus, *Apostolos declarasse eos esse canonicos*, ac proinde concludo tempore patrum, fuisse certum, & determinatum canonem scripturarum, & hos libros à patribus extra canonem fuisse relictos. Idem non obstante Augustini auctoritate, iudicavit & subsequens Ecclesia. Brito enim in Prefat. Hieronymi ad librum Iudith, negat eos esse in canone, & sequitur sententiam Hieronymi in Prolog. Galeat. Idem docet Brito in Prefat. Hieronymi ad librum Tobia. Sed & Lyra idem docet in Prefat. ad Tobiam. Præfator in glossam ordinariam, *Quia sunt multi*, inquit, *qui ex eo quod non multam operam dant S. Scriptura, existimant*  
*omnes*

omnes libros, qui in Biblijs continentur, pari veneratione esse reuerēdos atq; adorandos, ne scientes distinguere inter libros Canonicos, & non canonicos, quos Hebraei inter apocrypha computant, unde saepe coram doctis ridiculi videntur, (nota ridiculos & indoctos habitos fuisse, qui hos libros numerabant inter canonicos) & perturbantur, scandalizanturq; cum audiunt aliquem non pari cum ceteris omnib; veneratione prosequi aliquid, quod in Biblijs legitur. Idcirco hic distinxim; & distincte numeravim; primò libros canonicos, & postea nō canonicos: inter quos tantū distat, quantum inter certum & dubium. Nam canonici sunt confecti Spiritu S. dictante. Non canonici autem siue apocryphi, rescitur quo tempore, quib; siue auctoribus sint editi: quia tamen valde boni & utiles sunt, nihilq; in eis, quod canonicis obuiet, inuenitur, ideo Ecclesia eos legit, & permittit, ut ad deuotionem, & morum informationem a fidelibus legantur. Eorum tamen auctoritas ad probandum ea, quae veniunt in dubium, aut in contentionem, & ad confirmandam Ecclesiasticorum dogmatum auctoritatem non reputatur idonea, prout dicit Hieronymus in Prologis super Iudith. Et postquam enumeravit libros Canonicos vigintiduos, adiicit, quicquid autem extra hos est (de Veteri Testamento loquor) ut dicit Hieronymus, inter Apocrypha est ponendum. Isti sunt libri qui non sunt in canone, quos tamen Ecclesia ut bonos, & utiles libros admittit, non ut canonicos. Inter quos sunt aliqui maioris auctoritatis, aliqui minoris, nota eos non esse eiusdē auctoritatis. Nam Tobias, Iudith, & Machabaeorum libri, Sapientie quoq; liber, & Ecclesiasticus, valde ab omnibus probantur: ita quod Augustinus libro 2. de doct. Christ. tres superiores numerat inter canonicos, & de Sapientia

atq;.

atq; Ecclesiastico dicit, meruisse eos recipi in auctoritatem, & inter propheticos debere numerari: & de libris Machabaeorum lib. 18. de Ciuit. Dei, loquens de libris Esdrae, dicit quod quamuis hebraei non habeant eos pro Canonicis, tamen Ecclesia habet illos pro Canonicis, propter quorundam martyrum passionem vehementes, atque admirabiles. Minoris autem auctoritatis sunt Baruch, & tertius ac quartus Esdrae. Nam Augustinus loco supra dicto, nullam de his facit mentionem, cum tamen, ut dixi, alios apocryphos canonicis annumeret. Ruffinus quoque in exposit. Symboli. Et Isidorus in Etymolog. ubi hanc Hieronymi diuisionem referunt, horum nihil meminerunt. Et paulò post, Neque aliquem moueat, quod in Iudith, & Tobiae Prologis dicitur, quod apud hebraeos inter hagiographa leguntur: quia manifestus error est, & apocrypha pro hagiographa est legendum qui error in omnibus, quos videri codicibus inuenitur, & inoleuit, ut puto, ex pietate, & deuotione exscriben-ium, qui deuotissimas historias horrebant annumerare inter apocrypha. Nam quòd hic error multis retro annis codices occupauerit, ostendit Magister in historia Iudith, ubi dicit, Hic liber apud Chaldaeos inter historias computatur, & apud Hebraeos inter apocrypha, quod dicit Hieronymus in Prologo, qui sic incipit, Viginti & duas litteras. Si ergo in Prologo super Iudith legitur inter hagiographa, vitium Scriptoris est, quod in ipso titulo deprehendi potest. Ex quo miror, quod dictus Magister non aduerterit eundem esse errorem, in Prologo Tobiae, ut ipse dicat, hanc historiam Hebraei ponunt inter apocrypha, Hieronymus tamè in prologo suo dicit inter hagiographa. Glossa quoque super dicto Prologo Tobiae dicit, potius & verius dixisset apocrypha, valla-ge accipit hagiographa quasi sanctorum scripta, & ita



non est de numero illorum novem, quæ propriè dicuntur  
Hagiographa, quæ sunt de Catalogo. s. de numero viginti  
duorum istorum librorum Biblia. Nam cum Hieronymus in  
Prolog. Galeat. post enumerationem librorum canonicorum  
dicat: hic prologus scripturarum quasi galeatum principi-  
um omnibus libris, quos de Hebræo vertimus in Latinum,  
conuenire potest, ut scire valeamus, quicquid extra hos est,  
inter apocrypha esse ponendū. Igitur Sapientia, quæ vulgo  
Salomonis inscribitur, & Iesu filij Syrach liber, & Iudith,  
& Tobias & Pastor non sunt in canone. quomodo creden-  
dum est illum postea in illis prologis scripsisse inter hagio-  
grapha, & sibi ipsi contradicere? Si quis praterea liberatiori  
examine Hieronymi verba in dictis prologis perpenderit,  
animaduertet illum scripsisse apocrypha non hagiogra-  
pha. Dicit enim in prolog. Tobie, Exigitis ut librum Chal-  
deo sermone conscriptum, ad Latinum stylum traham: li-  
brum utique Tobie, quem Hebræi de catalogo diuinarum  
scripturarum secantes, his quæ apocrypha memorant,  
manciparunt. In Iudith autem ait, apud hebræos liber Iu-  
dith inter apocrypha legitur, cuius auctoritas ad roboran-  
da illa, quæ in contentionem veniunt, minus idonea indica-  
tur. Cum ita dicat Hebræos secare Tobiam de catalogo S.  
scripturarum, & Iudith auctoritatem minus idoneam in-  
dicari, si inter hagiographa numeraret, & non inter apo-  
crypha, contraria videretur eodem in loco scripsisse. Sed ut  
dixi, scriptores hoc nomen Apocrypha horrente deuotione,  
ac pietate quadā, reiecto Apocrypha, Hagiographa scri-  
pserunt. Ruffinus verò, ubi supra, enumeratis libris canoni-  
cis, in quibus cum Hieronymo concordat, infert: Hec sunt  
quæ patres inter canonem concluderunt, ex quibus fidei no-  
stra assertiones constare voluerunt. Sciendum tamen est,  
quod



quod & alij libri sunt, qui non canonici, sed Ecclesiastici à maioribus appellati sunt, ut Sapiencia qua dicitur Salomonis, & alia Sapiencia, qua dicitur filij Syrach, & infra, eiusdem ordinis est libellus Tobia, & Iudith, & Machabeorum libri. Et infra, qua omnia legi quidem in Ecclesia voluerunt, non tamen proferri ad auctoritatem ex his confirmandam. Ceteras verò Scripturas apocryphas nominarunt, quas in Ecclesijs legi noluerunt. Hoc primitivè & subsequentis Ecclesiæ iudicium cùm Chemnitius & alij viderent, & tamen animaduernerent eos à Papa inter canonicos nominari, dixerunt Papam libros non canonicos facere canonicos, & canonicos facere non canonicos. Ad hoc respondes esse impudentem calumniam, neque esse vestra asserta, sed nostra commenta. Addis Papam & Ecclesiam non habere potestatem faciendi libros non canonicos, canonicos: sed habere potestatem distinguendi inter libros non canonicos, & canonicos. Hoc ego cum stupore legi. Ipse enim cum Chemnitio in eadem fui sententia. Itaque ut intelligatur, an Chemnitius verum dixerit, an verò tu eum calumniæ & mendacij rectè insimularis, age repetamus eam sententiam paulò altiùs. Ac primum memini me in quodam papista legere, scripturam à Papa non approbatam non habere plus auctoritatis, quàm fabulas Æsopi. Sed quoniam librum, in quo hoc legi, nunc non habeo, non possum locum annotare, & ob eam causam hoc dictum non urgebo. Vide Wittakerum contra Dura. lib. 1. sect. 31. & Hesselsum de sexcentis errorib. cap. de verb. Dei. Certè Ioannes Eccius in Enchiridio locorum communium adversus Lutherum, disertè scribit Scripturam non esse authenticam sine auctoritate Ecclesiæ. In Propositione

ne de Ecclesia, & eius auctoritate, ubi diluit obiecta, num. 3. Et Pigius lib. 1. Hierarchiæ Ecclesiæ cap. 2. dicit omnem scripturæ auctoritatem ab Ecclesiæ auctoritate pendere, & addit inde factum esse, ut *Marci Euangelium*, qui non fuit Apostolus, sit receptum, *Bartholomæi* verò, qui Apostolus erat, sit reiectum. Ob eandem causam dicit factum, ut *Luca Euangelium*, qui non vidit Dominum, sit receptum: *Nicodemi* verò, qui vidit Dominum, sit reiectum. Stapletonus lib. 9. cap. 14. doctr. princip. dicit esse penes Ecclesiam huius temporis, librum aliquem nondum in canonem receptum, Apostolorum tamen tempore scriptum, & nunquam Ecclesiæ iudicio reprobatur, (exempli causa librum *Herme* & constitutiones à *Clemente* editas) in numerum librorum sacrorum et certò canonicorum referri posse. quod & ante me observavit illud decus Angliæ *Vittakerus* cōtra *Duræ*. lib. 1. sect. 27. Huiusmodi multa ex vestris libris colligi possunt. In Colloquio *VVormatiensi*, anno 57. vestri dixerunt *Scripturam* esse *nasum ceruum*, librum *omnis discordiæ, dubiæ, incertiæ, & normæ plumbeæ*. Sed fieri potest, *Bellarmino*, ut cōmodiùs sentiatis, quàm loquamini. Itaque istis missis, ex Decretorum libris afferam, quid Papa cum tota sua cohorte de hac re senserit. *Nicolaus Papa* *Distinct.* 19. c. *Si Romano-*  
*rum*, §. *Quibus*, *Quoniam*, inquit, *si Verus Novumq;*  
*Testamentum* sunt recipienda, non quòd *codici Canonum*  
*ex toto habeantur annexa: sed quòd de his recipiendis San-*  
*cti Papa Innocenti* prolata esse videtur sententia; restat nimirum quòd *Decretales Rom. Pontificum epistole* sunt recipiende. Et cap. in *Canonicis*, *Distinct.* ead. disertè dicitur, *inter Canonicas Scripturas Decretales epistola con-*  
*nume-*

numerantur. Ante etiam ostendi Gelasium expungere libros Samuelis ex Canone, & Innocentium addere quartam Iohannis ad Canonem. Ex hac nuda narratione apparet, Bellarmine, eos non mendaciter, neq; impudenter calumniari, sed veritatem dicere, qui hoc vobis tribuunt. Quod verò tu cum quibusdam alijs dicis, *Ecclesiam non habere potestatem librum non Canonicum faciendi Canonicum; sed tantum habere potestatem discernendi libros canonicos ab alijs, qui non sunt Canonici*, metuo vt tu ipse ita sentias; defendis enim Tridentinum concilium, in quo hi libri, qui revera Canonici non sunt, in Canonem tamen relati sunt: Deinde tua argumenta ducuntur à Paparum quorundam approbatione. Prætereà dicis libros alios esse apocryphos, ob eam maximè causâ, quòd *aliqui Papa eos non approbaverint*. Atq; Paparum approbatio istius rei causâ esse non potest. Nō enim quia Papa librum approbat, ideo est Canonicus: sed quia *diuinitus inspiratus est*, ideo est Canonicus. Quâ ob causâ cum velles probare, hos libros esse Canonicos, debebas indubitatis testibus, & immotis argumentis ostendere, eos esse diuinitus inspiratos. Hoc quoniam non facis, suspecta est mihi tua oratio. Fortè vis Ecclesiam habere potestatem distinguendi libros non canonicos à canonicis, & propter istam distinctionem, libros esse vel non esse canonicos. Sed si ita sentis, tum ludis verborum inuolucris. Hoc enim idem est, atque illud prius. Si verò ingenuè sentis, Ecclesiâ posse libros canonicos à nō canonicis distinguere, & eos nō propter Ecclesiæ distinctionē; sed proptereà, quòd *Dei verbum sunt*, vel quòd *diu-*

*nitus inspirati sunt*, esse libros Canonicos; tum nobiscum sentis: & si hoc ita est, tum da gloriam Deo, & palam testare Romanos Papas, qui in suis decretis contrarium docuerūt, errasse. Quod si feceris, patefacies studium tuū in indagāda veritate: si non feceris, ostendes te aliud loqui, & aliud sentire. Post hæc ponit Bellarminus tria *κεφάλαια*, iuxta quæ Ecclesia hos libros canonicos esse iudicauerit. Primū, *quia Apostoli declarauerunt eos Canonicos*, at pagina sequenti dicit Hieronymi ætate *nihil de hac re statutum fuisse*. Esse autem hoc ab Apostolis determinatū, & hoc ipsum Hieronymi ætate non esse determinatum, sunt contradictoria. Deinde iam antè ostendimus, Apostolos nō statuisse hos libros esse Canonicos. Proinde primum hoc *κεφάλαιον* est falsum, & ob eam causam hi libri non sunt Canonici. neq; est, quo se tueri Bellarminus possit; nisi velit ad nouam reuelationem confugere. Secundum, *quia hi libri sunt reliquis Canonicis conformes*. At non quicquid Canonicis libris conforme est, hoc est Canonicum. Deinde hi libri non sunt Canonicis libris conformes. Vnum enim librum ex his Hieronymus dicit *vitiosum* esse, alterū *fabulosum*. At vitiosum & fabulosum non est veritatis regulæ conforme. Prætereā in singulis libris ostendimus, eos non esse canonicis conformes. Tertium, *quia omnes Christiani eos paulatim pro canonicis receperunt*. Sed hoc esse falsum constat ex præcedentibus: imò patres, quicunque ante Augustinum recensuerunt canonem, disertè eos à canone reijciunt: posteriores item omnes, teste præfatore in Glossam ordinariam, eos cum primitiua Ecclesia *extra canonem ponunt*, & cum

eum eadē eos legi ad adificationem permittūt. Cū igitur hi libri ab Apostolis non sint approbati, neque sint canonicis per omnia conformes, neque sint à primitiua & subsequente Ecclesia pro canonicis recepti, sequitur alia *exigētia* excogitanda esse, aut eos non esse in canone. Nos cum vniuersa primitiua & subsequente Ecclesia pronunciamus, *receptos eos esse ab Ecclesia, ut ad morum informationem in ealegantur, eorum tamen auctoritatem ad probandum ea, quæ in contentione veniunt minus idoneam reputari, ut dicit Hieronymus in Prologo super Iudith, & in prologo super parabolis Salomonis. Lyra in prologo Tobia.*

## CAPVT VI.

*Estheræ Additiones non esse principium Christianorum dogmatum, vel non esse regulam fidei.*

**H**Actenus in genere ostēdimus hos libros & has Additiones non esse regulam fidei: sequitur ut idem de singulis in specie ostendamus. Et quoniam Bellarminus non ab integris libris, sed ab Additionibus exorsus est, igitur nos iisdem vestigijs insistentes, ab Additionibus iisdem ordiemur. Primo loco ponit Estheram. Hunc aliqui in canone non ponunt. Melito apud Euseb. lib. 4. cap. 26. Athanasius in *Synopsi*. Nazianzenus in *Carminibus de S. Scriptura libris*. Putabant enim eum ad aliud volumen pertinere, ut idem Athanasius in *Synopsi*; vel eum sub *Esdra libris* comprehendebat, ut Isidorus. Porro hic liber partim extat hebraicè, ut decem priora capita; partim græcè, ut septem capita posteriora. De illis decem capitibus non est cotrouersia. Vtraque enim pars fatemur ea esse canonica. Itaque de illis verba non faciam. Tan-

tum controuersia est de septem illis posterioribus capitibus. Ea Bellarminus dicit esse canonica, nos negamus. Ille probat suam sententiam sex argumentis, quæ ordine expendemus. Primum argumentum, quia aliqui patres retulerunt hunc librum in canonem.

Quoscumque libros aliqui patres in canonem retulerunt, ij sunt canonici. Sed Estheram aliqui patres in canonem retulerunt. Ergo hæc septem posteriora capita sunt canonica.

Respondeo, Aliud esse in conclusione, quam in præmissis. Non enim sequitur *hec septem capita esse Canonica*: sed *genuinam Estheram esse Canonicam* ex præmissis efficitur. Deinde maior est falsa. Clemens enim *tertium Machabeorum*, item *duas epistolas Clementis*, & *eiusdem Constitutiones in Canone* ponit, Canone Apost. 84. Innocentius *quartam epistolam Ioannis* Canoni adiecit, ad Exuperium Cap 7. Irenæus recipit *librum Hermæ*. Eusebius lib. 5. Ecclesiast. Hist. cap. 8. Tertullianus recipit *librum Enoch* de habitu muli. cap. 3. & ibi Pamel. Neq; tamen tertius Machab. & liber Hermæ, neq; liber Enoch, neq; quarta Iohannis, neq; Clementis epistolæ, vel eius Constitutiones sunt Canonice. Ad Minorem dico. multos patres Estheram in Canonem retulisse, sed *genuinam tantum*. Estheram enim in Canone posuerunt, & hæc capita septem disertè exceperunt, Athanasius in Synopsi postquam Canonicos libros enumerasset, dicit in Veteri Testamento esse alios libros non Canonicos, & ne dubitandi materia esset, nominat *Sapiētiā, Ecclesiasticum, Tobiam, Judith, & Esther cuius initium est, anno secundo, etc.* Hieronym. in Præfat. ad Paralip. dicit ad

cit ad Hebræos reuertendum esse. Idem in Præfat. *Est* dicit abijcienda esse, quæ non sunt apud Hebræos. Sed hæc septem capita non sunt apud Hebræos. Idem Hieronymus in 10. cap. *Esther*. dicit, se hæc septem capita obelo, id est, veru prænoscisse. Rectè Sixtus Senensis lib. 1. pag. 33. Canon ille, intelligendus est de veris ac genuinis partibus, non autem de laceris quibusdam appendicibus, & pannosis additamentis, à quovis incognito auctore temerè appositis, & utriusque insutis, qualia sunt huiusmodi vltima capitula, quæ non solum Hugo Card. Lyra, Dionysius Carthusianus, ceteriq; recentiores auctores negant esse Canonica, sed & D. Hieronymus à toto *Esther* volumine resecat, ceu vitiatam partem, & laciniosis verborum sinibus cõficta, ex his quæ ex tempore dici poterant, sicut solitum est scholaribus discipulis sumpto themate excogitare. Origenes quoq; ad Iulium Africanum hæc eadem Additamenta explodit. Negari igitur potest, Bellarmine, patres hæc Additamenta in canonem retulisse. Secundum argumentum, quia aliqui patres dixerunt hæc septem capita esse sacra.

Quem librum aliqui patres sacrum esse dicunt, ille est canonicus, Sed hæc septem capita aliqui patres sacra esse dixerunt. Ergo hæc septem capita sunt canonica.

Respondeo, Maiorem esse falsam. Clemens enim tertium *Machab.* item, duas epistolas *Clementis*, & eiusdem constitutiones, sacras & sanctas vocat, canone Apostolico 84. Et hæc tamen propterea canonica non sunt. Ad Minorem dico, hæc septem capita *κατὰ οὐρανὸν* sacra dici posse. Sunt enim in illis quædam sacra, & propterea tamen non sunt canonica. Tertium Argu-



mentū, quia hæc septem capita in Ecclesia leguntur.

Quod in Ecclesia legitur, illud est canonicum. Sed hæc septem capita in Ecclesia leguntur. Ergo hæc septem capita sunt canonica.

Respondeo, Maiorem esse fallam. Nam & *historia martyrum* in Ecclesia legitur. Concilio Carthag. 3 Canone 47. *Tertius* item & *quartus Esdræ* in Ecclesia leguntur. Bellarminus lib. 1. de Verbo Dei cap. 20. *Hermes* item in Ecclesia legitur, Euseb. Ecclesiast. hist. lib. 3. cap. 3. Ruffinus in Symbolo, Hieronymus in Catalogo cap. *Hermes*. *Ephrem* in Ecclesia legitur. Hieronymus in Catalog. cap. *Ephrem*. *Clemens* in Ecclesia legitur, Niceph. lib. 3. cap. 18. Et tamen hi libri non sunt canonici. Ad Minorem dico duplices esse libros, qui in Ecclesia leguntur. Alios Canonicos, alios non Canonicos. Canonicos in Ecclesia legi extra controuersiam pono, non Canonicos in Ecclesia legi probo his testibus. Athanasius in Synopsi, *præter hos, inquit libros, sunt & alij Veteris Testamenti libri non Canonici, qui Catechumenis tantum leguntur, ut Sapientia, Ecclesiasticus, Esther cuius initium est, Anno secundo regnante Artaxerxe, Iudith, & Tobias, Cyprianus in Symbolo dicit alios libros non Canonicos, sed Ecclesiasticos a maioribus vocatos esse, ut Sapientiam, Ecclesiasticum, Tobiam, Iudith, & Machabæorum libros, & addit maiores voluisse, ut in Ecclesia legerentur, non ut proferrentur ad auctoritatem fidei ex ijs confirmandam.* Hieronymus præfat. ad libros Salom. eos quidem, inquit, *legit Ecclesia* (loquitur de Iudith, Tobia, & Machabæorum libris) *Sed inter Canonicas scripturas non recepit.* Item *hec legat Ecclesia* (loquitur de Sapientia



tia & Ecclesiastico ) ad adificationē plebis, non ad fidem confirmandam. Idem docet Lyra in Prologo ad Tobiam, & Brito in Prologo ad Iudith, & præfator in Glossam ordinariam, & multi alij. Vnde apparet hos libros, in Ecclesia legi, & tamen non esse canonicos. Quantum argumentum, Quia Origenes dicit, hæc septem capitæ esse canonica. *In epist. ad Africanum.*

Quicquid Origenes dicit, hoc est verum. Sed Origenes dicit, hæc septem capita esse canonica. Ergo hæc septem capita sunt Canonica.

Respondco Maiorem esse falsam. Non enim quicquid dixit Origenes, hoc est verum. Ad minorem dico Epistolam Origenis legi apud Eusebium *lib. 6. cap. 23.* Sed in eo loco non fit Eltheræ mentio. Deinde idem Origenes apud Euseb. *Ecclesiast. hist. lib. 6. cap. 18.* Canonem Veteris Testamenti constituit secundum Hebræos. Sed hæc septem capita Hebræi nunquam agnouerunt. Postremò si Origenis testimonio standum est, tum Iudith, Tobias, Baruch, Sapientia, Ecclesiasticus & Machabæici non sunt in Canone, Ille enim apud Euseb. *lib. 6. Ecclesiast. Hist. Cap. 18.* Catalogum Canonicorum librorum recensens, hos omnes præterit. Sanè Sixtus Senensis *lib. 1. sect. 3. pag. 33.* dicit Origenem ad Iulium Africanum hæc eadem *Aditamenta* explodere. Quintum argumentum, Quia aliqui patres ex his septem capitibus testimonia allegant.

Ex quibus libris aliqui Patres testimonia allegant, ij sunt Canonici. Sed ex his septem capitibus aliqui patres testimonia allegant. Ergo hæc septem capita sunt Canonica..

Respondeo Maiorem esse falsam. Eusebius enim lib. 5. Ecclesiast. Hist. cap. 4. *pastorem* allegat. Athanasius in orat. contra Arrianos *quartum Esdra* allegat. Idem facit Cyprianus Epist. 74. Quin ipse Paulus in 1. ad Corinth. cap. 15. vers. 33. citat *Menandrum*, Act. 17. vers. 28. citat *Aratum*. Ad Tit. 1. vers. 12. citat *Epimenidem*, Iudas citat *Enoch*. Sed hi non sunt canonici. Ergo non quoscunq; libros patres citant, illi sunt Canonici. Sextum argumentum. Quia *Synodus Tridentina iudicauit hæc septem capita esse Canonica*. Sed hæc Synodus nos non magis mouet, quàm ea, quæ Christum condemnauit. Atq; hæc sunt Bellarmini argumenta pro his septem capitibus. Nunc immotis rationibus ostendam, ea non esse canonica. Primum Argumentum, quia hæc septem capita sunt originaliter scripta græcè.

Nulli libri Prophetarum Veteris Testamenti, sunt originaliter scripti græcè. Sed hæc septem capita sunt originaliter græcè scripta. Ergo hæc septem capita non sunt à prophetis scripta.

Bellarminus, Maiore concessa negat Minorem, & dicit *probabile esse*, hæc septem capita olim existisse Hebraicè. Sed Eusebius lib. 3. Ecclesiast. hist. cap. 10. Et Iosephus lib. 1. contra Appion. dicunt Prophetarum successionem debere *certam et exploratam esse*. Quod verò tantum probabile, siue credibile est, hoc neq; certum, neq; exploratum est. Deinde Lucas dicit cap. 1, 4. *ideò se scripsisse, ut haberemus earum rerum, quas Apostoli uina voce tradiderunt ἀποφαι- λουσιν*. Sed quod tantum probabile siue credibile est, hoc non est ἀποφαιλῆς. prætercà Hieronymus disertè dicit

dicit hæc non haberi in Hebræo, & apud nullum poenitus ferri interpretum. Lyra dicit hæc ab Iosepho & ab alijs esse conficta, & postea vulgata editioni inserta, cap. 10. Idem docet Sixtus Senensis lib. 1. sect. 2. cap. Esther. fol. 24. Hæc etsi sufficerent ad illam Responzionem: tamen libuit Bellarmino suam sententiam aliquot argutioris probare, quas omnes expendemus. Primum dicit Iosephum lib. 11. Antiquit. cap. 6. habere quadam, quæ sient in his septem capitibus. Hinc infert ea fuisse antea hebraicè scripta, & Iosephum sua ex ijs descripsisse. Argumentum tale,

Quicumq; libri habent aliquid, quod est in Iosepho, illi prius fuerunt hebraicè scripti, & Iosephus hoc ex ijs descripsit. Sed hæc septem capita habent aliquid quod est in Iosepho. Ergo Iosephus sua ex ijs descripsit, & hæc prius fuerunt Hebraicè scripta.

Respondeo hoc argumentum nihil probare. Sunt enim multi libri hebraici, qui non sunt canonici. Potuit igitur Iosephus hæc ex hebraicis, & non canonicis libris scribere. Deinde Iosephus multa habet, quæ non sunt ex canonicis hebræorum libris. Sanè historia a. 7. cap. 11. libr. ἀρχαιολογίας vsq; ad finem 20. libri non est in canonicis hebræorum libris. Postremò æquè bene sequitur, Auctorem Estheræ descripsisse ex Iosepho, quàm Iosephū ex illo. Atq; in hanc sententiam magis inclinât Lyra in 10. caput, Esther *Cetera, inquit, quæ sequuntur, non intendo exponere, tum quòd satis apparet eorum sententia ex prædictis: tum quòd non sunt in hebræo, neq; in scriptura canonica. Sed magis videntur à Iosepho & alijs auctoribus*

conficta, & postea editioni vulgata inserta, secundum quod dicit Hieronymus in prologo huius libri. a. addens ea, quæ ex tempore dici poterant, sicut solitum est scholaribus discipulis sumpto themate excogitare. Idem docet Sixtus Senensis lib. 1. scilicet. 2. Cetera sex capitula, inquit, usque ad finem libri, ab incerto græco scriptore addita sunt ex varijs historijs, præcipuè verò ex 11. libro Antiquitatum Iosephi: ex quo exemplum litterarum Haman et exemplum epistola regis Artaxerxis, quæ 13, 16. huius libri capite recitantur, ad verbum desumptæ sunt. Hoc cum videret Bellarminus, attulit aliam Responsionem, & dicit historiam Esther *καὶ ἱστορίῃ* primum hebraicè scriptam esse; alio deinde tempore eandem historiam ab alio copiosius scriptam (nota eiusdem historiæ duos diuersos libros secundum Bellarminum) & à Lyfimacho in Græcam linguam translatam esse. Prioris auctoris librum dicit hebraicè exstare, & istis 10. capitibus comprehensum esse. Posterioris verò libri translationem tantum ad nos peruenisse, eamq; his septem capitibus comprehensam esse. Sed hoc est falsum. Lyfimachus enim non totum librū, Sed tantum *Epistolam Phurim* in græcam linguam transtulit. vt cap. 11. vers. 1. scribitur. Deinde hæc 10. capita, quæ Hebraicè exstant, seriem historiæ magis explicant, quàm hæc septem capita, quæ Græcè extant. Hieronymus enim, Lyra, & Sixtus Senensis nullam historiæ seriem in ijs agnoscunt, sed testantur ea esse *laceras quasdam appendices, & pannosa Additamenta, temerè apposita, & vicūque insuta*, quod autem hæc ipsa additamenta quibusdā locis copiosiora sunt, caussa est quod ex ijs, quæ ex tempore dici poterant, laciniosis verborū

sinibus

*sinibus conficta sunt.* Ergo hæc 7. capita non sunt iste liber, de quo loquitur Bellarminus; aut quod dicit falsum est. Postremò etiamsi verum esset, his 7. capitibus eandem historiam copiosius scriptam esse, quàm ijs decem: tamen ideo non sequeretur, ea esse canonica. Iosephus enim historiam creationis fusiùs explicat, quàm Moses; & tamen Iosephus non est canonicus. Nisi igitur Bellarminus alias rationes habuerit; relinquitur hæc 7. capita esse originaliter Græcè scripta, ac proinde non esse canonica. Secundum Argumentum, quia hæc septem capita cum canonica scriptura ex diametro pugnant.

Quod cum canonica Scriptura ex diametro pugnat, illud non est canonicum. Sed hæc septem capita cum canonica scriptura ex diametro pugnat. Ergo hæc 7. capita non sunt canonica.

Maiorem pono extra controuersiam. Minorem probo. Genuina enim Esther dicit insidias duorum Eunuchorum per Mardochæum detectas esse *anno 7.* *Apueri*, Esth. cap. 2. vers. 16. Addititia autem dicit detectas esse eas *anno secundo eiusdem*, Esth. cap. 11. vers. 2. Bellarminus respondet vndecimũ & duodecimũ caput pertinere ad principiũ libri, & id quod 11. & 12. capite narratur, tantum *de somnio*; quod verò 2. cap. dicitur, de *insidiarum detectione* intelligendum esse. Sed hoc implicat contradictionem. In priore enim argumento dixit esse *duos diuersos libros*, & *utrumque eandem rem narrare*, sed *alterum copiosè, alterum breuiter*. Hic verò cogitur dicere esse *unum & eundem librum*; & *in Græco non narrari idem, quod in hebraeo*. Quæ duo simul vera esse non possunt. Deinde

de si Bellarmini sententia admitteretur, sequeretur 5. integros annos effluxisse inter somniū Mardochæi, & inter insidiarum detectionem. Sed hoc non esse verum, apparet ex fine 11. & ex principio 12. capitis. Sic enim inquit, *hoc somnium, consiliūq; Dei sibi representatum Mardochæus expectatus in animo suo condidit, utq; omni ratione cognoscere voluit, donec nox aduenisset, agebat autem eo tempore Mardochæus in regia cum Bagatha & Thara, duobus regis Eunuchis aula custodibus, & intellexit eorum consilia, studiaq; explorauit, atque didicit, quemadmodum regi Ariaxerxi manus afferre conarentur, eosque ad regem detulit.* Vnde apparet non 5. integros annos; sed tantum vnū diem inter somniū Mardochæi, & insidiarum detectionem effluxisse. Disertè enim dicit Mardochæum eo tempore insidiarū machinationem audiuisse, & patefecisse, quo de somnio cogitabat. Sed cogitabat de somnio postridiè eius diei, quo somniauerat. Si Bellarminus hîc nouam anticipationem cōminiscetur, implicabit se noua contradictione. Dixit enim 11. & 12. caput pertinere ad principium libri fol. 34. linea 34. Deinde dicit hæc omnia in grecis codicibus suo ordine collocata esse; At in ijs 11. & 12. caput tanquam vna Appendix coniunguntur, idem fit in *Versione Hieronymi*, ad quam prouocat Bellarminus. Aut igitur falsum est 5. annos effluxisse inter Insidiarum detectionem, & Mardochæi somnium: aut falsum est 11. & 12. caput pertinere ad principium libri. Secundò genuina Esther dicit Mardochæū propter Insidiarum detectionem nulla premia accepisse, Esther cap 6. vers. 3. Addititia verò dicit eum premia accepisse, Esth. cap 12. vers. 5.

Bel-

Bellarminus respondet hæc intelligenda esse per anticipationem, hoc est, vult Mardochæum eo tempore non accepisse præmium, cum rex sibi prælegi iuberet annales, postea verò egregio munere ornatum esse, & hoc munus intelligi debere per illud, quod cap. 12. & 6. narratur, nempe *exaltationem Mardochæi*. Sed hoc verum esse non potest. Haman enim cap. 12. vers. 6. Mardochæo, eiusq; populo perniciem struebat, postquam Mardochæus ita a rege exaltatus esset. At ex cap. 6. & 7. colligi potest, Hamanem fuisse suspensum eodem die, quo Mardochæus euehebatur. Hæc simul vera esse non possunt. Homo enim suspendio sublatus nemini perniciem machinari potest. Deinde hæc responsio de anticipatione nouam cōtradictionem implicat. dixit n. pag. 34. l. 32. *11. & 12 caput ad principium libri pertinere*. At ipsa detectio facta est cap. 2. vers. 22. Si igitur duodecimum caput iuxta historiæ seriem ante primum collocari debet, doceat Bellarminus, quomodo Mardochæus pro delatione ornatus sit, priusquam detulisset? Præterea addititia Esther dicit Hamanem fuisse Mardochæo, eiusq; populo perniciem machinatum *propter detectos Eunuchos*, Esther cap. 12. vers. 6. Genuina verò dicit id factum esse propter *denegatam adorationem*, Esth. cap. 3, 5. Ad hoc nihil respondet Bellarminus. Porro genuina Esther testatur regem se valdè *benignè intuitum esse*, Esth. cap. 5. vers. 2. Addititia verò dicit regem se valdè *seuè adspexisse*, Esth. 14. 10. Denique genuina Esther dicit Iudæos exitio destinatos esse 13. *die Adar*, Esth. 3, 13. & 8, 12. & 9, 1. Addititia verò dicit eos destinatos esse exitio 14. *die Adar*, Esth. 12,



6. Neque ad hæc quicquam respondet Bellarminus. Cum igitur hæc septem capita non obstantibus Bellarmini conciliationibus cum genuina Esther ex diametro pugnent, manifestum est ea non esse canonica. Tertium argumentum, quia hæc 7. capita cum historica veritate pugnant.

Quod cum historica veritate pugnat, id non est canonicum. Sed hæc septem capita cum historica veritate pugnant. Ergo hæc septem capita non sunt canonica.

Maiorem pono extra controuersiam. Minorem probo. Addititia n. Esther docet, cap. 16, 14. Hamanem voluisse *regnum Persarum ad Macedonas trāsferre*. Hoc verò ante ætatem Philippi, qui est Alexandri Magni pater, fieri nō potuit. Nam ante illud tempus regnū Macedoniæ nullas habuit vires, multo minus habuit vires Persis formidabiles. Vnde apparet hūc personatum Hamanem vel fuisse coætaneū Philippo, vel vixisse post ætatem Philippi. Deinde hic Hamā infidiatus est Mardocheo c. 12, 6. Sequitur ergo & illū fuisse Mardocheo coætaneū. At genuina Esther dicit Mardocheū simul cum *Iechonia Babylonē abductū esse*, cap. 2, 7. Sed à captiuitate Babylonica ad exitum Philippi ferè sunt 300. anni. Si igitur hæc oīa vera sunt, sequitur Mardocheū ad minimum fuisse 300. annorum, cum Esther am regē locaret. At eo tempore nemo ad istam ætatem perueniebat. Bellarminus vt hūc se expediat, mutat se in omnes formas, reiicit opinionem Cani, vituperat sententiam Genebrardi, contemnit iudicium Senensis, Carionis, Benedicti & aliorum. Sed aqua ei hæret, vt est in proverbio.

Dicit



Dicit non ipsum *Mardocheum* abductum esse in captiuitatem, sed in parētibus eum descendisse. At hoc quoniā in scriptura auctoritatem non habet, potest eadem facilitate à nobis contemni, qua ab illo approbari. Hoc cū videret Bellarminus, excogitauit aliā solutionem, & dicit *Paulum Eremitam* fuisse 115. annorū. Ergo *Mardocheum* potuisse Longimani ætatem attingere. Sed etiam si *Mardocheus* potuisset attingere Longimani ætatem: tamen ideo quæstio non esset soluta. Tempore enim Longimani nullæ erant vires Macedonum, neq; eo tempore regnum Persarum per Hamanem ad Macedonas transferri potuit. Deinde *Esther* fuit *Mardochei* patrnelis cap. 2, 7. Ergo vel fuit ei cōtanea, vel non multo iunior. At scriptura dicit eam fuisse omnium puellarum pulcherrimam, sed anus 300. annorū neq; puella est, neq; pulcherrima inter puellas. Imò si quis cōcedat *Estheram* fuisse *Mardocheo* 100. annis iuniorem (quod tamen fieri vix potest) manet tamen eam 200. annorum fuisse, cū regi nuberet. Sed anus 200. annorum neq; puella est, neq; tam formosa esse potest. Hoc adeo mouit Sixtum Senensem, vt pronunciarit cum Hieronymo, Origene & Lyra hæc capita non esse canonica, cui iudicio nōs subscribimus. Quartum argumentum, Quia hæc 7. capita sunt scripta post ætatem Artaxerxis.

Quicquid in Veteri Testamento post ætatem Artaxerxis scriptum est, hoc non est canonicum. Sed hæc 7. capita post ætatem Artaxerxis scripta sunt, Ergo hæc 7. capita non sunt canonica. Maiorem probo. Iosephus lib. contra Appion.

omnia, inquit, *que ab Artaxerxe usq; ad nostram ætatem scripta sunt, non eadem fide, que primis debetur, digna ducuntur, pro eo, quòd non ita constiterit prophetarum surgis & explorata successio.* Idem docet Euseb. Ecclesiast. hist. lib. 3. cap. 10. Minorem probo, quia cap. 11, 1. fit mētio *Ptolomai & Cleopatra.* Deinde *Lyra & Sixtus Senensis docēt hæc ab Iosepho conficta esse.* At illi, vt & Iosephus, vixerunt longo tempore post Artaxerxen. Postremò, horum 7. capitū sunt duæ Editiones, vna *Græca*, altera *Latina*, illæ inter se non cōueniunt cap. n. 15. in principio in vulgata Latina legimus, *Et mandauit ei (hand dubiè, quin Esther Mardocheus) vt ingrederetur ad regem, & rogaret pro populo suo, & pro patria sua, & memorare (inquit) dierum humilitatis tue, quomodo nutrita sis in manu mea, quia Haman secundus à rege loquutus est contra nos in mortem, & tu inuoca Dominū, & loquere regi pro nobis, & libera nos à morte.* Hæc oīa in græca defunt. Dicat Bellarminus quænam hic sit regula veritatis, & quam ob caussam; Nam si græcam editionem dicit regulam esse, cōdemnat editionem vulgatam. Si vulgatam, tum doceat, qua ratione illud sit authenticum, quod ab originali non est profectum. Cū igitur hæc 7. capita sint originaliter scripta græcè, idq; post ætatem Artaxerxis, & multa habeant, quæ cū historica veritate, & canonica scriptura pugnant, cū denique ipsæ horum capitum editiones inter se pugnēt, sequitur ea canonica esse non posse. Nos statuimus cum Athanasio in synopsi *Esther*, cuius initium est, *Anno secundo regnante Artaxerxe, esse librum V.T. non canonicum.*

## CAPVT VII.

*Baruch non esse principium aut regulam Christianorū dogmatum.*

**S**Vperiore capite ostēdimus septem capita posteriora Estheræ non esse canonica: nunc differemus de Baruch: Hunc Bellarminus dicit esse canonicum, nos negamus. Ille probat suam sententiā sex argumentis, quæ ordine expēdemus. Primum argumentum, quia est à synodo Tridentina approbatus. Secundum quia legitur in Ecclesia. Tertium quia aliqui patres ex eo testimonia allegant. Ad hæc tria argumenta respondi capite superiore, neq; est necesse vt istæ Responsiones hīc iterentur. Quartum argumentum, quia vocatur à quibusdam diuina scriptura.

Quemcunque librum aliqui patres nominarunt diuinam scripturam, ille est canonicus. Sed aliqui patres vocarunt Baruch diuinam scripturā. Ergo Baruch est liber Canonicus.

Respondeo Maiorem esse falsam. Ambrosius enim *quartum Esdræ Dei verbum & diuinum vocat, de bono mortis cap. 10. & lib. 2. in Lucam, de nomine Presbyteris.* Et tamen liber quartus Esdræ neq; Dei verbum, neq; diuinus est. Ad Minorem dico, esse in Baruch quædam diuina, & ob eam causam eum κατὰ συνδοχὴν diuinum vocari, & tamen non esse Canonicum. Quintum argumentum, quia aliqui patres putarunt eum esse partem Ieremiæ.

Quem librū aliqui patres Ieremiæ esse putāt, ille est canonicus. Sed Baruch est ille, quem aliq patres Ieremiæ esse putāt. Ergo Baruch est Canonicus.

Bellarminus more suo Maioris falsitatem dissimulat

mulat, & Minorem, quæ non est controuersa, probat multis testimonijs. Sed ego Minore concessa, nego Maiorem. Non enim sequitur Baruch ideo esse canonicum, quod eum aliqui patres Ieremiæ esse putarunt; sed eos patres errasse rectè sequitur. Sextum Argument. Quia Hilarius ponit Baruch in Canone.

Quos libros Hilarius in canone posuit, illi sunt canonici. Sed Hilarius in canone posuit Baruch. Ergo Baruch est canonicus.

Nego Maiorem. Hilarius enim Præfat. in psalm. numerat 22. libros ad numerum litterarum Hebræorum. Deinde addit adhuc duos nempe Tobiam & Iudith nullam aliam ob causam, quàm quod *Græci habent 24. litteras*. Quod sanè iudicium leuissimum est. Nā si ista ratio valet, apud Latinos erunt tantum viginti tres libri canonici. Illi enim tantum habent viginti tres litteras. Deinde & Minorem nego. Hilarius n. in Catalogo librorum Canonicorum nullam facit *Baruch* mentionem. Dicit enim *Ieremias cum Lamentatione & Epistola*. Si Bellarminus dicit hoc de epistola apocrypha, quæ ad finem Baruch ponitur, intelligendum esse, respondeo hoc non dicere Hilarium. Deinde extat epistola apud Ieremiā cap. 29. de qua hoc intelligere possumus. Deniq; illa epistola apocrypha non est Ieremiæ, quod Bellarminus fateatur. Si igitur dictum Hilarij de illa epistola intelligendum est, tum non sequitur eam esse canonicam: sed Hilarium errasse rectè sequitur. Postremò si Hilarij iudicio standum est tum Sapiientia, Ecclesiasticus & Machabæici duo non sunt in canone. Illorum enim Hilarius in præfatione ista nullam facit mentionem

onem. Hæc sunt Bellarmini argumenta, quibus voluit asserere Baruch esse canonicum. Nunc immotis rationibus ostendam eum non esse canonicum. Ac primum quia pugnat cum canonica scriptura, dicit enim cap. 1. vers. 2. *urbem eodem tempore captam & exstam esse*, at contrarium docet Ieremias capite ultimo, & historia Regum lib. 2. cap. 25. Deinde est originaliter græcè scriptus. Hoc affirmant omnes docti. Præterea dico eum nunquam fuisse in canone Hebræo. Et ob eam causam, si Bellarminus pertinaciter dicit eum fuisse hebraicè scriptum, respondeo Baruchum hebraicum nunquam fuisse in canone. Ergo græcam eius versionem in canone esse posse. Sed neque fuit tempore primitivæ Ecclesiæ in canone Christiano. Eusebius enim lib. 3. cap. 10. eum præterit, Idem facit Melito apud Euseb. lib. 4. cap. 26. Et Origenes apud eundem libr. 6. cap. 18. Idem facit Hieronymus in Prologo galeato. Nazianzenus in carminibus de genuinis S. Scripturalibris. Cyprianus in Symbolo. Athanas. in Synop. Laodicenum Cōcilium Canone 59. Hilarius Præf. in Psalmos. Cū igitur Baruch pugnet cū canonica scriptura, & sit originaliter scriptus græcè, nec vnquam fuerit in canone hebræo nec tempore primitivæ Ecclesiæ fuerit in canone Christiano, manifestum est, eum inter canonicos censeri non posse.

## CAPVT VIII.

*Additiones Danielis non esse Principium vel regulam Christianorum dogmatum.*

**B**Aruch sequuntur Additiones Danielis. Eas Bellarminus dicit esse regulam Christianorum dogmatum, nos negamus. Ille suam sententiā probat 6,

argumentis, quæ ordine expendemus. Primum Argumentum. quia Tridentina Synodus eas canonicas esse iudicauit. 2, Quia leguntur in Ecclesia. 3, Quia aliqui patres ex ijs testimonia allegant. 4, Quia aliqui patres eas vocant diuinam scripturam: Hæc argumenta sunt à nobis cap. 5. refutata. Ideo de ijs nunc non dicam. Sed quoniam dicunt has Additiones nunc non tantum in Ecclesia legi: sed etiam *ante mille ducentos annos* in ea lectas esse, ideo præter ista priora ad secundum argumentum adhuc ponnihil respondendum est. Dico igitur istam historiæ notationem Bellarmini causam non iuuare. Nam & *historia martyrum* ante mille ducentos annos in Ecclesia lecta est, legebatur enim *tempore concilij Carthag.* 3. neque tamen est canonica. *Libri item Ephrem* ante mille ducentos annos in Ecclesia lecti sunt, legebantur enim *tempore Hieronymi*, neque tamen sunt canonici. Manifestum igitur aliquos libros ante mille ducentos annos in Ecclesia lectos esse, & tamen non esse canonicos. Quintum argumentum. Quia credibile est, patres, qui Daniele in canonem retulerunt, etiam has Additiones in canonem retulisse. Argumentum tale,

Qui genuinum librum in canonem referunt, ij etiam eius Additiones in canonem referunt. Sed aliqui patres Daniele in canonem retulerunt. Ergo eius etiam Additiones in canonem retulerunt.

Respondeo Maiorem esse falsam. Hieronymus enim genuinum Daniele in canone ponit, has verò *additiones reiecit. Prefat. in Daniel. & Prefat. comment. in Daniel.* Origenes item, Eusebius, Appollinarius, alijq; ecclesiastici viri, & doctores gratia genuinum Daniele recipi-

recipiunt, has verò Additiones sanctæ scripturæ præbere ullam auctoritatem negant. Hieron. Præfat. com. in Dan. Sextū argum. Quia Origenes dicit eas esse canonicas.

Quicquid dicit Origenes hoc est verum. Sed Origenes dicit has Additiones esse canonicas. Ergo hæ Additiones sunt canonicæ.

Respondeo Maiorem esse falsam. Non n. verū est quicquid dixit Origenes. Deinde ipse Bellarminus eius auctoritatē reiicit lib. 4. de Verbo Dei cap. 9. Auctoritat. 8. Sed neq; Minor est vera. Origenes n. negat has Additiones præbere sacre Scripturæ ullam auctoritatem. Hieron. Præfat. Cō. in Dan. Quod verò ad epistolā ad Iulium Africanū attinet, illa non est ferenda. Dicit n. id solum pro vero habendū esse in scripturis divinis, quod 70. Interpretes transtulerūt, Euseb. li. 6. Ecclesiast. hist. cap. 25. At hoc pugnat cum veritate, & cum Origene. Cum veritate; ipsi n. Papistę fatentur versionem 70. non esse autheticam, deinde Daniel non iuxta 70. Interpretes, Sed iuxta Theodotionem in ecclesia legabatur. Hieron. Com. in Dan. Cum Origene; Origenes enim in Editione vulgata asteriscos posuit: docens de hisse que addita sunt: & rursus quosdam versus obelis prenotavit, superflua queque designans. Hieron. præfat. Com. in Dan. quod sanè non fecisset si illud tantum esset verū, quod est in 70. Atq; hæc sunt Bellarmini argumenta pro Additionib. Danielis. Nunc immotis rationibus ostendam, eas non esse canonicas. Ac primum, quia originaliter græcè scriptæ sunt. Hieronym. in Præf. com. in Dan. Non habentur, inquit, apud hebræos, sed sunt Græci sermonis figmentum. Græca translatio docet has Additiones μή ἔστι ἐν ταῖς βιβλίαις

ταυτιδεδιω. Idem docent istę etymologię οχιου οχιου & πλου πειρου v. 14. cap. 13. Atqui nullum librum veteris Test. originaliter gręcè scriptum esse docui antè. Ad duo priora nihil respondet Bellarminus. Ad tertium dicit, nunc quidem talem Etymologiam non esse in hebręa lingua, fuisse tamen olim. Idque probat ex Origene ad Iulium Africanum. Sed inter opera Origenis Basileę edita, nihil extat ad Iulium Africanum. Apud Euseb. Ecclesiast. hist. lib. 6. cap. 23. reperitur quidem Origenis de Susanna testimoniu, idque ex eo libro, qui ad Iulium Africanum scriptus erat. sed huius Etymologię illic nulla fit mentio, Deinde Eusebius, Apollinarius & ipse Origenes contrariũ restantur apud Hieron. Præfat. com. in Dan. fatentur n. has visiones non esse in hebræo, neq; ullam sanctę scripturę auctoritatem prębere, vt antè dictum est. Præterea nunc est eadem lingua hebręa, quę tēpore Origenis erat. Nam & tunc eam ex libris discebant, quemadmodũ nunc faciunt : sed nunc talis etymologia in toto & vniuerso hebręorũ sermone inueniri non potest. Ergo neq; tunc fuit. Relinquitur igitur hos libros originaliter esse scriptos Gręcè. Secũdum arg. Quia hæ Additiones ex diametro pugnant cũ Scrip. canonica.

Quod ex diametro pugnat cum Scriptura Canonica, hoc non est canonicum. Sed hæ Additiones ex diametro pugnant cum Scriptura canonica. Ergo non sunt canonicę.

Maiorem pono extra controuerfiam. Minorem probo. Addititius n. Daniel dicit, se fuisse puerum etate minimum, cũ Susannam vindicaret cap. 13, 45. Ge-  
nuinus verò longè ante dicit, se cum duobus alijs, a re-



ge, i 20 Satrapis præfectum esse, ut audiret rationes regni, ne rex molestia afficeretur cap. 2. vers. 48. & cap 6. vers. 2. Sed puer ætate minimus talibus negotijs præesse non potest. Bellarminus respondet, hæc per anticipationem intelligenda esse. Decimum tertium enim caput debere esse primum. Ac proinde historiam Susannæ primo loco ponendam, utpote quæ accidit Daniele adhuc puero. Reliqua deinde contigisse, postquam Daniel ad virilem ætatem peruenisset. Sed hoc est falsum. Græca enim editio dicit, ἐξ ὁρίων σατταπης παρὰ τῆς τοῦ Δανιηλ ἀρχῆς ἀφωρισμένη, διὰ τὸ μὴ εἶναι αὐτὴν ἀσπαιρὲς τὸ τοῦ δεσπότου τοῦ βῆλ διήγημα, ἐν τοῖς βιβλίοις τῶν ἱεραίων. Vnde sequitur hanc historiam non pertinere ad principiū Danielis, sed esse prorsus à Daniele separatam. Deinde hæc Bellarmini responsio nodum implicat, non soluit. Nam in eodem capite, vers. 63. fit mentio Cyri, Vnde apparet historiam Susannæ tempore Cyri contigisse. Genuinus verò Daniel dicit se cum *Ioachim* cap. 1. vers. 2. & sequentibus, à *Nebucadnezar* captiuū deductum esse. Ab hac verò captiuitate ad Cyrum sunt 70. anni, *Ierem. 29. vers. 10.* At vir 70 annorum non est puer ætate minimus. Ad hoc respondet Bellarminus, *ultimum versum capitis 13, ab eo capite rescindendum esse, & addendum ad caput 14.* Atque ita non historiam Susannæ, sed historiam Beli referendam esse ad ætatem Cyri. Sed neque hoc quæstionem soluit, In historia enim Beli dicit Additius Daniel, *se ab Habacuc cibatum esse*, cap. 14. vers. 36. Sed Habacuc longè ante captiuitatem prophetauit. Dicit enim cap. 1. vers. 6. *Ecce ego suscitabo Chaldeos etc.* Vnde sequeretur Hebacuc ferè 100. ānos prophetaffe. Sed

nemo inter omnes prophetas, ne Ezaias quidem, tam longo tempore prophetauit. Deinde *Eusebius & Apollinarius responderunt Susanna Belisque ac Draconis fabulas non contineri in Hebræo. sed partem esse prophetiæ Habacuc, filij Iesu, de tribu Leui*, Hieron. com. in Dan. Ad hæc respondet Bellarminus, non absurdum esse dicere, duos esse *Danieles*, vnum è tribu Iuda, qui tempore Nebucadnezar vixit, alterum è tribu Leui, qui tempore Cyri vixit, Atque hoc dicit, *multos veteres sensisse, & inter eos Hieronymum præf. com. in Dan.* Sed hoc est falsum. Hieronymus enim non dicit duos *Danieles* esse; sed dicit *has fabulas Habacuc esse, qui fuit ex tribu Leui*, & addit 70. *Interpretes in titulo eiusdem Belis fabula idem ponere.* Deinde accipio duos *Danieles* fuisse, vnum è tribu Leui, alterum de tribu Iuda. Sed eum, qui est ex tribu Iuda, cum tota primitiua ecclesia pro propheta accipio, illum verò qui est ex tribu Leui, cum tota primitiua Ecclesia non agnosco. Tertium Argumentum, Quia hæ Additiones nunquam fuerunt in Canone hebræo, hoc pono extra controuersiam. Quartum argumentum, Quia tempore primitiuæ Ecclesiæ non fuerunt in canone Christiano. Hieronymus enim eas diserte reijcit, *Præf. in Dan. Origenes, Eusebius & Appollinarius negant eas ullam Sanctæ scripturæ auctoritatem præbere.* Hieron. præf. com. in Dan. Idem faciunt alij Ecclesiastici viri, & doctores Græci, ibidem. Cum igitur hæ Additiones sint originaliter scriptæ græcè, & aliquando ex diametro pugnent cum scriptura canonica, nec vnquam fuerint in Canone Hebræo, nec tempore primitiuæ Ecclesiæ in canone Christiano, sequitur eas non esse Canonicas.

## CAPVT IX.

*Tobiam non esse principium Christianorum  
dogmatum.*

**A**Dditiones Danielis sequitur Tobias. Hunc Bel-  
larminus dicit esse regulam Christianorum do-  
gmatum; nos negamus. Ille probat suam sententiam  
quatuor argumētis, quæ ordine expendemus. Pri-  
mum, Quia *Cyprianus dicit eum esse librum Spiritus San-  
cti, in sermone de Eleemosyna.*

Quemcūque librū aliquis pater vocat librum Spiritus  
S. ille est regula Christianorum dogmatum.

Sed Tobias est ille, quem vnus pater vocat li-  
brum Spiritus S. Ergo Tobias est regula Chri-  
stianorum dogmatum.

Respondeo Maiorem esse falsam. Tertullianus  
enim de Idololatria cap. 15. dicit Enoch esse librum  
Spiritus Sancti. *Hac, inquit, Spiritus Sanctus praevidens  
praececinis per antiquissimum prophetam Enoch; neq; tamē  
Enoch propterea est canonicus.* Origenes lib. 10. ad  
Rom. in cap. 16. dicit librum *Hermæ esse diuinitus in-  
spiratum.* at hoc nihil aliud est, quàm esse librum  
Spiritus Sancti. Neque tamen *Hermes* propterea est  
canonicus. Secundum, Quia *Basilius & Calixtus dicūt  
eum esse diuinam scripturam.* Sed ad hoc iam antè re-  
sponsum est. Tertium, Quia *Ambrosius* vocat hunc  
librum *propheticam scripturam.*

Quem librum aliquis pater propheticam scriptu-  
ram vocat, ille est canonicus. Sed Tobias est  
ille, quem quidam pater propheticam scriptu-  
ram vocat. Ergo Tobias est canonicus.

Respondeo Maiorem esse falsā. Augustinus enim

*E s lib. 18.*

lib. 18. de ciuitat. Dei. cap. 36. dicit *tertium Esdra à propheta scriptum esse*; neq; tamen propterea *tertius Esdra* est canonicus. Tertullianus dicit *librum Enoch à propheta scriptum esse*, lib. de Idololatria cap. 15. vt paulò antè probaui, neque tamen *Enoch* propterea est canonicus. Minor est quidem vera, sed non magni momenti. Melito enim, Origenes, Cyprianus, Nazianzenus, Athanasius, Concilium Laodicenum, Hieronymus, Hilarius, Cyrillus, & tota antiquitas contrarium testatur, vt capite quarto & quinto ostendimus. Illorum autem omnium auctoritati vnus Ambrosius postponendus est. Deinde *Ecclesiam non recipere Tobiam inter canonicas scripturas* docet Hieronymus in Præf. ad libros Salomonis. Idem docet Athanasius in *Synopsi*. Cyprianus in *Symbolo*, & Nazianzenus in *Carmine de libris canonicis*. Ambrosius igitur iudicauit eum κατὰ συνειδόχην propheticum esse, aut eius iudicium ab Ecclesiæ iudicio dissentit. Quartum, Quia Augustinus ex eo, tanquam ex canonico libro testimonia allegat. Sed & hoc iam antè refutatum est, & ad Augustini auctoritatem responsum est. Atque hæ sunt Bellarmini rationes pro Tobia. Nunc immotis argumētis ostēdam eum non esse, neque esse posse regulam Christianorum dogmatum. Ac primū quia totus liber est corruptus & deprauatus.

Quod corruptū & deprauatū est, illud non potest incorruptæ, & certæ doctrinæ principium, aut regula esse. Sed liber Tobiae est corruptus, & deprauatus. Ergo non potest incorruptæ, & certæ doctrinæ principium, aut regula esse.

Maiores

Maiores est citra omnem controuersiam vera. Corruptum n. incorrupti regula, & canō esse non potest. Nam inter corruptū & incorruptū nulla similitudo. Minorem probo. Sunt enim duę editiones, una *Latina Vulgata*: altera *Complutensis Græca*. Hæ ambæ ita differentiūt, ut in ijs nihil sit sani. Cap. n. 1. vers. 1. legimus in editione græca, *Liber sermonum Tobia filij Tobia, filij Ananielis, filij Adonielis, filij Gabaëlis, è semine Ajaelius*. hæc omnia in vulgata latina defunt. Eodem cap. vers. 4. in vulgata Latina legimus, *Cūmq; esset iunior omnibus in tribu Naphthali, nihil tamen puerile gessit in opere*. at hæc omnia in Compluteni græca defunt. Ibidem in Compluteni græca legimus, *Ac cū in mea essent patria, in terra Israël adhuc iuuenis, paternæ tribus mea defecit a domo Hierosolymitana, ea quæ ex omnibus Israël tribubus ad sacrificia omnium offerenda selecta fuerat, ubi templum tabernaculi altissimi conseruatum fuerat, atque ad omnes ætates edificatum*. at hæc oīa in vulgata Latina defunt. Eodem cap. vers. 7. legimus in Cōplut. Græca, *Primas omnium fructuum decimas dabam sacerdotibus ab Aarone ortis, qui Ierosolymis ministrabant. alteras decimas vendebam: & profectus, quæ inde confecissem, Hierosolymis annis singulis impendebam. Tertias verò ijs, quibus par erat, elargiebar, sicut Debora mater patris mei mihi præceperat. nam me quidem pater pupillum reliquerat*. Hæc omnia in Latina vulgata defunt. Ibidem in Latina vulgata legimus. *Ita ut tertio anno proselytis, & aduenis administraret omnem decimationem. Hac & his similia secundum Legem Dei puerulus obseruabat*. At horum nihil est in Compluteni græca. Eodem cap. vers. 10. in Latina vulgata legimus, *Quem ab infamia timere De-*

um docuit, & abstinere ab omni peccato. At hæc in Complutenſi græca deſunt. Eodem cap. verſ. 16. in Latina vulgata legimus, *Cum autem veniſſet in Rages Civitatem Nedorum, & ex iſs, quibus honoratus fuerat a rege, habuiſſet decem talenta argenti, & cum in multa turba generis ſui Gabelem gentem videret, qui erat ex tribu eius, ſub Chirographo dedit illi memoratum pondus argenti.* At hæc omnia in Complutenſi græca deſunt. Eodem cap. verſ. 24. in Complutenſi græca legimus, *Qui cum in montes Ararath auſugiſſet, Sarchedonus eiujdem filius illi regnum ſucceſſit: atq; Archiacharum Anaëlis fratris meiſ filium omnibus patris ſui rationibus, totiq; gubernationi præfecit.* At hæc omnia in vulgata Latina deſunt. Eodem cap. verſ. 23. in vulgata Latina legimus, *Tobias verò cū filio ſuo, & cum uxore fugiens nudus latuit, quia multi diligebant eum.* At horum nihil eſt in Complutenſi græca. Eodem cap. verſ. 25. in Complutenſi græca legimus, *Erat autem ille à poculis, atque ab annulo ſignatorio, tñ à rationibus ac diſpenſator, vicariumq; ſibi Sarchedonus conſtituerat è fratre meo natum.* At hæc omnia in vulgata Latina deſunt. cap. 3, 1. legimus in græca editione, *Cum aut domum meam rediſſem, uxorq; mea Anna una cum filio Tobia reſtituta mihi eſſet, in feſto Pentecoſtes, quod ſeptem hebdomadarum ſacrum eſt.* At hæc deſunt in vulgata Latina. Eodem cap. verſ. 12. legimus in vulgata Latina. *Hanc autem tentationem ideo permiſi Dominus euenire illi, ut poſteris daretur exemplum patientiæ eiuj, ut Sancti Iob. Nam cū ab infantia ſua ſemper Deum timuerit, & mandata eiuj cuſtodierit, non eſt contriſtatus contra Deum, quòd plaga cecitatis eueniret ei: Sed immobilis in Dei timore permansiſſet agens gra-*

*ius Deo, omnibus diebus vita sua. Nam sicut beato Iob  
 insultabant reges: ita isti parentes & cognati eius irridebat  
 vitam eius, dicentes, ubi est spes tua, pro qua Eleemosynas  
 & sepulturas faciebas? Tobias verò increpabat eos, dicens:  
 nolite ita loqui, quoniam filij sanctorum sumus, & vitam  
 illam expectamus, quam Deus daturus est ijs, qui vitam  
 suam nunquam mutant ab eo. At hæc omnia in Complu-  
 tensi græca defunt. cap. 3. vers. 6. legimus, in Græca,  
 ut dissoluatur atq; in terram redigar. Hoc in vulgata latina  
 deest. Eodem versu legimus, in Græca; quoniam ex-  
 probationes immeritis audiui, in magnòque dolore sum,  
 iube nunc, ut ijs solutus angustijs, in locum æternum conce-  
 dam, ne tuam à me faciem auertas. Hæc in vulgata Lati-  
 na defunt. Eodem cap. vers. 8. legimus in Editione  
 græca, An nescis, inquebant, te viros tuos suffocauisse? sep-  
 tem iam viros habuisti, neque ullius, illorum nomine fuisti  
 cognominata. Hæc in vulgata Latina defunt. Eodem  
 cap. vers. 11. legimus in vulgata Latina, Sed in Oratio-  
 ne persistens cum lachrymis deprecabatur Deum, ut ab isto  
 improprio liberaret eam: factum est autem die tertia, dum  
 compleret orationem, benedicēs Dominum. At hæc in edi-  
 tione græca defunt. Eodem cap. vers. 17. legimus in  
 editione græca, Nec unquam nomen meum patriq; mei  
 in terra captiuitatis meæ aliqua turpitudinis macula in-  
 quinaſſe. unica sum filia patri meo, neq; puellus ei est, qui  
 eius hæres futurus sit, neq; frater propinquus, aut filius ab  
 eo natus, cui ego me ipsam reſeruem uxorem. Quid est cur  
 ego in vita diutius maneam. Quid si tibi non placet, ut  
 occidar, fac ut ad me respicias, misericordiamq; in me con-  
 feras, ne ego posthac eiusmodi probrum amplius audiam.  
 Hæc omnia in vulgata Latina defunt. Eodem cap.  
 vers.*

vers. 18. legimus in vulgata Latina, *Virum autē cum timore tuo, non cum libidine mea consensu suscipere, & aut ego indigna sui illis, aut illi, forsitan mihi non fuerunt digni: quia forsitan viro alij conseruasti me, non est enim in hominis potestate consilium tuum, hoc autem pro certo habet omnis qui te colit, quod vita eius, si in probatione fuerit, coronabitur. si autem in tribulatione fuerit, liberabitur: & si in corruptione fuerit, ad misericordiam tuam venire licebit. non enim delectaris in perditionibus nostris, quia post tempestatem tranquillum facis, & post lachrymationem & fletum exultationem infundis, Sit nomen tuum, Deus Israël, benedictum in secula.* Hæc omnia in Complutēsi desunt. Eodem cap. vers. 25. legimus in græca editione, *ut & Tobia oculorum albumen abstergeret, & Saram Ragaclis filiam Tobie filio uxorem daret, Asmodeumq; malum Demonium cōstringeret, quoniam ad Tobiam in re quodam hereditario pertinebat, eode mō ipso tempore reuersus Tobias, introiuit domum suam, & Sara ē cœnaculo descendit.* Hæc omnia in vulgata Latina desunt. cap. 4. 5. legimus in Editione græca, *Iustitiam autem cole omnibus vite tue diebus, neq; vias iniustitie cōteris: si enim veritati studueris, omnia qua geres, tibi bene ac feliciter succedent, omnib; q; is, qui iustitiam coluerunt.* Hæc in vulgata desunt. Eodem cap. vers. 13. in editione græca legimus, *Neq; alienigenam mulierem, qua ē tribu patris tui non sit, tibi adiungas. Sumus enim prophetarum filij, Noë, Abraham, Isaac, Iacob, priscis orti maioribus; memento filij, illos duxisse uxores e fratribus suis, atque in sobole sua benedictos fuisse. semenq; ipsorum terram possesurum.* Hæc in vulgata desunt. Eodem cap. vers. 20. in Græca legimus, *Omniaq; tua instituta & Consilia prosperentur*



prosperentur, neque enim est ulla gens, quæ consilium habeat, sed ipse dominus omnium bonorum auctor est; & quem vult, quo vult modo, humiliat. Nunc igitur fili memineris præceptorum meorum, neque ex animo tuo ea unquam deleantur. Hæc omnia in vulgata Latina desunt. Eodē capite ver. 21. in vulgata Latina legimus, Et chirographum eius apud me habeo, & idæ perquire, quomodo ad eum peruenias, & recipias ab eo supra memoratum pondus argenti, & restitnas ei chirographum suum. Hæc omnia in Græca editione desunt. Cap. 5. vers. 12. In vulgata Latina legimus, Et ait Tobias quale gaudium mihi erit, qui in tenebris sedeo, & lumen calis non video. Cui ait iuuenis: forti animo esto, in proximo est, ut à Deo cureris. Dixit autem illi Tobias, nunquid potes perducere filium meum ad Gubelum in Rages civitatem Medorum, & cū redieris, restituam tibi mercedem tuam? & dixit ei angelus, ego ducam & reducam eum ad te. Hæc omnia in editione Græca desunt. Eodem cap. vers. 20. legimus in editione vulgata, Dixit autem ei angelus, ego sanum ducam, & sanum reducam filium tuum. Respondens autem Tobias ait: Benè ambuletis, & sit Deus in itinere vestro, & angelus eius comitetur vobiscum. Tunc paratis omnibus, quæ erant in via portanda, fecit Tobias vale patri suo, & matri suæ, & ambulauerunt ambo simul. Hæc omnia in editione græca desunt. Ibidem in editione græca legimus. Nam tu quidem frater meus es, ex honesta bonâque ortus progenie: cognoui enim Ananiam & Ionathan magni illius Samariae filios, cū unā Hierosolymam ad orandum accederemus, primogenita, & fructuum decimas offerentes. neq; unquam in errore fratrum nostrorum versati fuerunt.

Sed diu

Sed dic quam tibi dem mercedem? drachmâmnè in dies singulos, simulq; & ea, quæ sunt ad iter necessaria, ut & meo filio? quin etiam si vos incolumes redieritis, ad hanc mercedem aliquid addam. Itaq; cùm inter eos conuenisset, Tobias filium monuit, ut se ad iter pararet, faustamq; eis profectiõnem precatus est. Cùm aut ille, quæ ad iter sunt necessaria, parauisset, pater ei dixit, tu quidem cum hoc homine proficiscere. Egressi sunt igitur ambo ut abirent, & canis adolescentis una cum illis. Hæc omnia in vulgata Latina desunt. Reliqua capita æquæ sunt deprauata, & corrupta. imò si quis has duas editiones diligenter inter se conferet, videbit vix vnâ periodum esse, in qua hæ duæ editiones per omnia conueniant, sed mihi non libet plura describere. Hæc enim hominibus non contentiosis euidenter ostendunt Tobiam esse corruptum. At quod corruptum est, ex eo nihil per se, nisi quod corruptum est, colligi potest. Deinde hæ duæ editiones sæpè inter se ex diametro pugnant. Vulgata enim dicit Tobiam fuisse *quinquaginta sex annorum*, cùm visum amitteret, cap. 14. 3. Græca verò dicit eum tum fuisse *annorum quinquaginta octo*, cap. 14. vers. 2. Deinde vulgata dicit, eum *quatuor annos cæcum fuisse*, cap. 14. vers. 3. Græca verò dicit eum *octo annos fuisse cæcum*, cap. 14. vers. 2. Denique vulgata dicit Tobiam iuniorem habuisse *septem filios*, cap. 14. vers. 5. Græca verò dicit eum tantum *sex filios habuisse* cap. 14. vers. 5. Prætereà vulgata dicit Tobiam seniore habuisse *102. annos cùm moreretur*, cap. 14. vers. 2. At Græca dicit eum habuisse *annos 158, cùm moreretur*, cap. 14. vers. 7. Adde vulgatam dicere Senacheribum post *quadraginta quinque dies* occisum esse à filiis suis, cap. 1.

cap. 7. vers. 24. Græca verò dicit eum post *quingenta et quinque* dies à filiis suis occisum esse. Quid, quòd Vulgata dicit Tobiam juniorem *vixisse annos nonaginta novem*, cap. 14. vers. 16. Græca verò dicit eum *vixisse annos centum viginti septem*, cap. 14. vers. 16. At quod ita incertum est, hoc utique certæ doctrinæ principium esse non potest. Secundum argumentū, Quia neutra editio est sibi ipsi consentanea.

Quod reuera secū pugnat, hoc non potest indubitata & certæ doctrinæ principium esse. Sed quælibet editio Tobia secū pugnat. Ergo non potest indubitata & certæ doctrinæ principium esse.

Maiorem pono extra controuersiam. Quod enim non apparenter, sed verè secum pugnat; illud non potest eius doctrinæ, quæ immutabiliter vera est, principium esse. Minorem probo. Duæ, ut dixi, sunt huius libri editiones, vna *Latina Vulgata*, altera *græca*. Neutra est sibi ipsi consentanea. Græca enim dicit cap. 1. ver. 4. *Defectionem Israelis factam esse Tobia seniore adhuc iuvene*. At illa (sequor Funicium) incidit in annū mundi 2970. Eadem dicit eum post mortem *Senacheribi* (quæ contigit anno mundi 3230) *cæcum factum esse*, cap. 2. vers. 11. Vnde apparet eum non annumeratis annis iuventutis suæ 260 annos vixisse priusquam cæcus fieret. Eadem dicit cap. 14. vers. 2. *eum octo annos cæcum fuisse*. Ex eodem capite colligi potest eum *nonaginta duos annos* vixisse post visum recuperatum. Hæc oīa in vnum collecta, & iuuetutis annis annumeratis ostendunt, eum ad minimū 360. annos vixisse. Atqui eadem Græca editio dicit eum mortuū esse *anno ætatis suæ 158*. cap. 14, 13. Quæ omnia si vera sunt

ra sunt, sequitur eum 212. annos vixisse, postquam mortuus esset. Deinde antè ostendi ex græca colligi posse, Tobiam seniore non annumeratis annis iuventutis suæ, habuisse *annos 254* cùm visû perderet. At eadem græca dicit eum *anno ætatis suæ quinquagesimo octavo* visum perdidisse. Manifestum igitur Græcam editionem sibi ipsi non esse consentaneam. Sed & Vulgata Latina est nihilo constantior. Dicit enim cap. 1. vers. 11. *Tobiam iuniorem simul cum patre à Salmanaasar captum esse.* Illa captivitas incidit in annum mundi (sequor Funcium) 3224. Eadem dicit *templum domini fuisse exustum Tobia iuniore adhuc vivente,* cap. 14. vers. 7. At hoc exustû est anno mundi 3356. Ibidem scriptum est, *eum parentibus mortuis in Mediam profectum esse, atque isthic tam diu vixisse, ut videret quintam generationem, filios filiorum suorum,* cap. 14. vers. 15. unde sequitur eum non annumeratis istis annis, quos in patria ante captivitatem, & in Media post obitum patris, vsq; ad quintam generationem vixit, fuisse centum triginta duorum annorum, cùm moreretur. At eadem vulgata dicit eum *anno ætatis suæ nonagesimo nono mortuum esse,* cap. 14. vers. 16. Manifestum igitur neq; vulgatam sibi ipsi cõsentaneam esse. At quod sibi ipsi contradicit, hoc utique non potest immotè & constantis doctrinæ principium esse. Tertium argumentum, Quia docet vana.

Quod docet vana, illud non potest eius doctrinæ, quæ immutabiliter vera est, principium esse. Sed hic liber docet vana. Ergo non potest eius doctrinæ, quæ immutabiliter vera est, principium esse.

Maior

Maiores est certa, ex vano enim & mendaci, nihil per se, nisi vanum & mendax colligi potest. Minorem probo cap. enim 15. vers. 18. dicit angelus *se esse Azariam Anania filium*. capite autem 12. vers. 15. dicit *se esse Raphaellem angelum Domini*. At si est angelus Dei, tum non est Ananiæ filius, & si Ananiæ filius est, tum non est angelus. Ad hunc locum Franciscus Iunius veteris Testamenti optimus interpres. *Hoc est*, inquit, *mendacium*, quo neque Deus, neque veri eius angeli in canonicis libris leguntur *usi*, quod mendacium (licet multa hinc in derationes comportentur) est mendacium à Deo, & ab electis eius angelis alienissimum. Simile est, quod cap. 12. vers. 16. dicit, *se esse vnum ex istis septem angelis, qui astant ante Dominum*. Hoc æquè verum est, atque illud prius. Daniel enim illustrior testis cap. 7. vers. 10 dicit *millies mille ministrare ei*, & *decies milies centena milia coram eo stare*. Aut igitur falsum docet Daniel, aut falsum docet hic personatus Raphaël. Scitè idem Iunius, *Nihil in toto orbe terrarum magicū dici potest*, aut hoc ex principijs magia petitum est, quorum doctores primarij ex India, & Bactriana profecti, cum Iudeis suum virus communicauerunt: Nam statuunt illi Angelos horarios, diarios, & alios cali regionibus attributos, principes, ministros, ex quibus Zoroastres Bactrianus, Menastor Indus, & alij scelerum concinnatores suas magie observationes elaborauerunt. Atque hoc quidem vitio Iudeos fuisse inquinatos, ostendit Epiphanius, heresi de phariseis. Ipsorum libri, & diuina observationes idem testantur, diem enim Solis Raphaëli, diem luna Gabriëli, diem Martis Gammaëli, diem Mercurij Michaëli, diem Iouis Tzidkiëli, diem veneris Hanaëli, diem Sabbati Kephariëli attribuunt, eos quoque

dominos statuunt omnis administrationis, in illum diem necessaria. Ex iisdem fontibus profecta est illa *Medicina* cap. 6. vers. 8. Talibus enim medicamentis fugari Sathanam non docent sacræ literæ. Franciscus Iunius respondit totum illud esse *Talmudicum*. Lyra, si Demones, inquit, haberent corpora sibi naturaliter unita, sicut dicit *Apuleius*, quod demones sunt animalia, corpore aërea, tempore aeterna, animo passiva: non esset impossibile, quod res naturales facerent in eis impressionem ratione corporum; sed quia secundum fidem nostram, & etiam Philosophorum doctrinam, sunt substantie simpliciter æternæ, ideo nulla corporalis creatura potest in eis facere aliquam impressionem. Et paulò post, Quod autem aliquando Demones ab obsessis corporibus recedunt, ad deportationem aliquorum lapidum, & herbarum; & pronuntiationem carminum & huiusmodi; non fit virtute talium, sed Demones hoc fingunt voluntariè, ut teneant homines in errore, &c: Simile penè iisdem verbis memini me aliquando apud Thomam legere, Et apud VVierum de *Prestigijs Demonum* lib. 4. cap. 17. & 18. Sed hæc sufficiant ad huius scripti vanitatem ostendendam. Quod autem vanum est, hoc veritatis regula esse non potest. Quartum argumentum, Quia Esdras hunc librum in canonem non retulit, hoc constat ex prioribus. Vnde sequitur hunc librum eo tempore aut fuisse, aut non fuisse scriptum; si fuit scriptus, tum non est canonicus, Esdras enim non reliquisset eum extra canonem. si non fuit scriptus, tum etiam non est canonicus. quod enim post illam ætatem scriptum est, hoc non habere canonicam auctoritatem iam antè ostendimus. Deinde hic liber tempore primitivæ  
Ecclesiæ

Ecclesię non fuit in canone Christiano, hoc item patet ex prioribus. Quam ob causam & nunc in canone esse non potest. Postremò hic liber tempore Hieronymi exstabat Chaldaicè, *ut docet Hieronym. in Prologo Tobia*, neque fuit ab eo diligenter versus, Hieronymus enim eam linguam ignorabat. ideo *utriusq; lingua peritissimum loquacem reperiens, unius diei laborem accipiebat, & quicquid ille hebraicis verbis exprimebat, hoc Hieronymus accito notario latinis verbis exponebat.* Hinc illa vitiosa exēplariū varietas. Quid aut si ille loquax Tobia mentem non fideliter expressit? quid verò si quædam addidit, quædam detraxit? Quod sanè factum esse docet illa portentosa varietas, & frequens contradictio. Exstant nunc quidem duæ Hebraicæ editiones, sed quas ab audaculis hominibus, & neque de Hebraea lingua, neq; de Ecclesia benè merentibus scriptas esse spondet Franciscus Iunius. Cùm igitur totus liber vitiosus sit, & sibi ipsi contradicat, cùm deniq; multa vana in eo doceantur, & cùm ille tempore Iudaicæ, & primitivæ Ecclesiæ non fuerit in canone, manifestum est eum nunc in canone esse non posse. Nos concludimus eum receptum esse ab Ecclesia, *ut ad morū informationem in ea legatur; tamen eius auctoritatem ad probandum ea, quæ in contentionem veniunt, minus idoneam reputari, ut dicit Hieronym. in Prolog. super Iudith, & in Prolog. super parabol. Salomon. Lyra in præf. ad Tobiam.*

## CAPVT X.

*Iudith non esse principium, neque regulam Christianorum dogmatum.*

**T**Obiam sequitur Iudith. Hâc Bellarminus dicit esse Regulam Christianorum dogmatum . nos negamus . Ille probat suam sententiam duobus argumentis. Primum, Quia Nicena Synodus eam canonicam esse dicit.

Quê librû Nicena Synodus ita in sanctis Scripturæ libris numerat, vt sit idoneus ad fidei dogmata cōprobāda, ille est canonic⁹. Sed Iudith est ille liber, quē Nicena Synodus, teste Hieronymo ita in sanctis &c. Ergo Iudith est canonica.

Respondeo in Maiore esse fallaciam à non caussa vt caussa . Nulla enim Synodus habet auctoritatem ex libro non canonico faciendi canonicum, vt antè ostendimus. Quam ob causā si Iudith antea non fuit canonica, tum propter Nicenæ Synodi auctoritatem canonica fieri non potest. Minorem dico esse manifestè falsam. Nullum enim verbum apud Hieronymum de ea re exstat. Verùm quoniam Bellarminus Minorem probat , audiamus ipsius probationem. *Hieronymus*, inquit, Præfat. ad Iudith, *asserit Iudith apud Hebræos censerī in libris sanctis. Deinde Nicena Synodus teste Hieronymo, ita retulit librum Iudith in numerum sacrorum librorum, vt eum censuerit idoneum esse ad fidei dogmata cōfirmāda. Hic duo dicit Bellarminus. Vnum Hebræos numerare Iudith in sanctis libris. Alterum, Nicenam Synodum, teste Hieronymo, ita retulisse Iudith in numerum sanctorum librorum, vt censuerit eum idoneum esse ad fidei dogmata comprobāda. Ad primum respondeo esse mendum descriptoris . Aliqui enim libri legunt *hagiographa*, alij *apocrypha*. Hoc testantur ipsi papistici doctores. Brito in præfat, Hieronymi ad Iudith*



Iudith: *Hic liber*, inquit, *apud Hebræos inter apocrypha computatur. Quod dicit Hieronymus in Prologo, qui inchoat. Viginti & duas litteras. Si ergo in prologo super Iudith alicubi legitur, inter Hagiographa, vitium scriptoris est, hucusque verba Magistri. cum hoc testimonio consentit auctor glossæ ordinariæ in Præfat. Hieronymi ad Tobiam; alia littera, inquiēs, habet apocrypha, quod est melius, quia Hieronymus in Prologo Galeato, enumerans libros canonicos, inter quos iste non est, refert quicquid extra hos est, inter apocrypha esse computatum. Quin ipse Hieronymus disertè negat Iudith inter hagiographa numerari. In Prologo enim Galeato dicit tantum novem libros esse hagiographos. Idem docet Glossa ordinaria in Præfat. Hierony. ad Tob. Sed Iudith non est inter illos novem. Deinde Hieronymus in eadem præfatione reijcit Iudith inter apocrypha. Si igitur hoc loco eum numeraret inter hagiographa, tum contradiceret sibi ipsi. Præterea Iudæi asserunt se tantum viginti duos libros sanctos habere. Testis Iosephus lib. 1. cont. Appion. In ijs autem non est Iudith. Manifestum igitur Iudith ab hebræis in sanctis libris non numerari. Si tamen Bellarminus istam vocem *Hagiographa* pertinaciter vserit, respondebo cum glossa ordinaria in præfationem Hieronymi ad Tobiam, *enim potius & verius dixisse inter apocrypha, vel largè accipere hagiographa, quasi sanctorum scripta, & ita non esse de numero illorum novem, quæ propriè dicuntur hagiographa. Vnde apparet duplex esse hagiographum, unum propriè, alterum impropriè dictum, illud est simpliciter sanctum, & ob eam causam idoneum ad fidei dogmata confirmanda, hoc tantum καὶ τὸ sanctum est,**

ac proinde ad fidei dogmata confirmanda non idoneum. Hoc ipsum & Bellarminus innuere videtur, de verb. Dei lib. 1. cap. 12. *Dicit enim Iudith numerari in sanctis libris, qui tamen non sint idonei ad fidei dogmata confirmanda.* plura vide capite quinto. Aliquod igitur sanctum non est idoneum ad fidei dogmata confirmanda. Atque hæc de primo membro. Alterum membrum est prorsus falsum. In tota enim præfatione Hieronymine verbum quidem de ea re exstat, Et nisi Bellarminus testimonium hoc in ista præfatione ostenderit, manifestum est eum falsa allegare. Deinde Hieronymus in Prologo Galeato dicit, *Iudith inser Apocrypha ponendam esse.* Ibidem dicit eam non esse in canone. Contradiceret igitur manifestè sibi ipsi Hieronymus, si verum allegaret Bellarminus. Prætereà idem Hieronymus in præfat. ad libros Salom. dicit *Ecclesiam quidem legere Iudith: sed eam inter canonicas scripturas non recipere.* Aut igitur errat Ecclesia, dum librum à Nicena Synodo approbatum non recipit: aut falsum allegat Bellarminus, dum hoc Nicenæ synodo tribuit. Imò non solum Hieronymus asserit Iudith ab Ecclesia inter canonicas scripturas non recipi: Sed omnes reliqui patres, qui canonem Ecclesiasticum conscripserunt, ut Athanasius in *Synopsi*, Cyprianus in *Symbolo*, Nazianzenus in *carminibus de genuinis S. scripture libris* idem testantur. Cum hoc testimonio congruit Brito & glossa ordinaria in *Præfat. Hieronymi ad Tobiam & Iudith*, quemadmodum antè ostendimus. Aut igitur concilium Nicenum pugnat cum Ecclesia, aut fuit ab Ecclesia repudiatum, aut deniq; non dixit Iudith esse canonicam

nicam. Sed quid ego hæc disputo? manifestum est Hieronymū hoc non scripsisse. Et vt hoc rectiūs intelligatur, adscribam ipsa Hieronymi verba, Præfat. ad Iudith. *Cuius*, loquitur Hieronymus de Iudith, *auctoritas ad roboranda illa, que in contentionem veniunt, minus idonea indicatur. Sed quia hunc librum Synodus Nicena in numero sanctarum scripturarum legitur computasse, acquiesci postulationi vestra, imò exactioni. & sepositis occupationibus, quibus vehemēter artabar, huic unam lucubratiunculam dedi, magis sensum è sensu, quam verbum ex verbo transferens.* Ex his verbis liquidè apparet, Hieronymum non dicere concilium Nicenum ita referre Iudith in numerū sanctarum scripturarū, vt eam censuerit idoneā esse ad fidei dogmata confirmanda. sed simpliciter dicere Nicenam Synodum computasse Iudith in numerum sanctarum scripturarum. At hæc duo, nempe computari in numero sanctarum scripturarum, & ita computari in numero sanctarum scripturarum, vt idoneum censeatur ad fidei dogmata comprobanda, longè differunt. Vnū enim dixit Hieronymus, Alterum non dixit. Deinde vnum est verum, alterum non est verum. Liber enim aliquis dupliciter computatur in numero sanctarum scripturarum: vel quod idem est, libri sancti sunt duplices, alij propriè, alij impropriè sic dicti. Illi sunt idonei ad fidei dogmata comprobanda: Hi non sunt, vt suprā ex Britone & Glossa ordinaria probatū est. Iudith autem impropriè sancta est. Potest enim *in Ecclesia legi: sed ad ea, que in cōtentionem veniunt, probanda, non est idonea.* Hoc docet Hieronymus in Prologo Galeato: negat enim *eam esse in cano-*

*ne*. Si non est in canone, quomodo potest rerum controuerfarum canon esse. Et vt omnis tergiuerfandi materia tollatur, Hieronymus dicit Præfat. ad lib. Salom. *Iudith legere quidem Ecclesiam, sed in numero canonicarum scripturarum non recipere*. Idem docent Athanasius, Cyprianus, Nazianzenus & alij, quemadmodum suprà ostendimus. Potest igitur Iudith inter sanctos libros censerì, & tamē non esse canonica. Deinde Hieronymus non dicit Iudith ideo esse idoneam ad fidei dogmata confirmanda, quod sit à Nicena Synodo in numero sanctorum librorum computata; sed dicit *se eam ideo vertisse*, quòd Nicena Synodus eam in numero sanctorum librorum computauerit. Manifestum igitur Nicenam synodum ab Hieronymo non vt causam authenticæ auctoritatis, sed tantum vt causam suæ versionis allegari, ac proinde falsum adduci à Bellarmino, & per consequens Iudith non esse canonicam.

Secundum Argumentum, Quia Iunilius Africanus, & Isidorus dicunt hunc librum censerì ab Ecclesia inter diuinos libros. Sed ad hoc argumentum respondimus cap. 8. Atq; hæc sunt Bellarmini argumenta, quibus Iudith esse canonicam asserere conatus est. nunc immotis rationibus ostendam eam non esse canonicam. Primum argumentum, quia non est in canone Hebræo. Testis Iosephus lib. 1. *cont. Appion. & Eusebius lib. 3. cap. 10. Ecclef. Hist.* Secundum Argum. Quia tempore primitiue Ecclesiæ non fuit in canone Christiano. Testis Hieronymus in *Prologo Galeato*, Cyprianus in *Symbolo*, Nazianzenus in *carminibus de genuinis S. Scriptura libris*. Epiph-

phanus *Heresi sexta*, & in libro de *Ponderibus*. Brito & Glossa ordinaria in *Præfat.* Hieronymi ad *Iudith*, & ad *Tobiam*. Tertium argumentum, Quia *Iudith* tempore Hieronymi fuit corrupta & deprauata. Hoc docet Hieronymus in Prologo ad *Iudith*. *Multorum*, in-  
 quiens, *codicum varietate vitiosissimā amputami*. Ad hanc Præfationem inquit Brito, *dupliciter ostendi hūc librū non esse authenticum*, primò quòd apud *Hebraeos* est apocryphus, secundò quòd apud *Chaldaeos* erat corruptus. Hæc vitiosa varietas lectores adhuc torquet. Exstant enim duæ Versiones, vna Latina vulgata, altera Complutensis græca. Quæ ita dissentiunt, vt sæpè quatuor & quinque integræ periodi inueniantur, quæ vel in hac, vel in illa non exstant. Exemplum vnum, atque alterum annotabo. Capite primo post versum duodecesimum legitur in Complutensi: *Anno autem decimo septimo aciem cum omnibus suis copijs aduersus Arphaxadem instruxit, atque eū bello superauit, omnemque potentiam, equitatum, omnesque eius currus euerit. Atque urbibus eius potitus vsque ad Egbatana peruenit: captisque urbis turribus, plateisque peruastatis, decus eius ad opprobrium redegit. Ipsum autem Arphaxadem in montibus Ragan assecutus, iaculis confixit suis, eūque prorsus eo die perdidit. His rebus gestis ipse cum omni turba suorum, & maxima bellicoforum virorum multitudine Nininem reuersus, otia ibi conuiuiaque cum exercitu per dies centum & viginti agitaui.* Hæc omnia in vulgata editione defunt. Capite secundo post versum decimum quintum legitur in complutensi; *Illic denuntiabis, vt aquas & terras præparent mihi, qui in furore meo sum eos invasurus, omneque solum terra pedibus copi-*

arum mearum operiturus, quibus ipsos daturus sum diripiendos: ita ut saucy valles & torrentes impleat, effusaq; redundent præ cadaueribus flumina: tum autem me captiuos ex ipsis ad ultimas quasq; terras abducturum. Tu autem prægressus, mihi præoccupabis omnes ipsorum fines, eosq; tibi deditos mihi in diem redargutionis asseruabis. Hæc in vulgata Latina desunt. Capite quarto post versum decimum legimus in Complutenfi. *Exaudiuit itaque Deus precationem eorum, afflictionemq; respexit. porro populus per totam Iudeam, ac Hierosolymam complures dies ante sanctuaria omnipotentis domini ieiunia suscipiebat.* Hæc in vulgata Latina desunt. Eodem capite post versum decimum legimus in vulgata Latina, *Tunc Eliacim sacerdos domini magnus circuiuit omnem Israel, allocutusq; est eos dicens, Scitote quoniam exaudiet Deus preces vestras, si manentes permanseritis in ieiunijs, & orationibus in conspectu domini. Memores estote Moysi serui domini, qui Amalec confidentem in virtute sua, & in potentia sua, & in exercitu suo, & in clypeis suis, & in curribus suis, & in equitibus suis, non ferro pugnando, sed precibus orando deiecit. Sic erunt uniuersi hostes Israël, si perseueraueritis in hoc opere, quod cœpistis. Ad hanc igitur exhortationem eius deprecantes permanebant in conspectu Domini.* Hæc omnia in Complutenfi desunt. Capite quinto post versum decimum quartum in vulgata Latina legimus. *Illinc fontes amari obdulcati sunt eis ad bibendum, & per annos quadraginta annonam de cælo cōsequuti sunt. Vbiunq; ingressi sunt, sine arcu & sagitta, & absq; scuto & gladio, Deus eorum pugnavit pro eis, & vicit. Et non fuit qui insultaret populo isti, nisi quando recessit à cultu Domini Dei sui. Quotiescunq; autem præter ipsum*

ipsum Deum suum, alterum coluerunt, dati sunt in praedam, & in gladium & in opprobrium. Quotiescunq; autem poenituerunt se recessisse à cultu Dei sui, dedit eis Deus virtutem resistendi. Hæc omnia in Complutenſi defunt. Capite septimo post versum nonum legimus in Complutenſi: Nos autem cum populo nostro in propinquos montium vertices ascendemus, ibi vallum faciemus praesidio futurum, ne quis urbe egrediatur. Ita ipsi uxoresq; ipsorum ac liberi fame tabescent, & antequam gladius in eos seniat, in domesticis plateis interibunt, tuq; ita rependes vicem ipsis perniciosam, eo quòd seditionem moliti sunt, nec placide tibi ad tuum nutum obsequuti. Hæc omnia in vulgata Latina defunt. Eodem capite post versum decimum in Complutenſi legimus: Filij autem Esau & Ammonita in regionem montanā ascenderūt, castraq; locauerunt è regione Dothaim. Porro partem suorum miserunt ad Austrum & Subsolanum aduersus Ecrebel iuxta Chusi, quæ super torrentem Mocho mur sita est: reliquus Assyriorum exercitus in campo castra habuit, totamq; terræ faciem operuit, ut cuius tentoria atq; impedimenta multitudine latissimè paterent. Filij autem Israël clamabant ad Dominum deum ipsorum collapsi animis, quòd ab hostibus conclusi essent, nec haberent è medio ipsorum effugium. Hæc omnia in vulgata Latina defunt. Eodem capite post versum decimum octauum legimus in vulgata Latina, Peccanimus cum patribus nostris, iniuste egimus, iniquitatem fecimus. Tu quia pius es, miserere nostri: aut in tuo flagello vindica iniquitates nostras, & noli tradere confitentes te populo, qui ignorat te. Vt non dicant inter gentes, ubi est Deus ipsorum? Et cum fatigati his clamoribus & his fletibus lassati siluissent. Hæc omnia

omnia in Complutenſi deſunt. Deinde hæ duæ Verſiones ex diametro pugnant. Vulgata enim dicit Nabuchodonofarem anno *decimo tertio* conſilium cepiſſe de toto orbe ſubiugando, at Cōplutēſis Græca dicit hoc factū eſſe anno *decimo octavo*. *Cap. 2, 1.* Deinde vulgata dicit ſōtes fuiſſe *viginti dies* obſeſſos: Cōplutēſis verò dicit fuiſſe *triginta quatuor dies* obſeſſos *Cap. 7, 10.* Prætereà qui duas iſtas editiones diligēter inter ſe conferet, ille videbit vix vnam periodum eſſe, in qua hæ duæ verſiones per omnia conueniūt. Cū igitur totus liber ita corruptus ſit, manifeſtum eſt eum incorruptæ, & indubitatæ doctrinæ regulam eſſe non poſſe. Quartum Argumentum, Quia oratio Iudith ad Holofērnem *cap. 11, 4. & cap. 12, 18.* eius item periuria & falſæ obteſtationes non valde conueniunt viduæ ſanctæ, qualis Iudith eſſe fingitur. Quintum Argumentum, Quia hic liber pugnat cum ijs, qui citra controuerſiam canonici ſunt. Capite enim nono, verſu ſecundo dicit *Deum dediſſe Simconi gladiū ad vlcifcendum alienigenas.* Sed Spiritus Sanctus per Iacobum apud Moſen *Libro 1. cap. 49, v. 5. & 6.* factum illud improbat, & deteſtatur. Neq; hic audiendus eſt Lira, qui *zelum probat, factum improbat.* Fecerunt enim contra fœdus & iuſiurandum, imò contra voluntatem Dei; at talis zelus nunquam laudabilis eſſe poteſt. Sextum Argumentum. Quia nullum ſeculum nominari poteſt, quo hæc hiſtoria contigerit. Cū igitur Iudith non ſit in Canone Hebræo, & tempore primitiuæ Eccleſiæ non fuerit in canone chriſtiano, cū denique liber ſit corruptus, & pugnet cum ſacra ſcriptura, neq; commodum tempus nominari poſſit



possit, quo contigerit, sequitur eam non esse canonicam. Sed hic non possum satis mirari ingenium Bellarmini. Reijcit enim opinionem Driedonis, Genebrardi, Mercatoris, imò veterum & recentium omnium; neque tamen affert meliorem. Asserit hanc historiam contigisse sub Manasse, neq; audet definire, an sub eius captiuitate, an post eam contigerit. verum nos ostendemus eam sub Manasse non contigisse. deinde patefaciemus falsitatem rationum, quibus in hanc opinionem adductus esse videtur. Ac primum Holofernes ex Ammonitis & Moabitis discit, quinam sit hebræorum populus. Cap. enim. 5. vers. 2, *Significate, inquit Holofernes, quisnam sit populus illa montanam regionem insidens. quas habitet vrbes, quantus copiarum eius numerus, in quo potentia eius, viri & que consistant, quisnam rex, aut militia dux est constitutus?* Vnde apparet Iudæos eo tempore Babylonij ignotos fuisse. At tempore Manassis Iudæi Babylonij ignoti non erant. Hierosolyma enim erat à Babylonij capta, & Manasses Babyloniam abductus. Deinde Iudith conqueritur cap. 5. vers. 22. *templum solo æquatum esse.* At tempore Manassis templum non fuit solo æquatum. Ad hoc respondet Bellarminus, librū esse corruptum. Sed si ad quasilibet difficultates respondere licebit, librum esse corruptum: tum nihil erit tam difficile, quod hac vna responsione soluere non possimus. Deinde Augustinus, Eusebius, Beda & alij, teste Bellarmino, propter hanc causam, istam historiam reiecerunt ad captiuitatem Babylonicam. Illorū igitur libri cum græco fuerunt consentientes. Præterea si nos ita tractarem⁹ bonos auctores, quem-

ad-

admodum papistas facere *index purgatorius* ostendit: tum posset quis cogitare librum corruptum esse. Huc accedit Israëlitas tempore Iudith fuisse cum Iudeis foedere, & amicitia iunctos, imò Israëlitas vel Samaritanos eo tempore paruisse Iudæis. Capite enim 4. vers. 3. *Hierosolymitani in omnes vicos ac fines Samaria & Bethoron, & Belmen, & Iericho, & Choba, atque Esora vallémque Salem dimiserunt; qui exelsa omnium montium iuga præoccuparent, Vicos ibimuris includerent, frumentumq; in belli apparatus reconderent. Pontifex etiam Ioacim, qui eo tempore Ierosolymis erat, scripsit ad incolae Betulia, ac Betmestham, iubens, ut insiderent montium accessus, quibus introitus in Iudeam pateret. Fecerunt item filij Israël, quemadmodum constituerat ipsis summus sacerdos Ioacim, senatusq; uniuersi populi Israël, qui Hierosolyma consederant. Manifestum igitur vel Samaritanos eo tempore Iudæis paruisse, vel cum ijs summa necessitudine & foedere iunctos fuisse. At sacra historia docet Israëlitas, iam ante ætatem Manassis à Rege Assyriorum in captiuitatem, & miserrimam seruitutem fuisse abductos, & in multas regiones dispersos. Samariam aut colonis Babylonijs, & Hamateis fuisse habitatam, 2. Reg. 17, 24, qui oēs fuerūt idololatræ, & adiunctis postea nonnullis sacerdotibus religionem veram cum idololatria miscuerunt. 2. Reg. 17, 27. Ab eo tempore cōstat Samaritanos fuisse Iudeis infestos & execrabiles, tantum abest, ut vel ijs paruerint, vel cū ijs foedere iuncti fuerint, vel deniq; eos contra regem suum defedere voluerint. Deinde tempore Manassis Iudæi fuerūt idololatria polluti. Fecit n. Manasse rex Iuda abominationes faciendo peiora, quam fuerint*

*runt omnia, quæ fecerunt Emorei, & peccare fecit Iuda in idolis suis. Quamobrem Deus minatur se velle super Ierusalaim lineam Someron extendere, hoc est, Iudæam eodem modo perdere, quo Samariam iam antè perdiderat. Samaritani verò, vt scriptura inquit 2. Regū 17. vers. 30. fecerunt Succoth Benoth, Nergal, Asima, Nibhaz, Thartac, & cōburebant filios suos igni ipsi Adramelech & Anamelech dijs Sepharuæorum. At tempore Iudith neque Iudæi, neque Samaritani se Idolatria polluerunt. Nostra enim, inquit Iudith, ætate, non extitit, neq; est hodie tribus, aut familia, aut populus, aut ciuitas c nobis, quæ deos adoret manufactos. Postremò si hæc hystoria contigit sub Manassè, tum vel antè captiuitatem ipsius, vel sub ea, vel post eam contigit. Ante non contigit, nisi vel hystoria sacra, quæ 2. regum cap. 17. & 21. totam Iudæam & Samariam idolatria pollutam esse queritur, vel hystoria Iudith, quæ cap. 8 vers. 17. nullam tribum alienos Deos colere contendit, falsa esse dicatur. Sed hystoria sacra fallere non potest. Ergo aut Iudith errat, aut hæc res ante Manassis captiuitatem non contigit. Sub eius captiuitate etiam non contigit. Manasses enim tum, & omnes Iudæi cum illo Idololatriæ pœnas luebant. At Iudith dicit neminem se sua ætate Idololatria polluisse. Deinde si hæc hystoria contigit sub eius captiuitate, quis crediderit regem Assyriorum tanta fuisse patiëntia. vt accepta à Iudæis, quibus erat infensissimus, tanta clade & ignominia, nihilominus Manassem regem eorum, quem habebat in vinculis, tam liberaliter dimiserit, & in regnum restituerit; Aut igitur hystoria Iudith falsa est, aut nō contigit sub Ma-*

nassus captiuitate. Sed neque post eius captiuitatem contigit. Incredibile enim est Manassem tam liberaliter dimissum, tanti beneficii tam subito oblitum fuisse, & populum contra regem incitasse, atque iterum regis victoris vires experiri voluisse. Deinde Iudith dicit *Iudeos non sequutos esse peccata patrum suorum, & sua etate nullam tribum, neque familiam se idololatria polluisse*, cap. 8. vers. 18. At ne tum quidem cum Manasses dimissus esset, Iudæi Deum purè coluerunt. Spiritus enim sanctus conqueritur, 2. Paralip. 33. vers. 17. *populum adhuc immolasse in excelsis*. Et paulò post dicit: *Amon immolasse cunctis sculptilibus, que fecit Manasse pater eius*. Vnde apparet verum Dei cultum ante Iosifæ ætatem in Iudæa non fuisse purè restitutum. In Samaria verò omnes Babylonij coloni Deos patrios colebant, vt suprà ex 2. Regum cap. 17. vers. 30. probaui, & si qui ex Israël relictī fuerunt, illi se etiā ad gentilium Deorum cultū conuerterunt, vt ex eodem capite ostēdi potest. Sequitur igitur vel sacram Scripturam, vel Iudith errare, vel hāc historiam post Manassis captiuitatem non contigisse. Sed sacra Scriptura errare nō potest. Ergo vel Iudith errat, vel hęc historia non contigit post Manassis captiuitatem. Deniq; tempore Iudith summus sacerdos fuit Eliacim, quem & Ioachim esse volunt. At tempore Manassis summus sacerdos non fuit Eliacim. Iosephus enim lib. 10. cap. 11. recenset summos pontifices, qui ante captiuitatem Babylonicam vixerunt. Sed Eliacim non meminit. Deinde inter Ezechiam & Iosifā, quo tempore Manasses vixit, summi sacerdotes fuerunt *Neri, Ioas, Selam & Chelcias*, Testis Nicephorus

*lib. 2. cap. 4.* Deniq; Eliacim successit Iesu filio Iosedech, vt docet Lyra *in cap. 4. Indith*, & Nicephorus *loco suprâ citato*. At filius Iosedech fuit post captiuitatem. fuit enim inter eos, qui altare Dei ædificarunt, *Esd. 3, 2*. Ergo eius successor tempore Manassis esse non potuit. Postremò res ipsa hoc loquitur. Spiritus enim sanctus Ezechiaæ liberationem tam sæpè & tã graphicè describit, & hanc, quæ nullo modo minor cœferi potest, ppetuo silētio præteriret? Nisi igitur Bellarminus tempus magis idoneum excogitaue-rit, sequetur hanc historiam ne vnquam quidem gestatū fuisse. Ob hanc causam semper mihi placuit eorum Iudicium, qui hunc librum piā Tragediam esse pronunciant. Nunc expendemus rationes, quibus Bellarminus motus, aliorum Theologorum iudicium repudiavit, & hanc historiam tempore Manassis accidisse asseruerit. Prima ratio quia *cap. 4. ver. 2. fit mentio templi Domini*. At tempore Manassis, inquit Bellarminus stetit Templum Domini. Ergo hæc historia contigit tempore Manassis. Ridiculum est hoc argumentum. Nam & reliquorum regum, qui ante Manassem vixerunt, ætate stetit templum Domini. Nihil igitur sequitur ex hoc argumento. Deinde Glosa ordinaria dicit *ea falsa videri, & propterea Iudeos non recipere hūc librum*. Neq; habet, quod hic comminiscatur, nisi templum Domini, per synecdochen accipiat pro altari Domini, disertè enim fatetur templum Domini eo tempore non fuisse reædificatum. Deinde *cap. 5. vers. 22.* legimus Templum Dei esse solo aquatum. Neque est, quod quis regerat, librū esse corruptum. Complutensis enim liber, Antuer-

pianus Regius, argentinensis & Aldinus vnanimiter legunt *ἡγὶ δὲ τοῦ τῷ θεῷ ἀποτὰν ἰγυρήθη ἐκ τῶν ἰδαφῶν*. Deinde quomodo probabit Bellarminus quintum caput magis corruptum esse, quàm quartum? Quod de Hieronymi versione dicit, nihil est. Libro enim secundo ostendemus hanc versionem non esse Hieronymi, & si maximè Hieronymi esset, hoc tamen non iuuaret causam Bellarmini. Libri enim Iudith Hieronymi ætate fuerunt valdè corrupti, vt antè ostendi, quin ipse Hieronymus fatetur, se non magnam diligentiam in eo vertendo posuisse, *huic unam, inquit, lucubratinunculam dedi magis sensum ex sensu, quàm ex verbo verbum transferens. Multorum codicum varietatem vitiosissimam amputavi. sola ea, quæ intelligentia integra in verbis chaldeis inuenire potui, Latinis expressi.* Vnde apparet ab Hieronymo firmum argumentum in hac re afferri non posse, & per consequens incertum esse, an hæc historia tempore Manassis contigerit. Secunda ratio, quia summus pontifex, qui tempore Iudith vixit vocatur Eliacim. Et tēpore Manassis, inquit Bellarminus est summus sacerdos vocatus, Eliacim. Ergo hæc historia contigit tēpore Manassis. Sed hoc falsum est. Tempore enim Manassis summus sacerdos non fuit Eliacim. Inter Ezechiam enim & Iosiam, quo tēpore Manasses vixit, summi sacerdotes fuerunt *Neri, Ioas Selam & Chelcias*. Testis Nicephorus *lib. 2. ca. 4.* Eliacim verò, quē aliq̃ Ioacim vocant, successit Iesu filio Iosedec, vt docet *Lyra in quartū caput Iudith*, & Nicephorus *loco suprā citato*. Iesus aut̃ filius Iosedec fuit longo tempore post Manassē. Vnde apparet & eius successorē Eliacim post Manassem fuisse.

iſſe. Quod aut Bellarminus dicit, Nicephorum *inter*  
*Sobnam*, qui fuit tēpore Ezechiz, & *inter Chelciam*, qui  
 fuit tēpore Iofiz, ponere *Eliacim*. Hoc falſū eſt. Sob-  
 næ. n. nequidē mentionem facit. Deinde inter Eze-  
 chiā & Iofiā nō ponit Eliacim. ſed eos quatuor, quos  
 paulo antē numeravi, Eliacim verò reijcit poſt capti-  
 uitatē Babylonicā, dicit. n. eum Ieſu Iofedec ſucceſ-  
 ſiſſe. Huius rationis falſitatē videns Bellarminus, ad-  
 iungit aliā, et dicit tempore Ezechiz fuiſſe Sobnam,  
 eiꝫ; ex Dei mādato ab officio remoto, ſucceſſiſſe E-  
 liacim, idꝫ; probat ex 4. *Lib. Reg. ca. 18. et. ex Eſaiā cap.*  
*22.* Sed quid hoc ad rem Bellarmine? Eliacim n. cu-  
 ius in quarto capite Iudith mentio fit, eſt ſummus ſa-  
 cerdos, Sobna verò nō eſt ſummus ſacerdos, ſed ſcri-  
 ba, vt 2. *Reg. 18. v. 2.* ſcriptum eſt, vel *Theſaurarius*, vt  
 docet Eſaias cap. 22. verſ. 15. Si igitur Eliacim Sob-  
 næ ſucceſſit, ſequitur eum non ſummū ſacerdotem,  
 ſed vel ſcribam, vel theſaurarium fuiſſe. Deinde ſcri-  
 ptura diſertē dicit Eliacim fuiſſe non ſummum ſa-  
 cerdotem, ſed *præpoſitum domus*, græca verſio dicit  
 fuiſſe οἰκοδόμος, 2. *Regum 19. verſ. 2.* Et ne putes eum  
 prius fuiſſe præpoſitum domus, & deinde factum  
 eſſe pontificem, docet Eſaias eum tum demum do-  
 mꝫ; regiz præfectum eſſe, cū in locum Sobnæ  
 conſtitueretur. Dicit enim 22. verſ. 15. Sobnam fuiſ-  
 ſe *theſaurarium*, nempe domus præfectum, eumꝫue  
 loco motum, & Eliacim eius poteſtate, vel vt Græ-  
 cus vertit, eius οἰκοδομίας donatum eſſe, h. e. eius loco  
 theſaurarium, vel domus præfectum fuiſſe. Verſu  
 deinde viceſimo ſecundo eiꝫdem capituli ponim, in-  
 quit, *clauem domus David ſuper humerū eius*. Hoc eſt,

ut interpretatur Pagninus, *donabo illum consilio, quo totam aulam Ezechiae possit regere*. Manifestum igitur Eliacim non ecclesiasticum, sed politicum officium administrasse, & ob eam causam Eliacim, cuius Ezaias, & historia Regum meminit, non est ille, cuius quarto capite Iudith mentio fit, ob eandem causam incertum est, an Iudith tempore Manassis fuerit. Tertia ratio. *Quia illud longum tempus pacis, cuius in Iudith mentio fit, sub Manassis imperio inueniri potest*. Sed & hoc est falsum. Cap. enim 16. vers. 30. scriptum est, *Non existit autem in vita Iudith, nec post mortem quidem eius, multis temporibus, qui Israëlitis terrorem ullum afferret*. Hæc multa tempora definiamus esse triginta annos, qui tamen exiguum tempus sunt. Vnde sequeretur triginta annis post mortem Iudith altam pacem in Israël fuisse. Deinde cum Iudith Holofernem occideret, erat *venusta forma, aspectuq; perpulchra* cap. 8. 7. Vnde credibile est, eam tum tricesimum ætatis annum nondum superasse. Porro cap. 16. v. 28. dicit græca editio *eam vixisse centum & quinque annos*, vulgata autem dicit, *eam mansisse in domo viri sui centum & quinque annos*, quæ lectio si vera est, vixit Iudith ad minimū centū triginta annos, sed nos sequemur numerū minorem, deptis igitur ijs annis, quos antè hoc factū transigit, & adiectis istis, quibus post eius mortem pax fuit in Israël, sequitur centum annos & amplius in Israël pacem fuisse. Sed à liberatione manassis tam longo tempore pax in Israël non fuit. Imò post liberationem Manassis Israël vel à seuitute, vel à bello nunquam liber fuit. Nam cum Deus Manassi minaretur exitium, dicit se velle *line-*



*am Someron super Iudæam extendere, vt supra ostendi.* Esaias addit Deum ita velle atterere Ephraim, ne sit populus, cap. 7. vers. 8. Doceat Bellarminus, quando, & per quem Samaria sit in libertatem vindicata? Quod ad tribum Iudæ attinet, illa post Manassis liberationem aliquandiu pacem habuit, sed hoc nihil facit ad rem, Iudith enim loquitur de *uniuerso Israhæle*, & non de vna tribu tantum. Capite enim octauo, vers. 17. dicit, *nulla tribus, nulla familia, aut populus, aut domus ex nobis*, etc. Ex summa etiam ista coniunctione, quam inter Israhælem & Iudæam eo tempore fuisse docui, patet eam de uniuerso populo loqui. Etsi igitur eo tempore in Iudæa aliqua pax fuerit, tamen propter reliquarum tribuum calamitatem, non rectè dixeris, neminem tum fuisse, qui Israhælitis terrorem afferret. Deinde non facilè definieris, quàm longa ista pax in Iuda post Manassis liberationem fuerit. In sacra enim historia scriptum non est, quando Manasses captus sit, neque quicquam nisi ex incertis conjecturis de ea re afferri potest. Funcius notat istam captiuitatem incidisse in annum Manassis *quadragesimum primum*. Bellarminus dicit eam incidisse in annum Manassis *decimum sextum* lib. 1. cap. 12. Melanchthon addit eū *decem annos in ista captitate detentum esse*. Alij aliud affirmant. Nos sequemur opinionem Bellarmini, ad istos verò sedecim annos, si illos decem, quibus in carcere fuit, addideris, erunt 26. supersunt de imperio Manassis viginti nouē, regnavit enim ānos 55. Ad istos 29. adde 2. ānos Amō, post Amō regnavit Iosias. Hic regnavit ānos triginta vnū. In fine regni Iosie Iuda turbatus est, & in ijs turbis Iosias periit, 2. Regum

23. vers. 29. Hos omnes si collegeris, habebis annos sexaginta duos, quibus in Iuda pacem fuisse probabiliter dixeris: at tempore Iudith longior pax fuit, quemadmodum antè ostensum est. Aut igitur Scriptura, aut historia Iudith falsa est. Sed historia regum falsa esse non potest, historia igitur Iudith falsa est, aut non contigit post Manassis liberationem. Et ut omnia in pauca contraham. Cum templum tempore Iudith fuerit Solo æquatum, tempore verò Manassis non fuerit Solo æquatum. Et cum Eliacim tempore Iudith fuerit summus sacerdos, tempore verò Manassis summus sacerdos non fuerit Eliacim; cum deniq; tēpore Iudith pax in Israële fuerit 100. annis. & amplius, tempore verò Manassis nulla pax fuerit in Israële; in Iuda etiam non nisi sexaginta duobus annis, aut circiter pax fuerit: sequitur historiam Iudith tempore Manassis non contigisse, Et si caussa istius opinionis falsa est. tum ipsam opinionem, quæ ex ea colligitur, falsā esse necesse est. Pronuncio igitur cum Hieronymo in præfatione ad libros Salomonis, *Hunc librum* (loquitur de Iudith) *à plebe ad edificationem legi posse: sed non censi ab Ecclesia inter scripturas Canonicas.*

## CAPVT XI.

*Sapientiam non esse principium aut regulam  
Christianorum dogmatum.*

**H**actenus ostendimus librum Iudith non esse in canone, sequitur liber Sapientiæ. Hunc Bellarminus canonicum esse dicit, nos negamus. Ille probat suam sententiam 6. argumentis, quæ ordine expendemus. Primum argum. *Quia concilium Sardicense apud*

se apud Theodoretum lib. 2. cap. 8. ex libro Sapiëntia cap. 7. probat Christum esse verum Deum. Argum. tale.

Ex quo libro Concilium Sardicense probat Christum esse verum Deum, ille liber est canonicus. Sed concilium Sardicense ex libro Sapiëntiæ probat Christum esse verum Deum. Ergo liber Sapiëntiæ est canonicus.

Respondemus Maiorem esse falsam. Clemens enim in *Stromatis* Lactant. in *Instit.* & alij ex *Sybillinis* idem, & similia probant. Neq; tamen libri *Sybillarum* Lactantij, & Clementis propterea sunt canonici. Quod ad Minorem attinet, fatemur apud Theodoret: lib. 2. cap. 8. hæc verba ex Sapiëntia cap. 7. v. 21. *Sapiëntia omnium me docuit*, ad Christi Deitatem probandam adducta esse. Sed quàm commodè hoc factum sit, iudicent doctiores. Equidem si non haberemus alia testimonia, quibus Christi Deitatem probaremus, essemus valde miseri. Multi sunt, qui existimant hæreticos minus pertinaces futuros fuisse, si orthodoxi hæc & similia non protulissent. Non igitur sequitur Bellarmine, Sapiëntiæ librum propterea esse canonicum, quod patres hoc testimonium ex eo petiuerint: Sed rectè sequitur ipsos patres pigros, & oscitantes fuisse, quod cum alia testimonia, eaq; solida essent in promptu, illi tamen ijs præteritis hæc & similia adhibuerunt. Secundum argumentum: Quia *Consilium Toletanum* 11. cap. 1. citans aliquid ex hoc libro, nominat eum *diuinam scripturam*. Sed hoc argumentum est à nobis antè refutatum. Deinde hoc concilium habitum est Anno 672. Ergo nos urgere non potest. Dionysius item cap. 4. de Diuinis nominibus

nibus idem facit. Sed liber iste est supposititiuſ, neq;  
vnquam à Dionyſio ſcriptus eſt. Dionyſius enim  
trucidatus eſt ſub Domitiano. Auctor verò iſtius  
libri eod. cap. citat dictum Ignatij, ad Rom. *meus a-*  
*mor crucifixus eſt.* At Ignatius hanc epiſtolam, longo  
tempore poſt mortem Dionyſij in itinere ſcripſit,  
cùm Romam ſub Troiano ad ſupplicium duceretur.  
Teſtis Euſebius lib. 3. *Eccleſ. Hiſt. cap. 36.* Et Hiero-  
nymus in *Catalogo C. Ignatii.* Quomodo verò Dio-  
nyſius potuerit epiſtolam nondum editam citare,  
explicet Bellarminus, qui hos ſuppoſititios libros  
tam pertinaciter defendit. Tertium argumentum,  
Quia *Melito* apud Euſeb. *Eccleſ. Hiſt. cap. 26. lib. 4.*  
*eum inter canonicos numerat.* Argumentum tale.

Quoſcunq; libros *Melito* inter canonicos nume-  
rat, illi ſunt canonici. Sed *Melito* numerat li-  
brum Sapientiæ inter canonicos. Ergo liber  
Sapientiæ eſt canonicus.

Reſpondemus Minorem eſſe falſam. *Melito* eni-  
am loquitur non de Sapientia Philonis, ſed de *Sapientia*  
*Salomonis.* Diſertè n. dicit, *Salomonis Proverbia, quæ &*  
*Sapientia.* At nos diſputamus de ea Sapientia, quam  
ipſe etiam Bellarminus non eſſe Salomonis fatetur.  
Deinde ſi orientalis Eccleſia (à qua *Melito* hoc didi-  
cit) ita iudicaſſet, tum Origenes, Athanaſius, Laodi-  
ceni, Hieronymus, Cyrillus, & alij Orientales do-  
ctores eum ex canone non expūxiſſent, neq; dixiſ-  
ſent eum ab Eccleſia reprobari. Poſtremò Bellarmi-  
nus cap. 8. dixit Melitonem, & alios non recensere  
canonem Chriſtianum, Sed canonem Hebræum. At-  
qui Sapientia Philonis nunquam fuit in canone he-  
bræo

bræo. Ergo non potuit recenseri à Melitone. Causa quæ decepit Bellarminū hæc est. Putauit Melitonem cum reliquis patribus recensere 22. libros, & hoc recte. Sed cum videret Hesther à Melitone prætermitti, non putauit istos *viginti duos* apud Melitonem inueniri posse, nisi *Prouerbia Salomonis*, & eius *Sapientia* in duos libros discerperetur. sed hoc malè. Melito enim *Hesther* sub alio libro comprehendebat (quod à quibusdam factum esse, docet Athanasius in *Synop.*) & librum *Iudicum* atque *Ruth*, quos nos pro vno accipimus, in duos diuisit. Hæc ad Minorem. Sed neque Maiorem admittit ipse Bellarminus. Nam si isti libri sunt canonici, quos Melito numerat, sequitur eos non esse canonicos, quos Melito præterit. At præterit *Iudith*, *Tobiā*, *Baruch*, *Ecclesiasticū* & *Machabeicos*. Inde sequeretur eos omnes non esse Canonicos. Quartum argum. Quia Augustinus eum defēdit lib. 2. de doctrina Christi. cap. 8. Et lib. 1. de Prædest. Sanctior. cap. 14. Sed ad Augustini auctoritatem respondimus, & hoc argumentū diluimus antè. Quintum argum. Quia aliqui patres ex eo testimonia citant. Et hoc argumentum est à nobis antea refutatum. Sextum argumentum, Quia aliqui patres putauerunt eum esse Salomonis. At ipse Bellarminus cogitur fateri eum non esse Salomonis. Ergo non sequitur, hunc librum propter falsam quorundā patrum opinionem esse canonicum. sed istos patres errasse rectè sequitur. Hæc sunt Bellarmini rationes pro libro Sapientiæ. Nunc immotis argumentis ostendam eum non esse canonicum. Primum, Quia est originaliter scriptus græcè. Hoc fatetur ipse Bellarminus. At nullus propheta scripsit

scripsit græcè. Ergò hic liber non est à prophetis scriptus. Secundum argumentum. Quia eius auctor est Philo, Testis Hieronymus in *Pref. Salam.* Et Isidorus *Etymol. lib. 6. cap. 2.* Sed Philo uixit post passionem Domini. Ergo eius liber non pertinet ad vetus Testamentum. Deinde Philo non voluit Christum recipere. Ergo eius liber non potest canonicus esse. Præterea si hic Philonis liber canonicus est: tum & reliqui eius libri canonici esse debent. Sed hoc non. Ergo neque illud. Ad hæc respondet Bellarminus, hunc librum quidem scriptum esse à Philone, verum à vetustiore quodam Philone, non autem ab eo, qui vixit tempore apostolorum. At hoc dicit absque auctore, neq; si alterius cuiusdam Philonis est, ideo est canonicus. Deinde Iosephus *lib. 1. cont. Appion.* meminit quidem alterius cuiusdam Philonis, Sed qui *Philosophus* est, & *gentilis*. At qui *philosophus* est, & *gentilis*, ille librum canonicum scribere non potest. Relinquitur igitur hunc librum non esse canonicum Tertium argument. Quia hic auctor continet quædam falsa. Argum. tale.

Qui liber continet quædam falsa. ille non est canonicus. Sed hic liber continet quædam falsa. Ergo non est canonicus.

Maiorē pono extra controuersia. Minorē probo. Capite enim 14. vers. 15. *Acerbo inquit, luctu dolens pater citò sibi rapti filij fecit imaginem. & illū qui tunc homo mortuus fuerat, nunc tanquam Deum colere cepit, & constituit inter seruos suos sacra & sacrificia.* Ad hunc locum scribit Calvinus *lib. 1. Institut. cap. 11. §. 8.* Porro de *Idolorum origine publico serè consensu receptum est, quod*

quod in libro Sapiencia habetur. Primos scilicet extitisse eorum auctores, qui hunc honorem detulerunt mortuis, ut eorum memoriam superstitiosè colerent. Et sanè concedo peruersam hunc morem fuisse vetustissimum. sed non concedo hunc morem esse primum mali fontē. Idola enim iam fuisse prius in usu, quam ista in consecrandis mortuorum imaginibus ambitio (cuius apud scriptores crebafit mentio) inualuisset, constat ex Mose. Cum enim Rachelem furatam esse narrat idola sui patris, non secus ac de communi vitio loquitur. Hic Bellarminus Caluinum mendacij arguit. Primò quòd dicat ante Rachelis Idolum non fuisse idolū humana imagine. Secundò, quòd neget Rachelis Idolū fuisse humana imagine. Sed Bellarminus deprauata Caluini sententia, quam refutare non potest, fingit sibi laruas, contra quas pugnet. Non enim negat ante Rachelis Idolum, fuisse idolum humana imagine, neque negat, Rachelis Idolū fuisse humana imagine. Sed negat istam mortuorum à πῶδῶν esse Idolorum Originem. Hoc probat, quia iam ætate Rachelis Idololatria fuit commune vitium. Non docet igitur ante Rachelis ætatem nullum fuisse Idolum humana imagine. sed confitetur Idololatriam, Rachelis tempore commune vitium fuisse, imò fuisse eam longo tempore ante ætatem Rachel probat. Credibile enim esse, asserit. Superstite adhuc sancto patriarcha (intelligit Noach) eius nepotes Idololatria fuisse deditos. Nam Thare & Nachor, iam ante natum Abraham, falsorum Deorum cultores erant, ut testatur Iosua cap. 24. vers. 2. Et Labani iurat per Deos Nachor Genes. 31. vers 52. Inde colligit, cum progenies Sem tam citò descisisset à vera religione, posteros Cham, qui erant à Noach male-

dicti,

dicti, *semulto citius Idololatria polluisse*. Hęc est genuina disputatio Caluini, quam penè iisdem verbis expressi. Iam audiamus Bellarmini ad eam respōsionē. Primum probat תרפים *esse simulachrum humana imagine*: Deinde docet *Belum Regem Assyriorum, qui ante ætatem Abrahæ vixit, fuisse à Nino filio consecratum in Deum, atque illam esse primam imaginem ad adorandum propositam*, ac proinde Caluini sententiam esse falsam. Nos prius ad illud respondebimus, deinde ad hoc. Ac primum illud nihil facit ad rem. Sapientię enim auctor dicit, *primam imaginem filio à patre erectam esse*. At Belo non à patre, sed à filio statua posita est. Deinde si existimas Belo mortuo esse primā statuā positā, tum nihil dicis ad rem, nō enim disputatur, cui primum statua sit posita: sed vnde Idololatria initium sumpserit. Si verò existimas Beli simulachrum esse primum idolum, erras. *Nachor enim fuit falsorum deorum cultor*, Genes. cap. 3. vers. 5. & Iosu. cap. 24. 2. At Nachor est Beli coætaneus. Ergo ante Beli ætatem fuerunt idola. Quin & *Nimrod* (ut docet Berossus lib. 4.) *furatus est rituales Iouis sacerdotes*. Ergo si eo tempore fuit sacerdos, fuerunt etiam sacra, & fuit idolum, cui ea à sacerdote fiebant. Sed primum. Ergo secundum. Ac proinde non tantum ante ætatem Beli & Nachor, sed etiā ante ætatē Nimrod fuerūt Idola. Quam ob causam credibile est, *Noachum*, (vt inquit Caluinus) *cū dolore vidisse terrā Idolis fœdari*. Sed quænam ista idola prima fuerint, quę publicè ad adorandum fuerunt proposita, non satis constat, nisi quod constat, non fuisse humanam imaginem. Lactantius lib. 2. cap. 14. *At ille, profugus* (loquitur de Chamo)

*consedis*



## CHRISTIAN. DOGMATVM. Cap. 11. 111

consedit in ea terraparte, qua nunc Arabia vocatur, eaq;  
 terra de nomine suo Chanaan vocata est. Eius posterior betu  
 totum replerunt, & à stirpe sancta radicis auulsi novos sibi  
 mores ac instituta pro arbitrio cōsiderunt. Sed oīm primi,  
 qui Egyptum occuparūt, cœlestia suspicere, & adorare ca-  
 perunt. Et paulò post in eodem cap. Cateri autē qui per  
 terram, dispersi fuerunt, admirantes elementa mundi, calū,  
 solem, terrā, mare sine ullis imaginib. ac templis venerabā-  
 tur, et his sacrificia in aperto celebrabāt, donec p̄cessu tempo-  
 ris potentissimis regib. templa & simulachra fecerunt, eaq;  
 victimis colere & odorib. instituerūt. Sic aberrātes à noticia  
 Dei gentes esse caperūt. Euseb. etiā li. 1, c. 6. de Præparat.  
 Euangel. docet priscos nō coluisse idola. sed Solē & Lunā.  
 Quæ si vera sunt, sequitur Caluini, nō sapiētix sentē-  
 tiam veram esse. Secūda ratio est, quia תַּרְבִּימִם signi-  
 ficāt *imaginem humanam*. Sed hoc nihil facit ad rem,  
 neque hoc negat Calvinus. Deinde etiam si verum  
 esset תַּרְבִּימִם (quod tamen in dubio relinquo) semp  
 significare *humanā imaginem*: tamen hoc non iuuaret  
 causā Bellarmini. Nam si prisci homines prius adorarunt  
*calum & Astra*, quā uillas imagines fecerunt, vt ex La-  
 ctātio & Euseb. docui. manifestū est, hois imaginem  
 non esse Idololatriæ principium. Quarta ratio, Quia  
 hic liber nunq̄ fuit in canone Iudaico, neq; Christi &  
 apostolorū tēpore fuit in canone christiano, vt antē  
 ostendimus. Cū igitur hominum ἀποβίωσις (vt hic  
 auctor dicit) non sit Idololatriæ principium; & hic  
 liber sit Originaliter scriptus grēcè, ac sit scriptus vel  
 à Iudæo Christum contemnente, vel à gentili chri-  
 stum ignorante, neq; vnq̄ fuerit in canone Iudaico,  
 neque tempore Christi & apostolorum fuerit in ca-  
 none

none christiano, manifestum est eum inter canonicos censerī non posse. Nos concludimus cum primitiua ecclesia, eum esse *χρησιμος καὶ ὠφέλιμος, ἀλλ' οὐκ ἀξιωματικὸς τῶν ῥητῶν ἐκ ἀναφίρεσθαι*. Epiphani. lib. de pōderib.

## CAPVT XII.

*Ecclesiasticum non esse principium aut regulam christianorum dogmatum.*

**L**ibrū Sapiētię non esse canonicū ostēdimus capite Superiore, sequitur Ecclesiasticus. Hūc Bellarminus dicit esse regulam christianorum dogmatum, nos negamus. Ille suam sententiam probat tribus argumentis, quæ ordine expendemus. Primum argumentum. Quia Clemens lib. 7, Stromatum & cyprianus lib. 3, Epist. 9, ex eo, *tanquam ex diuino, testimonia citant*. Sed hoc argumētū est à nobis antè refutatum. Deinde Euseb. lib. 6 Eccles. hist. cap. 13. *utitur autem, in illis* (loquitur de Clemente) *etiam earum scripturarum testimonijs, quibus contradicitur, & eius quoque, qua Salomonis Sapientia vocatur, & eius, quæ est Iesu Syrach, denique & Barnabæ & Clementis epistolis*. Hinc apparet nō omnes libros esse canonicos, ex quibus patres testimonia allegant. Deinde si omnes libri, ex quibus Clemens, tanquam ex scriptura, testimonia citat, sunt canonici, tum sequitur & Barnabæ & Clementis epistolas esse canonicas. Quod ad Cyprianum attinet, ille citat *tertium Esdræ*, in Epist. ad Pomp. Non igitur quicumque libri à patribus citantur, illi sunt canonici. Secundum Argumentum. Quia Epiphanius in *Hæresi Anomeorum librum Syrach numerat inter canonicos*. Argumentum tale.

Quoscunque libros Epiphanius numerat inter  
canonicos.

canonicos, illi sunt canonici. Sed Ecclesiasticus est ille, quem Epiphanius numerat inter canonicos. Ergo Ecclesiasticus est canonicus.

Respōdeo Minorem esse falsam. Epiphanius enim duobus locis enumerat canonem. Hæresi scilicet 8. & lib. de mensuris & ponderib. In primo loco, nempe hæresi 8. enumerat prorsus eosdem libros, quos nos enumerauimus, nisi quod Baruch cum Ieremia coniungat. Deinde post eorū enumerationem dicit  
 ἐστὶ δὲ καὶ ἄλλαι δύο βιβλίοι παρ' αὐτῶν ἐν ἀμφιθέλῃ, ἡ σοφία τῷ Σολομῶνι καὶ ἡ Σολομώνιος. in libro verò de pond. & Mensur. καὶ αὗται inquit χρήσιμοι μὲν εἰσὶ καὶ ἀφελίμοι ( loquitur de Sapientia & Ecclesiastico ) ἀλλ' εἰς ἀριθμὸν βιβλίων οὐκ ἀναφί-  
 ρον. Sed est hīc & alius Bellarmini error. Dicit enim Epiphanium in lib. de pond. recensere canonem ex Iudæorum sententia, hæres. verò 8. eundem recensere ex Christianorum sententia. Quod est manifestè falsum. Credo Bellarminum hīc vel memoria lapsum esse, vel esse typographi culpam. Quare n. hoc non benignè contra virum doctum interpretarer? Hæresi enim 8. dicit Epiphanius ἔσχατον δὲ οὗτοι οἱ Ἰουδαῖοι ἄχρηστον ἀποβιβάζουσιν αἰχμαλωσίας ἐκ παλαιῶν βιβλίων, καὶ προσθήκας τῶν ἑσχατῶν. Et paulò post αἱ ἐκ θεῶν, inquit, δοθεῖσιν τοῖς Ἰουδαίοις. Vnde manifestè apparet, eum loqui de canone secundum Iudæorum sententiā. Si verò Bellarminus ita scripsit, deceptus est fallacia cōsequentis. Quia enim Baruch recenset inter eos; hæresi. 8. ideo opinatus est, eum Christianorum canonem describere. Sed hoc malè. Non enim quia Baruch nominat, ideo recenset christianorum canonem, sed quia Baruch in catalogo Iudaico numerat, ideo vel Epiphanius errat, vt antè

notavi, vel liber est corruptus. Baruch enim à Iudæis nunquam magnitus est, neque in Catalogo Iudaico recensetur. Sed mendum hic esse monuit me illud decus Belgicæ Nobilitatis, Philippus Marnixius Dominus de Sanct. Aldegōda. In libro verò de Pōderib. recenset græcas versiones, & cum ijs ex sua & græcæ Ecclesiæ sententia hebræum textum confert. At hæc oīa pertinent ad solos Christianos, vt omnis æquus lector fatebitur. sequitur igitur in lib. de ponder. canonē ex Christianorū sententia recēseri. Tertium argumēt. Quia aliqui patres putauerunt *Ecclesiasticū esse Salomonis*. Sed ante respōdimus, nullū librū propter falsam eiusmodi patrum opinionem esse canonicum. Atque hæc sunt Bellarmini argumenta pro Ecclesiastico. Nunc immotis rationibus ostendam, Ecclesiasticum non esse canonicum. Ac primum, Quia est vitiosus. Sunt enim duæ editiones, vna Græca, altera Latina Vulgata. Hæ inter se non consentiunt. In Vulgata enim legimus cap. 1. vers. 14. *Dilectio Dei honorabilis sapientia: quibus autem apparuerit in visu, diligunt eam in visione, & in agnitione magnalium suorum.* Hæc omnia in Græca defunt. Eodem cap. vers. 27. in Græca legimus, & *quamdiu irasens est, iram auertit.* Hæc in Vulgata defunt. Cap. 2. vers. 16. in Vulgata legimus, *Et qui dereliquerunt vias suas, & diuertunt in vias prauas,* hæc in græca defunt. Eodem cap. vers. 21. in Vulgata legimus, *Qui timeant Dominum, custodiunt mandatum illius, & patientiam habebunt, vsq; ad inspectionem illius,* hæc in Græca defunt. Cap. 3. vers. 20. *Multi quidem altitudine fortuna gloriaq; excellunt Sed mansuetis reuelatur arcana.* hæc in vulgata defunt.

Eodem

Eodem cap. vers. 28. legimus in Vulgata, *Cor ingrediens duas vias non habebit successus. Præuū cor in illis scandalizabitur.* hæc in græca defunt. Ibidem legimus in Græca, *Pupillis orbis lumine carebis, cognitionem autem cuius expers es, ne profitearis.* hæc in Vulgata defunt. Reliqua omnia capita sūt equè deprauata. At quod deprauatum & vitiosum est, hoc vtique sanæ & integrę doctrinę principium aut regula esse non potest. Ex corrupto enim & deprauato nil necessariò nisi corruptum & deprauatum colligi potest. Si quis tamen hæc vel illam editionem pertinaciùs tuebitur, dicam cum Hieronymo, *non posse utique verum esse, quod dissonat.* Præfat. in Iosue. Secundum argumentum, Quia scriptus est ætate Euergetis, in Præf. vers. 8. sed quicquid eo seculo, & post, tempore veteris Testamenti scriptum est, hoc non habere canonicam auctoritatem, ex Iosepho & Eusebio docuimus, & proximo capite prolixius docebimus. Tertium argumentum, Quia nunquam fuit in canone hebræo, neq; tempore Christi & Apostolorum fuit in canone Christiano, Testis Hieronym. in prologo Galeato, Athanas. in Synop. Cyp. in Symbol. Epiphani. in lib. de Ponderib. & Mensur. Quartum argumentum, Quia Iesus nepos eum à patre & auo collectum edidit, & scripsit græcè, Præfat. vers. 5. *Hunc librum propè collectum Iesus ille primus vita defunctus reliquit, Sirach post mortem illius eundem acceptum Iesu filio suo tradidit, qui eum in manus sumptū concinnè totum redegit in volumen.* Vnde apparet auum Iesum, quædam hebraicè collegisse, patrem Sirachidem quædam addidisse, nepotē Iesum ista omnia digessisse, vertisse in græcum ser-

monem, & edidisse græcè. Idem ex altera præfat. vers. 9. colligi potest. *Multum vigilia*, inquit Iesus nepos *scientiæq; adhibui*, ut liber ad finem perductus ederetur. Ergo antè nondum fuit absolutus, neque editus. cum hoc consentit Epiphanius libr. de ponderibus *ἢ ὁ ἑκατόνδς αὐτῷ ἰησῷς ἐρμηνεύσας ἐλλήνισι ἔγραψε*. Simile docet Isidorus libr. 6. & Lyra in Prolog. *Sirach*. At Hieronymus dicit se *Hebraicum reperisse*. præfat. ad lib. Salom. Respondeo hoc de aui patrisq; collectaneis, quæ nepos digessit, & edidit, intelligi posse. Si quis tamen mauult eum originaliter hebraicè scriptum esse, ille per me fruatur suo iudicio, modo sciat hebraicum *Sirach* nunquã fuisse in canone, & ob eam causam, eius græcam versionem in canone esse non posse. Quintum argum. Quia auctor petit veniam sui scripti, in præf. vers. 5. *Vos igitur*, inquit, *monitos volo, & hortor: ut veniam deis, si minus assecuti esse videmur vim quarundam dictionum, quas interpretando exprimere conati sumus*. Sed nihil est, quod Spiritus S. assequi non potest. Ergo venia non habet opus. At huius libri auctor fatetur se *quadam assequi non potuisse*, & ob eam causam *se venia opus habere*. Ergo non est scriptus à Spiritu S. Cùm igitur hic liber sit deprauatus, & sit scriptus ætate Evergetis, neque vnquam fuerit in canone Iudaico, neque tempore Christi & apostolorum fuerit in canone Christiano, & sit editus græcè, deinde non potuerit quædam assequi, & ob eam causam venia opus habeat; manifestum est eum regulam Christianorum dogmatum esse non posse. Pronuntiatio cum primitiua ecclesia, *eum non esse in canone*, Hieronymus in prolog. galeato, addo cū eadē pri-

primitiua ecclesia, *eum ab ecclesia legendum esse, ad edificationem plebis, non ad auctoritatem Ecclesiasticorum dogmatum confirmandam.* Hieronym. præfat. in lib. Salomonis.

## CAPVT XIII.

*Libros Machabaicos, non esse principium neq; regulam christianorum dogmatum.*

**E**cclesiasticum sequuntur Machabæici. Hos Bellarminus Canonicos esse dicit: nos negamus. Ille probat suam sententiam tribus argumentis, quæ ordine expendemus. Primum, Quia aliqui patres eos honorificè producunt. Secundum, Quia aliqui patres eosdem libros diuinam scripturam appellat. Tertium, Quia Ecclesia eos habet pro canonicis. Ad hæc omnia nos quidem antè respondimus. Sed quoniam tertiam rationem Augustini auctoritate probans irridet Calvinum, quod is Augustino multum tribuat & tamen libros reiiciat, quos ille ab Ecclesia pro canonicis receptos testatur. Ideo ad hanc tertiam denovo aliquid respondebimus, æquus lector dabit nobis veniam, si ex prioribus nobis quædam repetenda erunt. Augustinus lib. 18, de ciuit. Dei cap. 36. *Quorum supputatio, inquit, temporum, non in scripturis sanctis, quæ canonice appellantur: sed in alijs inuenitur, in quibus & Machabeorum libri: quos non Iudei, sed Ecclesia pro canonicis habet, propter quorundam martyrum passionem graues, atq; mirabiles.* At quanta sit Augustini hac in re auctoritas, ostendimus antè. Deinde idem Augustinus in eodē cap. dicit, *Quartū Esdra, esse opus propheta Esdra.* At hoc est tam verum, quàm illud. Adde, Augusti. non simpliciter dicere, eos libros esse in ca-

none. sed tantum καὶ τὶ. nempe propter quorundam  
 martyrum vehementes & admirabiles perpeſſiones. Idem  
 docet libr. 2. contra Gaudentij epistolam cap. 23.  
*Machabæorum scriptura recepta est ab Ecclesia non inutili-*  
*ter, si sobriè legatur vel audiat, maximè propter istos*  
*martyres.* Sed ob hanc causſam in canone morum,  
 non fidei cenſeri poſſet. Et hoc docet Lyra. *Recepti*  
*sunt, inquit, ab Ecclesia, ut ad morum informationem*  
*legantur, præfat. in Tobî.* Idem teſtatur Brito, *Libri*  
*Machabæorum, inquit, non sunt in canone, & tamen*  
*leguntur in Ecclesia per constitutionem Romana Ecclesia in*  
*prolog. Machab. & Rabanus ad regem Ludouicum.*  
*Nunc tempus illud est, quo Romana Ecclesia conſtituit li-*  
*bros Machabæorum legi in Ecclesia.* Manifestum igitur  
 eos non ad dogmata probanda, sed tantum ad mo-  
 res formandos receptos, & lectos eſſe. Quod verò ad  
 canonem fidei attinet, etiam Auguſtini iudicio non  
 ſunt canonici. Libro enim. 1. de ciuit. Dei. cap. 20.  
*In ſanctis, inquit, canonicis libris nuſquam nobis diuinius*  
*præceptum permiſſiue reperiri poteſt, ut vel ipſius adpiſcenda*  
*immortalitatis, vel illius carendi cauendive mali cauſſa,*  
*nobiſmet ipſis necem inferamus.* At Razis ſeipſum occi-  
 dens laudatur 2. Mach. 14. v. 42. Nihil autem lauda-  
 bile, quod non licitum. id igitur, quod ſecundum li-  
 bros canonicos illicitum eſt, hoc Machabæici vt li-  
 citum, & laudabile permittunt. Deinde auctor  
 Machabæicorum laudat Razin, *quod voluerit nobiliter*  
*mori,* At hoc reprehendens Auguſtinus, *Melius, in-*  
*quit, vellet humiliter, ita enim utiliter. Illis enim verbis*  
*hiſtoria gentium laudare conſuevit, ſed viros fortes huius*  
*ſæculi, non Martyres.* Hinc apparet, eos ne quidem  
 Auguſt.



Augustini iudicio, esse canonicos fidei. Quid quod ipse Augustinus disertè neget, eos esse in canone. Lib. enim secundo de mirabil. S. Scripturæ, cap. 34. *In Machabæorum, inquit, libris, etsi aliquid mirabilium numero inferendum conueniens fuisse ordini inueniatur, de hoc tamen nulla cura fatigabimur. quia tantum agere proposuimus, ut de diuini canonis mirabilibus exiguam historicam expositionem tangeremus.* Atque hæc sunt Bel- larmini argumenta pro auctoritate Machabæicorū. Iam immotis argumentis ostendemus, eos non esse in canone. Ac primum, Quia tempore Machabæorū non fuit propheta, 1. Mac. 4. 46. *Lapides deposuerunt, donec exoriretur propheta, qui de his respondere posset.* Et. 1. Mac. 9, 27. *Et accidet Israëlitis calamitas tanta, quanta nulla unquam exstitit, ex quo nullus inter eos propheta visus fuit.* Ad hunc locum scribit Vatablus. *Nam tum prophetia cessauerant, neq; à Malachia propheta ullus fuerat, qui eos de rebus futuris admoneret.* Eodem libr. cap. 14. vers. 41. *Fecerunt Simonem principem & summum pontificem perpetuo, donec propheta certus existeret.* Vbi Vatablus. *Nam eo tempore, & iam diu antè prophetia desierant.* Ioseph. lib. 1. cont, Appion. dicit à tempore Artaxerxis non fuisse ἀγγέλιον διαδοχὴν τῶν προφητῶν. Idem docet Euseb. lib. 3. Eccles. hist. cap. 10. Hieronimi. lib. 13. in Esaiam cap. 49. *Post Aggeum, inquit Zachariam & Malachiam nullos alios prophetas, neq; ad Iohannem baptistam videram.* August. lib. de Ciuit. Dei. 17. cap. 24. *Toto, inquit, illo tempore, ex quo redierunt de Babylonia, post Malachiam, Aggeum & Zachariam, qui tunc prophetarunt, & Esdram, non habuerunt prophetas usque ad saluatoris aduentum, nisi alium Zachariam patrē*

*Iohannis. Euseb. libro 10. cap. 3. de prepar. Euang. post Aggeum, Zachariam, & Malachiam, non fuit amplius propheta apud Iudeos. At post Malachiam Machabæici libri scripti sunt. Aut igitur doceat Bellarminus quo tempore post Malachiam propheta fuerit, & quis ille fuerit, qui hos libros scripserit, aut fateatur eos non esse à propheta scriptos, vel denique concedat esse aliquem librum Vet. Test. canonicum, qui non est à propheta scriptus. 2, Quia eorum auctor Iosephus. Hierony. lib. 2. cont. Pelag. Machabeorum, inquit historia scriptor est Iosephus. Eusebius lib. 3. cap. 10, Est adhuc aliud eius (de Iosepho loquitur) elegans satis volumen, quod animus sit, qui imperium teneat in nobis, quem libellum quidam Machabeorum attitulauerunt, pro eo quod certamina inibi & agones pro pietate à Machabæis fratribus desudata contineat. Hierony. in catal. c. Iosephus. Alius quoque est liber eius (loquitur de Iosepho) in quo & Machabeorū sunt digesta martyria. At Iosephus Christum agnoscere non voluit. Aut igitur homo Christum repudiens potuit scribere librum canonicum, aut Machabæici non sunt canonici. 3, Quia est gentilis & non canonici libri compendium. Libro enim 2. cap. 2. vers. 24. Quæ à Iasone Cyrenæo quinque libris explicata sunt, nos uno volumine perstringere conabimur. Ad quem locum Vatablus. continet igitur hic liber Epitomen eorum, quæ à Iasone Cyrenæo pluribus verbis & libris sunt explicata. At si Epitome librorum Iasonis est canonica, tum etiam libri Iasonis canonici sunt. Epitome enim non habet plus auctoritatis, quàm ab illo cuius Epitome est, accepit. & ob eam causam vel gentiles libri, & eorum Epitomæ sunt*

sunt canonicæ, vel liber Machabæorum non est canonicus. 4. Quia pugnat cum veritate historiæ gentilis. Lib. enim 1. cap. 1. v. 7. *vocatis suis illustribus*, loquitur de Alexandro, qui unâ cum eo à iuvenute educati fuerant, vivus adhuc illis regnum suum dispartivit. At hoc non esse verum docent omnes historiæ. Plerosque enim servos illustres Clytum, Parmenionem, Philotam & alios necavit priusquam mortuus est. Deinde cum interrogaretur, cui regnum relinqueret, respondit, ei, qui optimus est. Curtius lib. 10, & Arrianus lib. 7. Diodorus Siculus lib. 17, τῷ δὲ φίλῳ ἐπερωτῶντι, τίη τὴν βασιλείαν ἀπολείπεις; ἐπὶ τῷ κατίστῳ. Lyra. *Querunt quem imperij faciat heredem*, respondit, dignissimum. Tanta illi magnitudo animi fuit, ut cum Herculem filium, cum Ariadæum fratrem, cum Roxanem uxorem pregnantem relinqueret, oblitus necessitudinū, dignissimū nuncupavit heredem, prorsus quasi nefas esset, viro forti alium quam virum fortem succedere, aut tanti regni opes alijs, quam probatis relinqui. Hac voce veluti bellicum inter amicos cecinisset, aut malum discordiæ misisset: ita omnes in emulationem consurgunt, & ambitione vulgi tacitum sermonem & favorem militum querunt, & paulò post. Non tam ipse hoc dismisit, quam alijs hoc disidendum reliquit. Præterea post eius mortem de successione tantum certamen fuit, ut corpus per multos dies inhumatum iacuerit, Testis plutarchus in eius vita. Atque hoc eum prævidisse, & prædixisse docet Arrianus lib. 7. Curtius lib. 10. Diodorus lib. 17. Denique cum duces eum decumbentem deflerēt inuenietis, respondit, cum excessero, dignum talibus viris regem. Postremò omnibus nota sunt bella & certamina, quæ post eius excessum ob suc-

cessionem contigerunt, ut taceam omnes eos, qui  
 Alexandrum sanguine attingebant, esse à successorib.  
 ut Curtius docet, occisos. Sed hæc omnia non  
 accidissent, si ipse regnum servis suis dispartiuisset.  
 Errat igitur historia Machabæorū. 1. Quia vnus liber  
 est scriptus Græcè. Hieron. in prolog. Galeato. *Secundus Græcusest, quod ex ipsa quoq; phrasi probari potest.*  
 At nullus propheta scripsit græcè. Omnes aut libri V.  
 T. à prophetis scripti sunt. Nullus igitur ex ijs om-  
 nibus originaliter græcè scriptus est. 6, Quia non est  
 in canone Iudaico. Hoc fatetur aduersarius. At ca-  
 non Christianus ex Iudaico factus est. Hoc probaui  
 ante. Non potest igitur esse in canone Christiano.  
 Quod enim Iudaicus canon non habet, hoc Christi-  
 anus ab eo accipere non potest. Et ob eam causam  
 tempore primitiuę Ecclesię canō V. T. Christianus &  
 Iudaicus per omnia consentiebant. 7, Quia tempore  
 primitiuę Ecclesię non fuit in canone christiano.  
 Hoc antè probatum est. Ergo & nunc in eo esse non  
 potest. Ecclesia enim non habet potestatem librū, qui  
 non est canonicus, faciendi canonicum. 8, Quia sunt  
 in ea quædam, quæ pugnant cum canonica scriptu-  
 ra. Libro enim. 2. cap. 12. v. 43. *laudatur Iudas, quod ob-*  
*tulerit sacrificium pro mortuis.* At in Dei verbo nullum  
 sacrificium pro defunctis institutum est. Deut. 5, v. 32  
*Custodite ergo ut faciatis quemadmodum præcepit Iehoua*  
*Deus vester vobis. ne declinetis ad dextram, aut ad sinistram.*  
 Aut igitur ostendat Bellarminus, vbi Iehoua sacri-  
 ficiū pro mortuis instituerit, aut fateatur Iudam  
 vel ad dextram, vel ad sinistram declinasse. Porrò in  
 cultu diuino non licebat quicquam facere, nisi que d  
 Deus

Deus præceperat. *Leuit. 10. 1. obtulerunt coram Iehoua ignem alienum, quod non præceperat eis. Tum egressus est ignis a facie Iehoua, & consūpsit eos.* Doceat Bellarminus ubi Deus præceperit pro mortuis sacrificiū offerre, Aut fateatur Iudā fecisse, quod nō erat mādātū Hoc cū doctissimus Calvinus te moneret, recte recisses, si secutus fuisses. At *Augustinum Caluino opponis, & doces illum ex hoc loco probare, pium esse orare pro mortuis.*

Ex quo libro Augustinus probat pium esse orare pro mortuis, ille est canonicus. Sed liber Machabæorum est ille, ex quo Augustinus hoc probat. Ergo liber Machabæorum est canonicus.

Respondeo Maiorem esse falsam, & iam antè docui Patres sæpè ex libris apocryphis, & gētilibus sua dogmata probasse, & ob eam causam nō omnes eos esse canonicos, ex quibus patres sua dogmata probant. Deinde conuertis te ad conuitia, & dicis, *tantum interest inter Spiritum Augustini, & Caluini, ut Augustinus quia libros Machabæorum credit esse canonicos, inde colligat bonum esse pro mortuis orare, Calvinus quod existimat malū esse orare pro mortuis, inde deducat libros non esse canonicos.* Comprime paululum hūc furorem. Hieronymus enim dicit *libros Machabæorum esse apocryphos.* Idem docet Cyprianus *in symbolo* cum eo cōsentit Nazianzenus *in carmine de genuinis S. Scripturae libris.* Idem facit Melito, Epiphanius, Origenes, Laodicensium concilium, ut antè ostensum est. Imò *Ecclesia*, ut inquit Hieronymus in prolog. ad lib. Salomonis, *non recipit eos inter canonicas scripturas.* Possemne igitur eodem modo dicere. *Tantum interest inter*  
spiritum

spiritum primitiue ecclesiæ & Bellarmini, ut Vetus Ecclesia à Spiritu S. gubernata eos inter canonicas Scripturas non receperit; Bellarminus verò receperit eos inter canonicas Scripturas. Define igitur cōuitiari. In promptu enim est, quo reprimaris. Quod verò attinet ad inuocationem pro mortuis, respondimus suo loco. 9, Quia petit veniam orationis impolitæ lib. 2. cap. 15. vers. 39, *Et si quidem rectè, & commentario congruenter, hoc & ipse volui, sin exiliter ac tenuiter, hoc est, quod potui, aut ut vetus habet, sin autem minus dignè, concedendum est mihi.* Bellarminus respōdet & paulum impoliti sermonis veniam petere. 2. Cor. 11. 6. *Quod si rudis sum sermone, non tamen sum rudis scientia.* At nusquam hic veniam petit, sed potius gloriatur ob imperitum sermonem. Theophylactus. *Ostendit Paulus se nihil defugere ruditatem, quin vel maxime de ea gloriari. Vult enim ostendere se non uti fucata, & polita oratione, ut quemquā decipiat, quemadmodum pseudoapostoli faciūt, sed uti rudi sermone, ut omnis vis diuina gratia tribuatur.* 1. cor. 2. 4. *Neque oratio mea & prædicatio mea versata est in persuasorijs humana sapiētie verbis: sed in demonstratione spiritualis potentia.* Deinde potuisse Paulū politè loqui, si voluisset, testatur Chrysost. in homilijs de Paulo, & in 4. libro de sacerdotio, & res ipsa indicat. Hic verò auctor conqueritur, se non potuisse rectiùs loqui. *sin exiliter, inquit, & tenuiter, hoc est, quod potui, τὸ τοιοῦτον ἔν μοι.* Non igitur huius libri auctor est Spiritus S. Illi n. nihil ipossibile. Prætereâ et si Paulus rudi utebatur sermone, cōmodè tamē & conuenienter sua dogmata elocutus est, 2. cor. 11. 6. *Omnino manifesti facti sumus in omnibus apud vos, Act.*

20.27. *Annūciaui vobis omne Dei consilium.* At auctor Machabæicorum dubitat, an historiæ convenienter scripserit, & addit se non potuisse meliùs scribere. Non rectè igitur hoc loco allegatur Paulus, nulla enim inter eos similitudo. 10. Quia quædam, quæ in hoc libro promittuntur, sunt fallæ. lib. n. 2. cap. 2, vers. 7. *Dicit ignotum fore locum istum in quo sc. arca erat abscondita, dum Deus recolleret multitu dinem populi, ac placatus fuerit, tum densque Dominum illa ostensurum, gloriæque eius cum nube apparituram.* Sed Deus est per mortem filij sui placatus, arca verò nusquam inuenta est. Ergo falsum promisit auctor Machabæicorum, Quod verò Bellarminus hoc vel de *ultimo Christi aduentu*, vel de *ipso Christo mysticè* intelligendum esse dicat, hæsitacionem arguit, & cum ipse hæsitet, neque sciat, quid definire debeat, non est necesse, vt eum pluribus verbis refutemus. Sed neque Epiphanius eum iuuat, liber enim ille de vitis prophetarum non est Epiphan. Hieron. enim in *catal.* eius non meminit. Sed neque Trithemius eum recenset, nisi in *additiuncula*. Deinde in Græco codice Basileę edito non exstat. Præterea auctor libri, de vitis prophetarum, hanc historiã de arca abscondita conuertit in allegoriam. Ex allegoria autem certum argumentum asferri non potest. Ad Tuitiensem non habeo necesse respondere. Porro totum illud de arca abscondita vanum est. Ieremias enim rem tanti momenti in suo libro non præterijisset, neq; Esdras & Nehemias illud post reditum intactum reliquissent. Præterea, Ieremias, neq; ante, neq; post captiuitatem potuit arcam auferre. Antè non potuit, tenebatur enim captiuus,

vsq;

vsq; ad vrbis excidium, *Ierem. 37. & 38.* post etiam non potuit, nam tum omnia erāt in manu Chaldaeorum. Deinde *arca & altare erant auro obducta*, vt docet Moses, *Exod. 25. 11.* Tantam verò prædam non passi fuissent crudeles milites sibi eripi. Præterea 2. Reg. ca. vlt. docet Scripturā *Chaldaeos omnia diripuisse, neq; quiequam reliquisse*, quid igitur sustulerit Ieremias, viderit Bellarminus. Quod autem Bellarminus dicit Ieremiam non potuisse tempore Zedechiæ, quo captus erat, arcam auferre, potuisse verò tempore Ioacim, quo liber erat, hoc pugnat cum Sixto Senēsi. ille n. cōtendit Ieremiā illud tēpore Zedechiæ, dum in carcere erat, per alios fecisse, li. 8. her. 12. Resp. ad ob. 5. Deinde est infirmum. A posse enim ad esse non valet consequentia. Præterea cū hoc absque scripturis dicatur, eadem facilitate à nobis negatur, quā à Bellarmino affirmatur. Rectiùs Lyra. *Quod hic dicitur de absconsione arca, & altaris incensi per Ieremiam, non habet magnam apparentiam. quod Ieremias in carcere fuit clausus vsq; ad diem captionis Ierusalem per Chaldaeos. vt pat. Iere. 37. & 38. Et sicut ante captionem ciuitatis ista non fecit, nec post captionem, vt videtur: quia capta ciuitate Chaldei omnia pretiosa, non solum aurea, & argentea, sed etiam ærea confregerunt, & totum rapuerūt, & asportarūt* 4. Reg. 25. & *Ierem. vlt.* Propter quod non videtur verisimile, qd Ieremia dimiserint arcam Domini, & altare incensi: quæ erant de auro purissimo, vt habetur in Exodo, igitur propter ista, & alia supradicta de morte Antiochi, à tempore Demetrii: quæ cum difficultate magna possunt cū alijs Scriptura locis concordari, vt patet ex supradictis. liber iste secundus, & maximè quantū ad præfationem, reputatur à mul-



*multis multum apocryphus.* 11. Quia lib. 1. cap. 8. vers. 16. dicit Romanos imperium suum uni homini annum committere, qui uniuersa ipsorum terra dominetur, cui omnes dicto sint audientes. At hoc falsum esse nemo ignorat. Romani enim non uni, sed duobus consulibus imperium committebant. Bellarminus dicit apud Romanos in more positum fuisse, ut consules alternis diebus imperarent, idq; probat exemplo Terentij Varronis, & Pauli Æmylij in pugna Cannensi. Quod equidem miror homini docto excidisse. Varro enim non ex prisca consuetudine, sed per vim alternis diebus imperabat. Plutarchus in vita Fabij. Varro, cum extorsisset ei alternis ut imperaret, castra castris coniungit ad vicum Cannas. Minutius & Fabius, cum in eodem bello simul imperatores facti essent, non alternis imperabant, sed copias inter se partiebantur, Plutarchus ibidem. In castra ut venit, offendit Minutium nihil iam modicè præ se ferentem, sed tumidum & inflatum, imperiumq; postulantem alternis diebus. Id haudquaquam placuit ei, sed diuisit cum illo copias. 12. Quia templum eodem die dicit profanatum, & expiatum esse, nempe 25. die Casleu, 1 Machab. 4. § 2. & 2. Mach. 10. 5. Eodem cap. v. 3. scriptum est templum expurgatum esse duobus annis, & sex mensibus, postquam sc. pollutum erat. Vatablus. Tantum enim temporis spacium intercessit inter templum profanatum, atque illud idem expurgatum. Explicet Bellarminus, quomodo eodem die templum, nempe vicesimo quinto Casleu profanatum, & expiatum sit, & quomodo inter eius profanationem & expiationem spacium biennij & sex mensium interfit. Alterutrum enim falsum esse necesse est.

Deinde

Deinde Vulgata versio dicit istam *Expiationem post biennium factam esse*, græca verò dicit post *biennium & 6. menses factam esse*. Vtrumque simul verum esse non potest. Quomodo persuadebit Bellarminus latinum textum Græco veriores esse? 13. Quia lib. 1. cap. 6. 16. dicitur Antiochus in Persia *in lecto suo mortuus esse*. At lib. 2. cap. 1. vers. 16. dicitur *in templo Nanea membratim casus esse*. Et rursus li. 2. ca. 9. v. 28. dicitur *peregrè inter montes miserrimo mortis genere vitam finivisse*. Hæc omnia si vera sunt, tum vnus & idem homo tribus diuersis locis mortem oppetit. Hic variè tumultuantur papistæ. Sed illis aqua hæret, vt est in proverbio. Alij diuersos somniant Antiochos, alij aliud comminiscuntur. Nos alijs neglectis solum Bellarminū persequemur. Ille hæc de vno & eodem Antiocho dici consitetur, & dicit eum lib. 2. cap. 9. non esse peregrè mortuum, sed *cepisse peregrè agrotare*, & ægrum domum deportatum esse. Capite verò primo eiusdem libri non ipsum sed *eius exercitū Nanea casum esse*, atque ita istum locum κατὰ συνειδήσιν intelligendum esse. Nisi Bellarminus Iesuita esset, dicerem eum somniare. Nam lib. 2. cap. 9. v. 28. dicitur Antiochus *peregrè inter montes miserrimo mortis genere vitam finivisse*, & vt omnis dubitatio tolleretur, additur *eius corpus à Philippo domum deportatum esse*. Si ille qui peregrè vitam morte finit, & cuius cadauer domum deferretur, mortuus non est, tum concedo, Bellarmine, peregrè mori, idem esse atque peregrè agrotare, & ægrum domum deferri. Ad locum lib. 2. cap. 1. v. 16. quod attinet, dicitur *istic lapidibus obrutus, & membratim dissectus esse*, caput item eius *amputatum* foras

foras proiecctum esse. Excipit Bellarminus, hoc exercitui Antiochi, non ipsi duci Antiocho contigisse. Hanc suam responzionem probat ex 14. Genes. vbi regem Sodom cæsum esse narrat scriptura, & eundem postea viuentem & loquentem introducit. At in decimo quarto Genes. regem Edom non cæsum, sed *cecidisse* scriptum est, atque hoc variè exponunt. Deinde synecdoche illic locū habere potest, hic non potest. Auctor enim lib. 2. cap. 1. v. 17. *percuſserunt*, inquit, *ducem, et eos qui cum eo erant*, etc. Vides manifestè ipsum ducem cum satellitibus cæsum esse. Si igitur probabilibus argumentis docere potes, eum, qui lapidib. obrutus, & membratim conſectus est, non esse mortuum; tum fatebor Antiochum hic mortuum non esse. Lyra, *clauſerunt templum, cum intrasset Antiochus*; & sic nō videtur quod euaserit, quia sacerdotes mortem eius magis querebant, quam aliorum. ideo subditur, *percuſſerunt ducem primò & principaliter, & eos, qui cum eo erant consequenter, & diuſerunt membratim. Quod autem per ducem intelligatur Antiochus*, patet ex principio huius partis. Nam cum in Perside eſſet dux ipſe. i. Antiochus etc. In 10, cap. 2. lib. idem dicit hunc librum propter hanc de Antiochi morte difficultatem. & propter alia quedam à multis apocryphū reputari. Relinquitur igitur, vel vanum esse, quod Machabæici docent, vel vnum & eundem hominem ter mortuum esse. 14. Quia Iudas occubuit anno 152. Seleuci, 1. Mach. cap. 9. v. 3, & 18. Idem anno 188. Seleuci scripsit epistolam ad confratres suos, 2. Mach. 1, 10, Quæ si vera sunt, sequitur eum anno 36. post mortem suam epistolam scripsisse. Respondet Bellarminus *numerus istum esse si-*

nem præcedentis Epistola, & non pertinere ad sequentem Epistolam, idq; probat, quia in Græcis libris post istum numerum est magna distinctio. Sed hoc est valde incertum. Latini enim codices vnanimiter istum numerum cum sequentibus coniungunt. Idem facit Lyra, & reliqui expositores. Deinde si hoc verum est, tum Latini libri ex Græcis emendati sunt. At hoc negat Bellarminus lib. 2. Præterea non omnes græci codices ita distinguunt. Biblia enim regia, quæ Arias ad exemplum Complutense edidisse dicitur, eodem modo distinguunt, atque libri Latini. 15. Quia laudat Razin semetipsum interficientem, 2. Mach. 14, 42. *generose mori malens*. Bellarminus respondet, *Factum narrari, non laudari*. At narratur & laudatur simul, Posuit enim hoc ex opinione Hebræorum, qui hoc modo sibi ipsi necem consciscere, non putarunt illa laudabile esse. Lyra. *In his duobus casibus dicunt Hebræi, quod non solum licitum, sed etiam meritorium sit semetipsum interficere: quod talis interfectio ordinatur in Deum*. Et paulò post, *Unde & scriptura libri huius, quæ recepta est ab Ecclesia ad legendum pro informatione morum, non videtur hic Razin arguere; sed potius commendare de sui ipsius interfectione*. Manifestum igitur Razis factum ab auctore laudari. At idem factum à Spiritu S. improbatur. Deinde vers. 46. *Iam prorsus, inquit, exanguis prehensa utraque manu intestina protulit, & in turbam proiecit, ac Dominum vite ac Spiritus precatum, ut hac eadem rursus sibi redderet*. At hæc impossibilia simul & absurda sunt. Impossibilia, homo enim iam prorsus exanguis, intestina sibi ipsi auellere, & in alium proijcere non potest. Absurda, qui enim in

tam

tam improbo facinore, tanto feruore & æstu occupatus est, Deum in ipso facinoris perpetrandi momento inuocare non potest. Propter hæc & similia pronunciamus cum Hieronymo, *Machabæorum libros legere quidem Ecclesiam, sed eos inter canonicas scripturas non recipere.* præfat. in libr. Salom.

## CAPVT XIV.

*Iudicium Veteris Ecclesie de libris Novi Testamenti.*

**H**Actenus differuimus de libris Veteris Testamenti, nunc de libris Novi Testamenti pauca addemus. Hi etsi apud nos in eadem sunt auctoritate: tamen quoniam Veterum de ijs diuersum fuit iudicium, operæ pretium erit, vt secundum nostram promissionem ostendamus, quid veteres de ijs iudicauerint. Libri igitur Novi Testamenti in duas Classes dividi possunt. nempe in eos, de quibus nemo dubitauit, & in eos, de quibus aliquando dubitatum fuit. Primi ordinis sunt 4. Euangelia, Actus Apostolorum, Tredecim epistolæ Pauli, Prima epistola Iohannis, & prima Petri, *Enseb. li. 3. cap. 25. Et lib. 6. ca. 18.* Secundi ordinis sunt duæ posteriores epistolæ Iohannis, Secunda Petri, Epistola Iudæ, Epistola Iacobi, Apocalypsis Iohannis, & Epistola ad Hebræos. *Enseb. lib. 3. cap. 3. & cap. 25. in eodem libro. Et lib. 6. cap. 18.* Postea verò re diligentius explorata, & cognita, vniuersæ Ecclesiæ hos posteriores agnouerunt. Testis Athanas. in Synop. Cyprian. in Symb. & Hieronymi. in prolog. Galeato. Non igitur damnamus Musculi, Heshusij, & aliorum sententiam, qui hos posteriores à prioribus, cum quibusdam patribus primitiue Ecclesiæ

clesiæ discernunt, libenter tamen cum Athanasio, Cyrillo, Hieronymo & alijs profitemur, eos habendos esse eodem loco, & honore. Atque ita iudicat confessio Belgica, *Articulo. 4.* Confessio Gallica, *Articulo 3, de verbo Dei,* & Harmonia confess. *Scet. 1. de Scriptura.*

*Conclusio.*

Vt omnia in pauca contraham. Manifestum est principia Christianorum dogmatum, debere esse certa, ante concessa, extra omnem controuersiam posita, integra, immutabiliter vera, & diuina. Ego verò ostendi hos sex libros cum istis additionib. esse dubios, ab altera parte negatos, in controuersia positos, falsos, vitiatos, & humanos. Necessariò igitur concludo eos non posse principia Christianorum dogmatum esse.

FINIS.

SIBRANDI

133

# SIBRANDI LVBBERTI

## De *Principiis Christianorum dogmatum* Liber secundus.

### CAPVT I.

*Status controuersia proponitur.*

**S**UPERIORE libro ostēdimus, quālibet libri sint Canonici: nūc ostendemus, quānam sit authentica canonicorū librorū editio. Hoc est secundum papisticę religionis principium. Ex libris n. apocryphis nō possunt oēs suos errores defendere. Ideo vulgatam versionem, quę multis errorib. scatet, pro secūdo principio acceperunt. Quoniam verō varię sunt versiones Veteris & N. Testamenti, exq̃; in varijs linguis extant; æquum fortē esset de singulis cum Bellarmino conferre. Sed de omnibus inter nos controuersia non est. Existimamus igitur non necesse esse de singulis versionib. & editionibus disputationem instituere, & ob eam causam reliquis missis, tantū ea, quę inter nos controuersa sunt, prosequemur. Ac primū de veteri Testamento, deinde de Nouo disseremus. Veteris Testamenti sunt duę Editiones, de quibus cōtrouersia est. Vna *Hebræa*, à prophetis ipsis scripta; Altera *Latina* (quā *Vulgatam* dicūt) ex hebræo in Latinū versā. De his duabus editionibus controuersia est. Aduer-

farij enim volunt Hebræam editionem corruptam esse, ac proinde authenticam esse non posse. Nos illud negantes dicimus Hebræum textum ab omni corruptione liberum, ac proinde authenticum esse. Sed quoniam aduersarij non omnes idem dicunt, ideo illorum sententia paulò diligentius explicanda est. Illi sese ita implicant, ut difficile sit verum cōtroversie statum proponere. Arias enim Benedictus, Vatablus, Mercerus, Pagninus, Eugubinus Steuchus, & alij Hebræum textum prorsus incorruptum esse ostendunt. Contrà Canus *libr. 2. cap. 13.* Hebræos libros prorsus corruptos esse clamat, idem facit Lindanus. Bellarminus eos neque prorsus corruptos, neque prorsus integros esse asserit, sed tamen ita corruptos esse dicit, ut regula fidei esse nō possint. Vera igitur Bellarmini sententia est, Hebræos libros neque prorsus corruptos esse, tamen ita corruptos esse, ut authenticos esse non possint. Nos ex aduerso hoc negamus, & dicim⁹ Hebræos libros ab omni corruptione liberos esse, & proinde esse authenticos. Hæ duę sententię quoniam ex diametro pugnant, simul veræ esse non possunt. Nos more nostro prius aduersarij sententiam expendemus, & ad eius rationes respondebimus. Deinde nostram explicabimus, eamque immotis argumentis probabimus.

## CAPVT. II.

*Bellarmini rationes, quibus Hebræum textum corruptam esse adserit, examinantur.*

**S**Tatu cōtrouersię intellecto, Bellarmini argumenta excutiemus. Ille suam sententiam probat 5, argumentis.



gumētis. Primum, Quia Calvinus lib. 1. Instit. cap. 13. §. 9. in nono cap. Esaiæ v. 6. legendum asserit, *Et vocabitur nomen eius admirabilis*. At in Hebræo est יקרר non autem יקר. Inde concludit hebræum textum esse deprauatum. Argumentum tale,

Vbicunque Calvinus aliter legendum cōtendit, q̃ in hebræo textu legitur, ibi Hebræus textus est deprauatus. Sed hoc loco Esaię 9. Calvinus cōtendit legendum esse, *et vocabitur admirabilis*, etc. cū tamen in Hebræo textu legatur, *Et vocabit*. Ergo textus Hebræus etiam Caluini confessione est deprauatus.

Minorem probat ex Institutione lib. 1. cap. 13. §. 9. Vbi Calvinus *Neque est*, inquit, *quod Indæi oblatrent, et sic lectionem inuertant: hoc est nomen quò vocabit eum Deus fortis, pater futuri seculi, ac demum hoc unum reliquū filio faciant, ut sit princeps pacis, quorūmenim tot epitheta in Deum congesta forent*. Ergo etiam Caluini confessione turbidus alicubi fluit ipse fons.

Nos prius ad argumentū, deinde ad Calvinum respondebimus. Ac primum dicimus Maiorem esse falsam. Caluini enim interpretatio non est regula authenticæ veritatis in textu Hebræo: Sed cōtrā textus Hebræus est regula Interpretationis Caluini. Quam ob caussam, quādo Caluini Interpretatio cum textu hebræo congruit, tum eam recipimus, quando verò cum textu hebræo non congruit, tum nos eam cum bona gratia Caluini, textui hebræo postpōnimus. Ad Minorem respondemus eam non esse Caluini. Nam & vetus Interpres ante illū ita vertit, idem fecit Hieronymus lib. 3. in Esaiam in fine, quin & Græca

translatio quæ nunc exstat, vertit καλῶς. Hanc Interpretationem sequutus est Calvinus. Deinde hæc versio ex Hebræo textu commodè colligi potest. Sæpè enim accidit apud Hebræos, vt verba actiua tertiæ personæ passiue, vel vt alij dicunt, impersonaliter accipiantur. vt ירכאום *conterent eos*, id est, conterentur, Iob 4. v. 19. Et ibi Mercerus. Et Gen. 15, 6. ויחשבה *imputauit ei ad iustitiam*. hoc est, imputatum est ei ad iustitiam, Rom. 4, 3. Et ærumnosæ noctes מנו לך *constituerunt mihi*. h. e. ærumnosæ noctes mihi constitutæ sunt. Iob. 7. 3. Et ibi Mercerus. Et *repetunt hac nocte animam tuam a te*, h. e. anima tua repetitur abs te, Luc. 10. 20. Mercerus in Iob. 4. 19. Ad hunc modum *Vocabit nomē eius*, non ineptè verti potest *Vocabitur nomen eius*. Hinc apparet Interpretationem Caluini non pugnare cum textu hebræo, sed frequentiss. vsu loquēdi ex eo deductā esse; neq; tamē errant, qui hoc verbum actiue accipiunt, neq; pugnant cum Caluino, modo rectè intelligatur. Hebræi n. sæpè verba actiua tertiæ personæ singularis numeri, sine certo Nominatiuo ponūt, subaudito Benoni eiusdē verbi, vt יפאדע *plaudet super eum manibus suis*, Iob. 27. 23. h. e. complodēs complodet manus suas, vel quod idem est, manus super eum complodētur. Mercerus in Iob, cap. 27. 23. Et ויגד *annūciauit Iacobo*, Genes. 48, 2. h. e. nuncius nunciauit Iacobo, vel quod idem est, nunciatum est Iacobo, Mercerus in Iob. 27. v. 23. Et, eo die וישא *tollet super vos parabolam*, Michæ 2. 4. h. e. lamentator lamentabitur, & tollet super vos parabolam, vel quod idem est, tolletur super vos parabola. Mercerus in Iob. 27. v. 23. Eodem modo *vocabit*

cabit eius nomē Deum fortem, h. e. vocator vocabit nomē eius. Ille verò vocator est Deus, solus n. Deus talia nomina accipere, & dare potest. Esa. 42, 8. *Ego sum Iehoua, & hoc est nomē meum & gloriam meam alteri non dabo.* Siue igitur dicas, *Deus pater vocauit nomen eius, nempe filij sui Deum fortem*, Siue dicas, *nomen eius a Deo patre vocatur Deus fortis*, perinde est. Sententia enim est eadem. Vtraq; etiā interpretatio est orthodoxa, & cum textu hebræo congruit, ac proinde textus hebræus hoc loco corruptus non est. Hæc ad argumētum, nunc ad Caluinum respondebimus. Ille non reijcit cōmunem hebraici textus lectionem: sed reprehendit impiam Iudæorum Interpretationem, quam illi ex detortis prophetæ verbis eliciunt, & vt res sit clarior, proponam ipsa Caluini verba in illum ipsum locum Esaiæ. *Quāquam*, inquit Calvinus, *acti- num est verbum quia tamen indefinitè capitur, non dubitauis reddere in neutro genere. Tantundem enim valet, ac si in plurali numero dixisset, vocabunt. Et nos Galli phrasin hanc imitamur, on appellera. Quod enim ad Deum referunt Iudæi, & legunt vno contextu, vocabit nomen eius admirabilis, consiliarius, Deus fortis, pater æternus, princeps pacis, facile apparet studio, vel potius libidine obcurande Christi gloriæ fieri. Ni enim nimis cupidè cum sua Deitate spoliare contenderent, optimè i'lueret cōtextus, sicut nostri reddunt, Deinde quorsum opus fuit Deum insigniri istis Epithetis, si tantum hoc volebat propheta, Nomen ab eo impositum fuisse Messia. Nam epitheta, quibus ornari solet Deus, vel perpetua sunt, vel accommodantur ad causam presentem, quorum neutrum hic agnoscere licet. Deinde non erat hoc recta series inter diuersa elogia*

medium *Dei nomen inferere, sed continuo post verbum יקרא debueras subiici, Deus fortis, etc.* Ex his manifestè apparet Calvinū non cōtendere, in textu hebręo aliter legendum esse, quā hodiè legatur: dicit enim apertè *verbum esse actiuum, & contextum optime fluere, & phrasin esse planè similem Gallica phrasi, qua dicitur, on appellera*: sed tantū impudentem Iudęorum deprauationem refellere, illi enim dicunt יקרא esse verbum actiuum, ideo volūt omnia ista Epitheta, quę sequuntur, non referri ad puerum, qui eiusmodi Epithetis dicitur esse ornatus, sed ad Deum patrem referri, quī sit *ille admirabilis, ille cōsiliarius, ille Deus fortis, ac potens ille pater seculi*, qui puero daturus sit nomen *principis pacis*. Et vt Christum Deitate spoliēt, spoliant eum omnibus Epithetis, quę Spiritus S. ei tribuit. Hoc illud est, quod reprehendit Calvinus, & docet, etsi verbum vocandi sit actiuum, tamē pro more hebręis vsitatissimo sumi impersonaliter, ac proinde non dubitasse se id reddere in neutro genere. Tale igitur est Bellarmini argumentum,

Quicumque verbum actiuę vocis vertunt indefinitè, seu neutraliter, illi fatētur textum hebraicum esse deprauatum. Sed Calvinus vertit verbum vocandi, quod est actiuę vocis, neutraliter. Ergo textus hebręus etiam Caluini confessione corruptus est, & deprauatus.

Huius Maiorem falsam esse aut ipse Bellarminus non audebit negare, aut ostendet toti mundo se esse hebręi sermonis imperitum. Qui enim vel prima rudimenta Hebręę linguę attigerunt, illi sciunt hoc esse hebręis vsitatissimum, vt verba impersonalia  
vel

vel neutra exprimant per verba actiua, quandoque plurali, quandoq; singulari numero. Ita pro eo quod nos dicimus, *Quid agitur? luditur, dormitur*, illi dicunt, *Quid agit? Ludit, dormit.* vel *quid agunt? ludunt, dormiunt*, subaudiunt enim *homines* vel *quivis homo*, vel *Benoni eiusdem verbi*, nempe, *quid agit? sc. quivis agens, dormit, quivis dormiens, ludit, quivis ludens*, & hoc non solum Hebræis, sed omnibus penè gentibus vsitatum est. Ita Græci in plurali dicunt, *φασι*. Latini, *sic aiunt, ferunt*, sc. *quivis homines*, quod idem est, ac si dicas, *sic fertur*, Germanicè, *Man thuet*, Galli, *on fait*, q. d. *homo facit*, i. *fit a quolibet homine*. Idem in hebræa lingua sæpissimè fieri euicimus, cùm argumentum destrueremus. Et vt res sit clarior, adducam adhuc vnũ atque alterum exemplum de eodem verbo Genes. 16, 14. *Idcirco vocauit puteum viuientis, videntis me*. Illud etsi quidam vertunt, *propterea appellauit putcum*, quemadmodum habet vulgata versio, & Pagnini, tamen certum est, verbum appellandi non accipi hic actiuè, neque referri ad Agar, ponendum enim esset in fœminino genere, quemadmodum positum est versu præcedenti, vbi dixerat de Agar, *quod ipsa vocauerat* אַרְקָא (in fœminino) *nomen Domini*, qui loquebatur cum ea, *Tu Deus, qui vidisti me*: sed accipi neutraliter, seu impersonaliter. Ideo notat ibi Vatablus *Subaudiendum est*, inquiens, *is qui ei nomen indidit*. Satis tritum est Hebrais verbum sic indefinitè accipi. Quo tamen sensus clarior sit, quidam in passiuum resolvunt, *vocatus est*. Ex his perspicuum est, eos qui ita resoluunt, non proptereà fateri textum hebræum esse corruptũ. Sed clarè exprimere latinè, quod clarè significat

ficat phrasis hebræa. Planè eodem modo Gen. 19, 22 textus hebræu. habet, *propterea vocauit nomen ciuitatis Soar*, vbi vulgata legit, *Idcirco vocatum est nomen urbis illius Segor.* & cap. 21, 31. Hebræus textus habet, *Ideo vocauit locum illum Berjeba*, vulgata autem legit, *Ideo vocatus est locus ille Bersabee*. Huiusmodi exempla passim occurrunt, grauiter igitur impingit Bellarminus, dum dicit Caluinum contendisse in hebræo legendum esse יקרא passiuè, & non, יקרא actiuè, propterea quod maluerit ad clariorem intellectû, & ad præripiendam ludæis occasionem calumniandi, resolvere neutrum verbum in vocem passiuam, vt solent Latini resolvere, & ob eam causam falsum est, quod asserit textum hebræum etiam Caluini confessione corruptum esse. Secundû argumentum, Quia Caluinus lib. 1. Institut. cap. 13. §. 9. locum Ieremæ cap. 23. v. 6. vertit. *Et hoc est nomen, quod vocabunt eum*, cû in hebræo sit יקרא *vocabit eum*. Est enim numerus singularis. Argumentum tale,

Quicumque interpretando Hebraica resoluunt verbum singulare, quod potest accipi neutraliter, in plurale, & pro *vocabit eum* sc. *vocans*, vertunt *vocabunt eum* phrasi Latinis vsitata, illi fatentur textum hebraicum esse deprauatum. Sed Caluinus ita resoluit verbum יקרא *vocabit eum*, & pro eo vertit *vocabunt eum*. Ergo textus hebræus etiam Caluini confessione est deprauatus.

Miror nisi Bellarminum horum argumentorum pudeat. Nos respondemus Maiorem esse falsam. Caluini enim Interpretatio, vt ante dictum est, non est regula

regula authenticæ veritatis in textu hebræo. Et ob  
 eam causam hæc & similia argumenta ridicula sunt,  
 & indigna ad quæ respōdeatur. Deinde Bellarminus  
 hic ostendit non ferendam sophisticandi libidinem.  
 Siue enim pluraliter veritas verba actiuæ vocis inde-  
 finitè posita, siue ea veritas singulariter per vocem  
 passiuam, eòdem res redit. Hoc enim nihil aliud est,  
 quàm phrasin hebraicam hebræis vsitatam, reddere  
 alia phrasi, quæ Latinis sit vsitata. Ad Minorem dici-  
 mus hanc Interpretationem non esse Caluini. Antè  
 eum enim vetus Interpres vertit *vocabunt*. Idem fa-  
 cit Pagninus. Hos imitatur Calvinus. Deinde hæc  
 Interpretatio cum hebræo textu optimè congruit,  
 præcedit enim nomē collectivum *ישראל* cum quo  
 verbum plurale & singulare rectè iungi potest. Israël  
 enim ponitur pro toto populo Iudaico, vel saltem  
 pro 10. tribubus, quæ peculiariter Israël vocaban-  
 tur. Hanc ob causam Hieronymus vertit *Vocabunt*  
*eum, & vocabit eum*. In Ierem. ad dictum locum. Si-  
 milia loca passim occurrunt in sacris & prophanis li-  
 teris, Genes. 1. versu 26. *Faciamus hominem, ut*  
*dominentur piscibus maris*, cùm tamen homo sit sin-  
 gularis numeri. Non errant igitur, qui in sin-  
 gulari numero vertunt *Vocabit*, neque errant,  
 qui in plurali vertunt *Vocabunt*. Sensus enim est  
 idem, vtræque enim Interpretatio orthodoxa, &  
 cum hebræo textu congruit. Manifestum igitur tex-  
 tum hebræum hoc loco corruptum non esse. Terti-  
 um Argumentum, Quia Paulus ad Rom. 10, 19.  
 vertit, *In omnem terram exiit sonus eorum*, cùm tamen  
 in hebræo sit *קוֹלָם* *linca eorum* Psal. 19, 5. Argumen-  
 tum tale,

Qui-



Quicumque locus veteris Testamenti à Pauli explicatione discrepat, ille est deprauatus. Sed hic locus Psal. 19, 5. à Pauli explicatione discrepat, Ergo textus hebræus hoc loco deprauatus est.

Maiorem concedimus esse veram. Quicumque n. locus rectè intellectus à Pauli explicatione discrepat, is citra controversiam est malus, & deprauatus. Sed Minorem nunquam probabit Bellarminus. Nos autem eam disertè negamus. Apostoli enim verba à Davidis non discrepant. Nam cùm Paulus doceret Gentiles electos esse, regerebant Iudæi, hoc verum non esse, Gentiles enim non esse vocatos. Sed hoc Paulus negat. Docet enim sonum eorum *celorum* in vniversam terram exiuisse, h.e. vniversam cælorum fabricam fuisse illis magistratam, vel quod idem est, eos iam à creatione mundi, per visibilem cælorum structuram, ad inuisibilem Deum colendum vocatos esse. At idem docet David, dicit enim *calos enarrare gloriam Dei*, hoc autem fieri, cùm *linea & verba celorum in vniversam terram exiuerūt*, quod nihil aliud est, quàm vniuersas gētes per visibilem cælorum fabricam, ad inuisibilem Deum vocatos esse. At tamen, inquis, David dixit, *Linea eorum*, & Paulus dixit, *Sonus eorū*. Ad hoc respondeo, primū, Apostolos in citandis scripturarum testimonijs magis de legitimo sensu, quàm de verbis fuisse sollicitos. *Origen. in Epist. ad Rom. lib. 3. Hieron. lib. 3. in Esaïam cap. 7. Et in Prefat. libr. 16. in Esaïam, & ad Algasiam Quest. 2. Et ad Pammachiū in libello de optimo genere interpretandi*, vbi hanc materiam ex professo tractat, & multis exēplis illustrat. Deinde *cælorum linea* est *ocularis vox* siue so-



*mus calorum.* Paulus igitur vel eandem vocem expressit, vel effecto tribuit, quod Dauid caussæ tribue-  
rat, idque manente eodem sensu & sententia. Mani-  
festum igitur, & hoc loco textum hebræum corru-  
ptum non esse. Quartum argumentum, Quia in om-  
nibus Græcis & Latinis libris legitur, *Foderunt manus*  
*meas, & pedes meos.* Psalm. 22. 17. Cum tamen in he-  
bræo sit כִּאֲרִי *Sicut Leo.* Argumentum tale,

Quando Græci & Latini codices vnanimenter ab  
Hebræo textu discrepant, tum hebræus tex-  
tus est corruptus. Sed in Psal. 22. v. 17. omnes  
codices Latini & Græci ab hebræo textu vna-  
nimiter discrepant. Ergo hebræus textus hoc  
loco est corruptus.

Respondeo Maiorem esse falsam. Græcorum enim  
& Latinorum librorum consensus non est regula  
authenticæ veritatis in textu hebræo. Omnes enim  
Græci & Latini libri (loquor de Interpretationibus  
vulgatis) dicunt arcam constituisse 27. die Mensis sep-  
timi, cum tamen hebræi rectè dicant, hoc factum es-  
se 17 die mensis eiusdem, Genes. 8. 4. Cuiusmodi exem-  
pla plura colligi possunt. Ex ijs tamen non sequitur,  
libros hebræos, sed Græcos & Latinos deprauatos  
esse. Nam cum numeri in Heb. Græcis & Latinis li-  
bris discrepant, tum hebræos sequi debemus. *Aug-*  
*ust. de Cinit. Dei lib. 5. cap. 11. & lib. 18. cap. 44.* Sed ne-  
que Minor vera est. Quidam enim libri habent duas  
lectiones. Vnam כִּאֲרִי, alteram כִּאֲרִי, & sunt, qui di-  
cunt se vidisse libros, in quibus tantum כִּאֲרִי scriptū  
erat. *Pet. Gualt. lib. 1. cap. 8. & lib. 8. cap. 17. Mullerus*  
*in dictum locum, Andrada lib. 4. pro concil. Trident. Ioan.*

*Isaac*

*Isaac lib. 2. cont. Lindanum. Pagninus & Vatablus ad dictum locum.* Deinde Masoritæ monent legendum esse בארי, & si quis legit בארי, docent illud in genuina significatione accipiendum non esse. *Tremell. & Iunius in Psalm. 22. 17. Bellarminus de verbo Dei, lib. 2. cap. 2.* Quam ob causam Hieronymus legens בארי vertit, *foderunt*, & Paraphrastes Chald. utramque lectionem coniunxit. Quod autem in בארי Aleph abundat, nouum non est. Verba enim in quibus *media quiescit*, solent aliquando Aleph adsciscere, ut Ozeæ cap. 10, 14. Et Zachariæ 14. 10. *Muller. in Psal. 22. 17.* Postremò si illud est corruptum, in quo duplex est lectio, tum sequetur nullum penè versum in vulgata Editione esse integrum, Nam ut Biblia nunc sunt à Louaniensibus edita, nullus penè versus est, in quo non sit adnotata lectionis varietas. Ex his manifestum est, hebræum textum hoc loco corruptum non esse. Quintum argumentum, Quia Exod. 2. post versum 22. in Græcis & Latinis exemplaribus legitur integer versus, qui non est in hebræis, nempe, *alium quoque genuit, et vocauit nomen eius Eleazar, dicens, Deus patris mei auxiliatus est mihi, & liberauit me de manu Pharaonis.* Argumentum tale,

Quicumque libri non habent omnia quæ sunt in Græcis & Latinis libris, illi sunt deprauati. Sed Hebræi non habent omnia, quæ sunt in Græcis & Latinis libris. Ergo hebræi libri sunt corrupti & deprauati.

Sed iam ante respondimus Latinos & Græcos libros non esse regulam authenticæ veritatis in textu hebræo. Deinde æquè facile est ad Græcos & Latinos

nos libros addere, quàm ab Hebræis detrahere. Nisi igitur Bellarminus ostēdat, Hebræos libros mutilatos esse, frustra laborat. Deinde & Minor falsa est. Caietanus enim doctissimus papista & Cardinalis, dicit *istum versum esse supernacuum*. Est igitur fallacia consequentis. Non enim sequitur hebræos libros, qui eum non habent, esse mutilatos, sed sequitur ad Græcos & Latinos libròs adulterinum aliquod appositum esse. Hoc Caietani iudiciũ verum est, Editio enim Roberti Stephani in Fol. eum non agnoscit: Libri item Louanienses notant eum asterisco. Manifestum igitur libros hebræos hoc loco corruptos non esse. Et cùm Bellarminus alia argumenta non habeat, quibus ostendat libros hebræos esse deprauatos; & illa omnia vel falsa sint vel nihil concludant: sequitur falsum esse quod docet hebræos corruptos esse. Aut si hoc nō concedit, negare non potest, quin reliqua omnia (loquor ex hypothesi) his quinque locis exceptis, sint integra, sana & incorrupta, ac proinde sint regula & norma fidei.

## CAPVT III.

*Hebræam Editionem esse authenticam.*

**B**ellarmini argumentis contra Hebræam editionem refutatis, sequitur vt immotis argumentis ostendamus textum hebræum in Veteri Testamento esse authenticum. Primum argumentum, Quia hebræus textus ante ætatem Christi, & post eam vsq; ad concilium Tridentinum fuit authenticus.

Quæ Editio ante ætatem Christi, & post eam, vsque ad concilium Tridentinum fuit authenti-

ca, ea & nunc est authentica. Sed hebræa editio ante ætatem Christi, & post eam vsq; ad concilium Tridentinum fuit authentica. Ergo hebræa editio & nunc est authentica.

Maiorem aduersarij, volūt nolūt, coguntur cōcedere, nisi probent veteris Testamenti editionem esse deprauatā, & Latinam, quam volunt ipsi substituere, esse ea integriorem. Vel quod idem est, esse eam Latina corruptiorem. Hoc equidem aliqui impudentes monachi asserere non erubescunt, sed qui inter eos modestiores sunt, vt Arias, Sixtus Senēsis, Eugubinus, Steuchus, Caietanus, Mercerus, Vatablus, Pagninus, Bellarminus, & alij hoc iure improbant, & illorum argumenta doctè refutant. Sed inter hos etiam est aliqua discrepātia. Arias n. Vatablus, Pagninus, Caietanus, & alij volunt hebræam Editionem esse prorsus incorruptam. Bellarminus verò asserit eam non prorsus incorruptā esse, sed non adeo corruptam, vt Lindanus, Canus & alij volunt, interea ita corruptam esse dicit, vt non possit esse authentica. Nos eam corruptam esse prorsus negamus. Nam ante ætatem Christi corrupta non est, Iosephus n. lib. 1. Cont. Appion. docet Iudæos tanta fide conseruasse S. Scripturam, vt maluerint mortem oppetere, quàm quidquā in ea immutare. *Nam cum tot, inquit, secula interceßerint, nemo tamen quicquam addere, vel auferre, vel permutare ausus fuit, omnibus enim nostra gentis hominibus insita quodammodo atque ingenita fides est, credere hæc Dei esse consulta, & his acquiescere, ac pro ipsis, si ita res poposcerit, libenter animam ponere.* Idem iisdem verbis docet Euseb. lib. 3. Eccles. Hist. cap. 10. Idem Eusebius

bis ex Philone, *Mirabile, inquit, mihi videtur duobus annorum millibus, imò maiore tempore iam fere transacto, nec verbum unum in lege illius esse immutatum, sed centies unusquisq; Iudeorum morietur, q̃ legi Moysæ derogabit.* lib. 8. præparat. Euāg. cap. 2. Deinde si Iudæi adulterassent Scripturam ante tempus Christi, Christus & apostoli tam nefarium flagitium non dissimulassent. ad eorum enim officium pertinebat, talia flagitia patefacere. At Christus & apostoli nunquam accusarunt Iudæos adulteratæ scripturæ. Denique si Iudæi ante ætatem Christi adulterassent scripturam, Christus & apostoli nō monuissēt suos auditores vt scripturā legerēt. At Christus & apostoli monuerūt eos vt scripturam eo tempore vſitatam legerent, Ioan. 5. 39, *Scrutamini scripturas.* Luc. 16, 29. *Habent Moſen & prophetas, audiant eos.* Prætereà si Iudæi adulterassent scripturā ante ætatem Christi, Christus & apostoli ex ea suam doctrinam non pbaſſent. At Christus & apostoli paſſim ex ea suam doctrinam probāt Act. 28, 33. *Suadens eis, quæ de Iesu Christo sūt ex lege Moſis & prophetis, à manè vsq; ad vesperam.* Et Luc. 24. 27. *Et incipiens a Moſe & ab omnibus prophetis, interpretabatur illis in omnib. scripturis, quæ de se scripta erant.* Deinde si Iudæi ante Christum adulterassent scripturam, tum Paulus non dixisset, *ſe credere omnibus iſtis, quæ ſunt in Moſe & prophetis,* Act. 24. 14. Postremò, si scriptura ante Christi ætatem fuit adulterata, tum tota doctrina Noui Testamenti eſt falſa. Paulus enim diſertè dicit, *Se nihil dicere extra ea, quæ ſunt in Moſe, & prophetis,* Act. 26. 22. Ex his & ſimilibus euidenter concludo scripturam ante ætatem Christi non fuiſſe corruptā. Sed

neque post ætatem Christi corrupta est. Philo enim & Iosephus suum testimonium supra allegatum protulerunt post Christi ætatem. Eusebius claruit anno domini 320. Ille suo tempore in communi Ecclesiæ historia testatur hebræam editionem esse incorruptam. Idem testatur Origenes apud Hieronymum in 6. caput Ezaïæ. *Quod si, inquit, aliquis dixerit Hebræos libros postea à Iudæis esse falsatos: audiat Originem, quid in octavo Volumine Explanationum Ezaïæ, huic respondeat quasiuncula, Quod nunquam dominus & apostoli, qui cetera crimina arguunt in Scribis & Phariseis, de hoc crimine, quod erat maximum, reticissent. Sin autem dixerint post aduentum domini Salvatoris, & predicationem apostolorum, libros hebræos fuisse falsatos, cachinnum tenere non potero, ut saluator & Euangeliste, & apostoli ita testimonia protulerunt, ut Iudæi postea falsaturi erant. Idem docet Augustinus de Ciuitat. Dei lib. 15. cap. 13. ubi si, inquit, quæram, quid sit credibilis, Iudæorum gentem tam longè lateq; diffusam, in hoc conscribendam mendacium vno consilio conspirare potuisse; & deim alijs inuideant auctoritatem, sibi abstulisse veritatem. Et paulò post, Sed absit, inquit, ut prudens quispiam, vel Iudæos cuiuslibet peruersitatis atq; malitiæ tantum potuisse credat, in codicibus tam multis, & tam longè lateq; dispersis. Simile est in lib. 12. con. Faustum Marichæ ū cap. 23. *Quid est enim, inquit, aliud kodiè gens ipsa, nisi quedam scrimaria Christianorum, baiulans legem & prophetas in testimonium Adsertionis Ecclesiæ.* Idem de Ciuitat. Dei lib. 18. cap. 46. *Nobis quidem illa, inquit, sufficiunt, quæ de nostrorum inimicorum codicibus proferuntur, quos agnoscimus propter hoc testimonium, quod nobis inuiti perhibent,**

bent eosdem codices habendo atq; conseruando, per oēs gentes etiam ipsos esse dispersos. Et in Psal. 56. Propterea autem, inquit, adhuc Iudæi sunt, ut libros nostros portent ad confusionem suam. quando enim volumus ostendere prophetarum Christum, proferimus paginis istas litteras. Et ne fortè dicant duri ad fidem, quia nos illas Christiani composuimus, ut cum Euangelio, quod predicamus, finxerimus prophetas, per quos predictum videretur, quod predicamus, hinc eos conuincimus, quia omnes istæ litteræ, quibus Christus prophetatus est, apud Iudeos sunt, omnes istas litteras habent Iudæi. Proferimus codices ab inimicis, ut confundamus alios inimicos, codicem portat Iudeus, unde credit Christianus, librarij nostri facti sunt &c. Simile extat apud Augustinum in Psalm. 39. Hæc & similia non dixisset Augustinus, si libros hebræos iudicasset esse deprauatos. Deinde Iudæi à tempore Christi vsq; ad hanc ætatem, tanta religione conseruant codicem S. Scripturæ, ut ieiunium indicent, si ille in terram ceciderit, Testis Ioannes Isaac cont. Lindanum de optimo genere interpretandi, & Bellarm. lib. 2. de Verb. Dei. cap. 2. Ergo non est credibile eos voluisse sacram scripturam falsare. Prætereà si Iudæi scripturam adulterare voluissent, tamen non potuissent. Libri enim erant per vniuersum orbem terrarum dispersi, Ergo in vnum conferri, & tanto consensu adulterari non potuerunt. Si quis tamen hoc fieri potuisse pertinaciter contendat, ille sciat libros hebræos non tantum fuisse in potestate Iudeorum, sed etiam in potestate Christianorum. At Christiani nunquam tolerassent libros hebræos, qui sunt fundamentum vitæ & fidei, adulterari. Adde si Iudæi voluissent S. Scripturam adul-



terare, sanè adulterassent ea loca, quæ de Christo contra eos adduci possunt. Sed ea non adulterârunt. Illa enim omnia sunt multò illustriora in hebræis libris, quàm in latinis. Huc accedit, omnia loca Veteris Testam. quæ ab apostolis in Nouo Testam. citantur, ita adhuc in Veteri Testamento legi, atque ab apostolis in Nouo Testamento citata sunt. Ex his & similibus argumentis, quæ ipse Bellarminus probat, concludo hebræam editionem post ætatem Christi corruptam non esse. Et ne quis dicat hæc vsque ad Augustini & Hieronymi ætatem ita quidem fuisse, post eam verò ætatem hebræâ editionem esse à Iudæis deprauatam, manifestum est, nunc omnia eodẽ modo legi, atque tempore Hieronymi legebantur, & ab eo versa extant. Testis etiam ipse Bellarminus *lib. 2. de Verb. Dei cap. 2.* & communis omnium doctorum sententia. Cùm igitur scriptura hebræa neq; ante ætatem Christi, neque post eam corrupta sit, euidenter concludo, eam nunc authenticam esse debere, vt in Veteri Ecclesia erat. Hæc de Maiore, nunc ad Minorem, quæ est eiusmodi, Hebræa editio ante ætatem Christi, & post eam fuit authentica vsque ad Trident. Concilium. Eam ante ætatem Christi authenticam fuisse extra controversiam pono, tempore item Christi eam fuisse authenticam, æquè certum est. Sed & post ætatem Christi fuit authentica. Omnes enim translationes ad eam examinabâtur, & eatenus recipiebantur; quatenus cum hebræo textu congruebant. Hieronimus n. ad Suniam & Phretellam, *sicut autem, inquit, in Nouo Testamento, si quando apud Latinos quæstiq; exoritur, & est inter exemplaria va-*  
*rietas,*



rietas, recurrimus ad fontem Græci sermonis, quo nouum scriptum est Instrumentū: ita in veteri Testamento, si quādo inter Græcos Latinosq; diuersitas est, ad hebraicam recurrimus veritatem. Idem in.8. caput Zachariæ, Cogimur ad hebræos, inquit, recurrere, & scientia veritatem de fonte magis, quā de riuulis querere. Quod adeo Gratiano placuit, vt illud inter decreta retulerit, *Distinct. 76. cap. Ieiunium.* Idem Hieronymus in Epist. ad Vitalem dicit se ad hebræam veritatem tanquam ad arcem confugere. August. lib. 2. de doct. Christ. cap. 11. *Latina lingua homines, inquit, hebræa & græca lingue cognitione opus habent, vt ad exemplaria præcedentia recurrant, siquam dubitationem intulerit latinorum interpretum infinita varietas.* Gratianus affirmat hebræa volumina impendere libris veterum auctoritatem, *Distinct. 9. C. vt veterum.* Ut veterum, inquit, librorum fides de hebræis voluminibus examinanda est, ita nouorum veritas græci sermonis normam desiderat. Hoc docet ipsa natura. Nam vt docet Glossa ad dictum locum, *quantumcunque authenticum sit aliquid, si tamen de ipso in dubium aliquid reuocetur, semper exhibendum sit illud, à quo originem ducit.* Ex his & similibus colligo hebræam editionem ab ætate Christi vsq; ad Tridētinum concilium semper fuisse authenticam. Illa enim decreta, secundum papistas, vim legum habent, & non sunt ante conciliū Tridentinū antiquata. Manifestum igitur, textū hebræum vsque ad concilium Tridentinum authenticum fuisse, & pròinde nunc etiam authenticum esse debere. si quis hic pertinaciùs resistit, illum admo-neo, vt consideret quid sit Mahometo responsurus; qui dicit se, ppter eā vetus testamētū reijcere, quod

fit à Iudæis deprauatum, & nouum, quod illud sit adulteratum à christianis. Deinde Bellarminus tantum quinque loca adducere potuit, quæ licet immerito deprauata esse existimat, vt ostendi, tamen inde etiam illo iudice sequitur, reliqua omnia esse incorrupta, ac proinde authentica. Secundum argumentum, *Quia in versionib. ambiguis, male descriptis, & non iustam verborum vim exprimentibus, ad editionem hebræam tanquam ad iudicem recurrere debemus.*

Ad quam Editionem in versionib. ambiguis, male descriptis, discrepantibus, & non iustam verborum vim exprimentibus, tanquam ad iudicem recurrere debemus, illa est authentica. Sed in Veteri Testamento hebræa est illa, ad quam in illis quatuor casibus, tanquam ad iudicem recurrere debemus. Ergo in veteri Testamento hebræa est authentica.

Maior citra omnem cōtrouersia vera est. Ad quod enim exempla deprauata corrigere debemus, illud authenticum esse necesse est. Minorem ponit Bellarminus, eamque multis exemplis probat, quæ omnia ad quatuor classes à Bellarmino referuntur. Prima classis, *cum in Vulgata editione est error librarij.* Secunda, *quando codices Latini variant.* Tertia, *quando verba & sententia in latinis versionibus sunt ambigua.* Quarta, *quando vis hebræorum verborum non est satis expressa.* His quatuor casibus docet Bellarminus ad hebræum textum, tanquam ad iudicem recurrentum esse. Primi generis exemplum ponit hoc, Psal. 42, 3. *Ad Deū fontem viuum.* Legi debet fortem viuum. Nam in hebræo est לֵב אֱלֹהִים. Secundi generis ponit hoc exemplū,  
Ios.

ios. 5. *Quibus inuauit, ut ostēderet eis terram fluentē lacte & melle.* Legi debet, *ut non ostenderet.* In hebræo enim est particula negandi. Tertij generis ponit exemplū hoc, Genes. 3. *maledicta est terra in opere tuo.* Hoc est ambiguum. Potest enim intelligi de opere praterito, & de opere futuro. Sed in hebræo est בעבור quod caret prorsus omni ambiguitate. Quarti generis exemplum est hoc, Psal. 138, *Mirabilis facta est scientia tua à me.* Vis hebræi sermonis est, *scientiam Dei esse admirabiliorem, quàm ut homo eam capere possit.* Canus lib. 2. de locis Theolog. cap. 15. Et Georgius Wicelius in censura VVittembergicæ bibliorum editionis in præfatione, multo plura enumerant. Cùm igitur in deprauatis latinis versionibus ad hebræum textum tanquam ad iudicem recurrere debeamus, sequitur hebræum textum esse incorruptum, ac proinde authenticum. Hoc loco non possum præterire, quin ostendam Hebræam editionem esse Latina vulgata puriorem. Nam illa editio, ad quam vulgata debet corrigi, illa est purior, Sed hebræa est illa, *testib. Bellarmino & Cano,* ad quam vulgata debet corrigi. Ergo hebræa est purior, quàm vulgata. Maiorem nisi Bellarminus concedat, sequitur eos vulgatam versionē magis deprauare, quàm corrigere. Illud enim quod bonum est, mutare ad illud, quod deprauatum est, non est corrigere, sed errores cumulare. Minorem posui ex Bellarmino. Cùm igitur hebræa editio sit purior, quàm Vulgata Latina, fieri non potest, nisi cum summo scelere, ut authentica auctoritas dematur hebrææ editioni, & transferatur in Vulgatam Latinam. deinde lib. 1. cap. 10. dixisti Bellarmine

*Chemnitium impudenter calumniari, dum dicit papistas facere libros canonicos, non canonicos; & contra ex non canonicis facere canonicos. Atque hinc doces Hebræam editionem, quæ usque ad Concilium Trident. fuit authentica, nunc non esse authenticam. Sed hoc est librum canonicum, facere non canonicum. canonicum enim & authenticum idem. Librum item canonicum facere non canonicum, & eius authenticam auctoritatem facere non authenticam, idem est. Aut igitur verum dixit Chemnitius, & tu eum immerito calumnie infirmulas; aut falsum est, quod dicis hebræam editionem non esse authenticam. Deinde est & alia contradictionis implicatio. Hebræam n. editionem esse corruptam, ac non esse authenticam, & Latinam esse authenticam, & tamen debere ex Hebræa emendari, simul vera esse non possunt. Nam aut Latina editio ex hebræo emendanda non est, aut Latina editio non est authentica. Quod n. corruptum est, atq; ex alto emendari debet, hoc non est authenticum. Vel, quod idem est, Hebræa editio est authentica, vel non est illa, ex qua Latina emendari debet. Hieronymus in lib. cont. Heluidium, *multo purior est fontis unda, quam rivus.**

Tertium argumentum. *Quia Deus exstruxit Ecclesiam suam supra doctrinam prophetarum & apostolorum.* Nunc igitur patietur fundamentum, in quo Ecclesia fundata est, corrumpi & adulterari? aut si ipsum fundamentum corruptum & adulteratum est, quomodo ædificium stabit? Deinde si omnino vis hebræam editionem corruptam esse, doce quo tempore, & à quibus corrupta sit, & hærebis. Cum igitur Vetus Testamentum hebraicum corruptum non sit, & an-

te ætatem Christi, & post eam vsque ad Concilium Tridentinum fuerit authenticū, cū denique omnes versiones ad illud emendari debeant, & fieri non possit, vt Ecclesię fundamentum corrumpatur, neq; Bellarminus docere possit, quo tempore & à quibus sit corruptū: manifestum est, illud hoc tempore incorruptum, ac proinde authenticum esse.

## CAPVT IV.

*Vulgatam versionem non esse purē Hieronymi, & ipsam Hieronymi versionem non fuisse authenticam in Ecclesia.*

**H**Ebræam editionē Veteris Testamenti esse authenticam, ostendimus capite superiore: nunc de auctore Vulgatę versionis, & eius auctoritate differemus. Hęc Disputatio est prorsus inutilis, & superuacua. Siue enim sit Hieronymi, siue non sit, perinde est. Sed quia Bellarminus ea de re disputationem instituit, & ab Hieronymi auctoritate quædam argumenta ducit, cogimur hanc rem paulo diligentius excutere. De auctore huius versionis ita variant aduersarij, vt penè tot sint sententię quot sunt capita. Santes enim Pagninus cum alijs quibusdam negat eam esse Hieronymi, in præfatione suę versionis ad Clementem. Augustinus verò, Eugubinus, & Ioannes Picus in libris de hac re editis, asserunt eam esse Hieronymi. Driedo li. 2. cap. 1. & Sixtus Senensis lib. 8. Bibliothecę neutram sententiā probant: dicūt n. eam ex Hieronymi & aliorum versionib. mixtam esse. Sed neque hęc sententia placet Bellarmino. Nam illē aliquos libros vult esse ex Hieronymi translatione, aliquos

quos non. *Ecclesiasticum, Psalmos, Sapientiam & Machabæicos* non vult esse ex versione Hieronymi. Reliquos autem omnes libros Veteris Testamenti, asserit esse ex Translatione Hieronymi. Cùm igitur hæc quæstio ipsis etiam aduersarijs consentientibus adeo sit incerta, vt nihil certi definiri possit, melius fecisset Bellarminus, si illam inter principia non tractasset. Illa enim debent esse certa & immutabiliter vera, vt antè ostendimus. Et multo peius facit, dum ab auctoritate Hieronymi, & à commendationib. Hieronymianæ versionis contra nos argumenta ducit. Quæ enim controversa sunt, non possunt, neque debent ab altera parte pro probationib. sumi, multo minus pro principijs allegari. Et quod ad auctorem attinet, non possumus definire, quem auctorem habeat vetus translatio. tamen probare possumus, cum non esse Hieronymum. Hieronymus enim non tantum erat linguæ Latinæ peritissimus, Sed etiam purissimè & Latinissimè scribebat. Hæc autem vulgata interpretatio est sæpè barbara. Cuius rei priusquam exempla subiiciamus, protestamur nos simplicitatē sermonis non contemnere: veneramur enim eam, & colimus. Et ob eam causam non loquimur de simplicitate sermonis, sed de manifesta barbarie, quam Hieronymus ad Paulinū vitium esse asserit. Exempla ex multis pauca adferemus, Genes. 1. 5. *factumque est vespere & manè dies unus*, qui barbarismus iteratus est sexies in eodem capite. At Latini non dicunt *dies factum est*, sed *dies factus* vel *facta est*. Genes. cap. 2. v. 4. *istæ sunt generationes calis & terræ, quādo creatæ sunt*. Illud *creatæ* refertur ad cælum & terram. At quis vn-

quam

quam fado audiuit in latina lingua duobus vel pluribus substantiuis, subijci nomen adiectiuum plurale in fœminino genere? Genes. 2. 5. *Et homo non erat, qui operaretur terram. Quid sit, homo operatur terra, ignorat Latiû. Eodem cap. v. 15. dicit hominem in paradysum positum esse, ut operaretur eam. Bis terque quod pulchrum est. Eodem cap. v. 18. faciamus ei adiutorium simile sibi, neque sensum exprelsit, & ipsa dictio est insulsa. Eod. cap. v. 19. formatis igitur dominus Deus de humo cunctis animantibus terra, & uniuersis volatilibus calis, adduxit ea ad Adam. Hieronymum ita loquutum esse, credat qui uolet. Eod. cap. v. 20. Ada verò non inueniebatur adiutor similis eius. Hoc ante dixit adiutorium simile sibi. Vtrumque æquè venustum. Genes. 3. 15. ponam inimicitiam inter seminem tuum, & semen mulieris, & ipse conteret tibi caput. Ad hunc locum excusandum valdè laborat Lucas Brugens. Et tandem concludit Grâmaticam, & ipsam rationem postulare, ut legatur ipsum, est n. relatiuum seminis. Genes. 4. 22. malleator & faber in cuncta opera eris et ferri. Gen. 7. 15. ingressa sunt ad Noë in arcam bina & bina. Hieronym. dixisset advenerunt, siue ingressa sunt. Gen. 13. 11. divisique sunt alterutrum à fratre suo. Hieronymus dixisset, divisi sunt alter ab altero. Matth. 17. 19. quare nos non potuimus eicere illum? Hieronymus dixisset, illud, refertur enim ad demonium. Iohan. 7. 12. murmur multus. Hieron. dixisset, multum. vide Erasum. Iohâ. 14. 12. maiora horum faciet. Hieronym. dixisset, maiora his. Vide Vallam. Act. 8. 2. erant autem viri timorati, vox ignota in Latio. Act. 8. 36. vade contra meridianum, Hieronymus dixisset, vade versus meridiem.*



1, Cor. 2. 14. *Animalis homo non percipit ea, quæ sunt spiritus, stultitia n. scet.* Hiero. dixisset, *sunt ei.* Et 1. cor. 6. 19. *membra vestra templū est Spiritus S.* Hiero. dixisset, *membra vestra sunt templū Spiritus s.* Valla ad hūc locū. *Et si græcè est numerus singularis, tamen transferendum fuisse pluraliter, templum, iunt, quia suppositum plurale est, neque enim nobis idem licet, quod græcis.* Huiusmodi exempla possem innumera colligere. Sed satis est ostendisse hanc Interpretationem esse barbaram, & sæpè per grammaticam tolerari non posse. Num verò Hieronymus tam fuerit imperitus Latini sermonis, ut prima eius elementa ignorârit, viderint illi, qui hanc versionem Hieronymi esse, tam pertinaciter defendunt. Deinde Hieronymus palam gloriatur, se ita vertisse S. Biblia, ut cum hebræa veritate maximè congruerent. Præfat. in Pentateuch. *Sicubi, inquit, in Translatione vidcor errare, interroga hebræos, diversarum urbium magistros consule.* Et Præfat. in libros Regum. *Quamquam, inquit, mihi omnino conscius non sum, mutasse me quippiam de hebraica veritate.* August. de ciuit. Dei lib. 18. cap. 43. *Ex Hebræo (loquitur de Hieronymo) in Latinum, diuinas litteras conuersit, cuius tantum literarum laborem hebræi fatentur esse veracem.* Idem penè dicit Gregorius lib. 20. Moral. cap. 25. Isidorus lib. 1. de diuinis officijs cap. 12. dicit *Hieronymi versionem esse veraciorem in sententijs, & clariorem in verbis.* Ex his testimonijs colligo Hieronymi versionem cum hebraica veritate fuisse congruentē. Sed hæc Vulgata translatio in omnibus penè capitibus, vel ad hebræam veritatem aliquid apponit, vel ab ea aliquid detrahit, vel in ea aliquid immutat.

Quod



Quod si probare potero, manifestũ erit, hanc translationem non esse Hieronymi. Ac primum de ea sæpè aliquid detrahit. Vt Genes. 2. 14. *Ipse vadit contra Assyrios; deest, ad Orientalem plagam.* Genes. 3. 6. *Aspèctũque delectabile, deest, ad intelligendum.* Gen. 1. 30. *Vt habeant ad vescendum, deest, omne olus terre.* Genes. 34. 29. *deest, Sed omnem substantiam depredati sunt, & quicquid erat in domo.* Gene. 39. 6. *deest, Reliquit igitur omnia, quæ erant sibi, in manu Ioseph.* Genes. 49. 30. *deest, in spelunca, quæ est in agro Machpelach.* Ibidem vers. 32. *deest, emptio agri & spelunca, quæ est in eo, à filijs Heth.* Et Genes. 41. 12, *deest. Interpretatus est nobis omnia nostra, singulis secundum somnium suum interpretatus est.* Et Exod. 26. 19. *Et quadraginta bases argenteas facies, deest, sub viginti tabulis.* Exod. 36. 12. *deest, quod quinquaginta laqueolos fecit in cortina una, & quinquaginta laqueolos fecit in extremo cortina secunde.* Exod. 39. post vers. 18. *desunt, fecerunt item duos annulos aureos, quos posuerunt in duabus extremitatibus pettoralis in ora eius, quæ erat in latere Ephod intrinsecus; fecerunt præterea duos alios annulos aureos, quos posuerunt in duabus oris Ephod infernè à fronte ipsius, è regione conjunctionis eius, supra balthæum Ephod.* Exod. 20. post vers. 13. *desunt. Filios quoque eius appropinquare facies & indues eos tunicis, ungeque illos, quemadmodum unxisti patrem eorum & sacerdotio fungentur mihi: eritque unctio illorum, ut sit eis in sacerdotium perpetuum per generationes.* Leuit. 15. post vers. 22. *deest, quod si instrumentum aliquod fuerit superstratum ipsum, vel super sellam, super quam sederit: cum tetigerit illud aliquis, immundus erit usque ad vesperam.* Num. 15. post vers. 13. *desunt. Et cum peregrin-*

peregrinatus fuerit peregrinus, aut quicumque est in medio vestri per generationes vestras, feceritq; oblationem ignitam odoris Iehoua, quemadmodum facietis, sic faciet. O congregatio, statutum unum erit vobis & peregrino, qui peregrinatur apud vos: statutum inquam perpetuum per generationes vestras: sicut vos, sic & peregrinus erit coram Iehoua. Lex, inquam, una, & norma una erit vobis, & peregrino, qui peregrinatur apud vos. Huiusmodi plura exempla possent colligi ex veteri testamēto. Sed hæc sufficiunt ad ostendendum, Veterem Interpretem sæpè detraxisse aliquid de textu hebræo. Deinde etiam sæpè apponit aliquid ad textum hebræum. vt Genes. 4. 8. appositum est, *Egrediamur foras*. Ibidem vers. 15. appositum est, *Nequaquam ita fiet*. Genes. 34. 30. appositum est, *quibus perpetratis audacter*. Genes. 27. 33. appositum est, & *ultra quam credi potest, & mirans*. Exod. 27. 8. appositum est, *non solidum, sed inane*. Psalm. 13. Post vers. 3. apposita sunt, *Sepulchrum apertum guttur eorum, linguis suis dolosè agebant, venenum aspidum sub labijs eorum, quorum os maledictione & amaritudine plenum est. Veloces pedes eorum ad effundendum sanguinem, contritio & infelicitas in vijs eorum, & viam pacis non cognouerunt, non est timor Dei ante oculos illorum*. Hæc esse addititia, & non esse hoc loco in hebræo testatur Hieronymus prafat. in 16. librum Esaie. Et in psalm. 13. Idem docet Origenes in 3. cap. ad Rom. Prouerb. 7. post vers. 1. additum est, *fili honora dominum, & valebis: prater eum verò ne timueris alienū*. Prouerb. 9. post vers. 18. additū est, *Qui enim applicabitur illi, descendet ad inferos. nam qui abscesserit ab ea, saluabitur*. Prouerb. 10. post vers. 4. additum est, *Qui nititur mendacijs,*

*mendacys hic pascit ventos, idem autem sequitur aues volantes. Prouerb. 12. post vers. 11. additum est, qui suauis est in vini demoracionibus, in suis munitionibus relinquit contumeliam. Prouerb. 13. post vers. 13. additum est, anima dolosa errant in peccatis: iusti autem misericordes sunt, & misereantur. Prouerb. 14. post vers. 15. additum est, filio dolofo nihil erit boni, seruo autem sapienti prosperi erunt actus, & dirigetur via eius. Ibidem post vers. 21. additum est, qui credit in domino, misericordiam diligit. Prouerb. 15. post vers. 5. additum est, in abundanti iustitia virtus maxima est, cogitationes autem impiorum eradicabuntur. Ibidem post vers. 27. additum est. Per misericordiam & fidem purgantur peccata, per timorem autem domini declinat omnis a malo. Prouerb. 16. post vers. 5. additum est, Initium via bone, facere iustitiam, accepta est autem apud Deum magis quam immolare hostias. Prouerb. 17. post vers. 16. additum est, Qui aliam facit domum suam querit ruinam, & qui euolat discere, incidet in mala. Prouerb. 18. post vers. 8. additum est, Pigrum deiecit timor, anima autem effœminatorum esurient. Ibid. post vers. 22. additum est, Qui expellit mulierem bonam, expellit bonum: qui autem tenet adulteram, stultus est, & insipiens. Prouerb. 22. post vers. 10. additum est, victoriam & honorem acquirat, qui dat munera: animam autem aufert accipiētium. Prouerb. 24. post vers. 32. additum est, Vsque quo piger dormies? vsque quo de somno consurges? Prouerb. 25. post vers. 10. additum est, Gratia & amicitia liberant, quas tibi serua, ne exprobrabilis fias. Ibidem post vers. 20. additum est, Sicut Tinea vestimento, & vermis ligno, ita tristitia viri nocet cordi. Prouerb. 28. post vers. 22. ad-*

L

ditum

ditum est, *Cor iniqui inquit mala, cor autem rectum in-*  
*quirit scientiam.* Prouerb. 29. post vers. 27. additum  
 est, *Verbū custodiens filius extra perditionem erit.* Huius-  
 modi multa exempla ex veteri Testamento colligi  
 possunt. Sed hæc sufficiunt ad ostendendum, vete-  
 rem Interpretem multa addidisse ad textum hebræ-  
 um. Prætereà vulgata translatio sententiam aliquan-  
 do prorsus peruertit; Genes. 8. 4. in hebræo est, *Et*  
*requieuit arca mense septimo, decima septima die mensis.*  
 Vulgata autem dicit hoc factum esse *vicesima septima*  
*die mensis.* Genes. 37, 2. in hebræo est, *Ioseph cum na-*  
*tus esset septendecim annos, pascebat cum fratribus.* Vul-  
 gata autem dicit, *cum esset annorum sedecim.* Genes.  
 41. 21. in hebræo est, *& expergefactus sum.* Vulgata au-  
 tem dicit, *Rursus sopore depressus.* Genes. 49, 24. in he-  
 bræo est, *roboraueruntque sese brachia manuum eius.*  
 At in vulgata est, *& dissoluta sunt vincula brachiorum.*  
 Exod. 27, 15. in hebræo est, *Lateri verò secundo quin-*  
*decim cortina.* At vulgata dicit, *In latere altero erunt ten-*  
*toria cubitos obtinentia quindecim.* Michæ. 5, 2. in vul-  
 gata est, *& tu Bethlehem Ephrata paruula es in millibus*  
*Juda.* At ex hebræo prorsus contrarius sensus colligi  
 potest. Osiander in Harm. Euang. & Matthæus pla-  
 nè contrarium reddidit cap. 2. v. 6. Respondet Bel-  
 larminus *Matthæum legisset cum Interrogatione, paruula*  
*es?* hoc est, *nequaquam paruula es.* De verbo Dei lib.  
 2. cap. 12. in fine. Hoc etsi probabile videtur, tamen  
 ita nō legitur in vulgata Latina. Act. 8, 7. græcus tex-  
 tus habet, *spiritus enim impuri ex multis, qui eis teneban-*  
*tur, exibant,* Vulgata autem versio dicit, *multi enim*  
*eorum, qui habebant spiritus immundos, exhibāt.* Senten-  
 tia

tia prorsus deprauata. Græca enim editio dicit *immundos Spiritus exiisse*, at vulgata dicit *iplos homines exiisse*. Ad hunc locum notat Erasmus, *Quod genus est illud, quod canitur in lau. libus Deipara virginis. Cuius Dominus humilitatem respiciens angelo nūciante, concepit redemptorem mundi. Ex his verbis, quid aliud Latinus intelliget, quam Dominum grauidum factum esse?* Huiusmodi plura exēpla possunt colligi ex veteri & N. testamento. Sed hæc sufficiunt ad ostendendum veterem interpretem sæpè pervertisse sententiam textus hebraici. Cùm igitur Hieronymi translatio optimè congruerit cum textu hebræo; hæc verò vulgata multa detraxerit, multa etiam addiderit, & multa peruerterit, manifestum est, eam non esse Hieronymi. Argum. tale,

Hieronymi translatio congruebat cum hebræo.

Vulgata Translatio non congruit cum hebræo.

Ergo Vulgata Translatio non est Hieronymi.

Maiores est manifesta ex testimonijs Augustini, Isidori; ipsius Hieronymi & Gregorij suprà allegatis. Minor cōstat ex exemplis suprà recitatis. Ergo conclusio falsa esse non potest. Deinde, illa quæ Hieronymus à se posita esse contendit, sæpè non inveniuntur in vulgata translatione, vt Genes. 14, 13. habet vulgata, *nūciauit Abraham Hebræo*. At Hieronymus dicit se posuisse *transitori*, Quæstion. in Genes. Et Genes. 25. 18. Vulgata habet, *coram cunctis fratribus suis obiit*. Ad quem locum Hieronymus Quæstionib. in Genes. *verius est, inquit, quod nos posuimus, coram omnibus fratribus suis occubuit*. Et Genes. 30, 20. Vulgata habet, *etiam hac vice mecum erit maritus meus*. Ad

quem locum Hieronymus in Quæstionib. ad Genel.  
*et binos, inquit, pascimus, habitabit tecum.* Marc. 5, 41.  
 legimus in vulgata, *Quod est interpretatum.* At Hiero-  
 nymus dicit se legere, *quod interpretatur,* ad Pâmach.  
 Ioâ. 19, 37. legimus in Vulgata. *videbunt in quem trans-*  
*fixerunt.* at Hieronymus dicit iuxta hebraicam veri-  
 tatem esse, *videbunt in quem compunxerunt.* Matth. 26,  
 31. Hieronymus legit, *dispergentur oves,* ad Pammach.  
 at vulgata legit, *dispergentur oves gregis.* Mar. 2, 40.  
 Hieronymus legit, *in propheta,* ad Pammach. at vul-  
 gata habet, *per prophetam.* Et vers. 5. Hieronymus le-  
 git, *ex te enim egredietur,* ad Pâmach. at vulgata habet,  
*ex te enim exiet.* Ibid. Hieronymus legit *in ducibus,* ad  
 Pammach. at vulgata habet *in principibus.* Marc. 1. 1.  
 Hieronymus legit, *principium Euangelij,* ad Pammach.  
 at vulgata habet *initium Euangelij.* Ibidem vulgata le-  
 git, *filij Dei,* hoc Hieronymus non agnoscit, ad Pam-  
 mach. Marc. 2, 25. Hieronymus legit, *et socij eius,* ad  
 Pammach. at vulgata habet, *et qui cum eo erant.* Ibidem  
 Hieronymus legit, *quomodo ingressus domum Dei,* ad  
 Pammach. at vulgata habet, *quomodo introiit in do-*  
*um.* Ibidem Hieronymus legit *sub Abiathar pontifi-*  
*ce,* ad Pam. At vulgata habet *sub Abiathar principe*  
*sacerdotum.* Ibidem Hieronymus legit, *Panes propo-*  
*sitionis comedit,* ad Pammach. at vulgata habet, *mandu-*  
*cavit,* Ibidem Hieronymus legit, *quibus non licebat*  
*vesci,* ad Pammach. at vulgata habet, *manducare.* Ibi-  
 dem Hieronymus legit, *nisi solis sacerdotibus,* ad Pam-  
 mach. at vocem *solis* non agnoscit Vulgata. 1. cor. 2,  
 8. Hieronymus legit, *si enim cognovissent dominum glo-*  
*ria, non crucifixissent,* ad Pammach. at vulgata habet,

*Si enim cognovissent, nunquam Dominum gloriæ crucifixissent.* 1. Cor. 2, 9. Hieronymus legit, *quæ præparavit Deus diligentibus se*, ad Pammach. At vulgata habet, *quæ præparavit Deus, ijs, qui diligunt illum.* Esa. 11. 1. Hieronymus transtulit, *exiet virga de radice Jesse*, ad Pammach. at vulgata legit, & *egredietur*. Huiusmodi plura exempla ex Hieronymi commentarijs, & alijs libris colligi possunt. Sed hæc sufficiunt ad ostendendum, multa esse in vulgata versione, quæ ab Hieronymo posita, & lecta non sunt, At

Quæ versio non habet illa, quæ Hieronymus posuit, illa non est purè Hieronymi. Sed hæc vulgata versio non habet illa, quæ Hieronymus se posuisse dicit. Ergo hæc vulgata versio non est purè Hieronymi.

Maior est manifesta. Minor constat ex exemplis suprà allegatis. Manifestum igitur hanc versionem non esse hieronymi. Et si maximè Hieronymi esset, tamen propterea non esset authentica. In quo enim quædam detracta sunt ex ijs, quæ sunt in Originali; & quædam addita sunt ad illa, quæ sunt in Originali; quædam item prorsus inversa, & depravata sunt, hoc authenticum esse non potest. Sed in hac versione sunt quædam detracta, quædam addita, quædam inversa; ergo hæc versio authentica esse non potest. Hoc si Bellarmino sufficit, benè est, sin minus, dico idem, quod hieronymus in Præfat. Iosue, *Cum unusquisque, inquit, pro arbitrio suo vel addiderit, vel detraxerit, quod ei visum est, utique non potest verum esse, quod dissonat.* Deinde hieronymus sæpè erravit. Testatur hoc August. *Epist. 8. ad Hieronymum*, & ipse hierony-

mus hoc fatetur in 19. cap. Esaiæ, & si non confessus fuisset, tamē hoc ipsum probari posset. Ione. n. 4. cap. vertit *hederam*, at ipse in comment. ad dictum locum *hederam non esse* fatetur. Deinde hāc herbam non esse *hederam*, sed *Ricinum*, docuit Lumen illud hebraicarū literarum Mercerus. Deinde hiero. in Ezec. 25, 2. dicit. *Ubiq; iuxta 70. secundo ponitur, Dominus, Dominus primum nom. ē tetragrāmaton est, quod proprie ad Deū pertinet, & ineffabile dicitur.* At eodem loco, ad quem hoc notat, in græcis Biblijs est, τὰ δὲ λίγαι κύριος κύριος, in hebræo, autem est יהוה אלהים hoc est, sic dixit dominus Iehoua. Iehoua enim non primo, sed secundo loco ponitur. Idem in Quætionib. in Genes. dicit, *Asar beatum, & diuitiam secundum verbi ambiguitatem significare.* Verū non אשׁר sed עשר diuitias significat. Deinde hieronymus dicit in comment. ad Sophoniam cap. 2. *quod nos transtulimus coruus, in hebræo ponitur חרב, quod secundum lectionis diuersitatem, vel siccitatem, vel gladium, vel coruum significat.* At חרב quomodocunque legas, nunquam apud hebræos significat coruum. Præterea idem hieronymus in Ezaiam 40, 12. dicit λιχανος, esse *minimū digitum*. At λιχανος non est minimus digitus, sed ille, qui est pollicis proximus, quem *indicem* appellamus. Denique idem hieronymus dicit, 11. Cap. Esaiæ, vers. 1. in hebræo iuxta linguæ illius idiomata scriptum esse, & Nazareus de radice eius crescet. At in eo loco est נצר. Nazareus autē non est נצר, hoc enim significat plantam nouellā, ut inquit R. David, sed נצר separatus, quia videlicet separabatur à vino. plura vide apud Eliam in Tisbite. Huiusmodi plura possunt colligi ex libris hieronymi



hieronymi. Sed hæc sufficiunt ad ostendendum, eum aliquando errasse. Qui verò in scriptis suis errat, eius libri & versiones non possunt esse authenticæ. Sed hieronymus in scriptis suis aliquando errat. Ergo hieronymi libri & versiones non possunt esse authenticæ. Maiorem illi libenter concedent, qui mentem habent. Minor propter præcedentia exempla & testimonia negari non potest. Siue igitur hæc Interpretatio hieronymi est, siue hieronymi non est, sequitur eam authenticam esse nō posse. Quod autem quædam errata & in vulgata versione, & in hieronymo detexerimus, non fecimus studio mōrdendi. Vulgatam enim versionem cum reuerentia legimus, & hieronymū tanquam magistrum nostrum veneramur. Sed ideo ista deteximns, vt ostenderemus, versionem hanc esse multis erroribus obnoxiam, ac proinde non esse authenticam, & Bellarminum errare, dum incerta, ac controversa inter principia tractat, & dum ea nobis pro principijs obtrudit.

## CAPVT V.

*Bellarmini responsiones ad superiora argumenta refutantur.*

**V**ulgatam editionem non esse hieronymi, ostēdimus capite superiori. Nunc examinabimus responsiones Bellarmini, quibus nostra argumenta refellere conatur. Ac primum respondet ad hoc argumentum,

Hieronymi versio teste ipso Hieronymo, Augustino, Isidoro & Gregorio, cum hebræo congruebat. At hæc vulgata non cōgruit cum hebræo. Ergo hæc vulgata non est Hieronymi.

Bellarminus cōcessa Maiore, respōdet ad Minorem, & dicit *duas causas esse, quod hac vulgata cum hebræo non cōgruit: unam, incuriam librariorum, alteram, quia Hieronymus non tam verba, quàm sensum reddidit, hoc innuit ipse Hieronymus in lib. de optimo genere Interpretadi.* ob has duas causas dicit Bellarminus hanc versionē esse Hieronymi, etiamsi cum hebræo non cōgruat. Nos vtramq; rationem expendemus. Ac primum te ipsum inuoluis. Dicis enim Hieronymum esse causā, quod Latina trāslatio cum hebræo non congruit, & dicis incuriam librariorum eiusdem rei causam esse. Quæ duo simul consistere non possunt, nisi distinguas, in quibus librarij peccauerint, & in quib. Hieronymus ab hebræo discesserit. Nam quod vnum exemplum adfers, in quo Hieronymus nō verba, sed sensum reddiderit, nihil est. Nullum enim caput est, in quo non sit peccatum à vetere Interprete. Deinde si Hieronymus non verba verbis expressit, sed sēsum reddidit, errāt sanè Augustinus, Gregorius, Isidorus, & ipse Hieronymus, cū affirmāt eum fuisse *verborum tenacem*. Quod verò Bellarminus ex lib. ad Pammach. conatur ostendere, Hieronymum *non verbum verbo reddidisse, sed sensum tantum expressisse in S. Scriptura*, tolerandum non est. Hieronymus enim se ibi tuetur adversus eos, qui eum propterea falsi accusabant, quod *Epiphani epistolam ad Iohannem Hierosolymitanum non vertisset de verbo ad verbum*. Ad illam criminationem respōdēs dicit se ea lege non teneri, & producit in eam rem testimoniū Ciceronis, & omnium penè doctorum, imò etiam exemplum Apostolorum & Euangelistarum. At non dicit se ista

licentia

licentia in S. Scripturis vertendis uti, quemadmodū dicit Bellarminus, sed contrā, sacram Scripturam disertè excipit, *Ego enim* inquit, *non solum fateor, sed libera voce profiteor, me in Interpretatione græcorum, absque scripturis, nota scripturas excipi, ubi et verborum ordo, et mysterium est, non verbum è verbo; sed sensum exprimere de sensu.* Malè igitur Bellarminus à versione græcorū librorum, ad versionem S. litterarum argumentatur. Præterea ex adductis exemplis manifestum est, veterem Interpretem quædam de hebræo, *detraxisse*, quædam *addidisse*, in quibus sensus est obscuratus, quædam etiam *mutasse*, ubi sensus prorsus est deprauatus. Sed hoc non est *sensum de sensu reddere*. Equidē Hieronymus ipse ait, *ubi quis pro arbitrio addit, & demit, quod vult, ibi quod dissonat, utique non potest esse verum.* At in hac versione multa sunt *detracta*, multa *adiecta*, multa *immutata*: *dissonat* igitur. Ac proinde non potest utique vera esse. Si pertinacior eris Bellarmine, Idem vel simile tibi respondeo, quod Hieronymus suis obtrektoribus in Præfat. in Pentateuch. *Audi igitur*, inquit, *emule, obtrektor ausculta, non damno, non reprehendo Septuaginta, sed confidenter cunctis illis apostolos præfero. Per illorum enim os mihi Christus sonat.* Eodem, inquam, modo tibi respondeo, non damno, non reprehendo veterem translationem, sed confidenter illi prophetas præfero. Per istorum enim os mihi Deus sonat. Atque hæc de vna causa. Altera causa est incuria librariorum. Verūm Bellarmine, si tanta fuit improbitas librariorum, ut nullum caput ab illorum improbitate sanum & integrum relictum sit, qui fieri potest, ut in omnibus libris, qui in Hispania, Italia,

Germania, Gallia, Anglia, Scotia, Polonia, Hungaria, alijsque regnis descripti sunt, sit tantus demptorum, adiectorum, & mutatorum consensus? Deinde si vestra Latina Biblia ita miserè & impiè à librarijs, idque tanto consensu corrupta sunt: hebræi autem libri, quinq; tantum locis exceptis, etiam te teste integri sunt, & incorrupti; quare illud quod incorruptum est, negas esse authenticum? Et quare illud, quod etiam te teste corruptum & deprauatum est, facis authenticum? Hoc ad primum argumentum. Deinde respondes ad hoc argumentum,

Quæ Interpretatio ab Hieronymo passim reprehenditur, castigatur, & quæ aliud habet, quàm Hieronymus vertit, illa non est Hieronymi. Sed vulgata versio sæpè ab Hieronymo reprehenditur, & multa habet quæ Hieronymus non posuit. Ergo hæc vulgata versio non est Hieronymi.

Bellarminus concessa Minore, respondet ad Maiorem, ac fatetur hanc Interpretationem sæpè ab Hieronymo reprehendi, addit etiam, multa in ea se aliter habere, quàm Hieronymus vertit, & tamen eam esse hieronymi. Quod autem quædam in ea ab Hieronymo reprehendantur, quædam etiam in ea aliter se habeant, quàm Hieronymus posuerat, hoc dicit ob quatuor causas factum esse. Prima causa est, culpa librariorum: secunda, ambiguitas verborum: tertia, quia Hieronymus sententiam subinde mutavit: quarta, quia etiam si Hieronymus priorem versionem aliquando mutandam indicavit, tamen postea Ecclesia hanc approbavit. Hæc omnia nobis expendenda sunt. Ac primum quod ad librariorum

librariorum culpam attinet, satis à nobis responsum  
 est in superiori argumento. Secunda causa est ambi-  
 guitas verborum, ob quam Hieronymus eundem  
 locum diuerso loco & tempore diuersè verterit. Ve-  
 rùm Bellarmine, hoc aliquando fieri pòtest. Tam sæ-  
 pè autè accidisse vni viro, eiùque doctissimo, creden-  
 dum non est, nisi dicas eum fuisse valdè varium & in-  
 constantem. Deinde etsi hoc ita esse concederemus:  
 tamen nullo modo concedi potest, virum doctum  
 verba ambigua antè rectè vertisse, deinde verò cùm  
 ea magis expenderet, deterius vertisse. Hoc, inquam,  
 nullo modo concedi debet, nisi velis Hieronymum  
 in senectute delirasse, & propter delirium ea in se-  
 nectute corrupisse, quæ in integra ætate rectè ver-  
 terat. Multis enim locis in suis commentarijs melius  
 vertit, quàm vulgata habet. *Ut spiritus Domini fereba-*  
*tur super aquas,* Hieronymus dicit melius esse *Confo-*  
*nebat,* vel *incubabat,* hoc enim sonare verbum hebræ-  
 um, & hoc verum est, etsi tu, contra ipsam Hiero-  
 nymi assertionem fingas Hieronymum non repre-  
 hendisse, sed tantum explicasse vim hebrææ vocis.  
*Genes. 4. transeamus in campum.* Hieronymus notat,  
*hec esse superflua,* & rectè. Non enim sunt in hebræo.  
 Huiusmodi plura exempla adduci possunt. At qui &  
 nunc omnes docti fatentur, melius esse *cōfouebat,* si-  
 ue *incubabat,* quàm *ferebatur*. Et tamen *ferebatur* est  
 in vulgata. Omnes item videmus illa, *Egrediamur fo-*  
*ràs* esse superflua, & tamen sunt in Vulgata. Ergo si  
 Hieronymus priora mutauit, mutauit in deterius.  
 Sed hoc est delirantium. Idem respondeo ad causã  
 tertiam. Quarta causa est, *Quia Ecclesia priorem versio-*  
nem

*nem approbaui.* De hac iam sæpè respondi. Et quid si Ecclesia versionem multis errorib. scatētem approbavit, an propterea est authentica? hoc quidem hoc loco non apertè dicis: sed tamen cap. 11. asseris *Interpretem non esse prophetam, & posse errare. Verùm Interpretem in ea versione, quam Ecclesia approbaui, non posse errare.* Hoc si verum est, Bellarmine, dic nobis num vulgata translatio sit apud vos principium Christianorum dogmatum, & respondebis, quod sic. Doces enim libros Veteris & Noui Testamenti esse authenticos, & illorum vulgatam versionem esse authenticam. Ergo Vulgata versio Veteris & Noui Testamenti est principium nostræ fidei, idque propter Ecclesiæ approbationem. Sed hoc principium vel per se tale est, vel propter aliam causam tale est. Non per se. Est enim propter Ecclesiæ approbationem tale. At tum non est principium. Omne enim principium est *immediatum*, quod autem medium habet, definit esse principium. Hoc enim medium, est dicti principij principium. Quam ob causam, cū vulgata versio propter Ecclesiæ approbationem principium sit, sequitur non ipsam versionem, sed Ecclesiæ approbationem principium esse. Deinde vulgata versio inter nos controuersa est. Ergo principium esse non potest. Principia enim debent esse certa, præcognita, vera & antè concessa. Tu probas eam principium esse propter Ecclesiæ approbationem. Sed & hoc inter nos controuersum est. Ecclesiam enim habere potestatem faciendi editionem authenticam ex non authentica, negamus, incertum igitur probas per incertum. Denique antè negasti vos statuere ullum li-

brum

*brum non authenticum, propter Ecclesiæ approbationem esse authenticum, & cùm Chemnitius vobis hoc exprobraret, dixisti esse impudentem calumniam. At nunc dicis Vulgatam versionem non posse errare, nullam aliam ob causam, quàm quod sit ab Ecclesiâ approbata. Sed hoc nihil aliud est, quàm vulgatam versionem, quæ olim non erat authentica, facere authenticam propter Ecclesiæ approbationem. Quid tergiversaris? vel fatere Chemnitium rectè dixisse, vel te tibi ipsi contradicere. Postremò, quod dicis, falsum est. Ecclesiâ enim vulgatam versionem nunquam agnouit pro authentica, multo minus eam authenticam fecit. Tempore enim apostolorum non fuit authentica. Nam tum nondum erat. Sed neque tempore Hieronymi fuit authentica. Si enim vetus ista Itala est, tum non fuit authetica, Hieronymo enim, etiam te teste, eam emendare licuit, neque si Hieronymiana est, tū fuit authentica. Hieronymus enim relinquit liberum, vt ea vtamur, aut non vtamur. Præfat. in Iosua. Et vt, inquit, sciat, me non in reprehensionem veterum nona cudere, sed pro virili parte offerre me lingua mea hominibus, quos tamen nostra delectant: vt pro graecorum ἱερωδοῖς, quæ & sumptu, & labore maximè, indigent, editionem nostram habeant, & sicubi in antiquorum voluminum lectione dubitarint, hæc illis conferentes, inveniunt, quod requirunt. Et paulò post. Vnde cesset aduersus nos insurgere scorpis, & sanctū opus venenata carpere lingua: vel suscipiēs, si placet: vel contemnēs, si displicet. Idem Præfat. in Iob: utraque, inquit, Editio, & Septuaginta, quæ iuxta graecos, & mea iuxta hebræos, in latinum meo labore translata est. Eligat unusquisque quod vult: & studiosum*

*me magis, quàm maleuolum probet.* Idem in epist. ad Damasum, cuius initium, *Multi.* Ita & nunc, inquit, ex *hebraeis codicibus veritas exprimenda est.* Quin ipse Hieronymus hebraicam veritatem vocat *authenticam* in epist. ad Vitalem. Idem in 8. cap. Zachariæ, *Cogimur igitur, inquit, ad hebraeos recurrere, & scientia veritatem magis ex fonte, quàm de rivulis quarere.* Hinc manifestum est, Latinam versionem tempore Hieronymi non fuisse authenticam. Sed neq; tempore Gregorij fuit authentica. Nam ne tum quidem sola Hieronymi translatio in Latina Ecclesia obtinere potuit, *Præfat. in Iob, cap. 5.* Neque tempore subsequente fuit authenticæ. Gratianus enim vult *omnes translationes Veteris Testamenti ex hebraeis fontibus æstimandas esse, Distinct. 9. c. vt Veterum.* Idem docet *Distinct. 76. c. Ieiunium.* Neq; illa decreta à quoquam papa vel concilio sunt vnquam antiquata. Præterea multi fuerunt in Ecclesia doctores, qui ad hæc vsque tempora apertè testati sunt, vulgatam versionem reuocandam esse ad fontem hebraicæ veritatis: quales fuerunt *Cassianus, Paschasius, Albinus, Rabanus, Rupertus Tuiensis, Strabus, Lyra, Burgenfis:* quod testatur Georgius Wicelius in præfat. ad censuram versionis VVittebergensis. Ipsa etiam Glossa ordinaria infinitis locis ad hebraicam veritatem prouocat. Quin & nostra ætate plerique viri docti, vt *Pagninus, Vatablus, Mercerus,* & quicunque linguam hebraicam callent, in ea sunt sententia. Ergo falsum est, quod dicis Ecclesiam approbasse vulgatam versionem tanquam authenticam. Et quoniam sola Ecclesiæ approbatio est causa authenticæ auctoritatis in vulgata versione, & talis



& talis approbatio ab Ecclesia nunquam facta est, sequitur eam non esse authenticam. Sublata enim causa, propter quam res est, tollitur effectum. Deinde cum vulgata versio propter Ecclesiæ auctoritatem non possit errare, & talis approbatio nunquam facta sit, sequitur Vulgatam versionem errare posse. Nam si ideo non potest errare, quod ab Ecclesia approbata est, sequitur eam posse errare, si ab Ecclesia approbata non est. Sed non est ab ecclesia approbata. Potest igitur errare, & ob eam causam non est authentica. Si hæc Bellarmino satisfaciunt, bene est: si non satisfaciunt, æquè bene est. Incertum enim & controversum, quicquid dicat Bellarminus, nunquam nobis erit principium. Deinde si hæc non satisfaciunt, doceat Bellarminus, quo tempore, quo loco, per quem, et quā ob causam Vulgata facta sit authentica, & hærebit. Tridentinum n. concilium allegare hîc, nobis est ineptire. Nisi igitur firmiorib. rationibus nostra argumenta contra vulgatam versionem destruere possit, relinquitur eam esse incertam & controversam:

## CAPVT VI.

*Adversariorum sententia de Vulgata Editione Latina proponitur & refutatur.*

**S**Vperiore capite diluimus Responsiones Bellarmini ad argumenta nostra, quibus probamus Hieronymum non esse auctorem vulgatæ versionis. sequitur vt Bellarmini sententiam de eadem Editione examinemus. Ille dicit eius auctoritatem esse authenticam; nos negamus. Hæ duæ sententiæ, quoniam ex diametro pugnant, simul veræ esse non possunt.

sunt. Bellarminus suam opinionem probat quinque argumentis, quæ ordine expendemus. Primum argumentum. *Quia Ecclesia mille annis usa est vulgata Editio-  
ne.* Argumentum tale,

Editio, qua Ecclesia mille annis usa est, illa est authenticæ. Sed vulgata editio est illa, qua ecclesia mille annis usa est. Ergo vulgata editio est authenticæ.

Respondeo Maiorem esse falsam. Nam si ætas auctoritatem conciliat, nulla editio est vetustior hebraica. Latina enim si mille annis in Ecclesia usurpata est, Hebraica penè ter mille annis in ea usurpata est. Deinde si omnes istæ editiones sunt authenticæ, quibus Ecclesia mille annis usæ est, tunc Chaldaica, Arabica, Syriaca, Græca, & multæ aliæ editiones sunt authenticæ. Ecclesia enim eas omnes longiore tempore, quàm mille annis usurpauit. Præterea, si Latina editio propterea est authenticæ, quod Ecclesia eam mille annis usurpauit, tum omnia verba vulgatæ editionis, quæ Ecclesia his mille annis usurpauit, sūt authenticæ. Sed multa errata sunt, in ijs verbis quibus Ecclesia his mille annis in ista editione usæ est. Ergo & errores isti sunt authenticæ. Ex multis paucos proferam. Proverb. 11, 6. Vulgata editio legit, *Lapides seculi*, & ita legit Hieronymus in suis cōment. ad dictum locum. Vnde credibile est istum errorem ab ætate Hieronymi ad hoc usq; tempus in ista editione hæsisse. Canticor. 2, 17. vulgata editio legit, *super montes Bethel*, & ita legit Gregorius in suis comment. ad dictum locum. Vnde apparet & hunc errorem à tempore Gregorij, ad hanc usq; ætatem, in ista editione hæsisse. Genes. 8, 4. vulgata dicit *arcam  
sedisse*

*sedisse vigesimo septimo die mensis septimi, & ita legit Chrysostomus in comment. vnde apparet hunc errorem ab ætate Chrysostomi vsque ad nostram ætatem in vulgatis versionibus hæsisse. Hæc & similia multa exempla produci possunt. Ergo si ista Editio propterea est authentica, quòd ab Ecclesia mille annis vsurpata est, tum propter eandem rationem sequitur, & hos errores esse authenticos, Nam & illi mille annis ab Ecclesia vsurpati sunt. Sed hoc est absurdum. Ergo absurdum ex quo hoc consequitur. Ratio est, quòd non vetustas mille annorum, sed diuina inspiratio est causa, quòd hæc vel illa editio sit authentica. Quoniam verò vulgata Latina non est diuinitus inspirata, ideo non est authentica. Deinde & minor falsa est. Vniuersalis enim Ecclesia eam nunquam vsurpauit. Ecclesia enim Ægyptiaca, Æthiopica, Arabica, Indica, Persica, Lybica, Græca suas vernaculas versiones habuerunt, quemadmodum libro sequente ostendemus, & hac Latina nunquam vsæ sunt. Deinde Ecclesia Latina non vsurpauit eam solam. August. lib. 1. de Doct. Christ. cap. 9. *Qui scripturas; inquit, ex hebraea lingua in græcā verterunt, numerari possunt, Latini autem Interpretes nullo modo.* Hiero. Præfat. ad Euangelist. ad Damasum, *Tot sunt exemplaria penè latina, quot Codices.* Cùm igitur plures versiones eo tempore in Ecclesia legerentur, manifestum est, hanc solâ lectâ non esse. Præterea qui in latina Ecclesia eam vsurparunt, illi nunq̃ receperunt eam pro authentica, sed eatenus approbabant, quatenus cum hebræa editione congruebat, C. *Ut veterum Distin. 9. Et C. Ieiunium Distinct. 76.* Cùm igitur neque Maior,*

M neque

neque Minor vera sit, sequitur Conclusionem vetā esse nō posse. Deinde Bellarminus adigit nos ad absurdum. *Nisi, inquit, hæc editio sit authentica, & ab omnibus erroribus libera, sequitur Ecclesiam, quæ est stabilimentum veritatis, usurpasse versionem incerti auctoris, & erroribus obnoxiam.* Sed hoc est puerile. Nam, vt ante dixi, sunt multæ Ecclesiæ, præter Romanam, quæ eam nunquā usurparunt, neque tota Romana Ecclesia eam usurpauit. Præterea auctorem eius incertum esse & multos in ea esse errores, probatum est antè. Postremò facilè cogitare poterat Bellarminus grauiores errores, quàm hi sunt, defendi ab Ecclesia Romana. Quorsum enim ab ea discessionē faceremus? quorsum tam funesta bella sustineremus? quorsum omnes fortunas, & vitam ipsam in præsentissima pericula adduceremus, si nulli essent errores in Ecclesia Romana? sed de hac quæstione, num Ecclesia Romana errare possit, agemus suo loco, nunc satis sit dixisse, in ista versione esse multos errores, eosq; ab Ecclesia Romana usurpatos esse. Secundum argumentum. *Quia Augustinus laudat antiquam Italiam, & versionem Hieronymianam, eandemque laudat Isidorus lib. 6. cap. 5. Etymolog. Et Gregorius lib. 20. Moral. cap. 25.* Argumentum tale,

Quamcunque Editionem laudat Augustinus, Gregorius, Isidorus, illa est authentica. Sed Augustinus laudat veterem Italicā, & Hieronymianam nouam, eandem laudat Isidorus & Gregorius. Ergo si hæc vulgata editio est antiqua Italica, vel si est ista nova Hieronymiana, est authentica.

Respondeo

Respondeo Maiorem esse falsam. Non enim quæcunque versio ab hoc, vel illo homine laudatur, illa est authêtica. Nam Iustinus, Irenæus, Eusebius, Clemens Alexandr. Epiphanius, Chrysost. Cyrillus, Tertullianus, Augustinus, Hilarius, & ipse Hieronymus laudant *Interpretationem septuaginta*. Neq; tamen illa propterea est authêtica. Deinde si illa interpretatio est authêtica, quam Augusti. laudat, tum due versiones Latinæ sunt authenticæ. Laudat n. *veterem Italicam* lib. 2. de doctr. christ. cap. 15. & *Hieronymianâ* lib. 18. de Ciuit. Dei, cap. 43. Prætereà si aliqua versio ex his duabus propter laudationem Augustini est authêtica, tum tamē hæc vulgata non est authêtica. Illa enim non est Hieronymiana, hoc probauimus antè. & si hieronymiana esset, tum tamen non esset authêtica. Nam si illa propter Augustini laudationem facta fuisset authêtica, tum eodem tempore, quo ab Augustino laudabatur, authêtica facta esset. Sed hoc non. tempore enim Gregorij nondum erat authêtica. nam *presa. in Iob. cap. 5.* ostendit eam solam ne suo quidem tēpore in ecclesia christiana obtinere potuisse. Nec est vetus ista Italica. Nam si Italica in tanta fuit auctoritate, vt Augustinus testatur lib. 2. de doctr. Christ. cap. 15. Et aduersarius affirmat, tum sine dubio fuit eo tempore in Latinis Ecclesijs vsitata. Sed hæc vulgata eo tempore in Ecclesijs Latinis vsitata non fuit. Augustinus enim in libris de Locutionib. veteris testamenti, sine dubio versionem vsitatissimam, ac proinde veterem istam Italicam explicuit. At quæ in illis libris apud Augustinum leguntur, illa in hac vulgata non extant. Dicit enim Gene.

2, 7. *legi secundum Orientem*. At in vulgata legitur, *à principio*. Eodem cap. vers. 17. *legi dicit, ex omni ligno, quod est in paradyso escaedes*. At in vulgata est, *ex omni ligno paradyfi comede*, Genes. 3, 1. dicit legi *serpenserat prauissimus oim bestiarum*. At in vulgata est, *Serpens erat callidior cunctis animantibus*. Similia exēpla passim apud Augustinum. Deinde etiam si hæc vulgata esset ista vetus Italica, tamen non propterea esset authentica. Non enim eam tempore Augustini fuisse authenticam, sed displicuisse viris doctis, constat ex reprehensionibus, quæ sunt apud Augustinū in libris de Locutionibus veteris Testamenti, vt Genes. 8, 7. *Qui exiens reversus non est*. August. lib. 1. Locutionum in Genesin, in hebræo contrarium. Et Genes. 11, 12. *Erat Arphaxat annorum 135. cum genuit Cainam, & vixit Arphaxat postquam genuit Cainam annos quadringentos*. August. lib. 1. Quæstion. in Genes. Quæst. 23. Hoc totum non est in hebræo. Plura exempla passim apud Augustin. in libris Locutionum & Quæstionum. Denique vetus ista Italica, ne ipsi quidem Damaso papæ placuit. Petiuit enim Damasus ab Hieronymo, vt nouam versionem ad hebraicam veritatem institueret. Deinde ipse Hieronymus sepè eam flagellat, Præfat. in Iob. dicit, *se idcirco in hoc volumine laborasse, non vt editionem antiquā reprehenderet, sed vt illa, quæ in ea, aut obscura sunt, aut ommissa aut certe scriptorum vitio deprauata, sua interpretatione manifestiora fierent*. Idem in Ezechielem cap. 40. *Volui, inquit, breuiter ostendere, quantum temporis longitudine, imò scriptorum vitio, & vt apertius loquar, imperitia, ab hebraica veritate discrepet antiqua translatio*.

Hinc

Hinc apparet antiquam istam Italicā multos habuisse errores, & tempore primitiuæ Ecclesiæ non fuisse authenticā, ac proinde & nunc authenticam esse non posse. Siue igitur hæc vulgata Latina trāslatio est ista antiqua Italica, siue Hieronymiana, siue ex illis mixta, manifestum est eam non esse authenticam. Tertium argum. *Quid Ecclesia hebræa habuit authenticam scripturam in hebræa. Et Ecclesia Græca habuit authenticam scripturam in Græca lingua.* Argumentum tale,

Quod habet Ecclesia hebræa & græca, hoc etiā debet habere Ecclesia Latina. Sed ecclesia hebræa habuit scripturam authenticam in hebræa lingua, Græca itē Ecclesia habuit scripturā authenticā in græca lingua. Ergo & Ecclesia latina debet scripturā authenticam habere latina lingua.

Respondemus Maiorem esse falsam. Multa enim utraq; Ecclesia habuit, quæ non est necesse. ut habeat ecclesia latina. Deinde & Minor non est simpliciter vera. Hebræa enim Ecclesia christiana nunquam habuit Noui Testamenti authenticam scripturam in hebræa lingua, neque græca ecclesia habuit scripturam veteris Test. authenticam in græca lingua. Ergo non est necesse, ut latina ecclesia habeat scripturam authenticam in latina lingua. Deinde si latina Ecclesia non est Ecclesia, nisi habeat authenticam scripturam in sua lingua, tum ante Tridentinum concilium nulla fuit latina ecclesia. Ante illud enim latina versio in nullo concilio canonizata est. Si hoc nō concedis, sequitur tamen citra omnem controuersiam, ante Hieronymum nullam fuisse latinam ecclesiam. Hæc enim editio non potuit esse authentica priusquam.



esset, Sed ante ætatem Hieronymi (pono eam esse Hieronymi) non fuit. Ergo ante ætatem Hieronymi nulla fuit latina ecclesia. Denique si latina ecclesia deberet habere scripturam authenticam in sua lingua, tum etiam ecclesia Gallica, Anglica, Germanica, Danica, Polonica, Hungarica, & reliquæ oēs ecclesiæ deberent habere scripturam authenticam in sua lingua. Postremò latina ecclesia nō potest habere scripturam authenticam in sua lingua. Hoc n. tempore nulla est latina ecclesia. si dicis in Italia esse eam, respondeo in Italia esse ecclesiam non latinam, sed Italicam. Nemo enim in Italia latinè nouit, nisi qui eam linguam in scholis didicit. Si igitur Itali deberent habere scripturam authenticam in sua lingua, deberent eam habere in lingua non latina, sed Italica. Postremò si verum est Latinam ecclesiam debere scripturam authenticam habere, doceat Bellarminus quo tempore hoc verum esse cœperit. Nam apostolorum ætate non fuit verum. Tunc enim latina versio nondum extabat. Neque Hieronymi ætate verum fuit, ille enim non propterea scripsit, vt sua versio esset authentica, sed nobis reliquit liberum, vt ea vtamur, vel non vtamur. Neque post Hieronymi ætatem verum fuit. Gratianus enim vult *omnes translationes ex hebrais fontibus censeri*. Distinct. 9. C. vt veterum. Et Distinct. 76. C. Ieiunium. hæc duo decreta à nullo cōcilio, neq; ab ullo Papa antiquata sunt. Doceat igitur Bellarminus, vel Tridentini, quo tempore vulgata translatio cœperit esse authentica. Deinde hoc implicat contradictionem. Libro enim primo cap. 10. dixit *calumniam esse dicere papistas facere librum non authenticum autem*



*thenticum*. At hic Bellarminus asserit versionem vulgatam, quæ olim non fuit authentica, esse authenticam, sed hæc simul vera esse non possunt. Aut enim vulgata editio non est authentica, aut papistæ ex non authenticis faciunt authenticæ. Quartum argumentum.

*Quia paucissimi Episcopi intelligunt Græcè aut hebræicè.* Argumentum tale,

Quam linguam episcopi in cōcilijs generalibus nō intelligunt, in ea scriptura sacra authentica esse non potest. Sed Episcopi nō intelligūt græcam aut hebræam linguam. Ergo S. Scriptura in græca aut hebræa lingua authentica esse non potest.

Respondemus Maiorem esse falsam. Non n. quæcunque editionem episcopi intelligunt, illa est authentica, sed quæ *diuinitus inspirata* est, illa est authentica. Ad Minorem dico illam quidem esse veram, sed propterea non sequi, vulgatam versionem esse authenticam, sed eos episcopos indoctos esse, rectè sequi. Deinde si propter ignorantiam episcoporum quædam editio authentica est, quædam non est, tum non inspiratio diuina, sed inscitia episcoporum est causa authenticæ auctoritatis in S. Scriptura. Deniq; si græca & hebræa editiones propterea nō sunt authenticæ, quòd episcopi græcam & hebræam linguam ignorāt, tum sequitur hebræam & græcam editiones saltem ijs authenticas esse, qui eas intelligunt. Sed tum vna & eadem editio esset authentica, & non authentica, idque eodem tempore, at hoc est absurdum. Postremo si illa editio non est authentica, quam aliqui episcopi non intelligunt, tum ne quidem latina editio est authentica, sunt enim multi episcopi, qui latine nesciunt.

nè nesciunt. Quintum argumentum, *Quia hæretici  
condunt multas versiones.* Argumentum tale,

In quacunque lingua sunt multæ versiones S.  
Scripturæ, in ea lingua vna est versio authen-  
ca, sed in latina lingua sunt multæ versiones S.  
Scripturæ. Ergo in latina lingua debet vna  
versio esse authentica.

Respondeo Maiorem esse falsam. Nam non in qua-  
cunque lingua sunt multæ versiones, in ea lingua est  
vna authentica. In græca enim lingua sunt diversæ  
versiones, in Germanica, Gallica, Belgica & alijs lin-  
guis diversæ item versiones extant, & tamen ex illis  
omnibus nulla est authentica. Ad Minorē dico, non  
tantum nunc, sed etiam apud veteres fuisse diuersas  
latinas versiones. Augustin. lib. 2. de doct. Christ.  
cap. 11. *qui, inquit, scripturas ex hebræa lingua in græcam  
verterunt, numerari possunt, latini nullo modo.* Hieronym.  
præfat. in Iosua, *apud latinos, inquit, tot sunt exempla-  
ria, quot codices.* Et in Præfat. Euāgelist. ad Damasum,  
*Tot, inquit, fere sunt exemplaria, quot codices.* Sed ex  
omnibus istis versionib. latinis tempore Augustini  
nulla fuit authentica. Ergo non est necesse, ut nunc  
ex ijs aliqua sit authentica. Præterea cum apud ve-  
teres tam multæ extarent versiones, tum tamen he-  
bræa editio Veteris, & græca Noui testamenti erat  
authentica. Ergo etsi nunc multæ sint latine versio-  
nes, tamen hebræa in veteri testamento, & græca  
in N. testamento debet esse authētica. Postremò etsi  
illud studium omnia innouandi non probamus, va-  
rietas tamen versionum inutilis esse non potest. Au-  
gust. de doct. Christ. lib. 2. cap. 14. *plurimum, inquit,*  
hæc

*hic quoque inuat Interpretum numerositas collatis codicibus inspecta, atque discussa.* Item cap. 12. *Nam nonnullas, inquit, obscuriores sententias, plurium codicum manifestavit inspectio.* Nisi igitur Bellarminus alia argumenta habeat, quibus probet vulgatam versionem esse authenticam, sequitur eam æquè incertam esse, atque antè erat. Post hæc invehitur Bellarminus in Calvinum & Chemnitium, qui iam ambo in Deo placidè quiescūt, & licet æquum esset mortuis parcere, congerit tamen multa conuitia, quibus eos iam mortuos perstringat. Hæc ego constitueram negligere. Cōuitiā enim illos non attingūt. Tamen quoniā doctrinam illorū ex obliquo tangunt, ideo ad ea prorsus silere non potui. Prius igitur in genere, deinde in specie respondeo. In genere affirmo Spiritum Christi esse mansuetum, non conuiciari, neque criminari. Cū igitur Bellarminus sanctos Christi seruos tam immeritò lacessat, viderit ille, cuius spiritu trahatur. Equidem ipsæ gentes parcebant mortuis, hic verò monachus neque à viuentibus, neque à mortuis linguam abstinet. Sed hæc est ista Iesuitica pietas, quæ in charitate fundata est. Hęc in genere: nunc in specie crimina singula expendam. Primum crimē est, quod Calvinus dicit, *neque indicio, neque recto delectu factum esse, ut ex Interpretationibus diuersis vna obtinuerit apud indoctos.* Hoc valdè exagitas. Sed an verum dixerit Calvinus, docet experientia, Vtique illa translatio, quæ in multis locis de hebræa veritate *detrahit, adijcit, & immutat,* obtinuit. Nisi igitur papales episcopi fuissent indocti, sanè vel elegissent meliorem, vel ipsi fecissent meliorem. Deinde ipsa historia testatur, &

totus mūdus clamat episcopos papales indoctos fuisse. Ante Lutheri n. ætatem, ex mille episcopis vix vnus erat, qui poterat latinè legere. Græca lingua adeo fuit neglecta, ut ipsæ academix solitæ sint dicere & scibere, *hæc græca sunt, quæ legi non possunt*. Hebræa etiam lingua prorsus iacebat, etiam de nomine incognita. Quod verò de Augustino, Gregorio & Isidoro refers, hoc huic rei non derogat. Illorum enim ætate hæc versio nondum obtinuit, vt antè docuimus. Post eos etsi aliqui docti fuerunt, illi tamen linguas ignorabant, quod de Thoma, Alberto, & alijs manifestum est. Imò si quis linguis studebat, ille vulgatam versionem ad hebraicam veritatem emendandam esse putabat, quod ante ex Lyræ, Strabi, Burgensis, Rabani, Tuitiensis, & aliorum exemplis probatum est. Et si quis linguarum studium paulò acrius persequebatur, ille à monachis opprimebatur, nota est historia Reuchlini, Erasmi, & aliorum. Manifestum igitur Caluinum non esse mentitum, cum hoc diceret, sed ipsam veritatem dixisse. Tu videris, quid sis Iesu Christo responsurus, quod sanctissimum eius seruum iniustè mendacij infimulas. Secundum crimen est, quod Caluinus dicit *Tridentinos decreuisse, non esse audiendos, qui ex ipso fonte purum liquorem proferunt, & ex certa veritate falsum coarguunt*. Dicis hoc mendacium esse, quia Tridentini his verbis non sint vsi in suis decretis. Sed quid hoc ad rē? Sanè rem ipsam Tridentini decreuerunt. Negant enim hebræam scripturam, quæ pura est, esse authenticā, & aiunt vulgatam versionem, quæ in multis locis malè trās-lata est, esse authenticam, vetant etiam, ne latinæ versiones

versiones ex Hebræis fontibus corrigantur. Testis huius rei sunt Canus lib. 2. cap. 13. Lindanus, & alij. Ergo etsi non vsus est Calvinus iisdem verbis, quibus Tridentini vsi sunt, tamen ipsam rem diligenter expressit. Tertium crimen est, quod Calvinus dixit, *adeo nihil integrum esse in latina versione, ut vix tres continui versus sint, qui non sint aliquo errore fœdati.* Hoc te valdè mordet, & dicis, si hoc verum est, quare Calvinus non ostendit vnum vitiū in Psalmo primo. Quoniam autem in eo nullum vitium notauit, ideo concludis ipsum mentitum esse. Sed Calvinus non omnes errores vulgatę versionis notauit, & si quis omnes eos notare vellet, hic liber eos non caperet, potuisses igitur modestius loqui, & vt scias Calvinum (apud quem tamen ego hoc non legi) non omnino à veritate aberrasse, ego in tuam gratiam perlustrabo primū Psalmum. vers. 1. *in cathedra pestilentie.* At in hebręo nō est *Cathedra pestilentie*, sed *deformis*. vers. 4. *Non sic impij, non sic.* Illud posterius, *non sic* adiectitium est. Eod. vers. *quem proicit ventus à facie terra,* hæc, *à facie terra*, adiectitia sunt. vers. 5. *Ideo non resurgēt impij,* deprauatū est, וקם enim est, nō stabūt, vel nō cōsistent, & nescio, quid scholastici occasione huius versionis de impiorum resurrectione commenti sint. Eod. vers. *in consilio infortiorum.* at in hebręo non est consiliū, sed *cætus* siue cōgregatio, siue conciliū. Vides igitur Bellarmine Calvinū habuisse iustas causas, propter quas ita scripserit: si tamē ipsa scripsit, neque te primū psalmū ab omni errore defendere posse. Atq; hæc sunt ista crimina, propter quę Calvinū tam seque perstrinxisti. Nūc ad Chemnitiū. Primū crimē,

quod

quod Chemnitio obijcis, est, quod dicit *Tridentinos decrenisse ut pro ijs, quæ Sp. Sanctus in fontibus græcis & hebraïis scripsit, recipiamus ea, quæ à librarijs mutilata, vel addita sunt.* Hoc dicis esse manifestum mendacium. Atqui negas, ut iam antè ostendi, hebræam veritatē esse scripturam authenticam, & statuis vulgatā versionem, quam manifestè ostendimus mutilatam, auctam, & mutatam esse, & quam ipse etiam fassus es *librariorum incuria vitiatam esse*, esse authenticam, neque iuuat quod dicis Tridentinos mandare, ut *biblia quàm castigatissimè edantur.* Nam ipsa biblia ab eo tēpore edita, sunt in multis locis mutilata, aucta, & mutata, imò Bellarmine, quod Tridentini mandant ea emendatè edi, lusus est. Nolunt enim ut ad hebræā Veritatem corrigantur, quomodo possunt igitur emendatè edi? Vides igitur Chemnitium simplicem veritatem bona fide dixisse. Secundum crimen, quia Chemnitius dicit, *in indice purgatorio à Paulo III. edito damnari omnes editiones bibliorum, in quibus manifestissima errata vulgata editionis emendata sunt.* Hoc dicis esse crassissimum mendacium, ac defendis illud tam frigide, ut ex ipsa defensione appareat verum esse quod Chemnitius dicit. Dicis enim in isto indice tantum prohiberi editiones factas ab hæreticis, & à suspectis. Sed num propterea biblia ad hebræam veritatem vel versa vel castigata debent damnari, quod ab ijs hominibus, qui vobis immeritò suspecti sunt, impressa, vel edita sunt? vel num hoc aliud est, quàm quod dicit Chemnitius? Tertium crimen, quia Chemnitius dicit *papistas dispensare in substantialibus Sacramenti.* Verum Bellarmine cum de Sacramentis agemus, euincam

euincam certis rationibus papistas non solum dispensare in substantialibus sacramentorum, sed noua etiam sacramenta instituere. Itaque ad illud nunc plenè non respondebo. Quartum crimen est, quod Chemnitius dicit: *Papistas retinuisse hanc vulgatam versionem, quia ad illorum errores sit conformata*. Hoc verum esse demonstrabo singulis locis. Valdè argutarius in verbo *Transformata*, sed hoc ita potest intelligi, vt sit idem quod accommodata. Neque tamen absurdum est, si *Tò transmutata* in natia significatione intelligatur. Nam nō euicisti hanc editionem in primitiua ecclesia obtinuisse. Et si hoc maximè euicisses, non tamen propterea errores vestri non essent errores. *Vetustas n. errorem nō excusat*. Postremò quod de mille errorib. Lutheri loqueris, nihil facit ad rem. Nemo n. ex nobis oībus Lutheri versionem habet, p̄ authentica, sed quatenus illa cum Hebraica & Græca versione congruit, recipimus eam: quatenus verò ab ea discrepat, nos illā, cū bona pace Lutheri originali veritati postponimus. Deinde si Lutheri versionem reciperemus pro authentica, essemus vobis similes, qui vulgatā versionem multis erroribus scatentē pro authentica recipitis. Et si hoc nobis vitio vertitis, quare non idipsum in vobis reprehēditis, præsertim cū vulgata versio minus cū hebræo congruit, quàm Lutheri. Præterea non tam multi errores sunt in Lutheri versione, quàm existimatis. Quod enim quidam monachi quædam in ea notarunt, in ijs illi se ridiculos, & Hebraici, Germaniciq; sermonis imperitos esse ostenderunt. Vt Gen. 1, 1. Lutherus vertit *Ihm anfang*, belli isti correctores *ahm anfang*: stu-



vatem, aliud interpretem esse, ibi spiritus ventura pradi-  
cit, hic eruditio & verborum copia ea quæ intelligit trans-  
fert. Ergo necessariò concludo eius scripta non esse  
authentica. Inspiratio enim diuina est sola & vnica  
caussa authenticæ veritatis. Ea enim posita, ponitur  
authentica auctoritas, & ablata, aufertur. Scio quos-  
dam respondere *Sp. Sanctum peculiari modo adfuisse*  
*Hieronymo, cum S. Scripturas interpretaretur.* Sed hoc  
repudiavit Bellarminus. Non est igitur necesse, vt à  
me refutetur. Ex his oïbus necessariò colligi potest,  
hâc versionem propter hieronymum non esse, neq;  
posse esse authenticam. Sed neque propter Ecclesiæ  
approbationem est, neque potest esse authentica. Ec-  
clesia enim illud nunquam decreuit. Ipse enim hie-  
ronymus in epist. ad Suniam & Phretellam dicit, *In*  
*veteri Testamēto, quando inter Græcos Latinosq; diuersitas*  
*est, ad hebraicam recurrimus veritatem.* Idem ad Dama-  
sum. *Ex hebrais codicibus, inquit, veritas exprimenda est.*  
Idem in epist. ad Vitalem dicit se in veteri Testamēto ad  
hebraicam veritatem, tanquam ad arcem confugere. Idē  
in Zachariam cap. 8. *Cogimur, inquit, ad hebreos, re-*  
*currere, & scientiam magis de fonte, quàm de riuis quæ-*  
*rere.* Idem docet August. lib. 2. de doct. Christ. cap. 11.  
12. & 15. Et epist. 59 & 19. Vnde confidenter colligo  
Augustini & Hieronymi ætate non esse ab ecclesia  
decretum, vt hæc interpretatio esset authentica. Sed  
neq; post Augustini ætatem hoc vnquam in ecclesia  
decretum est. Gratianus enim respondet *veterum li-*  
*brorum fidem de hebrais voluminibus examinandam esse,*  
Distinct. 9. C. vt veterum. Ergo & Gratiani ætate  
non decreuit ecclesia vulgatam versionem esse au-  
then-



thenticam. Neque post Gratiani ætatem hoc ecclesia decreuit. Videmus enim multos scripturæ interpretes etiam in ecclesia Rom. habuisse hebraicam veritatem pro authentica, neq; propterea vnquam fuisse reprehensos. Cùm igitur decreta habeant vim legis, & hoc decretum à nullo concilio (Tridentinum habeo nullo numero) abrogatum sit, manifestum est ecclesiam nunquam statuisse, hanc vulgatam versionem esse authenticam. Propter ecclesiæ igitur approbationem n. vulgata versio neque est, neque potest esse authentica. Nam quod non est, illud non potest authenticæ auctoritatis causa esse. Deinde etsi tale decretum ab Ecclesia factum esset, non propterea tamen hæc versio esset authentica. Ipse enim Bellarminus negat *ecclesiam habere potestatem librum non canonicum faciendi canonicum*, libr. 1. cap. 10. Sed hæc vulgata versio (quam possum hieronymi librū dicere) hæc, inquam, versio tempore Hieronymi erat liber non authēticus, neq; tempore Gratiani fuit authenticus. Ergo nunc ab ecclesia authenticus fieri non potest. Ac proinde si Bellarminus seriò dicit, *ecclesiam nō posse librum non canonicum facere canonicum*, viderit ipse, quomodo possit defendere hanc versionem, quæ olim non fuit authētica, nunc propter Ecclesiæ approbationem esse authenticā. Authenticū n. in hac disputatiōe idem quod canonicū. Si relabatur in castra Pigij, & quod antè negauit, statuet eam propter ecclesiæ decretum esse authenticam, sciat se principium petere. Inter nos enim & illum controuersum est, an ecclesia habeat potestatem faciendi libros canonicos ex non canonicis. Deinde isthinc se-

queretur solam ecclesiæ approbationem esse causam authenticæ veritatis. Et licet nunc Bellarminus asserere hoc erubescat, tamē hāc esse vel fuisse mentem papistarum, ex eo probari potest, quod Sorbona Franciscani monachi miserunt aliquando librum à se factū Romam, quem vocabant *eternum Evangelium*, & petierunt à Papa, ut illud canonizaret, testis Isaac Rabbothenu par. 1. cap. 2. Et Matthæus Parisiēsis in Chronicis. Cum eo congruit, quod Wulfgangus Hermannus asseruit, *euāgelia nisi essent à papa approbata, non habere plus auctoritatis, q̃ fabulas Æsopi*, testis Heshusius de sexcētis erroribus papæ, loco de verbo Dei. Et Vittaker. contra Duræum lib. 1. § 31. Siue igitur hæc versio hieronymi est, siue non est, siue item ab ecclesia approbata est, siue non est, manifestum est, eam non esse, neq; posse esse authenticam. Et si ex his apparet hanc versionē non esse authenticam; tamē adhuc vnum atq; alterū argumentum adiungā. Primū quia in hac versionē sunt multi errores.

In quo sunt multi errores, hoc non est authenticum; At in vulgata versione Veteris Testamenti sunt multi errores. Ergo vulgata versio veteris Testamenti non est authentica.

Minorem nos antè probauimus cap. 4. Bellarminus Maiorem concedit, & respondet ad Minorem, omnes quidem interpretes errare posse, *sed hunc non errasse in ista versione, quem ecclesia approbavit lib. 2. cap. 11. & paulò post. Non n. auctores canonizauit ecclesia, sed tantum versiones approbavit.* An non hoc idem est, atq; dicere, errores ab ecclesia approbatos non esse errores? Nam si te probè intelligo, dicis hanc versionē, si non esset

non esset ab ecclesia approbata, errare, nunc, quoniam ab ecclesia approbata est, non errare. Certè hoc idem est, atque illud, *si papa mille animas mitteret in gehennam, neminẽ debere dicere, domine quare facis sic?* Distinc. 40. C. si papa. Error est error, Bellarmine, etiam si millies sit approbatus ab ecclesia, neque in æternũ fiet, vt *mutata, mutata, & adaucta* versio propter papisticæ synagogæ determinationem sit verbum Dei. Sed ad rem. *Hæc versio*, inquis, *non potest errare, quia ab ecclesia approbata est*. Ergo ecclesiæ approbatio & sola & vnica caussa est, ob quam hæc interpretatio est vera & authentica. Nõne hĩc manifestè te tuamque caussam prodis? nõne antè negasti *ecclesiam posse ex libro non canonico facere canonicũ*, lib. 1. cap. 10? nõne quod illic negasti, hĩc affirmas? Sed quid ego hæc disputo? Non enim tibi ipsi tantũ, sed præstantissimis vestris doctõribus, & ipsis papis cõtradicis. Pagninus n. Caietanus, Lyra, Paulus Brugensis, Valla, Steuchus, Stapulensis, Viues, Lucas Brugens. Erasmus, Arias, & multi alij vno ore fatẽtur vulgatam versionem esse corruptam. Quin ipse Leo decimus in bulla præfixa. Nouo Testamento Erasmi, Clemens & Adrianus papæ Roman. idem asseruerunt. Approbarunt enim versionem Erasmi. Ergo vulgatam versionem non obscurè reprobarunt. Adde vulgatam versionem ipsi Hieronymo visam fuisse vitiosam, & vitiosam esse clamant omnes docti, & res ipsa testatur. Si igitur quod vitiosum est, propter ecclesiæ decretum non est vitiosum, tum ecclesia est Deo potentior. Ipsi enim Deo simpliciter impossibile est, facere mendaciũ non esse mēdacium. At ec-

clesia secundum Bellarminum potest facere, ut error non sit error. Deinde quod sæpè dixi, repeto, te ostendere logicæ imperitiā, tum quod principium per aliud probas, est enim immediatum & indemonstrabile. Principium enim fidei nostræ est verbum Dei, idq; nullam aliā ob causam, quàm quia verbum Dei est, tum quod illud probas per illud, quod cōtrouersum est. Vulgatam n. versionem probas esse principium propter ecclesiæ approbationem. At quis tibi vnquam cōcessit, ecclesiam papisticam posse ex libro non canonico facere canonicum? aut quæ logica te docuit, principium per illud, quod controuersum est, probandum esse? Secundum argumentum. Quia omnes patres, ius canonicum, & ipse Bellarminus lib. 2. cap. 11. statuunt Latinorum librorum fidem ex hebræis examinandam esse.

Cuius fides ex alio examināda est, vel quod ad aliud emendari debet, illud non est autheticum. Sed Latine versionis fides ex hebræis examināda est, vel latina versio ad hebræos libros emendari debet. Ergo latina versio nō est authetica.

Maiorem mihi libenter concedent omnes ij, qui mentem habent. Minorem docet Hieronymus, ad Vitalem, ad Suniam & Fretellam, ad octauum caput Zachariæ. August. de doctrina Christ. lib. 2. cap. 11. 12. & 15. Epist. 19. & 59. Gratianus Distinc. 9. C. ut veterum. Bellarm. lib. 2. cap. 11. *Cum latini, inquit, codices culpa librorum sunt deprauati, & cum sibi contradicunt, & cum ambiguam, vel incertam sententiam continent, tum ex hebrais fontibus corrigendi sunt, idq; multis exemplis docet, quod & Canus lib. 2. cap. 15. mul-*  
tò

tò plixius ante Bellarminum docuit. Cùm igitur latina versio ex hebræo corrigi debeat, sequitur eam non esse neque posse esse authenticam. Et quæ insania est dicere non ipsam veritatem in natiua lingua, sed eius deprauatam versionem esse authenticam? *Cùm exemplū rescripti imperatorum in eadem lingua non sit authenticum.* 2 §. Q. 2. C. dicenti. §. Sancimus. Deinde si hæc versio est authentica scriptura, tum apostoli & primitiua ecclesia non habuit authenticam scripturam, nam tum non erat. Præterea si hæc versio est authentica scriptura, tunc primitiua ecclesia non agnouit authenticam scripturam. Illa enim hebræam scripturam habuit pro authentica, & Latinā ad hebræam emendauit. Si hæc Bellarmino satisfaciunt, benè est, sin minus, doceat quo tempore hebræa scriptura desierit esse authentica, & quando Latina scriptura cæperit esse authentica, & hærebit. Cùm igitur Latina versio neque propter Hieronymum, neque propter ecclesiæ approbationem sit authentica, & cùm habeat multos errores, atque ad hebræam scripturam examinari & emendari debeat, neque tempore apostolorum, primitiux & sequentis ecclesiæ fuerit authentica, & absurdum sit apostolos non habuisse authenticam scripturam, & posteriorem ecclesiam non agnouisse authenticam scripturam; sequitur vulgatam versionem non esse, neq; posse esse authenticam.

## CAPVT VIII.

*Exceptiones ad loca à Chemnitio notata refutantur.*

**V**ulgatam editionem V. T. non esse, neque posse esse authenticam probauimus capite superiore.

Nunc quibusdam locis à Chemnitio ante productis idem ostendemus, & simul Bellarmini ad ea exceptiones diluemus. Primus locus est Genes. 3, 15. *ipsa conteret caput tuum* in hebreo est *הוּא יִשׁוּמֶךָ רֶאשׁ*. Chēnitius monuit hunc locum esse depravatū, ad probandam intercessionem Mariæ. Cuius rei causas sine dubio habuit Chemnitius. Ego verò ex hoc loco depravato, Marię intercessionem natam esse existimo. Bernhardus enim Homil. 2. de laudib. Marię, dicit *Mariam abstulisse matris* (loquitur de Eva) *opprobriū, ipsamque patri pro matre satisfecisse, quia si vir cecidit per fœminam, iam non erigitur nisi per fœminam*. Deinde dicit hoc in scripturis promissum esse, nempe hoc loco, *Ipsa conteret caput serpentis*. Vbi addit, *cui hac victoria seruata est, nisi Maria?* Rectè igitur dico intercessionem Marię ex hoc loco ortam esse. Sed quàm bene paucis declarandū est. Bernhardus dicit *hominem non nisi* (nota exclusiuam) *per fœminam erigendum esse*. Ergo falsum est, quod omnes Prophetę & Apostoli clamant, hominem per Christum restitutum esse. Christus enim non est fœmina. Deinde Bernhardus dicit, *cui hac seruata victoria est, nisi* (nota rursus exclusiuam) *Marię*. Ergo rursus falsum est, quod omnes Prophetę & Apostoli clamant, hanc victoriam per Christum partam esse. Christus enim non est Maria. Vt hanc impiam & blasphemam sententiam probaret Bernhardus, adduxit hunc locum, *ipsa conteret caput serpentis*, q. d.

Qui cōteret caput serpētis, ille solus erigit nos, & sathanam vincit. Sed sola maria (hoc n. equipollet particulę exclusiue) conterit caput serpētis.  
Ergo

Ergo sola Maria crexit nos, & vicit Sathanam.

An non hoc est Christum de cœlo deturbare? an non, inquam, hoc est omnes prophetas & apostolos falsi arguere? omnes enim illi non Mariæ sed Christo testimonium perhibent, nos per Christum, non per Mariam remissionem peccatorum accipere. Hunc errorem rectissimè flagellauit Chemnitius. nam in hebræo est *relatiuū masculinū*, & *verbum masculinū*, deinde & *affixū masculinū*. Ergo quemadmodum apud hebræos *הוא* refertur ad *זרע*, eodem modo & apud Latinos *ipsa* referri debet ad *semen*. Hoc omnes docti non tantum orthodoxi, sed etiam papistæ fatentur, vt Canus lib. 2. cap. 15. Caietanus in cōment. ad dictum locum. Idem facit Pagninus, & Arias Montanus in suis versionibus, & Andrada lib. 4. Contra Chemnitium. Lucas Brugenſis postquam multa verba fudit, tandem dicit inter *הוא* & *זרע* esse debitam conuenientiam, & disertè addit non esse necesse, vt vox quæ subaudiatur, aliunde accersatur. Deinde ipse Hieronymus in quæſtionib. super Genes. dicit *ipsum* legendum esse. Bellarminus respondet *הוא* aliquando legi pro *היא* ac verba masculina aliquando poni pro femininis. Vtriusque rei affert exempla ex Luca Brugenſi. Probat illud quod non est necesse. Quis enim adeo hospes in lingua hebræa, vt illud ignoret. Sed non sequitur, Bellarmine, genera aliquando permutantur. Ergo & hoc loco permutantur. Verba enim clara sunt *ponam inimicitiam inter semen tuum & semen eius, & ipsum conteret tibi caput*. Illud ipsum est relatiuum præcedentis. Refert igitur vel semen vel to eius vel totam sententiam. Non totam



sententiam, nihil enim intelligeretur, neque tò e-  
ius, nulla enim mulier contriuit caput serpentis.  
Ergo ad *semen*, hoc autem est Christus. Semen au-  
tem est generis neutri, ergo & relatiuum in neutro  
genere poni debuit. Hoc cū te Chemnitius doceret,  
maiorē laudem assequutus fuisses, si cum Cano,  
Clario, Andrada, & Brugenſi, eius admonitioni  
acquieuiſſes. Verū si acquieſcis benè est, si verò in  
errore perſeueras, ſcias te principium petere, quoti-  
es hunc locum ad Mariæ interceſſionem defenden-  
dam contra nos adducis. Quod ad reliquos patres  
non respondeo, conſultè facio. Non enim ſtatui hoc  
loco de Mariæ interceſſione diſputare, ſed ſatis mi-  
hi eſt, hoc loco demonſtraſſe, hunc locum eſſe malè  
verſum. Secundus locus eſt Genef. 6. v. 5. & *cuncta*  
*cogitatio cordis intenta eſſet ad malum*. Chemnitius mo-  
net & hunc locum ad *extenuandum peccatum originale*  
*corruptum eſſe*. Ego rurfus dico, veteres occasione hu-  
ius verſionis peccatū originis extenuaſſe, legitur autē  
in hebræo וכל יצר מחשבות לבו רק רע כל היום  
hoc eſt, *omne figmentum cogitationis cordis eius tantum-*  
*modo malum eſt omni die*. Bellarminus dicit hoc idem  
eſſe, atq; oēm cogitationem hominis intētā eſſe ad malū.  
Hoc an verum ſit videbimus. Ac primum vt intelli-  
gatur, quid ſibi velit, deſcribemus explicationem  
horum verborum ex cenſura Colonienſi. *ſenſus eſt,*  
*in corde humano eſſe pronitatem & concupiſcen-*  
*tiam quandam ad malum*. Si exiſtimas, Bellarmine,  
hoc idem eſſe atque *omne figmentum cogitationum eſſe*  
*tantummodo malum*, vehementeſ erras. Figmētum n.  
cogitationum ſignificat ipſum cogitationum prin-  
cipium



cipium & fontem, cogitatio autem significat cogitationem cōsummatam. At inter cogitationum principium siue figmentum cogitationū, & formatam cogitationē est magna differentia. Deinde vulgata versio dicit *intentam esse ad malū*. Sed hoc additum est, *intentum* enim non est in hebræo; neque sensus expressus est. Longè enim aliud est *esse malum*, & *intentum siue prouum esse ad malum*. Præterea particula intendendi *קָרַן tantummodo*, vt Pagninus vertit, vel *tantum*, vt Arias, & Bellarminus, hoc loco prætermittæ est. At illa habet Emphasin, & prætermitti non debuit. Longè enim aliud est, *figmentū cogitationum cordis est malum*, quàm est *tantummodo malum*, & hoc ipsū longè aliud est atque *cogitatio prona est ad malum*. Hoc enim sonat cogitationes non esse malas, sed tantum ad malum pronas. Illud verò docet figmentum cogitationum, h. e. ipsarum cogitationum principium, & ipsas cogitationes nihil nisi malum esse. Quod addis in hoc loco *esse hyperbolen*, verum non est. omnium enim hominum non regenerantium cogitationes sunt malæ. Neque verum est, quod dicis, Lutheranos ex hoc loco colligere omnium opera esse mala. Non enim dicunt omnium hominum, sed hominū non regenerantium opera esse mala. Dum hanc hyperbolen probas per illam, *omnis caro corruerat viam suam*, petis principium. Reuera enim omnis caro corruerat viam suam, neque Noë erat ab hac corruptione immunis. Quod autem *iustus* dicitur, hoc non de propria iustitia intelligendum est, sed quia *gratiam inuenerat in oculis Iehouæ*. i. ideo iustus erat, quia peccata ei propter futurum Christum erant re-

missa, neque simpliciter iustus dicitur, sed *iustus in generatione sua*. paulò enim post notatur eius ebrietas. Ex his manifestum est, hunc locum non esse hyperbolicum. Et si quis disputandi gratia hic hyperbolen admitteret, tamen non excusaretur latina versio. In illa enim non est hyperbole. Aliud igitur hoc loco loquitur scriptura hebræa, & aliud vulgata versio. Non persequar hæc ulterius, sufficiat ostendisse hunc locum iure à Chemnitio flagellatū esse. Tertius locus est Genes. 9. 6. *Quicumque fuderit sanguinem humanū, fundetur sanguis illius*. Hunc locum ut mutilatū castigavit Chēnitius. In hebræo est שֶׁכָּר דָּם הָאָדָם כִּאֲדָם דָּמוֹ יִשָּׁפַךְ. *Quicumque fuderit sanguinem hominis, per hominem fundetur sanguis eius*. Bellarminus negat mutilatū esse, & dicit sensum bene expressum esse, neq; per omissionem istorum verborū *per hominem*. de sensu quicquā decessisse. At ex hebræo textu colligi potest, homicidam per hominem occidi debere. Illud enim sibi vult דָּם *per hominem*. Hoc verò ex latino colligi non potest. Hic obiter moneo accentum postulare ut *per hominem* non cum priori, sed cū posteriori parte iungatur. Deinde si sensus est æquè perfectus, tum Spiritus S. hæc duo verba in hebræo frustra posuit. Sed hoc hætenus nemo affirmare ausus fuit. imò Arias & Pagninus ea legunt. Caietanus dicit *ea habere emphasian*. Et sunt qui ex hoc loco disputant magistratum gladio esse à Deo instructum, ut homicidam puniat. sed illud ex Latino colligi non potest. Rectè igitur hunc locum notavit Chemnitius. Quartus locus est Genes. 14. 18. *At verò Melchisedec rex Salem, proferens panē & vinum, erat*

n. sacerdos altissimi, benedixit ei. In hebræo est מלכי צדק מלך שלם הוציא לחם ויין והוא כהן לאל צדק מלך שלם הוציא לחם ויין והוא כהן לאל עליון h.e. *Melchisedec rex Salem eduxit panem & vinum, et ipse sacerdos Deo altissimo.* Hunc locum deprauatū esse ad probandam missam, inquit Chemnitius. Equidē Bellarmine ipse dicis eum panem & vinum Deo in sacrificio obtulisse, & hoc facto gessisse figuram vestri sacrificij, quo sub specie panis & vini corpus & sanguinem Christi offertis Deo. Ergo negare non potes papistas ex hoc loco sacrificium missæ probare. An verò hoc rectè faciant, expendemus. Mosès dicit Melchisedechum lassos Abraham milites (sunt verba Andradæ lib. 4. cont. Chēnitium) & diuturna pugna fractos pane & vino refecisse. Hoc Bellarmino idem est, atque Deo panem & vinum sacrificare. Ridiculum hoc est Bellarmine, & quoniam nos aliquando prouocas ad hebræos doctores, excute omnes Rabbinorum commentarios, consule omnes grammaticos, & docebunt te הוציא לחם ויין non esse missam celebrare. Deinde לחם non significat panem, sed est vox generis, quæ omnes ciborum species sub se comprehendit. Præterea והוא illud γ non est particula causalis, vt tu comminisceris; sed est separata particula. docet hoc distinctio hebræa, idem affirmat Cardinalis Caietanus. *Quod in vulgata, inquit, subditur, vt causa oblationis, erat enim sacerdos Dei altissimi, in hebræo non habetur vt causa oblationis, sed vt particula separata, & ipse sacerdos Deo excelsio, adiungit siquidem regia liberalitati dignitatem sacerdotalem.* Idem penè iisdem verbis docent Vatablus, & Pagninus, protulit, inquiūt panem & vinum. i. lassum & famelicum exercitum regia liberalitate refecit.

refecit. Neque enim exponendum est, ut vulgò, ipsum protulisse panem & vinum, ut offerret Deo in gratiarum actionem, quòd sacerdos esset. Nam duo dicit, quæ necessario distinguit, ipsum Melchisedec fuisse regem & sacerdotem. Iq; rex esset, Abrahamũ & eius comites excepit hospitio, atque aluit pane & vino. Panis nomine intellige omne cibi genus: quòd autem esset sacerdos, benedixit iure sacerdotij, & decimas ab eo recepit. Vetus autem hic mos fuit, ut qui reges erant, simul sacerdotio fungerentur. Quod autem quædam exempla producis, quibus ostendis aliquãdo pro ð accipi, probas illud, quod non est necessarium, & quod nemo ignorat. Sed expende argumentum tuum. 1.º aliquando accipitur caussaliter. Ergo & hoc loco. dignum Bellarmino argumentum. Illud hĩc ita non accipi, testatur non tantũ Andrada lib. 4. cont. Chemnitium. (aietanus, Vatablus & Pagninus, sed & res ipsa idem docet. Quod autem negas vulgatam versionem habere obtulit, ut inquit Chemnitius, ostẽdis te varia exemplaria non consulere. Quidam enim libri habent obtulit. Testis Andrada lib. 4. cont. Chemnitium. Deinde contradicis tibi ipsi, probas enim hanc lectionem ex Ambrosio lib. 4. de Sacram. cap. 3. at ibi disertè legitur obtulit. Aut igitur erras dum Chemnitiũ mendacij arguis, aut tibi ipsi contradicis. Quod autem dicis Ambrosium dicere Melchisedechum obtulisse Deo panem & vinum in sacrificium, falsum est. Ambrosius enim dicit tunc victor venit (loquitur de Abrahamo) occurrit ei Melchisedec sacerdos, & obtulit ei panem & vinum. Si stabis Ambrosij sentẽtia, cecidisti tua caussa. Ambrosius n. nō dicit, eum quicq̃ obtulisse Deo, sed obtu-

obtulisse victori. i. Abrahamo. Epiphaniū allegas her. 79. ἐξήνεγκε τὸ ἀβραάμ ἄρτους ἐ πίον, & paulò post ὁ μελχισεδεκ αὐτῷ, loquitur de Abrahamo, ἀπήνια, καὶ ἐξέβαλεν αὐτῷ ἄρτον ἐ πίον. Si tu ex hoc loco poteris colligere melchisedec obtulisse Deo panem & vinū in sacrificiū, dicā te ipso Carneade acutiorē esse. Reliqua patrū loca non libet excutere, ne longior sim, & suo loco excutientur. Allegas præterea psalm. 109. *Tu es sacerdos in æternum secundum ordinem Melchisedec*, & addis *cur Christus sacerdos secundum ordinē Melchisedec, nisi quia ille obtulit panem & vinum, hic seipsum in specie panis & vini*. Hanc orationem affirmamus blasphemam esse, potest enim in hunc modum resolui, nulla alia causa est, ob quam Christus sit sacerdos secundum ordinem Melchisedec, quā hęc sola, quòd Melchisedec obtulit panem & vinum, Christus autem seipsū obtulit in specie panis & vini. Si hoc verum est, tum Apostolus in epist. ad hebræos cap. 5. & 7. scripsit mēdadium. Allegat enim eius rei longè aliam causā, & hanc præterit. Deinde si est sacerdos secundum ordinem Melchisedec, qui Christum offert in specie panis & vini, tum omnes papistici sacrificuli sunt sacerdotes secundum ordinem Melchisedec. Illi enim omnes clamant, se quotidie offerre Christum in specie panis & vini. At quis feret has blasphemias? Sed non constituimus nunc de missa disputare. Explicabimus eam controversiam suo loco, Nunc tantum dicimus Melchisedec non sacrificasse. Id enim docet phrasis hebræa: Testantur omnes grammatici, fatentur Andrada, Vatablus, Pagninus, Arias, Caietanus. Deinde illud non esse causalem particulam doce

docet textus hebræus, fatetur Caietanus, Vatablus, Arias & Pagninus; docent hoc omnes grammatici. Præterea לחם hoc loco non significat *panem*, sed cibum in genere, quo Melchisedec refecit exercitum, docet hoc ipse textus, testantur omnes grammatici, fatentur Andrada, Caietanus, Pagninus & Vatablus. Denique nihil Deo oblatum est, sed quicquid productum est, Abrahæ, eiusque exercitui productum est. Docet hoc ipse textus, testatur omnes grammatici, fatetur Caietanus, Vatablus, Pagninus, Andrada, Ambrosius, Epiphanius. Postremò psalm. 109. ad hanc rem probandam absque blasphemia adhiberi non potest. Pronunciamus igitur rectè fecisse Chénitium, dum hunc errorem castigavit. Si Bellarminus assentitur benè est, si pro Iesuitica modestia in errore perseverat, æquè benè est, modò sciat se principium petere, quoties hanc depravatam versionem in defensionē papisticæ missæ contra nos allegat. Quintus locus Num. 36. 7. *omnes enim viri ducent uxores de tribu & cognatione sua. Et cuncta sæmina de eadem tribu maritos accipient.* Hanc versionem reprehendit Osiander, & eius falsitatē multis exemplis demonstrat. In hebræo est, לא תסב נחלה לבני ישראל ממטה אל מטה כי איש בנחלת מטה אבותיו ירבו בני ישראל: וכל בת ירשת נחלה ממשות בני ישראל לאחר ממשפחות מטה אביה תהיה לאשה למען יירשו בני ישראל אש נחלת אבותיו: ולא תסב נחלה ממשות למטה אחר כי איש בנחלתו ירבו ממשות בני ישראל:

hoc est *no transferatur hereditas filiorum Inda de tribu*  
ad

ad tribum aliam. Nam filij Israël singuli adhaerebunt hereditati tribus patrū suorum. Et oīs filia quae possederit hereditatem de tribubus filiorū Israël, uni de familia tribus patris sui erit in uxore: ut possideant filij Israël singuli hereditatem patrum suorum. Ne transferatur possessio de tribu ad tribum aliam, sed singuli ex tribubus filiorum Israël suae hereditati adhaerebunt. Bellarminus respondet hæc duo non differre, sed habere sensum prorsus eundem. Equidem hīc frōtem desidero. Quod enim viri simpliciter prohibentur de tribu aliena uxorem ducere, nō est in hebræo, quicquid dicat Bellarminus. Quod item omnes fœmine iubentur nubere viro de tribu sua, hoc etiā non est in hebræo. Hebræus enim textus tantum loquitur de mulieribus hereditantibus, ijs non licuit extra tribum nubere. In priori igitur membro est additio, in posteriori mutilatio. Allegare autem Eusebium & alios, quod illi hunc locum ita intellexerint, insanire est. Non enim disputatur, an Eusebius & alij hūc locum ita intellexerint, sed quæstio est, an vetus interpretes hunc locum rectè ex hebræo verterit. Deinde hac versione omnes penè doctores decepti sūt. Plerique enim asserunt, non licuisse eis, qui diversarum tribuum erant, matrimonium contrahere, nisi solis Lemitis. Sed hoc neque in Dei lege prohibitum est, neque in populo Iudaico vnquam obseruatum fuit. In lege non fuit prohibitum. Illa enim tantum prohibet tribuum possessiones confundi, ijs verò, qui hæredes non sunt, nihil præcipit. Neque etiam in populo obseruatum fuit. Moses enim non duxit uxorem de tribu sua. Aaron duxit uxorem Elizabet, Exod. 6. 23. Illa est filia Aminadab, & soror Nahazon, qui est



qui est de tribu Iuda, Num, 1, 7. & Ruth 4, 10. Iosabeth filia regis è tribu Iudæ nupsit Ioiade summo sacerdote, 2. Paralip. 22, 11. David. qui fuit è tribu Iudæ, habet uxorem Michol, 1. Sam. 28, 27. Michol aut erat filia Saulis, & erat de tribu Benjamin. Elizabeth vxor Zachariæ erat ex filiabus Aaron, Luc. 1, 5. & erat cognata Maria, Luc. 1, 36 Sed maria citra cōtrouersia erat de tribu Iuda. Vnde ceteri tribus testantur se non lege, sed iuramento teneri, quo minus suas filias Beniamitis elocent, Iud. 21, vers. 18. Hinc manifestum est hoc neque prohibitum, neque obseruatum fuisse in populo Iudaico. Dum igitur Bellarminus hoc loco vulgatam versionem tuetur; tantum ostendit peruersum & pertinax in erroribus tuendis studium. Sextus locus Esdræ 9, 8. *ut daretur nobis pax illius in loco sancto eius*, in hebræo est וְלִתְּנוּ לָנוּ יֵתֵר בְּמִקּוֹם קִדְשׁוֹ. Hunc locum castigauit Chemnitius, & dixit *clauum*, vel *paxillum* legendum esse. Errorem hunc agnoscit Bellarminus. Septimus locus est, Iobi 5, 1. *Voca ergo si est, qui tibi respondeat, & ad aliquem sanctorum conuolare*. In hebræo est וְצַל מִי וְצַל מִי קִדְשֵׁי תַבְכָּה. hunc locum intempestiue Bellarminus adduxit, non enim reprehēdit Chemnitius eius versionem, sed prauam papistarum expositionem. Papistæ dicunt *ad quem sanctorum respicies*, idem esse, atque *sanctos mortuos inuocandos esse*. Sed hoc non esse verum, manifestum est. Tempore enim Iobi non fuit repertum dogma de sanctorum inuocatione. Deinde Eliphaz non iubet ut Iobus inuocet defunctos, sed ridet eum, & dicit, tu te extollis, at tam miser es, ut nullus angelus te responsione dignetur. Deinde non potest sequi. Nam si dicas, *ad quem sanctorum respicies*



*spicies qui tibi respondebit? hoc est, nemo ex omnibus sanctis te responsione dignabitur. ergo mortui sunt inuocandi, si, inquam, ita dicis, helleboro opus habes. Non enim illud ex Eliphasi sententia sequitur. Sed hoc potius, cum igitur ex omnibus sanctis nemo tibi respondebit, æquum est, ut te humiliēs, & Deo non responses, neque tuam innocentiam apud Deum prædices. In græco est *ἢς τίνα ἁγίων ἀποκρίσεται ὁ ψα*; Si acquiescis huic expositioni, benè est; si non acquiescis, scias te principium petere, quoties mortuorū inuocationem ex hoc loco probas. Octauus locus Prouerb. 16. 11. *opus eius sunt omnes lapides seculi*, castigauit hoc Chemnitius. In hebræo enim est *כל מעשרו בל אבני בים* hoc est, *omnes lapides sacculi*, hunc errorem agnoscit Bellarminus. Nonus locus est Eccles. 9. 1. *Nescit homo, virum amore, vel odio dignus sit*. Hunc locum notauit Chemnitius *deprauatum esse, ad probandam dubitationem de remissione peccatorum*. In hebræo est *גב אהבה גב שנאה אין ידע האדם* hoc est, interprete Aria, *etiam amorem, etiam odium non sciens homo*. Manifestum igitur istam vocem *dignus* esse ad genuinum textum appositam, ac proinde hunc locum deprauatum esse. Iam videndum, an ista vox ad sensum exprimendum sit necessaria. Salomon loquitur de æterna Dei prouidentia. Hoc constat ex versu eod. & sequent. Ex eodem: Dicit enim *Iustos & Iniustos, & opera eorū esse in manu Dei*; ex sequente, *omnia enim dicis euenire consimiliter omnibus, euentum unum esse Iusto & Iniusto*. Horum verborum verus sensus est, *è manu Dei esse, quod Iusti & Iniusti benè vel malè habeant, ne ideo commoneantur, quod sibi eadem euenire videant, que alijs.**

vel, quod idem est. *omnia bona, & mala, quæ cuiquam eveniunt, esse decreta, & ob eam causam non esse, quod se quisquam cruciet, sed boni omnia consulat, & se suavis omnia sibi persuadeat in manu Dei esse.* Nulla igitur hic dignitatis ratio: Deinde amor & odium vel significant illud, quod homo amat & odit, Nam de affectu humano intelligi non potest. vel deniq; quod homo amatur, & odio habetur. Si illud, tum amor idem est, quod *res amata*, & odium idem, quod *res exosa*. atq; tum verus sensus est, homo nescit re amata & exosa uti, nempe per se, vel sua facultate & arbitrio. In hunc modum intelligit Aben Ezra: Si hoc, tum verus sensus est, homo nescit an à Deo ametur, vel odio habeatur, atq; hoc potest dupliciter intelligi, nempe de ipso Dei favore, & de externis euentibus. Nos intelligimus de externis euentibus. Papistæ de ipso Dei favore: Videamus nunc vtra sententia sit melior. Paulus dicit *se persuasum habere, quod nihil possit se separare à charitate Dei* Rom. 8, 38. Sciuit ergo vtrum à Deo amaretur. Idem Rom. 8, 16. dicit *spiritum una testari cum nostro spiritu nos esse filios Dei.* Sciunt ergo filij Dei vtrum à Deo amentur. Plura eiusmodi testimonia sunt passim obuia. Ergo locus Ecclesiasticus ita intelligi non potest. Rectè ergo de externis euentibus intelligitur, & verus eius sensus est, *ex externis euentibus neminem posse iudicare vel de se, vel de alio, an à Deo ametur, an verò odio habeatur, & utriusque causam hominem, ut homo est, ignorare. Quia ut mali, sic & boni viri calamitates patiuntur: & ut boni prosperè habent, sic & mali.* Mer. Hæc si Bellarmino satisfaciunt, bene est: sin minus, æquè bene est, modo sciat

sciat se principium petere, quoties ex hoc loco malè  
verso malum dogma defendere conatur. Ad loca  
ex Ecclesiastico adducta non respondebo, ille enim  
liber est apocryphus, vt lib. primo ostendimus, ad  
locum ex Michæo cap. 5. respondimus ante. Deci-  
mus locus, Ioëlis 2. *præstabilis super malitia*. ista voce vi-  
titur Hieronymus in commentarijs, & si ita intelli-  
gitur, vt Hieronymus explicat, tum non offendit  
Chemnitium, alioqui vox ipsa in Latio ignota est.  
Atq; hæc de locis à Chemnitio notatis, ex quibus  
manifestè apparet veterem interpretem sæpè ab he-  
braica veritate recessisse, ac proinde eius versionem  
non posse authenticam esse.

## CAPVT IX.

*Refutatio exceptionum ad loca à Caluino producta.*

**S**uperiore capite ostendimus Chemnitium meri-  
tò flagellasse veterem versionem, nunc videbi-  
mus, an Calvinus eadē meritò reprehēderit. Primus  
locus est Ps. 2, 12. *Apprehēdite disciplinā*. Hūc locū di-  
xit Calvinus malè versū esse. In hebræo est *בְּיָדְךָ יְהוָה*  
hoc est, *osculamini filium*, neque vllum verbum est,  
quod *apprehendere* significat. Fatetur Bellarminus  
verbum verbo redditum non esse, sensum tamen  
fideliter expressum esse. *Osculari enim filium*, est eum  
pro rege agnoscere. Eum verò pro rege nemo agno-  
scit, nisi qui eius doctrinam recipit. At hoc nihil  
aliud est, quàm disciplinam apprehendere. Hæc in-  
terpretatio etsi mala non est, tamen propterea non  
sequitur, hunc locum benè versum esse. Interpres  
enim non habet istam potestatem, præsertim cum  
nulla est necessitas. Debet n. q̃ minimum fieri potest,

à verbis recedere: si aliter facit, sensum suū exprimit, nō eum, quem verba diuinitūs inspirata præ se ferūt. Deinde quod inquit Bellarmin. sensum probè redditum esse, verum non est. Disciplinam enim apprehendere, non est filium osculari. Disciplinā n. non est filius, sed tantūm modus, seu mediū, quo quis se filio subijcit. neq; oīs disciplina est modus, quo quis se filio Dei subijcit, sed tantūm ea, quę Dei verbo cōprehensa est. Deinde apprehendere disciplinam est doctrinam de filio Dei suscipere, osculari autē filiū, est eū pro rege agnoscere, & se eius subditū confiteri. Hoc esse quidem cum eo cōsentaneum non inficior, idem tamen esse nego. Ex hebræo n. possumus filij auctoritatē in oēs creaturas probare, ex latino non possumus, non igitur idem sensus. Hunc errorē in hoc versu tantū notauit Calvinus, sed est & alius æquē crassus. Nam in eodē versu est, *ne pereatis de via iusta*. Illud *iusta* non est in hebræo, & sensum peruertit. *Via* v. phrasi hebræa ponitur pro humanis studijs. Sensus igitur est, *Ne pereatis propter viam*, h. e. propter vestrā inobediētiam, quam erga filium exercetis, vel ne via vestra pereat. hoc est, ne ratio vitæ vestræ damnetur. Quocunque modo verteris, non poterit consistere versio Latina. Nemo enim peribit propter viam iustam, neque ipsa via iusta damnabitur, & alia interpretatio, vt opinor, non dabitur. Ne autem quis in ista particula *de* materiam cauillandi inueniat, sciat & eam esse addititiā, non n. est in hebræo. Rectè igitur hunc versum flagellauit Calvinus. Sed quoniam ei tantūm propositum fuit, apud moderatos homines ostendere huius versionis vitiositatem

tem, ob eam causam non omnia persequi voluit. Secundus locus Psal. 4, 3. *filij hominum usque quo gravi corde.* Et hunc locum castigavit Calvinus. Nihil enim est in hebræo, quod *grave* sonat, neque quicquam, quod *Cor* sonat. Est autem textus hebræus עַד מֵה לְבַלְמָה hoc est *usq;* quo *gloriam meam in ignominiam*? Bellarminus suspicatur hebræum textum corruptum esse. Sed hæc suspicio vana est. Omnes enim patres testantur hebræos libros non esse corruptos. Deinde docet in textu hebræo & versione latina, esse sensum eundem. Idque probat in hunc modum, *Deus*, inquit, *conqueritur homines celestia contemnere; & sectari temporalia*, & eos latina versio vocat *graves corde.* In hebræo verò textu dicit eos esse *gloriam suam*. Sed hoc est falsum, & ratio, qua hoc probat, est vana. Non enim Deus, sed David conqueritur, sunt enim verba Davidis. Hoc potest colligi ex versu antecedente, & sequente. Ex precedente. Qui enim hic loquitur, petit vt *Deus sui misereatur*, Ex sequente. *Dicit enim se à Deo segregatum esse.* Deinde quod dicit *Deum vocare impios gloriam suam*, viderit ipse, quomodo probare poterit. Scriptura enim nunquam vocat illos, qui Deum indefinenter contumeliis afficiunt, & obstinatè in peccatis perseverant, gloriam suam. Tertius locus est Psal. 32. 4. *Conversus sum in erumna mea, dum configitur spina.* Hunc locum dixit Calvinus malè versum esse. In hebræo enim est קִיץ בַּהֶפֶךְ לְשָׂרִי בַּחֲרָבוֹנִי hoc est, *versus est viror meus in siccitates æstatis, ubi neq; spine, neq; confixionis, neq; conversionis vlla mentio est.* Bellarminus suspicatur textum hebræum corruptum esse. Sed hæc suspi-

cio falsa est. Nam verba hæc in hebraico psalterio apud Hieronymum eodem modo leguntur. Deinde dicit interpretem *corripere non posse*, *versit enim ex Græco*. Sed Bellarmine, si vertit ex Græco, tum vulgata versio non est authentica. Græca enim versio nunquam fuit authentica. Eius igitur Latina versio authentica esse non potest. Non enim plus auctoritatis habet, quàm à græca editione accepit. Deinde neque Græcæ versionis textum fideliter reddit. Nam in Latina est, *conuersus sum in miseria*. Hoc secundum tuam explicationem est, *cum in miseria essem, conuersus sum ad Deum*, hoc est, resipui, vel pœnitentiam egi. At in græco est *ἱεράδην ἐν ταλαιπωρίᾳ*, hoc non est, resipui cùm essem in miseria, sed *in miseriam versus sum*, hoc est, factus sum miser. Idem autem esse, conuerti ad Deum, cùm es in miseria, & verti in miseriam, vel miserum fieri, iis, qui sanam mentem habent, nunquam persuadebis. Deinde licet græcus verba non expresserit, sensum tamen utrunq; retinuit. In hebræo n. est, *meus succus versus est in siccitates æstiuas*, hoc est, quemadmodum omne humidum à Solis æstu consumitur, ita ego præ æstu iræ tuæ penè exarui, vel, quod idem est, penè consumptus sum. Atque hoc secundum sensum idem est, atque *ἱεράδην ἐν ταλαιπωρίᾳ*, hoc est, *factus sum miser*. Græca igitur translatio ab hebræo sensu non longè recessit. Latina verò non magis cum græco, quàm cum hebræo congruit. *Conuerti enim ad Deum, & conuerti in miseriam*, sunt contraria. Nam qui ad Deum conuertitur, ille incipit à miseria emergere, qui verò in miseriam vertitur, à Deo flagellatur, &

punitur. Deinde illa verba, *dum configitur spina*, nulum sensum habent, quicquid dicat Bellarminus. Spina n. non configitur, neq; potest configi. Et sensus aliquis est, David configitur spina. vel, spina infigitur Dauidi. Præterea neque versionis græcæ sensus hic expressus est. In græco enim est, *ἐν τῇ ἰμῶντι μοι ἄκανθα*, hoc est, *dum mihi spina infigitur*. Dicere verò, *dum mihi spina infigitur*, idem esse, atque *dum spina configitur*, insanire est. Proinde & in hoc hemistichio, latina versio non magis cum græco, quàm cum hebræo congruit. Sed hîc notat Bellarminus regulam corrigendi S. Biblia. *Cùm videmus*, inquit, *in Latino textu facile potuisse aliquid mutari à librarijs propter literarum similitudinem, & non potuisse in hebræo, dicimus errorem librariorum esse in Latino, ubi verò facile potuit aliquid mutari in hebræo, & non in græco, & latino, ibi dicimus in hebræo esse librariorum errorem*. Sed hoc idem est ac si dicas, si regula mollis est, & facile potest flecti, tum debet ad lapidem accommodari. Si verò lapis mollis est, & facile flecti potest, tum debet ad regulam accommodari. Deinde Hieronymus sæpè flagellat versionem græcam veteris Testamenti, ipsa etiam Latina versio, quam Hieronymi esse vultis, à Græco & Hebræo discrepat. Quomodo igitur potes Latinum ad Hebræum, & contra hebræum ad Latinum mutare? Annon hoc idem est, quod Erasmus in præfatione ad nouum Testam. ex aurea bulla docet, *Pontificem aliquando decreuisse, ut Græci libri Novi Testamenti ad exemplum Latinorum librorum mutarentur*. Sanè si Latina editio ad hebræam, & contra hebræa ad Latinam mutari debet, nihil certum erit



S. literis. Atque hæc est ista papistica Theologia. Sed quid facies locis istis, quæ ex diametro pugnant, ut Genes. 8, 4. ubi hebræa dicit *arcam decima septima die mensis quiesuisse*. Latina verò idem *vicecima septima die* factum affirmat, & Genes. 37, 2. Hebræa dicit Iosephum eo tempore fuisse *septendecim annorum*. Vulgata verò dicit eum tum fuisse *annorum sedecim*. Num hîc, & in similibus ista plumbea regula locum habebit? Quartus locus Psalm. 38, 8. *Quoniam lumbi mei impleti sunt illusionibus*. Hunc locum reprehendit Calvinus. In Hebræo enim est *כי ככלי מלאו נקלה* ubi nulla *illusionum* mentio. Sensus enim est, *quoniam ilia mea plena sunt ardore*. Bellarminus respondet *נקלה* significare *ardorem & ignominiam*, *Davidem autem loqui de eo pruritu, qui cum in corpore existit, in mente parit illusionem*. Veterem igitur interpretem vertisse illusionem, & effectum pro causa posuisse. Verum Bellarmine, cum David hunc Psalmum conscriberet, secundum omnium penè sententiam gravissimo morbo erat correptus. At illi qui graviter laborant, non sentiunt istum pruritum, de quo loqueris. Ergo si illusiones de quibus dicis, tum sunt in mente, cum pruritus sentitur in carne, sequitur Davidem eo tempore ab illis liberum fuisse. Verus sensus est, ipsius ilia nimio dolore penè fuisse torrefacta, vel combusta, quemadmodum illis accidit, qui vel peste, vel acutis morbis laborant. Quintus locus est, Psalm. 68, 7. *Deus inhabitare facit unius moris in domo*. Hunc locum castigat Calvinus, in Hebræo enim est, *יחיריים*. At *יחיריים* non significat *congregatus*, ut vertit Græcus, neque *homines unius moris*, ut vertit Lati-



Latinus, sed significat *unicos*, vt ex psal. 22. 21. & psal. 25. 16. liquet. Atq; hoc secundum subiectam materiam explicatur psal. 22. 21. *erue de manu canis unicum meum* h.e. vt interpretatur Vatablus, *solitariam, & quæ subsidijs omnibus destituitur*. Psal. 25. 16. *quia unicus & pauper sum*, h.e. vt idem Vatablus explicat, *ab oïbus desertus, & omni ope destitutus*. Planè eodem modo Vatablus dicit in Psal. 68. 7. *unicos vocari solitarios & desertos in familia* h.e. vt *qui liberis carebant, habeant amplam familiam*. Quin & Hieronymus in psalterio hebraico vertit *solitarios*. Si igitur hæc interpretatio displicet Bellarmino, abstineat à Caluino, & Ariæ Montano, Pagnino, Vatablo, Hieronymo & omnibus doctis litem intendat. Sextus locus est in eodem versu, *Qui habitant in sepulchris*. Et hunc locum castigauit Caluinus. in hebræo enim est צחיה Bellarminus scripsit, *negari non potest, quin vox hebræa צחיה locum arentem designet*. Duplici errore, non enim est *ע* sed *צ*. Deinde ה non est de substantia nominis, sed est nota, quæ motum ad locum significat, sed credo typographi culpam esse. Libenter enim in bonam partem interpretabor, quæ possum, At צחיה non sonat sepulchrum, sed propriè significat *Candorem seu nitorem*. Vnde ad eundem locum significandū transfertur, qui suapte natura aridus glaber est, & nitidus: Interdum ariditatem denotat, cui loca eiusmodi nitida & edita sunt exposita, quod in illis sit velut caluities, nec illic herba crescat, aut gramina, et eiusmodi. Mercerus. Pro loco igitur sicco & arido explicat R. Dauid in commentarijs. Idem facit Vatablus, Pagninus, Arias, & omnes isti, qui hebræam linguam callent. Quin ipse

Bellarminus dicit *negari non posse* הנה ע locū arentem significare, verū addit hoc interpretem non ignorasse, sed posuisse sepulchrum, ut horrorem deserti exprimeret. At hoc est ludere. Non enim quæritur, quid interpret sciuerit, necne: deinde ipse Hieronymus vertit ex hebræo in *ariditatibus*. Præterea, sepulchrum ponere pro loco sicco, non est interpretari, sed explicare, & hoc non licet interpreti, ille enim non debet à verbis discedere, nisi necessitas illum id facere cogat. Rectè igitur hunc locum castigauit Calvinus. Septimus locus est eodem Ps. v. 13. *Rex virtutū dilecti & speciei domus dividere spolia: si dormiatis inter medios cleros &c.* Hunc locū castigauit Calvinus. In heb. est מלכי צבאות ירדון ונות בית תחלק שלל אם שבתם h.e. interprete Aria Montano. *Reges exercitū fugiebāt, fugiebāt, & habitatio domus diuidebat spoliū, si accubueritis inter tripodes.* Bellarmin⁹ dicit interpretē benè vertisse quod fuit in græco. At græca editio nunq̃ fuit authentica, quomodo potest igitur eius versio authentica esse? Deinde dicit hebræum textum posse ad latinum faciliè accommodari. At quid hoc aliud est, quàm lineam ad lapidem flectere? Equidem Bellarmine plus auctoritatis apud me haberent tuæ disputationes, si te in re deplorata minus pertinacem viderem. Vtique in hebræo non est *Rex*, sed *Reges*, nec in hebræo est *dilecti*, sed *fugerunt*. Deinde etsi ἀνὰ μέσον τῶν κλήρων apud Græcos utcūque intelligi potest. κλήρος enim teste Suidam *limitem* significat: tamen quid sit apud Latinos *inter medios cleros dormire* non faciliè explicueris. Et tamen audes in tanta luce doctrinæ & linguarum hæc tam perti-

pertinaciter defendere. Octauus locus est vers. 23. *Conuertā in profundū maris.* Hūc locū castigauit Caluinus. In hebræo n. est *יָשִׁיב מִמְצִלֹת יָם* h. e. interprete Vatablo, *reducā de profundis maris.* At cōuertā in profundū maris, & *reducā de profundis maris* sunt cōtraria. Bellarminus contendit & versionem vulgatam posse defēdi, quia *מִיָּן* apud hebræos teste R. Dauid aliquando significat *in*, & ob eam causam *מִמְצִלֹת יָם* esse *in profundū.* Quod equidē miror viro docto excidisse. Et si n. *מִיָּן* aliquādo *in*, significat, nō tamē isthīc sequitur, illud & hoc loco ita accipi. Deinde propheta loquitur de liberatione populi, an verò cōvertere in profundū maris sit idē, quod populū liberare, iudicet ipse Bellarminus. Reliqua nō libet excutere. Et ex his satis manifestū est vulgatā versionē ab hebræa veritate sæpē lōgiuseuagari, & propterea nō esse authenticā.

## CAP. X.

*Argumenta quibus Bellarminus probare conatur Græcam N. Testamenti editionem non esse authenticam, refutantur, & simul ostenditur eam esse authenticā, vel, quod idē est, esse principiū Christianorū dogmatū.*

**A**D quasdā exceptiōes cōtra loca à Caluino producta respōdim⁹ cap. superiore. Nūc differem⁹ de authenticā editiōe N. T. Sūt autē due versiōes de quibus cōtrouersia est, vna Græca, altera Latina. Aduersarij volūt Græcā editionē esse corruptā, & ob id regulā fidei esse nō posse, esse autē vulgatā latinā authenticā. Nos hoc negātes, græcā incorruptā, ac p̄inde authenticā esse asserim⁹. Aduers. verò hic sibi nō satis cōstāt, aliq. n. volūt græcā editionē prors⁹ esse corruptā, alij verò asserūt eā nō, prors⁹ purā esse, in tēa tñ eā ita

cor.

corruptam esse, vt authentica esse non possit. vnde inferunt Latinam esse Græca integriorem, ac proinde authenticam. Hanc sententiam sequitur Bellarminus. Ille probat suam sententiam aliquot argumentis, quæ ordine expendemus. Primum argumentum, Quia corrupta est.

Quod deprauatum est, hoc non potest esse authenticum. Sed græca editio Noui Testamenti est deprauata. Ergo non potest esse authentica.

Maiorem nos concedimus. Nam quod corruptum est, & deprauatum, id non potest incorruptæ doctrinæ principium esse. Minorem probat Bellarminus aliquot locis ex Græco Testamento productis, quæ ordine expendemus. Primus locus ad Corinth. 15. 47. *Primus homo de terra terrenus, secundus homo de cælo cælestis*. In græco constanter legitur ὁ δῦτης ἀνθρώπος πρῶτος ἐκ τῆς γῆς ἕρπων. Hoc ita deprauatum esse à Marcione dicit Bellarminus, & hoc probat ex Tertulliano lib. 5. cont. Marcionē. Secundum eum enim legendum esset ὁ δῦτης ἀνθρώπος ἐκ τῆς γῆς ἕρπων. Argumentum erit huiusmodi.

Quem locum Tertullianus corruptum esse dicit, ille est corruptus. Sed hunc locum Tertullianus corruptum esse dicit. Ergo est corruptus.

Et si ad Maiorem respondere possemus, tamen ea præterita, negamus Minorem. Tertullianus enim lib. 5. cont. Marcionem ex Epist. ad Corinth. in fine hunc locum allegat, sed prorsus eodem modo, atque nos legimus. *Primus, inquit, homo de humo terrenus, secundus Dominus de cælo*. Neque dicit hunc locum fuisse à Marcione corruptum, sed præcedentem. Do-

minum,

*minum*, inquit, posuit nouissimum pro nouissimo *Adā*. Deinde Epiphanius Hæresi 22. recenset omnia loca Noui Testamenti, quæ Marcion corruptit, sed huius non meminit. Huc accedit Chrysostomū & Theophylactum eodem modo legere. Postremò eandem lectionem habet versio Syra & Arabica. Hunc igitur locum corruptum esse credibile non est. Nam cum Orthodoxi summa diligētia libros custodirent, quis credet ex Arabibus, Syris, Græcis & Latinis hoc neminem vidisse. Quod autem Hyeronymus & Ambrosius ita legunt, vt in vulgata versione est, nihil probat. Illi enim vulgatam versionem sequuntur, vt quæ tum in ecclesijs occidentālibus cepit vñtata fieri. Secundus locus est 1. Corinth. 7. 33. *Qui autem cum uxore est, sollicitus est, quæ sunt mundi, quomodo placeat uxori, & diuisus est, et mulier innupta, et virgo cogitat quæ domini sunt, vt sit sancta & corpore & Spiritu, &c.* At in Græco longè aliter est. Nam *περίεργος* cum sequentibus coniungitur, in Latino verò cum præcedentibus. Illam Græcam lectionem dicit Hieronymus lib. 1. Cont. Iouianum *non esse Apostolicæ veritatis*.

Quicquid Hieronymus dicit non esse Apostolicę veritatis, hoc est corruptum. Sed hanc Græcā lectionem Hieronymus negat Apostolicę esse veritatis. Ergo est corrupta.

Nos dissimulata Maiore, respondemus ad Minorem, eundem Hieronymū ad Heluidium, & ad Eustochium de seruanda virginitate, eandem lectionem seruare, quæ est in Græco, vnde apparet Hieronymi auctoritati hoc loco parum tribui posse. Deinde Syra translatio probat græcam lectionem, idem faciūt Theo-

Theophylactus & græca scholia, & Basilius libro de vera virginitatis integritate. Præterea duplex est huius loci distinctio: vna ante *αἰμίρειται*, altera post. Secundum illam distinctionem sensus est; *vir uxoratus diuisus est*, hoc est, distractus in varias curas, secundum hanc, *uxor & virgo discreta sunt*, hoc est; inter eas est differentia, illa enim curat, quæ sunt mariti; hæc quæ sunt Domini. Vtraque sententia est orthodoxa, sed hæc concinnior. Si autem omnes loci sunt corrupti Bellarmine, qui variè distinguuntur, tum nullum caput integrum & sanum est in tota vulgata versione. Tertius locus est Roman. 12. 11. *Domino seruientes*, Græci enim legunt *τῷ κυρίῳ δουλοῦντες*. Hieronymus autem dicit in epistola ad Marcellum in emendatis codicibus legi, *τῷ κυρίῳ δουλοῦντες*.

Quod cum emendatis exemplis non congruit, illud est corruptum. Sed hæc lectio cum emendatis exemplis non congruit. Ergo est corrupta.

Argumentum hoc est putidum. Nostri en. Græci libri legunt *τῷ κυρίῳ* vnus legit *τῷ κυρίῳ* & ad marginem annotat *τῷ κυρίῳ*, & diuersam lectionem fuisse apud veteres constat ex Hieronymo. Nam si emendati libri legerūt, *τῷ κυρίῳ*, fuerunt sanè, qui aliter legerūt, & ita docet interpret Origenis. Quinetiā apud Latinos olim fuit diuersa lectio. Ambrosius enim legit *tempori seruientes*, & dicit se intellexisse, quosdā Græcos legere, *domino*. Nos autē amplectimur illā lectionē, quæ legit *domino*. Illam n. probat Syra versio, Chrysostomus, Theophylactus, & Basilius in Ethicis summa 69. c. 2. Neq; tamē altera lectio est mala, neq; eius sensus est hæreticus. Præterea si omnes isti loci sunt corrupti, qui variè legūtur, tū nullū caput integrum

est in tota vulgata versione. Posthæc dicit Bellarminus *Græcos libros truncatos & mutilatos esse.*

Quod mutilatum est, & truncatum, hoc non potest esse authenticum, Sed græci libri mutilati sunt & truncati. Ergo non possunt esse authentici.

Minorem probat Bellarminus aliquot locis, quos mutilatos esse existimat, eos ordine expendemus. Primum dicit in græcis libris *desse ultimū caput Marci*, hoc est, decimum sextum. Sed hoc est falsum, legitur enim in omnibus græcis libris, quos quidem vidimus. Athanasius in Synop. eius summam recenset, & Theophylactus illud interpretatur. Extat itē apud interpretē Syrum Hierō. ad Heb. id. q. 3. de eo suspicionē mouet, sed frustra. nā cū reliquis euāgelistis nō pugnat, & antiquitatis testimonio nō destituitur. Deinde dicit *et Euāgelium Iohannis mutilatum esse, in græcis n. codicibus nō extare principium cap. octauum, q. est de adultera.* Sed & hoc falsum est, in nostris n. libris, omnib. ista historia extat. Athanas., in Synop. in cōpendio Euāgelii Iohannis illam agnoscit, idem facit Chrysostomus Homil. 60. in Iohannem, & nostræ omnes Ecclesiæ eam approbant. Neque tamen dissimulandum est, huic parti fuisse aliquando contradicendum. Hieronymus enim lib. 2. contra Pelagianos *fateatur eam in quibusdam græcis libris non extare, & adhuc in versione Syra non extat.* Deinde dicit & epistolam Iohannis primam, capite 5. 7. esse in græcis libris mutilatam. Nam pulcherrimum illud testimonium de Trinitate in græcis libris non extare, *Tres sunt qui testificantur in cælo, Pater, Sermo, & Spiritus Sanctus, atque hi tres unum sunt.* Sed hoc est falsum. Nostri enim libri



bri omnes id legūt. Athanasius item lib. 1. ad Theophylum; & Hieronymus illud legit, extat item in editione Complutensi. Neque tamen dissimulandum est, huic loco olim fuisse contradictum. Tertiū argumentum est, quod quædam adulterina ad græcū textum adsuta sint.

Cui aliquod adulterinum adsutum est, hoc nō est authenticū. Sed græco codici aliquod adulterinum adsutum est. Ergo græcus codex non est authenticus.

Minorem probat, quod Matthæi 6, 14. legitur, *Quia tuum est regnum, & potentia, & gloria, in secula seculorum, amen.* Hoc probat, quia in nullo latino libro reperiuntur. Sed ut antè ostendimus, concordantiam latinorum librorum non esse regulam veritatis in veteri Testamento, ita nunc adserimus eandem nō esse regulam veritatis græcæ in Nouo Testamento. Deinde Græco nihil additum, sed à Latino aliquid detractum esse docet Valla. Hoc verum esse manifestum est. Nā Chrysostomus ea legit, & Theophylactus; reperiuntur etiam in Syra versione, & omnes græci libri ea agnoscunt. Ex his apparet Græcum textum neque corruptum, neq; mutilatum, neq; adauctum esse, & ob eam causam esse authenticū. Sublata enim causa, tollitur effectus. Hæc etsi sufficiunt, tamen vnum atque alterum argumentum adiungā, quo ostendam Græcum textum esse authenticum. Ac primum,

Ad quod omnes latini codices emendari debent, hoc est, authenticum. Sed Græcus textus est id, ad quod omnes Latini codices emendari debent.



debent. Ergo est authenticus.

Maiorem pono extra controuersiam. Minorem probant omnes patres, Ambros. de Spiritu S. lib. 2. cap. 6. *Quod si quis, inquit, de Latinorum codicum varietate contendit, quorum aliquos perfidi falsauerunt, grecos inspiciat codices.* Idem de Sacramento incarnationis cap. 8. *Ita enī, inquit, in grecis codicibus inuenimus, quorum potior auctoritas est.* Idem docet Augustinus lib. 2. de doct. Christ. cap. 11. *Latine lingua homines duabus alijs linguis ad scripturarum diuinarum cognitionem habent opus, hebraea sc. & greca, ut ad exemplaria precedentia recurratur, si quam dubitationem attulerit Latinorum interpretum infinita varietas.* Idem in eod. libro cap. 15. *Libros autem N.T. inquit, si quid in Latinis varietatibus titubat, Grecis cedere oportere non est dubium.* Idem de Ciuit Dei. lib. 15. cap. 13. *Cū diuersum, inquit, aliquid in utrisque codicibus reperitur, quandoquidem ad fidem rerum gestarum utrumque non potest esse verum, ei lingue potius credatur, unde est in aliam per interpretes facta translatio.* Ad hunc locum Viues. Hoc ipsum Hieronymus, inquit, clamat, hoc ipsa docet ratio, & nullus est saniori iudicio, qui repugnet. Sed frustra consensus bonorum ingeniorum hoc censet. Nam rigidus stupor, velut moles opponitur. Idem docet Hieronymus. Praefatione enim in Euangelistas ad Damasum proficitur se versionem Latinam ad exemplum grecum correcturum esse, idque auctoritate Damasi Papæ, Nonum opus, inquit, me facere cogis ex veteri, ut post exemplaria scripturarū toto orbe dispersa, quasi quidam arbiter sedea, & quia inter se variant, quæ sint illa, quæ cum Græca veritate consentiant, decernā. Idem docet Gratianus. Dist.

9. cap. vt veterum. *Nonorum*, inquit, *veritas Gracisfermonis normam desiderat*. Et ibi Glossator, *Quantumcunq, fit aliquid*, inquit, *authenticum instrumentum, si tamen de ipso aliquid in dubium vocatur, semper exhibendum est illud, à quo originē ducit*. 4. Si Papa & eius decreta errare non possunt, græcus textus tum citra omnem controuersiam fuit authenticus. At inter græcum textum, quem nunc habemus, & inter eū, qui fuit tēpore Hieronymi, Damasi, Gratiani, nulla est diuersitas. Quæ enim loca Bellarminus, propter variam illorum lectionem putat esse deprauata, illa & tum variè legebantur, & quæ putat esse mutilata, illa & tum in quibusdam libris non extabant. Et quod putat esse additum, hoc & tunc in quibusdam libris habebatur, quemadmodum antè ostendimus. Ergo si illis non obstantibus, omnes latini libri ad græcum textum illis temporibus fuerunt emendati, sanè & nunc ad eum emendari debēt. Imò si illis non obstantibus Græcus textus illis temporibus fuit authenticus, sanè & nunc authenticus esse debet. Sed primum, ergo secundum. Equidem pontificum decreta habent vim legum, quamdiu non abrogantur. At illud decretum, quod est Distinct. 9. de libris latinis ad Græcos & hebræos emendandis, à nullo Papa, neque ab vlllo concilio fuit antiquatum. Ipse enim Leo decimus Papa in bulla præfixa Nouo Testamento Erasmi, *approbanis laborem*, quo Nouum Testamentum ad græcum textum emēdauit, & errores veteris versionis detexit. Vnde apparet græcum textum vsque ad Leonē decimū fuisse authenticum. Si hoc non satisfacit

Bellar-

Bellarmino, doceat ipse, quando, & ob quas causas græcus textus authenticus esse desierit. Nam causæ ab eo allegatæ sunt nullius momenti. Eædem enim causæ fuerunt tempore Augustini, Hieronymi, Gratiani, Leonis Decimi, quemadmodum ostensum est. Et tamen ijs non obstantibus Græcus textus ijs temporibus fuit authenticus. Aut igitur errauit tota primitiua ecclesia, quod iis causis extantibus græcum textum habuerint pro authentico, aut Bellarminus cum tota Synagoga Romana errat, quod ob easdem causas, & non alias græco textui authenticam veritatem detraxerit. Secundum argumentum,

Quæ editio à tempore Apostolorum usque ad hanc ætatem in Ecclesiâ semper fuit authentica, illa & nunc authentica esse debet. Sed græca editio à tempore Apostolorum usque ad hanc ætatem in ecclesiâ semper authentica fuit. Ergo & nunc authentica esse debet.

Maiores est extra controuersiam posita, nisi aduersarij probent eam esse adulteratam. Sed hoc facere non possunt. Nam, ut sæpè dixi, diuersæ istæ lectiones, quas Bellarminus notauit, æquæ fuerunt in primitiua ecclesiâ, atque nunc sunt. Ergo si illis non obstantibus, libri græci eo tempore fuerunt authentici, sanè ijdem libri propter easdem causas nunc non authentici esse non possunt. Minor ex præcedentibus est manifesta. Nam grecam editionem in primitiua ecclesiâ authenticam fuisse, extra controuersiam pono. Media ætate, & deinceps authenticam fuisse docet Damasus, Augustinus, Hieronymus, Gratianus, Viues in locis su-

præcitatis. Eandem nostra ætate fuisse authenticā docet Leo Decimus, Clemēs, Adrianus, Valla, Steuchus, Caietanus, Pagninus, Arias, & multi alij Papiſtici doctores. Ergo ſi ſemper fuit authentica, nunc etiam authentica eſſe debet. Aut ſi nunc nō eſt authentica, idq; propter decretum Tridentinum, tum papa habet poteſtatem *ex libro non authentico faciendi authenticum*. Sed hoc negavit Bellarminus lib. 1. cap. 10. Deinde dicere *editionem græcam non eſſe authenticam propter decretum Tridentinum*, eſt petere illud, quod erat in principio. Græcam enim editionem non eſſe authenticam, inter nos eſt controuerſum; Sed & Tridentinum concilium inter nos incertum eſt. Illud igitur quod incertum eſt, probat per illud, quod æquē incertū eſt. Ex his manifeſtum eſt, Græcam editionem eſſe authenticam.

## CAPVT XI.

*Vulgata editio N. Testamenti non eſt authentica, neque principium Chriſtianorum dogmatum.*

GRæcam editionem N. Testamenti eſſe authenticā probauimus hætenus, & ſimul Bellarmini argumenta contra eam adducta diluimus, nūc de Latina vulgata differemus. Eam Bellarminus dicit eſſe authenticam, nos negamus. Ille ſuam ſententiā aliquot argumentis probat, quæ quoniam à nobis antea refutata ſunt, nunc leuiter tantū attingemus. Primum *quia penè mille annos in Eccleſia eſt uſurpata*. Reſpondeo græcam editionem longiore tempore in eccleſia uſurpatam fuiſſe. Deinde neque à tota eccleſia uſurpata fuit. Græci enim, Syri, Arabes ea nūquam

quã vfi sũt, et multi alij, neq; hæc sola ab latina ecclesia vsurpata est. August. n. ep. 19. nō vult eā in *Eccle. legi*. Isidorus, & Gregorius etiā alias versiones. tũ vñtatas fuisse docent. Sanè singuli ferè patres peculiare habuerũt versiones. Nā, vt inq̃t Erasmus in præfat. ad Hilariũ, *trãslatio qua vititur in Hilarius, diuersa est ab hac, qua nunc vulgò recepta est. Porro cũ Cypriano sua sit translatio, cũ Augustino sua, cũ Ambrosio sua, cũ Hilario sua, cũ Tertulliano sua ab omnibus diuersa: satis apparet olim nullam fuisse communem omnium*. Prætereā, quicquid vfi sunt, illi nunquā habuerũt eā pro authenticā. 2. *Quia multi episcopi græcè nesciunt*, sed hinc non sequitur græcam editionem non esse authenticam. Nam si propter ignorantiam episcoporum illa non esset authentica, tum neque latina esset authentica. Multi enim Episcopi & latinam linguam ignorant. Deinde authentica auctoritas Sacrarum literarum non pēdet ab inscitia episcoporum. 3. *Quia nunc variæ versiones cūduntur*. Sed non propterea sequitur vulgatam esse authenticam. Nam & Augustini ætate erant multæ versiones, neque tamen ex ijs omnibus vna fuit authentica. Ergo vt tum, licet multæ essent versiones, Græca tamen erat authentica: ita & nunc eadem non obstantibus diuersis versionibus authentica esse debet. 4. *Quia Tridentinum concilium ita decreuit*. Hoc argumentũ etsi antè ostēdimus futile esse, pauca tamen repetemus. Si igitur propter Tridentinum concilium vulgata versio est authentica, tum concilium Tridentinum est causa authenticæ veritatis. Ac proinde ante illud hæc versio non fuit authentica. Effectum enim nō est ante

causam. Estne hoc, quod dicimus, Papam sibi arrogare potestatem faciendi libros canonicos ex non canonicis, & non canonicos ex canonicis? Equidem ante concilium Tridentinū græcus textus erat authenticus, & ante idem concilium Latina versio nō erat authentica. Nunc propter Tridentinum decretum græcus textus desijt esse authenticus, & propter idem Latina versio facta est authentica. Si hæc est vestra sententia, tum non debuisti Chemnitium mendacij insimulare, cū hoc vobis exprobraret, aut si ita non sentitis, tum abstinete posthac ab istis argumentis, ex quibus nihil nisi hoc colligi potest: & vt controuersia semel finiatur, testamini coram toto hoc mundo, vos Gelasij, Innocentij, & reliquorum omnium, qui ex non canonicis canonicos, & ex canonicis non canonicos fecerunt, sententiam improbare. Deinde si Latina versio est authentica propter papæ auctoritatem, tum non illa, sed papæ iudicium est principium Christianæ fidei. *Nam propter quod unumquodque tale est, illud magis tale, vt inquit philosophus.* Et hæc, vt existimo, est vestra sententia. Antecessores enim vestri multa crassè dixerunt *de scrinio pectoris Papæ*, iisdem quidem verbis vos nunc non vtimini, sed tamen eandem rem vrgetis. Postremò, vide quàm ridiculum sit tuum argumentum. Vulgatam versionem dicis esse authenticam. At hoc est controuersum, & ob eam causam non potest esse principium. Illud enim, quemadmodum antè docui, non debet controuersum, neque alterius partis proprium, sed *antè concessum*, & *utrique parti commune esse.* Hoc vestrum

vestrum controuersum principium probas per *decretum concilij Tridentini*. Sed & hoc æquè controuersum est. Concilium enim Tridentinum apud nos habet tantundem auctoritatis, atque illud, in quo Caiphas Christum condemnabat. Ergo illud quod controuersum est, probas per illud, quod æquè controuersum est, idq; nobis pro principio obtrudis. Hæc ego tam prolixè scribo, non vt te exagitem, sed vt ostendam causæ tuæ infirmitatem. Si vos talibus principijs delectamini, potestis ijs per nos uti, modò nos ad ea, quæ non tantùm controuersa, sed etiam falsa scimus esse, non vrgeatis. Deinde si nobiscum disputabitis, vtimini istis principijs, quibus Apostoli, Euangelistæ, & tota primitiua, subsequensq; ecclesia vsq; ad tempus Tridentini concilij vsa est. Quod si facietis, concordiam ecclesiæ sperare possumus, si non facietis, tum totus mundus intelliget, vos causæ vestræ diffidentes, circa falsa & controuersa principia languere, ne ad legitimam controuersiarum disputationem adigamini. Quicquid autem feceritis, scitote vos principium petere, quoties contra nos in dogmate controuerso, ex vulgata versione, in ijs locis, vbi illa à græco textu dissidet, testimonium adducitis.

## CAPVT XII.

*Exceptionum contra loca à Chemnitio producta refutatio.*

**V**eterem translationē vulgatā non posse propter



*sed ut respiciant.* Idem ferè iisdem verbis docet Chrysostomus, Homil. 31. in Matth. Cùm igitur hæc particula in authenticis illorum libris non extet, extet autem in omnibus græcis codicibus, & cùm ad sententiam necessaria sit, sequitur vulgatam versionem hoc loco à Chemnitio rectè reprehensam esse. 2. locus est Iohânis 14. 26. *& suggeret vobis omnia, quacunque dixerò vobis.* Hunc locum reprehendit Chemnitius. Nam in Græco est καὶ ὑπομνησεῖ ὑμῶν πάντα, ἃ ἔποιον ὑμῖν, hoc est, *renocabit vobis in memoriam omnia, quæ dixi vobis.* Hanc esse veram huius loci sententiam, fatetur Bellarminus. Sed negat inter hæc & illam esse discrimē, quod equidem miror. Illud n. futurū est, vt rectè docet Erasmus, hoc præteritū. Deinde negat Papistas in hoc verbo ponere fundamentū auctoritatis conciliorū. Quod falsum est. Vtitur n. hoc loco ad eā rē Canisius D: de præceptis Eccle. cap. 10. & multi alij. Tertius locus est Rom. 1. 4. *Qui prædestinatus est Dei filius.* Hunc locum Calvinus dicit malè versum esse. Est enim in Græco τὸ ὁρισθέντος, hoc est, *declarato Dei filio.* Bellarminus dicit ἐπίγνω-  
*quam in S. Scriptura pro declarare accipi.* Quod si verum est, tum Chrysostomus ignoravit græcam linguam, ille enim dicit ὁρισθέντος idem esse, atque δειχθέντος, ἀποφανθέντος, κρινθέντος, ὁμολογηθέντος, Eandem ignoravit Theophylactus, dicit enim τὸ ὁρισθέντος idem esse, quod ἀποδειχθέντος, κρινθέντος, ἐβεβαιωθέντος, Græcus item Scholiastes eandem ignoravit. Dicit n. τὸ ὁρισθέντος idem esse, atque ἀποδειχθέντος, ἀποφανθέντος. Vide Erasmus in Annotationib. in 1. cap. ad Rom. Deinde & Syrus interpres vertit, *& cognitus est fi-*



lius Dei. Quod autem dicis omnes patres Latinos legere *predestinatus est*, hoc nō est verum. Tertullianus enim contra Praxeam cap. 27. legit *definitus est*. Quartus locus est Rom. 1, 32. *Qui cum iustitiam Dei cognovissent, non intellexerunt, quoniam quitalia agunt, digni sunt morte, non solum, qui ea faciunt, sed etiam qui consentiunt facientibus*. Et hunc locum notavit Chénitius. Nam illa, *non intellexerunt, & facientibus*, redūdāt. Bellarmin<sup>9</sup> dicit Latinā versionē esse græco textu meliorē. Nā secundū græcū sequeretur *συνοδοκῆν κακὰ πράττειν*, esse gravius, quā *κακὰ πράττειν*, hoc autem esse absurdum: *malum enim facere absolute peius, quā malè facienti consentire*. Deinde dicit *quosdam Latinos Patres ita legere, ut est in vulgata latina*, nos ad vtrumque respondemus, ac primum concedimus ex græco textu sequi *ἵδ' συνοδοκῆν κακὰ πράττειν*, esse deteriorius, quā *κακὰ πράττειν*, sed hoc esse absurdum negamus, *συνοδοκῆν* enim secundū Chrysostomum idē est, atque *συμπράττειν καὶ ἱπαταῖν*, secundū græca scholia idem, atque *εἰς τὸ κακὸν παρακαλεῖν*, secundū Theophylactum denique idem, atque *συνγορεῖν τῷ κακῷ* & idem secundū Syrum interpretem. At approbare mala, idq; cū voluptate, multo detestabilius est, quā mala facere. *Hoc enim sepe summo* (sunt verba Erasmi) *vel casus est, vel infirmitatis, illud verò pestilentissima & deploratissima malitia*. Nihil igitur absurdi sequitur ex græco textu. Quod autem aliqui Patres ita legūt, ut est in latina vulgata, mirū nō est, ut vident enim vulgata versione, & græcum textum, vel nunquam, vel rarò inspiciebāt. Hoc cōstat ex Ambrosio in 12. cap. ad Rom. *Dicit n. se audivisse quosdā græcos libros legere,*

Domino

*Domino seruientes.* Sed hîc mirari non satis potui Bellarmini responsionem, nam cûm patrum, & quidē *græcorum auctoritate urgeretur, respōdet, ego patribus oppono patres.* At si hæc responsio sufficit, tum nihil sanum atque integrum est in tota Christiana religione. Nullum enim ferè dogma est, de quo omnes Patres idem sentiunt, & loquuntur. Si igitur hæc respōsio sufficit, *oppono patres patribus*, nihil tam absurdum erit in religione, quod non defendi, & contra nihil tam sanum, quod non oppugnari possit, & ob eam causam, non quodlibet ideo probandum est, quòd hic vel ille pater ita scripsit, sed quia huius vel illius patris scriptum cum Dei verbo congruit, idèò probandum est. Sextus locus est Roman. 4, 2. *Si enim Abraham ex operibus legis iustificatus est.* Hunc locum reprehendit Chemnitius, nam rō legis hoc loco abusi sunt papistæ, vt probarent ceremonialia opera tantùm à iustificatione excludi. Hoc negat Bellarminus. Sed contrarium suo tempore probabimus. Deinde dicit *vulgatam versionem non agnoscere istam vocem.* Hoc de hoc tempore verum est. Quoniā igitur illi ipsi hanc vocem olim à Papistis vsurpatam nunc repudiant, nō est necesse vt de eo multa verba faciamus. Sextus locus est, Rō. 11, 6. *Si autē gratia, iā non ex operibus, alioqui gratia non esset gratia.* Hunc locum dixit Chemnitius mutilatum esse. Dceat enim, *sin ex operibus, iam non ex gratia, alioquin opus iam non est opus.* Bellarminus respondet hunc locum esse ad græcum appositum, quia nullus expositor præter Theophylactū eum habet. Sed hoc nihil cōcludit. Nō n. quia hic vel ille interpretes aliquē locū pterijt, idèò

• non

non pertinet ad textum. Deinde non est verū, quod Bellarminus dicit. Nam & Chrysostomus eum legit, & Oecumenius, & Syrus interpres, præterea ipsa res docet hanc antithesin requiri. Quod autem aliqui Latini patres eam particulam non habent, nō est nouum, vti enim sunt sæpè vulgata versione, & græcos libros rarissimè consuluerūt. Septimus locus Ephes. 5, 32. *Sacramentum hoc magnum est.* Hanc versionem reprehendit Chemnitius, & dicit papistas eo abuti, vt ostendant coniugium esse *Sacramentum*. At in græco est *μυστήριον*. Non omne aut *μυστήριον* est *Sacramentum*. Bellarminus respondet benè verum esse. *Sacramentum enim esse Latinis, quod græcis μυστήριον.* Quod miror homini docto excidisse. *μυστήριον* enim est genus, *Sacramentū* species. *Omne enim Sacramentum est visibile verbum,* vt inquit Augustinus. At non omne *μυστήριον* est visibile verbum, & ob eam causam non omne *μυστήριον* est *Sacramentum*. Si hoc Bellarmino satisfacit, benè est, sin minus, æquè benè est, modò sciat se principium petere, quoties ex hoc loco malè verso ostēdit matrimoniū esse *Sacramentum*. Octauus locus est Ephes. 6. 13. *vt possitis resistere in die malo, & in omnibus perfecti stare.* Hunc locū notat Chemnitius. In græco enim est, *ὑποταξάμενοι τοῦ κυρίου*, id est, *omnibus confectis*, vel, vt interpretatur Erasmus, *omnibus peractis*, hoc est, *cū omnia perfeceritis*, vt interpretatur Cyprianus lib. 4. epi. 6. Bellarminus dicit locum benè verum esse; quod miror eum in tanta doctrinæ & linguarum luce scripsisse. *κατεργάζεσθαι* enim significat conficere, effectū reddere, perficere.

perficere, peragere, *ἁπλῶς* igitur καὶ ἐργασθῆναι, quid aliud est ad verbum, quàm *omnia operati*, vt vertit Hieronymus (nota Hieronymi versionem cū vulgata non congruere) h. e. *omnibus confectis*, vt interpretatur interpres Chrysostomi, vel *omnibus perfectis*, vt vult Chēnitius. Nonus locus est Heb. 13. 16. *Talibus enim hostijs promeretur Deus.* Hunc locum notauit Chemnitius. In græco n. est *ἡ ἀρετὴ αὐτοῦ ὁ θεός*, id est, *delectatur Deus*. Bellarminus concedit illud propriè significare, *delectatur Deus*. & tamen cōtendit vulgatum interpretem rectè vertisse. *Ille enim* inquit, *Latina phrasi benè de aliquo meretur, qui facit ei rem gratam.* Sed hoc aliquando est verum, non semper. Mancipium enim facit domino rem gratam, & tamen non benè meretur de domino. Deinde Deus *ἡ ἀρετὴ αὐτοῦ* bonis operibus Adæ ante lapsum, & tamen non reconciliabatur cum Deo bonis operibus. Nam eum tum nondum offenderat. Deus item fidelium laudibus in altera vita *ἡ ἀρετὴ αὐτοῦ*, & tamen fideles tum non reconciliabuntur Deo per suas laudes. Nam tum hæreditatē æternæ vitæ consecuti, Deo perfectè reconciliati sunt. Ergo non quicunq; facit alteri rem gratam, ille benè meretur de altero, vel reconciliatur alteri. Præterea etiam si hoc ita se haberet, tamen non deberet ita vertere, nam, vt antè docui, non debet nisi necessitate coactus à verbis discedere. Denique ex Latina versione colligi potest nos nostris operib<sup>9</sup> aliquid promereri, ex græca verò editione illud colligi non potest. Principium igitur petitis, cū ex hac mala versione operum meritum colligere vultis. Reli-

qua

qua sciens prætereo, & hæc sufficienter ostendunt vulgatam versionem ab græca veritate longius deflectere, ac proinde non esse authenticam, aut principium Christianorum dogmatum. Quoties igitur papistæ in dogmate controuerso aliquod testimonium ex vulgata versione (vbi illa ab originali editione discrepat) contra nos adducunt, toties petunt principium, & probant illud, quod controuersum est, per illud, quod æquè controuersum est.

*Conclusio.*

Principia Christianorum dogmatum debent esse certa, extra controuersiam posita, vera, integra & diuina. At vulgata versio est incerta, in controuersia posita, falsa, mutilata, aucta, deprauata & humana. Ergo vulgata versio non potest esse principium Christianorum dogmatum.

F I N I S.

# SIBRANDI LVBBERTI

De

*Principiis Christianorum dogmatum*

Liber tertius.

CAPVT I.

*Status controuersie proponitur.*



VÆNAM sit authentica Canon-  
corum librorum editio, ostendi-  
mus libro superiore: sequitur vt  
disseramus, num Sacram scripturā  
in linguis vernaculis exstare, & legi  
liceat. Verum cum Bellarminushæc  
quæstionem confusè tractarit, explicabimus nos eā  
paulò plenius, & eam in certa quædam capita, vt re-  
ctius intelligatur, distribuemus. Diuiditur autem  
hæc quæstio in partes tres. Quærît n. an liceat om-  
nibus Christianis Sacram scripturam in linguis ver-  
naculis legere? Deinde an liceat Sacram scripturam  
in linguas vernaculas transferre? Postremò an lici-  
tum sit Sacra publica celebrare lingua vernacula &  
nota? De his tribus quæstionibus hoc libro disserere-  
mus. Sed quoniam Bellarminus hæc confusè tra-  
ctauit, ideò non possumus eius vestigia persequi,  
quemadmodum fecimus libris superioribus, eius ta-  
men argumenta recto loco afferemus, & ad singula  
sincerè respondebimus. Quod igitur ad primam  
quæstionem attinet, Controuersia est, an omnibus  
hominibus

hominibus liceat Sacram scripturam in lingua vernacula legere. Bellarminus negat, nos affirmamus. Papistæ hoc antè simpliciter negarunt, *censura Coloni. ad præfat. Manhemij.* Erasmus in Indice operum Hieronymi, quæ perierunt. *Hodie, inquit, piaculum existimant, Sacras literas vulgata legi lingua.* Sed cùm hoc nimis odiosum esse viderent, mutarunt Statum Controversiæ, & dixerunt, hoc non omnibus licere, *sed tantùm ijs, quibus hoc à Papa, vel à Confessario permissum est.* Nos contrà asserimus, omnibus absque discrimine licere Sacram scripturam in Dei timore legere.

## CAPVT II.

*Omnibus hominibus licere Sacram scripturam in Dei timore legere, probatur ex Scriptura.*

**S**Tatum controversiæ explicuimus capite superiore. Nunc immotis rationibus ostendemus, hoc non tantùm omnibus hominibus permissum, sed etiam necessarium esse. Deus enim hoc mandauit, Deut. cap. 6. vers. 6. *Eruntq; verba hæc, quæ ego præcipio tibi hodie, in corde tuo, & repetes ea filiis tuis, & loqueris de ijs, quando sedebis in domo tua, & quando ambulabis per viam, & quando iacebis in lecto, & quando surges. Ligabisq; ea in signum in manu tua, & erunt in frontalia, inter oculos tuos. Scribes quoque illa in postibus domus tue, & in portis tuis.* Idem infra, cap. 11. vers. 18. iteratur, Deut. cap. 17. vers. 19. *& leget in eo (libro legis) omnibus diebus vitæ suæ, ut discat timere Iehouam Deum suum, ut custodiat omnia verba Legis hæc, & statuta hæc, ut faciat illa, Iosue cap. 1. vers. 8.* Non recedas

*cedat liber legis iste ab ore tuo, sed mediteris in eo die ac nocte, ut custodias & facias secundum omne, quod scriptum est in eo. Psal. 1, 2. In lege eius meditabitur die ac nocte. Iohan. cap. 5, 39. Scrutamini Scripturas. Ad Collos. c. 3, 16. Sermo Christi inhabitet in vobis copiose. Ex quibus sic colligo.*

*Quod Deus indefinitè præcepit, hoc omnibus hominibus faciendum est. Sed Deus indefinitè iussit Sacram scripturâ scrutari, ergo omnibus hominibus licet verbum Dei legere.*

*Maiolem non negabit Bellarminus. Quod enim Deus in verbo suo præcepit, hoc illicitum esse non potest. Minorem probât supra allegata Testimonia. Deinde Apostoli laudant, eos, qui verbum Dei legunt. Actor. 17, 11. Fuerunt autem illi generosiores ijs Iudais, qui erant Thessalonica, ut qui receperint sermonem cum omni alacritate, quotidie scrutantes Scripturas, an hac ita se haberet. 2. Pet. 1, 19. & habemus firmissimum sermonem Propheticum, cui rectè facitis quod attendatis. Ex ijs sic colligo.*

*Quod ab Apostolis laudatur, hoc non est illicitum. Sed Laicos legere sacram Scripturam, & ex ijs iudicare de Ministrorum concionibus laudatur ab Apostolis. Ergo Laicos legere sacram Scripturam, & ex ijs iudicare de Ministrorum concionibus non est illicitum.*

*Maiolem non negabit Bellarminus. Quod enim ab Apostolis laudatur & commendatur, hoc vtrique illicitum esse non potest. Minorem astruunt allegata testimonia. Præterea verbum Dei est gladius, quo ignita Satanæ iacula profligare, & nos contra eius*

*Q ma-*



machinationes defendere debemus. Ephes 7, 17. *Galeam etiam salutarem accipite, & gladium spirituale, hoc est verbum Dei.* Vnde sic concludere possum.

Arma quibus nos contra Satanam tueri debemus, non sunt Christiano homini adimenda. Sed verbum Dei siue lectum, siue auditum, est gladius ille, quo Satanam profligare, & nos contra eum defendere debemus. Ergo à Dei verbi lectione & auscultatione neminem arce-re debemus.

Maiorem non negabit Bellarminus, nisi nos armis nudatos hosti prodere velit. Minor extructa est ex Dei verbo. Quod autem dico *lectum*, vel *auditum*, intelligo, quod per lectionem vel auscultationem ab animis nostris receptum constanter, & pie in ijs àseruatur. Hoc inquam verbum, per lectionem vel auditum perceptum & conseruatū, est gladius, quo hostem ferire possumus. Libenter hoc addidi, ut ostenderem me in Materialibus literis istam vim non ponere. Solent autem Papistæ aliquam partem Divini verbi à collo, vel pectore suspendere, atq; ita putarunt se tutos esse ab omnibus Satanæ insidijs. Sed nos abusus istos execramur, & asserimus verbū in fide & pietate custoditum, siue illud per lectionē, siue per auditum acceperimus, esse illum Spirituale gladiū. & cum nemini nisi cum exitio negari posse. Cū igitur Deus oīb. hominibus præcipiat, ut verbū suum scrutentur. & hoc ipsum Apostoli laudabile esse asserant, cū deniq; verbū Dei sit vnicus ille gladius, quo Satanam propellere possimus, manifestum est ab eius lectione neminem arceri debere.

## CAPVT III.

*Idem ex Praxi Primitiua Ecclesie ostenditur.*

**V**erbum dei ab omnibus hominibus legi debere, probauimus ex Scriptura. Atq; istæ rationes meritò sufficere debent. Vbi enim de Dei voluntate constat, nobis imminet certa obsequendi necessitas. eius enim voluntas est omnis rectitudinis & honestatis regula. Sed quoniam aduersarij magis mouentur hominum, quàm Dei autoritate, & ob eam causam semper *Papas & concilia* crepant: ideo non incommodum erit, eandem rem per se manifestam & claram ex Patrum scriptis probare. Ac primum licuisse Laicis Sacram Scripturam in Primitiua Ecclesia legere, ex 5. cap. Iohannis & 17. Actorù ita manifestum est, vt nemo illud, nisi qui frontem cum pudore perdidit, negare possit. Chrysostomus in Matthæum homilia 2. *Non sum* inquit, *Monachus, uxorem habeo, & filios, & curam domus, hoc illud est, quod omnia quasi una peste corrumpit, quod lectionē sacrarum Scripturarum ad solos Monachos putatis pertinere.* Idem ad Hebræos homilia 17. *dices non legi.* *Non est hac excusatio, sed crimen.* Idem Hom. nona in Epist. ad Collossenses. *Attendite quorquor estis seculares & vxoribus præstis ac liberis, quomodo vobis potissimum præcipiat Scripturas legere; idq; non simpliciter neq; obiter, sed cum magna diligentia.* Ibidem, *Audite obsecro seculares omnes, comparate vobis Biblia. anima Pharmaca, si nihil aliud vultis, vel nouum Testamentum acquirite, Apostolorum acta, Euangelia, &c.* Idem Homilia 3. de Lazaro. *Non potest fieri* inquit, *vt quis vitam æternam consequatur, nisi perpetuo in lectione Spirituali*

uali verſetur. Quod autē Bellarminus in hoc Chryſoſtomi loco hyperbolen eſſe exiſtimat, reſponſione indignum eſt. Optandum enim eſſet, vt omnes homines die ac nocte cum Dauide in lege Domini meditarentur. Dicere igitur in talibus Hyperbolen eſſe, eſt nimis dilutè de Dei verbo ſentire, & craſſam Papifticæ plebis ignorantiam nimis craſſè defendere. Idem Chryſoſtomus in eadem Homilia. Crebrò inquit, *Vobis predicimus, multis antè diebus argumentum de quo ſumus locuturi, vt his in medio diebus ſumpto libro, perpensaꝝ rei ſumma tota, poſtq̃ intellexeritis quid dictum ſit, quid dicendum reſtet, mentem veſtram inſtutiorẽ reddatis, ad audienda ea, quæ poſtea differentur. Idcoq̃ ſemper hortor & hortari non deſinam, vt non tantum hic attendatis ijs quæ dicuntur, verum etiam cum domi fueritis, aſſiduè diuinarum Scripturarum lectioni vacetis.* Origines Homilia 2. in Eſaiam. *Vtinam, inquit, omnes faceremus illud, quod ſcriptum eſt, ſcrutamini Scripturas.* Idem in Ioſuæ, homil. 20. *diſci poteſt Scripturæ difficiles ſunt. At nihilominus ſi eas legeris, profuerint tibi. Dominus enim Ieſus ſi nos in Scriptura occupatos inuenerit, & huiusmodi ſtudijs vacantes, non ſolùm ipſe refici & paſci dignatur in nobis: verum etiam ſi has epulas viderit apud nos apparatus, Patrem ſuum ad nos adducet.* Idem in Numeros, homil. 27. *Demonibus eſt ſuper omnia tormentorum genera, & ſuper omnes poenas, ſi quem videant verbo Dei operã dare ſcientiam Diuina legis, & myſteria Scripturarum intentis ſtudijs perquirentem.* Hieronymus in Nahum, cap. 3. *In aduentu Meſſie populus clemabitur & prophetabit, qui ſub magiſtris antè fuerat conſopitus & ibit ad montes Scripturarum,*

rarum, ibi inueniet montes *Mosen & Iosua*, montes *Prophetas*, montes *Novi Testamenti Evangelistas & Apostolos*, & cum ad tales montes confugerit, & in huiusmodi fuerit montium lectione versatus. si non inuenerit, qui eum doceat, tamen illius studium comprobabitur, quod confugerit ad montes. Idem ad Collossen. cap. 3. Hic ostenditur verbum Christi non sufficienter, sed etiam abundanter Laicos habere debere, & docere se inuicem vel monere. Idem ad Letã de institutione filia, Orationi lectio inquit, Lectio succedat oratio. Breue videbitur tempus: quod tantis operum varietatibus occupatur punctum. Idẽ ad Demetriadem de Virginitate seruanda. Vnum inquit, illud tibi nata Deo præq̃ omnibus unum prædicã, & repetens iterumque iterumque monebo, ut animum tuũ Sacra lectionis amore occupes. August. in Psalmum 85. Quando legis, Deus tibi loquitur, Quando oras, tu cum Deo loqueris, Idem in Psalmum 93. Modò ergo lectio necessaria est, quamdiu ex parte cognoscimus & ex parte prophetamus, cum autem venerit quod perfectum est, auferetur quod ex parte est. Non enim liber necessarius est, neque legemus in ciuitate Hierusalem, ubi Angeli viuũt, Idem in Scala Paradyfi. Lectio quasi solidum cibum ori apponit, meditatio masticat, & frangit. Oratio saporem acquirit, contemplatio est ipsa dulcedo, quae incundat & reficit, Lectio in Cortice, meditatio in adipe. Ibidem. Lectio inquirir, meditatio inuenit, oratio postulat, contemplatio degustat: unde ipse Dominus dicit, Querite & inuenietis, pulsate & aperietur vobis, Querite legendo, & inuenietis meditando. Idem Feria sexta post Dominicam passionem sermone primo. Adhuc ergo bonam habemus solatium Diuinarum scripturarum lectionem, quia

*Sacrarum scripturarum lectio est non parua cognitio diuina beatitudinis, in his enim tanquam in speculo, homo seipsum considerare potest, qualis sit, & quo tendat. Lectio assidua purificat omnia, timorem incutit Gehenna, ad gaudia superna cor instigat legentis. Qui vult semper cum Deo esse, ille debet frequenter orare & legere. Nam cum oramus, ipsi cum Deo loquimur, cum vero legimus, Deus nobiscum loquitur. Idem Dominica 3. sermone 2. Sit in manibus Diuina lectio, in sensibus Dominica cogitatio, Oratio iugis omnino non cesset, & salutaris operatio perseueret, ut quoties ad tentandum nos accesserit inimicus, nos bonis operibus inueniat occupatos. Ex his & similibus manifestum est, lectionem Sacrarum scripturarum tempore primitiue Ecclesie nemini fuisse illicitam. Deinde res ipsa docet, cui libet homini licere Sacram scripturam legere, vult enim Deus vt omnes homines in cognitione & intelligentia proficiant, at ex lectione scientia comparatur. Vult idem Deus vt in pietate proficiamus, at lectio sacrarum Scripturarum nos ad pietatem extimulat. Quis igitur vlli homini lectione Diuini verbi interdiceret. Ab humane sapientie lectione nemo repellitur: & a Dei verbi lectione maxima pars hominum arcebitur? Moses optat, vt omnes homines prophetent. Idem facit Paulus, & nos populum a celestis sapientie lectione arcebitur, vt in extrema ignorantia moriatur?*

## CAPVT IIII.

*Bellarmini sententia refutatur.*

**D**iuiinarum scripturarum lectionem omnibus licitam esse probatum est, sequitur vt Bellarmini argumenta

menta quibus contrarium probare conatur, diluamus. Ille primum producit auctoritatem Basilij, qui apud Theodoretum lib. 4. cap. 19. *Cum Praefectus inquit, culina Imperatoris nescio quid de scripturis protulisset, eum a magno Basilio reprehensum audivisse, iuum est de pulmentis cogitare, non dogmata divina decoquere.* Unde insert Bellarminus, omnibus hominibus non licere sacram Scripturam legere. Hic alius attentionem desideraret, ego fidem. Non enim dicit Theodoretus coquum Valentis aliquid de scripturis protulisse: sed dicit eum barbaricorum & sermone increpasse Basilium ὅς τῃ διδασκαλίᾳ τῆς οἰκουμένης ἐπιμεψάμενος ἐβαρβαρίσεν. & paulò post δυσχεράτας ἠπειλήσεν. Neutrum est aliquid ex Scriptura afferre. Credo hoc viro docto per incogitantiam excidisse. Quare enim tam manifesta errata non in bonam partem interpretarer? Ut ut sit, Cùm coquus iste ita barbarè se gereret, subridens Basilius ἱτασάμεθα inquit, καὶ Δημοσθένι ἀγράμματον, qua responsione cùm ille magis exacerbatus etiam minaretur; οὐδὲν ἐστὶν inquit Basilius τῆς τῶν ζῳμῶν καχυκίας φροσίζων. Deinde hic & alius Bellarmini error est. Non enim dicit Basilius, *tuum non est divina dogmata decoquere, sed tam obturatas aures habēs non potes divina dogmata audire* δογματῶν γὰρ θεῶν ἰσχύει δυνάσασθαι βιβουμένης ἰχθὺς τὰς ἀκοάς. Dicere autem

*Coquus nō debet Basilium barbaricorum increpare. Ergo*

*Laicis non licet scripturam legere. Vel,*

*Coquus non debet Basilio minari. Ergo*

*Laicis non licet scripturam legere. Vel,*

*Coquus debet Infculorum condimenta curare. Ergo*

*Laicis non licet scripturam legere. Vel,*

*Coquus obturatas aures habens non potest divina dogmata audire. Ergo*

*Laicis non licet scripturam legere*, nimis insipidum est. Si nos Bellarmine in hunc modum argumentemur, quas turbas concitaretis vos Iesuitæ? quos clamores de nostra inscitia tolleretis? Vobis tamen ita disputantibus ego nō succenseo; sed doleo quod vos in tanta Euangelij, Philosophiæ & Linguarum luce, talium argumentorum non pudeat; & opto ut Deus vobis oculos aperiat, ut veritatem, quam hactenus oppugnastis, videre possitis; vel saltē ut vos tantis errorum tenebris stipati modestiūs de vobis sentiat, & verecundiūs de alijs loquamini. Cæterum in aula Valentis erat quidam coquus nomine Demosthenes, Hic Basilium barbaricē exagitabat. Hanc præposteram garriendi audaciā reprehendit Basilius. Idem & nos facimus, non enim concedimus Laicis, ut doctos rideant, aut barbarico ritu increpent. Hinc autem inferre, *Basilius reprehendit coquum se barbaricē gerentem*, Ergo *Laici non debent scripturam legere*, insipidum esse diximus. Non enim ex eo sequitur Laicos non debere scripturam legere; sed indoctos debere sese inter suos terminos continere, & erga homines doctos, se non barbaricē gerere. Secundum argumentum adfert ex Hieronymo, qui in Epistola ad Paulinum, *Quod Medicorum est*, inquit, *promittunt medici, tractant fabrilia fabri, sola scripturarum ars est, quam sibi omnes vendicant*, *Scribimus indocti, doctique poemata passim*, *Hanc garrula Annus, hanc delirus Senex, hanc Sophista verbosus, hanc universi præsumunt, lacerant, docent, antequam discant* Ex hoc loco  
Bellarmine,

Bellarmino, nihil feliciùs contra nos disputabis, quàm ex illo; non enim hìc reprehendit Hieronymus scripturam à Laicis legi, sed *deliros senes & garrulas anus lacerare scripturam, & docere eam, priusquam discant.* Idem & nos facimus, non enim patimur ut quilibet scripturam laceret, neque toleramus, ut garrulæ anus doceant Scripturam, quam non didicerunt, & ut res magis intelligatur, formabimus argumentum syllogisticè.

Quicumque non debent scripturam lacerare, neque docere eam, priusquam ipsi didicerunt, Illi non debent Sacram scripturam legere, sed deliri senes & garrulæ anus non debent sacram scripturam lacerare, neque eam docere priusquam ipsi didicerunt. Ergo Laici non debent Scripturam legere.

Resp. aliud esse in conclusionem, quàm in præmissis, subiectum enim conclusionis non est in antecedente. Deinde & maiorem esse falsam. Non enim quicumque non debent docere, illi non debent legendo discere, neque hoc vult Hieronymus. Ante enim ex Hieronymo & alijs patribus docuimus, quibuslibet hominibus licere audiendo & legendo in Dei verbo proficere. Neque tamen diserteor esse quædam in Theologia subtiliora, quàm ut à plebe intelligi possint, sed istinc non sequitur, Laicos esse prorsus à Scripturarum lectione arcendos.

## CAPVT V.

*Status Controuersia de Scriptura in Vernaculas linguas vertenda.*

Q 5 Laicis



**L**Aicis licere Sacram scripturam legere probauimus. Iam disputandum est, an liceat Sacras scripturas in Vernaculam linguam vertere. Sed priusquã ad rei tractationem accedamus, explicandus est status controuersię. Quæritur autem, an liceat sacram Scripturam in Vernaculas linguas vertere? Nos respondemus licere. Papiſtæ verò ante aliquot annos hoc simpliciter negarunt. *Petrus Aſoro de horis Canoniciſ; cenſura Coloni. ad præſa. Manheimj. Harding. articul. 15. lect. 2. Aliqui, inquit, plane nefas eſſe iudicant Biblia in Vernaculam vllam & plebeiam linguam conuertere.* Et multi proſcripti ſunt à Papa & condẽnati, quod ſcripturam in Vernaculas linguas tranſtulerant. Biblia etiam in Vernaculas linguas verſa paſſim prohibita ſunt & exuſta; Cùm verò Papiſtæ hoc nimis odioſum eſſe viderent, mutarunt ſententiam, & dicunt, *illis tantùm licere Biblia in Vernaculas linguas vertere, quibus hoc à Papa permiſſum eſt.* Sed hoc etſi verbis aliud eſt, re tamen idem eſt. Papa enim hoc nemini concedet, niſi quem ſciat ita verſurum eſſe, vt errores, qui in vulgata verſione latent, ſimul in Vernaculas linguas tranſfundantur, & ad poſteros propagentur. Diuerſis igitur verbis Belarminus idem dicit. Sed ne habeat quod conquerratur, ſyncerè ipſius ſententiam proponemus, quæ eſt hæc, Nemini licere ſacram Scripturam vertere, niſi cui hoc à Papa permiſſum ſit, nos contrà negamus Papæ autoritatem hîc requiri, & aſſerimus cui libet pio, docto, linguarumq; perito, licere Sacram ſcripturam in linguas Vernaculas vertere, vel vt magis perſpicuè dicam, Quæritur an liceat Sacram ſcripturam

pturam absque Papæ permissione in linguas Vernaculas vertere. Illi negant, nos affirmamus.

## CAPVT VI.

*Sententia Orthodoxa confirmatur.*

**Q**Voniam superioribus capitibus euicimus *Lai-  
cis licere sacram Scripturam legere*, per se sequitur sacram Scripturam in linguas Vernaculas vertendam esse. Quomodo n. legent, nisi exstet eâ linguâ, quam Laici intelligunt. Deinde vt istic diximus principiû peti, dum volunt neminem debere Sacram scripturam legere, nisi cui hoc à Papa permissum est, Ita & hoc loco principium petût, volût n. propter Papæ auctoritatem scripturam vertendam esse. At Papa inter nos controuersus est. Vt autem appareat licere sacram Scripturam in Vernaculas linguas vertere, ostendam eam tempore primitiuæ Ecclesiæ in omnes ferè linguas transfusam esse, neque eo tempore Papæ Romani auctoritatem quicquam in ea re potuisse. Chrysostom. homilia 1. in Iohannem. Syri, inquit, *Aegypti, Indi, Persæ, Ethiopes, & innumera alie gentes in suam transferentes linguâ, homines Barbari philosophari didicerunt.* Theodoretus lib. 5. de corrigendis græcorum affectibus, *Hebraici*, inquit, *libri non modo in græcû sermonem conuersi sunt, sed in Romanam quoq. linguam, Aegyptiacâ, Persicam, Indicam. Armenicam, Scythicam, atque adeo Sauromaticam. semelq. ut dicam, in linguas omnes, quibus nationes ad hunc usque diem vtuntur.* Augustinus libro 2. de doctrina Christi. cap. 5. *Ex quo factum est*, inquit, *vt Diuina scriptura ab una lingua profecta, per varias Interpretum linguas longè latèque diffusa inno-*

*sa innotesceret gentibus ad salutem, quam legentes nihil aliud appetunt, quam cogitationes voluntatemque eorum, e quibus conscripta est, inuenire, & per illas voluntatem Dei, secundum quam tales homines locutos esse nonimus. Præterea Chaldaica, Syriaca, Arabica, Ægyptiaca, Æthiopica versiones adhuc exstant, illas autem tempore Apostolorum factas esse, omnes docti affirmant, neque quicquam potuisse in ijs Papæ auctoritatem, manifestum est. Tempore enim Apostolorum, Episcopus Romanus non habebat plus auctoritatis, quam singuli reliqui Episcopi. Tempore etiam subsequente, Arabes, Æthiopes, Syri, Ægyptiaci nunquam agnouerunt Papam Romanum pro summo pontifice. Hieronymus vertit Scripturam in linguam Dalmaticam, ut testatur Alphonsus de Castrolib. 1. cap. 13. Eccius, Hosius de sacro vernaculo & Erasmus in indice operum Hieronymi, quæ perierunt. Chrysostomus vertit Sacram scripturam in linguam Armenicam ut testatur Sixtus Senensis. Vulphilas vertit scripturam in linguam Gothicam, ut testatur Socrates tripart. histo. lib. 8, 13. vel in Eccles. hist. lib. 4. capite 33. Methodius vertit Scripturam in linguam Sclauonicam, ut testatur Auētinus Annal. lib. 4. Augustinus facit mentionem Syriacæ versionis Veteris Testamenti, de Civitate Dei, lib. 15. cap. 13. Musconos, Russos & alios legisse scripturam in lingua Vernacula, concedunt Eccius & Hardingus Aët. 3. sect. 38. contra Iuellum. Quin & Historiæ Anglicanæ indicant scripturam iam ante Bedam fuisse in Anglicam linguam conuersam, & ipse Beda testatur se aliquam partem Noui Testamenti in Anglicum sermonem transtulisse*

lisse. Ex his manifestum est Scripturam tempore primitiue Ecclesiæ in omnes linguas translatam, & eius lectionem omnibus hominibus absque discrimine concessam esse. Ex hoc primitiue Ecclesiæ exemplo sic argumentor.

Quod vniuersa primitiua Ecclesia Apostolorum tempore obseruauit, hoc nunc illicitum esse non potest. Sed vniuersa primitiua Ecclesia transtulit Sacram scripturam in linguas Vernaculas, idque absque Papæ autoritate. Ergo & nunc Sacram scripturam absque Papæ autoritate in linguas Vernaculas vertere licet.

Maiorem non negabit Bellarminus. Minor constat ex allegatis testimonijs. Concludimus igitur Sacram scripturam in linguas Vernaculas conuertere licere, & ad eam rem Papæ autoritatem non esse necessariam.

## CAPVT VII.

*Argumenta Bellarmini contra Vernaculas versiones refutantur.*

PRiუსquam horum argumentorum refutationem aggredior, moneo omnia hæc media esse communia, & posse æquè ad lectiones, & publica Sacra, quàm ad versiones Vernaculas accommodari. Quod propterea moneo, vt si hoc loco iustis rationibus à me refutantur, nemo eorum iterationem à me, cùm de Sacris Vernaculis ago, expectet. Quæ enim refutationes hoc loco ponuntur, etiam ad lectionem Vernaculam, & Sacra Vernacula referri debent. Primum argumentum. *Quia debemus contenti esse ijs Lin-*  
guis

gnis, quas Dominus crucis suæ titulo honoravit, Iohânis  
19. Argumentum tale est.

Sacra Scriptura in publico tantum debet exstare  
& legi in ijs linguis, quas Dominus crucis suæ  
titulo honoravit. Sed Hebræa, Græca & La-  
tinalingue sunt illæ, quas Dominus crucis  
suæ titulo honoravit. Ergo sacra Scriptura  
in publico non debet in alia Lingua exsta-  
re, quàm in Hebræa, Græca & Latinalin-  
gua.

Nos negamus maiorem. Inter medium enim &  
maius extremum non est maior cohærentia, quàm  
inter tenebras & lucem. Nam perinde est ac si dicas,  
*Deus voluit causam mortis Christi varijs linguis scribi, ut  
ab omnibus intelligeretur.* Ita enim Albertus & Lyra  
hoc explicant. Hieronymus in 15. cap. Marci, *dicit  
has tres linguas in crucis titulo coniunctas esse, ut omnis  
lingua commemoraret Iudeorum perfidiam.* Ergo scri-  
ptura debet ignota lingua exstare, ut à nemine in-  
telligatur. Imò contrarium potius sequitur Bel-  
larmino. *DEVS* voluit causam mortis Christi va-  
rijs Linguis scribi, ut ab omnibus intelligeretur.  
Ergo Verbum *DEI* debet in varias Linguas ver-  
ti, ut ab omnibus intelligatur. Hoc cum San-  
ctissimus Iuellus Hardingo respondisset, non de-  
buit à Bellarmino iterari. Deinde ipse Bellarmi-  
nus Maiorem concedere non potest. Si enim Ma-  
ior simpliciter vera est, tum sequitur omnes Ver-  
naculas versiones esse simpliciter illicitas. Nam si  
*titulus crucis tribus linguis descriptus* necessaria causa  
est, ob quam sacra Scriptura in tribus illis linguis  
tantum

tantum exstare debet, tum utique manifestum est, eam in nullam aliam linguam verti debere, erravit igitur vniuersa primitiua Ecclesia, quæ scripturam in Syram, Arabicam, Chaldaicam, Ægyptiacam, Ethiopicam, Armenicam, Dalmaticam, Russicam, Musconiticam, Sauromaticam, Gothicam, Slauonicam, Anglicam, Frisicam, & in alias innumerabiles linguas conuertit. Huc accedit neque Papam habere potestatem contrarium dispensandi, Papam enim non posse contra illud, quod ex Dei verbo colligitur, dispensare, extra controuersiam ponimus. Aut igitur Papa errat cum tota sua cohorte, dum permittit scripturam in Vernaculam linguam verti, aut Bellarminus hoc argumentum contra nos in cassum allegat. Nam vel illud hoc loco non sequitur, vel omnes versiones sunt simpliciter illicitæ. Ad Minorem dicimus omnes Linguas esse in tribus illis consecratas, & omnes ferè homines qui Hierosolymæ erant, ad minimum intellexisse vnam ex illis tribus. Ac proinde scriptum esse Latinè & Græcè & Hebraicè *in testimonium omnium Gentium* ut inquit Hieronymus in Esaiam, libro 7. capite 19. id est, ut manifestum esset, istum redemptorem ad omnes Gentes pertinere. Deinde scriptum est Græcè, Latinè, & Hebraicè, *ut ab omnibus intelligeretur*, quemadmodum rectè annotant in hunc locum Lyra & Albertus. Quoniam igitur omnes linguæ sunt in cruce sanctificatæ, & omnes homines titulum crucis agnoscere debent, probabilius colligitur verbum Dei debere in omnes linguas verti, ut ab omnibus intelligatur. Secundum argumentum. *Quia hæ tres lingue antiquitate,*

*antiquitate, amplitudine, & gravitate reliquis omnibus præstant. Argumentum tale.*

Quæ linguæ antiquitate, grâuitate, & amplitudine reliquis præstant, in ijs tantùm scriptura exstare debet. Sed Hebræa, Græca & Latina lingua sunt reliquis omnibus antiquiores, ampliores & grauiiores. Ergo scriptura in Hebræa, Græca & Latina lingua tantùm exstare debet.

Nos negamus maiorem. Apostoli enim, & illi qui Apostolorum ætatem proximè secuti sunt, verterunt Sacram scripturam in omnes linguas, vt antè probatum est, quod sanè non fecissent, si scriptura tantùm in his tribus linguis exstare deberet. Deinde si Maior simpliciter vera est, tum Papa errat, quod versiones vernaculas concedit. Nam si scriptura illis tribus linguis tantùm exstare debet, tum omnes versiones sunt simpliciter illicitæ. Dicere autem Papâ posse illud, quod illicitum est, concedere, ineptire est. Imò Papæ auctoritatem hic contra nos allegare ridiculum est. Petit enim illud quod est in principio, & nos Papæ auctoritate tantùm mouemur, quantum *imperio filij perditionis*, de quo est apud Apostolum. Prætereà hic non agitur de *amplitudine, gravitate, & antiquitate lingue*, sed de *intelligentia*; Hieronymus n. cum vellet *Dalmatas* instituere, non proposuit illis verbum Dei lingua antiquissima, vel amplissima, sed nota, id est, *Dalmatica*. Chrysostomus cum vellet *Armenios* docere verbum Dei, non laborauit de antiquitate, siue de amplitudine linguæ, sed vertit illis verbum Dei in notam linguam, id est, in *Armenicam*. Methodius item & Vulphilas nō proposuerunt suis  
verbum

verbum Dei lingua antiqua & ampla, sed nota, ille *Slauonica*, hic *Gotica*. De similibus est idem iudiciũ. Videris igitur ineptire, dum de antiquitate & amplitudine contra nos disputas. Non enim quia antiquissima & amplissima lingua est, ideo Dei verbum in ea exstare debet, sed quia *nota* lingua est, ideo Dei verbum in eam verti debet. Si verò putas Deum adeò morosum esse, vt non velit verbum suum legi, nisi in communissima, grauissima & antiquissima lingua, valdè erras. Omnes n. linguas esse in Christo sanctificatas, docet *donum linguarum* in primitiua ecclesia. Mar. 16, 17. *Loquentur nonis linguis*. Act. 2, 4. *Ceperunt loqui alijs linguis*. Præterea ex 2. capite Actorum constat eos alijs linguis, quàm *Græca*, *Hebraica* & *Latina* locutos esse. Versu enim 9. dicit Lucas, *Parthi & Medi, & Elameta, & qui incolimus Mesopotamiam, Iudeamq̃, & Cappadociam, Pontum, & Asiam, Phrygiam, & Pamphiliam, Egyptum, & partes Libya, quæ est secundum Cyrenen, & aduenæ Romani, tum Iudæi, tum Præselyti, Cretes & Arabes audimus eos loquētes nostris linguis magnifica Dei facta*. Deinde licet Deus tantum vnica lingua Canaan in Veteri Testamento cultus sit, tamen prædixerunt Prophetæ, omnes linguas Deum adoraturas esse, hoc est, quemlibet populum Deum in lingua sua culturum esse, Esa. 66, 18. *Tempus veniet, vt congregem omnes gentes, & linguas, venientq̃, & videbunt gloriam meam*. Dan. 7, 14. *Omnesq̃ populi loquuntur de regno Christi, tribus & lingua ei seruiunt*. Zach. 8. 23. *In diebus illis erit, quũ apprehendent decem viri, ex omnibus linguis earum gentium, apprehendent, inquam, oram viri Iudæi, dicendo, ibi-*



*mus vobiscum.* Hoc autem in Nouo Testamento impletum esse docent sacræ literæ, & adhuc impleri testatur experientia. Huc accedit manifestum siue mandatum, siue vaticinium Veteris Testamenti esse, vt quælibet lingua Deum adoret, Roman. 14, 11. *Omnis lingua confitebitur Deo.* Phil. 2, 11. *Omnisq; lingua confiteatur Dominum esse Iesum Christum.* Postremò ne vè quidem in Sacris literis est, quod debeamus Deum *grauissima & antiquissima* siue *amplissima* lingua adorare. Sed scriptura dicit *veros adoratores adorare Patrem in Spiritu & veritate*, Iohan. 4, 23. Ex his, vt existimo, satis constat, Maiorem esse falsam. Nunc respondeo ad minorem, & dico eam esse simpliciter falsam, si de tribus linguis communiter intelligitur. Hebræa enim non est communissima, neque Latina antiquissima. Deinde minor est trimēbris. 1. *antiquissima.* 2. *grauissima.* 3. *amplissima.* Antiquitatem, vt existimo, tribuunt Hebrææ, grauitatem Latinæ, amplitudinem Græcæ. Sed hæc non sunt simpliciter vera. Hebræam linguam concedimus quidem esse antiquissimam. Sed quid hoc ad rem. Si propterea Sacra publica hebræa lingua fieri debet, errant Veteres, q̃ in ijs *Egyptiaca, Armenica, Dalmatica, Syrica, Persica, Ethiopica, & alysinnumera-* *rabilibus linguis* vsi sunt. Græca lingua tempore Apostolorum in multis locis fuit quidem amplissima, sed nunc non est. Ergo si Sacra publica olim propter amplitudinem græcæ linguæ græcè fiebant, nūc tamen id fieri non debet, nam nunc non est tā ampla. Imò nunc nullus populus est, qui græca lingua loquitur, quod & de latina rectè dici potest. Vnde proba-

probabiliter sic concludo. Si olim in multis locis Sacra fiebant *græca lingua*, quæ erat communissima, idque tantum propter amplitudinem linguæ. Sequitur sane Sacra publica non debere fieri ijs linguis, quæ apud nullum populum vsitatæ sunt. Sed primi. Ergo secundum. Inde rursus infero. Sacra publica non debent ijs linguis fieri, quæ apud nullum populum in vsu sunt. Sed *Hebræa, Græca & Latina* nunc apud nullum populum in vsu sunt, Ergo sacra publica non debent latina & græca lingua fieri. Hoc argumentum Bellarmine multò est probabilius. Docet enim experientia Apostolos & Patres in primitiua ecclesia nunquam administrasse sacra publica ea lingua, quæ prorsus in desuetudinem venerat, & nusquam in vsu erat. Ergo illud & hoc tempore fieri non debet. Deinde si sacra publica debent communissima lingua fieri, sequitur ea *Sclauonica* fieri debere, hodie enim omnes peregrinatores, testantur nullam linguam esse *Sclauonica* ampliore. Quod si non concedis Bellarmine, manifestum est *amplitudinem* non esse idoneum medium, propter quod Sacra in hac vel illa lingua fieri debent. Quod autem ad *grauitatem* attinet, ridiculum est. Vna enim lingua per se grauior non est quàm altera. Omnis n. grauitas in qualibet Lingua, siue in quolibet sermone, vel ex persona loquentis, vel à subiecta materia, vel denique ex elocutione proficiscitur. Quin hæ tres linguæ nunc sunt *barbaræ*, Barbarum enim, quod nemo intelligit. Ouidius de ponto, *Barbarus hic ego sum, & non intelligor vlli*. Et tamen Ouidius optimè locutus est latine. Anacharsis dicebat *Athenienses*

in Scythia barbaros esse. Et tamen Athenienses nō tantum græcè, sed etiam Atticè loquebantur. Paulus. 1. Cor. 14, 11. *Nisi sciuerō vim vocis, ero ei, qui loquitur, barbarus; & ille apud me barbarus erit.* Hieronym. in 14. c. 1. ad Cor. *Omnis sermo qui non intelligitur, barbarus.* At has tres linguas nemo intelligit, nisi qui eas in scholis didicit. Tres igitur hæ linguæ sunt omnibus hominibus, paucis exceptis, qui eas in scholis didicerunt, barbaræ, tantum abest, ut sint grauissimæ & amplissimæ. Quòd igitur Papistæ ignota lingua sacra faciunt, simile habet cum *Heracleone*, ipse enim *inuisitata & ignota vocabula usurpabat, ut auditores percelleret*, Aug. de hæresibus cap. 16. & Epiphani. hæ. 36. Nullum autem mandatum est de ea re in sacris literis. Deinde Liturgia latina sæpè *Barbara est, & inepta.* In laudem Sanct. Virginis, *Cuius dominus humilitatem respiciens Angelo annuntiante concepit Redemptorem Mundi.* Atque hæc est illa grauitas latini sermonis in sacris papisticis. Præterea sacrificuli sæpè sunt istius Linguae imperitissimi, neque hoc tantum nostro sæculo, sed apud Veteres etiam. Zachariæ n. tempore Sacrificulus baptizauerat puerum his verbis: *Baptizo te in nomine Patria, & Filia, & Sp. Sancta.* de consecratio. dist. 4. C. Retulerunt. Ex quo colligere potest quilibet, quàm sint auditores huius linguæ periti, & quem fructum ex Latina lingua percipiant, præsertim cum tales habeant doctores. Imperator Caligula in quodam conuiuio apponebat aureos panes, quo spectaculo oculos conuiuarum perstringebat, famem non sedabat. Eodem modo Papistæ in sacris publicis, proijciunt *ignota & incognita verba*: atque  
ita

ita auditores pcellūt (æpè, & quasi obstupefaciūt, sed eos æquè indoctos atq; imperitos à se dimittunt, atq; accesserant. Atque hæc delecundo argumēto.

Tertium argumentum. *Quia Iudæi à tempore Esaiæ legerunt Scripturam lingua ignota, & sacra publica administrarunt ignota lingua.*

Quemadmodum factum est in Ecclesia Iudaica, à tempore Esaiæ vsque ad Christum, ita in Ecclesia Christiana fieri debet. Sed in Ecclesia Iudæa à tempore Esaiæ ad Christum Scriptura lecta fuit ignota lingua, & sacra publica administrata sunt lingua ignota. Ergo & hoc tempore ita fieri debet.

Nos primùm negamus maiorem. Nam non quicquid factum est in Ecclesia Iudaica, obseruari debet in Ecclesia Christiana, alioquin & externa sacrificia Deo offerre deberemus, idque Hierosolymæ, & verbum Dei hebraica lingua in Ecclesia legi, sacra item publica hebraica Lingua in Ecclesia fieri deberent, & multa alia. Deinde & minor fallā est. Tempore enim Esdræ verbum Dei non in lingua ignota, sed in lingua cognita prælectum fuit. Neh. 8.2. *Attulit ergo Esdras sacerdos legem coram multitudine virorum & mulierum, cunctisque qui poterāt intelligere. & Neh. 8.3. Et legit in ea ante plateam, quæ erat ante portam aquarum, à luce ipsa vsque ad meridiem, coram viris & mulieribus & intelligentibus, & aures totius populi erant ad librum Legis. Dicit populum intellexisse, & aures populi ad legem intentas esse, vnde apparet verbum illis non ignota, sed cognita lingua prælectum esse. Neh. 8.8. Et legerunt in libro Legis Dei distinctè, & apertè ad in-*

*telligendum, & intellexerunt cùm legeretur.* Si Iudæi intellexerunt legem Dei, cùm legeretur, nihil fuit illis ignota & peregrina lingua prælectum. Sed primum, ergo secundum. Itaque sic colligere liceret, *Quemadmodum factum est in Iudaica Ecclesia*, ita & in Christiana fieri debet.

Sed in Iudaica Ecclesia prælegit Esdras populo verbum Dei lingua omnibus nota, Sacra item publica lingua omnibus nota administrata sūt. Ergo & in Christiana ecclesia verbū Dei nota lingua & sacra publica eadem lingua celebrari debent.

Maiorem posuit Bellarminus. Minor ex allegatis testimonijs est manifesta. Atque hæc sufficerent, ad hoc tertium Argumentum. Sed quoniam Bellarmino libuit minorem aliquot paralogismis probare, nos eos examinabimus. Prima probatio eius est: *Quia Esdras & Leuitæ explicuerunt populo legem, Neh. 8. v. 7. & 9.* Respondeo duplicē esse interpretationem, vnam verborum, alteram rerum siue sensus. Esdras autem interpretatus est eis Legem, nō quoad verba, sed quoad sensum. Simile fecit Christus, Lucæ 24, 27. *Et incipiens à Mose & à Prophetis, interpretabatur illis in omnibus scripturis, quæ de se scriptæ erant.* Eodem modo interpretatus est Philippus Scripturā Eunuchō, Act. 8, 35. Manifestum enim est Eunuchū verba intellexisse, quærebat enim ex Philippo, *an Propheta de se, an verò de alio loqueretur.* Eodem modo Iudæi intelligebant verba Legis, sed sensum non assequiebantur, hunc aperuit illis Esdras. Secunda probatio minoris est. *Quia scriptura eo tempore legebatur hebraicè,*

hebraicè, & sacra publica fiebant hebraicè. Populus autem non intelligebat hebraicè, hoc probat quia tempore Christi multa peregrina verba, vt *Abba*, *Thalita*, *Kumi*, *Hakeldama*, *Golgotha*, & similia in Linguam hebraicam irrepserunt. Argumentum tale est.

In quorum linguam aliquot peregrinæ voces irrepserunt, illi suam linguam prorsus ignorant. Sed in Iudaicam Linguam aliquot peregrinæ voces irrepserunt, Ergo Iudæi suam linguam prorsus ignorabant.

Non argumentum hoc est Bellarmine, sed puerilis coniectura. In *Frisicam* enim linguam irrepserunt multa *Flandrica* verba, & tamen Frisij intelligunt maternam linguam. In *Flandricam* Linguam irrepserunt multa *Gallica* verba, & tamen Flandri intelligunt maternam Linguam. In *Saxonicam* Linguam irrepserunt multa *Misnica* verba, & tamen Saxones intelligunt maternam linguam. Eodem modo & Hebræa Lingua propter quasdam peregrinas voces Iudæis prorsus cognita esse non desijt, Nehe. 13, 24. *Et filij eorum partim loquebātur Asdodicè, & nesciebant loqui Iudaicè*. Vnde necessariò colligi potest, eos qui non habebant matres Asdodicas, non locutos esse Asdodicè, sed Iudaicè. Deinde Aggæus, Zacharias & Malachias post captiuitatem non scripsissent Iudaicè, si ea lingua prorsus ignota fuisset. Sed neque tempore Christi Iudaica Lingua erat Iudæis incognita, Lucæ 4, 17. *Christus accepit Prophetam Esaïam*, & explicuit in Synagoga. Hanc lectionem & explicationem intellectam esse à populo constat ex versu 22. eiusdem capitis, & omnes

testimonium ei dabant, & admirabantur super sermonibus  
 plenis gratia, qui procedebant ex ore ipsius. hoc enim fa-  
 cere non potuerunt nisi & lectionem & explicatio-  
 nem intellexissent. Siue igitur Christus Iudæi è sue-  
 rit locutus, siue non; sanè peregrina & ignota lingua  
 locutus non est, Ioh. 5, 39. *Vos scrutamini Scripturas,*  
*quia videmini vobis in ipsis vitam eternam habere.* Num-  
 ne Scripturam lingua ignota scrutari potuerunt? &  
 ne Bellarminus regerat, hîc tantùm doctores nota-  
 ri, constat ex vers. 10. 16. & 18, eiusdem capituli Chri-  
 stum *Iudeos*, hoc est, *ipsum populum alloqui.* Act. 17, 11.  
*Fuerunt hi generosiores ys, qui erant Thessalonica, ut qui re-*  
*ceperint sermonem cum omni alacritate, quotidie scrutan-*  
*tes scripturas, an hac ita se haberent.* Sed Beroenses scri-  
 pturam lingua incognita scrutari, & conciones Pau-  
 li ad eam examinare non potuerunt. Siue igitur Pau-  
 lus hebraica, siue alia lingua concionatus sit, Siue i-  
 tem Beroenses hebraica, siue alia lingua Scripturam  
 scrutati sint, manifestum est illud ignota Lingua fa-  
 ctum non esse. Quod autem Bellarminus dicit scri-  
 pturam eo tempore, tantùm hebraicè in Synagogis  
 lectam esse, hoc neque nego, neque affirmo, verifi-  
 mile tamen esse videtur. Verùm quod addit Iudæos  
 à tempore Esdræ usque ad ætatem Christi, & deinde  
 prorsus ignorasse linguam hebræam, illud falsum ef-  
 se partim ex illis quæ dixi, partim ex jis quæ adhuc  
 dicam, manifestum erit. Paulus Act. 2 1, 40. ad popu-  
 lum verba fecit lingua hebraica. Hoc à populo in-  
 tellectum esse cōstat ex sequentibus. Cap. 22, 2, *Quñ*  
*audissent autem eum hebræa lingua ipsos alloqui, magis pra-*  
*buerunt silentium.* Numne ignota lingua eos ita at-  
 tentos

tentos reddere potuit? & vt omnis tergiverfandi materia tollatur. Paulus cùm diceret fe ad Gentes mitti, verfu 21. eiusdem capitis, *tum fufulerunt vocem, & clamauerunt, tollatur de terra homo talis, &c.* Quis igitur negabit eos Pauli sermonem intellexiffe? Chriftus item allocutus eft Paulū *lingua hebraica.* Acto. 26, 14. Et hoc Paulus intellexit. Ergo quod Bellarminus dicit Linguam hebræam Iudæis eo tempore prorfus incognitam fuiſſe, verum non eft. Interea non negamus linguam hebræam eo tempore nonnihil corruptam fuiſſe. Sed licet Iudæi tum non purè loquebantur, tamen lingua hebræa eo tempore prorfus abolita non erat, neque adeò corrupta, quin Iudæi verbum Dei purè hebraicè ſcriptum intelligerent, Tertia probatio Minoris eft, Quia Pharifæi dicunt *turbam non nouiſſe legem.* Ioh. 7, 48. Hic meritò quis in Bellarmino iudicium defideraret. Quæſtio enim eft, an ſcriptura in ſacris publicis Vernacula, id eft, cognita lingua legi debeat? Nos aimus. Papiſtæ negant, & probant ſuam ſententiam, quia *Iudæi prælegerunt ſcripturam lingua ignota in publicis ſacris.* hoc rurfus probant, quia *turba ignorat legem.* At hæc turba dicebat *hic eſt Propheta,* Iohan. 7, 40. &, *hic eſt Chriſtus,* Iohan. 7, 41. Num verò ille legem ignoret, qui Chriſtum agnoſcit & recipit, iudicet Bellarminus. Deinde Pharifæi ex æmulatione calumniabantur, & probris afficiebant Chriſtum, altoque ſuperſilio contemnebant, imò condemnabāt eos omnes, qui Chriſtum recipiebant. Iohan. 7. 49. *turba hæc eſt execrabilis.* Non igitur hinc ritè collegeris, Iudæos eo tempore legiſſe ſcripturā in publicis ſacris lingua



ignota: sed recti' collegeris doctores Phariseos fuisse supbos, & præsupbia turbâ immeritò contempsisse. Prætereà vide Bellarmine, an vos Iesuitæ non eodẽ modo faciatis. Ipsi equidem ex æmulatione calumniamini, & probris afficitis puram doctrinam, & cõtemnitis eos vt *indoctos, imperitos, bardos, stupidos*, hoc est, vt *legem ignorantes*, imò condemnatis eos vt *Hæreticos*, hoc est, vt *exécrabiles*, qui eam recipiunt, atque ita reliquis omnibus contemptis, vobis solis scientiæ clauem arrogatis. Sed terreat vos illud Augustini, *Idiotæ & simplices cælum rapiunt, nos autem docti cõscientijs nostris ad inferna demergimur*. Atque hæc de tertio argumento.

Quartum argumentum. *Quia Iudæi etiam hoc tempore legunt Scripturam ignota lingua in Synagogis suis.*

Quod faciunt Iudæi in suis synagogis, hoc etiam Christiani in suis Ecclesijs facere debent. Sed Iudæi in synagogis suis legunt scripturam, & faciunt sacra lingua ignota. Ergo & Christiani scripturam ignota lingua legere, & sacra publica ignota lingua administrare debent.

Nos negamus Maiorem. Non enim quicquid faciunt Iudæi in sua synagoga, illud Christiani facere debent in Ecclesia. Iudæi n. *negant Christum* in suis Synagogis, & multa alia faciunt, à quibus Christiani debent abstinere. Ergo maior vera non est, & ob eā causam conclusio vera esse non potest. Deinde quia Iudæi legunt scripturam in suis synagogis lingua ignota; idèd tam pauci ad Christum conuertuntur. Equidem si scripturam legerèt lingua cognita, plures ad Christum conuerterentur. Dum igitur & vos  
sacra

facra publica ignota lingua administratis, & Scripturam ignota Lingua in publicis sacris legis, possetne inde quis meritò inferre, vos nolle, vt populus erudiat, sed velle, vt in crassa ignorantia detineatur. Cæterùm hoc argumentum ostendit Papisticæ Theologiæ paupertatem, non enim à Iudæorum Christum negantium exemplo, contra nos disputarent, si alia argumenta essent in promptu. Atque hæc de 4. argumento.

Quintum argumentum. Quia *Scriptura debet tantum ijs Linguis legi, quibus scripta est, & Sacra publica ijsdem Linguis tantum administrari debent.*

In quibus Linguis scriptura originaliter scripta est, in ijs tantum legi, & Sacra publica tantum in ijsdem administrari debent. Sed Scriptura originaliter scripta est lingua Hebræa, Græca & Latina. Ergo scriptura tantum in his tribus Linguis legi, & sacra publica in ijsdem administrari debent.

Respondemus neque maiorem neque minorem veram esse. Ac primùm maior vera non est. Scriptura enim lingua *Syríaca, Ægyptiaca, Æthiopica, Arabica, Armenica, Slaconica, Anglica, & alijs* Linguis originaliter scripta non fuit, & tamen in eas Linguas, imò in omnes, tempore primitiue Ecclesiæ, quemadmodum antè docui, versa fuit. idque nullam aliam ob causam, quàm vt ab omnib<sup>9</sup> intelligeret, & ab omnibus legi posset. Quod sanè neq; antiq; Apostoli, neq; Episcopi tollerassent, si iudicassent impiu esse, vt sacra scriptura Lingua cognita legeretur. Sequeret n. totam

tam primitivam Ecclesiam errasse. Deinde si scriptura tantū his tribus linguis legi & exstare debet, tum Papa Romanus non habet potestatem concedendi, ut in alias linguas vertatur, & in iisdē legatur. Quod enim simpliciter impiū est, hoc Papa Romanus concedere neque potest, neque debet, & contra, si Papa concedere potest, ut aliqui Scripturam in alias Linguas vertant, & in ijs legant, tum hoc argumentum non est idoneū, ad ostendendum scripturam in notis Linguis neq; exstare, neque legi debere. Atq; hæc de Maiore. Nunc ad minorem, quam etiam falsam esse affirmamus. Nihil enim in Veteri vel in Novo Testamento originaliter scriptum est *latinè*. De Veteri Testamento certum est, omnes enim libri Veteris Testamēti originaliter scripti sunt *hebraicè*. Quod ad Novum Testamentum attinet, eius omnes libros vel *hebraicè* vel *græcè* scriptos esse, præter *Euangelium Marci*, concedit Bellarminus. Contendit autē solum Marcum originaliter scripsisse *Latinè*. Hoc probat tribus testibus. Primus testis est Damasus *in vita Petri*. Sed Damasus tantū dicit *Petrum scripsisse duas Epistolas, quæ catholica ac canonice appellantur, & Euangelium Marci, quia Marcus auditor eius fuit, & filius à Baptismo*. Post omnem quatuor Evangeliorum fontem, quæ ad interrogationem, & testimonio eius (hoc est *Petri*) firmata sunt, dum alius *græcè*, alius *hebraicè*, alius *latinè* consonent, tamen eius testimonio sunt firmata. Quod autem Marcus *latinè* scripserit, ne quē quidem apud Damasum. Deinde Damasus iste, & reliquæ omnes decretales Epistolæ, quæ in Tomis conciliorum exstant, sunt ridiculæ, ineptæ & falsæ, de reliquis dicemus

mus suo tempore, nunc de Damaso. Dicit *Petrum esse ingressum in urbem Romam Nerone Casare*. Nero cœpit regnare anno Christi (sequor Functum) *quingagesimo septimo*, hoc est, *vicefimo tertio* anno post passionem Domini. Deinde Petrus secundum eundem Damasum *sedit Roma annis 25*. hoc est, usque ad annū *quadragesimum nonum*, post passionem Domini. At idem Damasus dicit *eum trucidatum esse Romæ, anno tricesimo octavo* post passionem Domini. Quod si verum est, tū Petrus sedit Romæ decē integros annos, postq̃ mortuus erat. Deinde Damasus dicit *Petrum venisse in urbem Romā Nerone Casare*, intelligatur hoc de primo anno Neronis, & paulò post dicit *eum Romæ fuisse temporibus Tiberij, Gaij, Claudij & Neronis*. Si hoc intelligis vel de ultimo anno imperij Tiberij, sequitur eum octodecim annis fuisse Romæ (tot enim interfunt inter exitum Tiberij & principium Neronis) priusquam Romam venit. Præterea Damasus dicit *Petrum septem annis sedisse Antiochiæ*. Quos annos si inchoabis à passione Domini, sequitur eum duob⁹ annis post mortem Tiberij sedisse Antiochiæ. Dominus enim quinto anno ante mortem Tiberij passus est. Idem Damasus dicit *eum temporibus Tiberij sedisse Romæ*. Quæ si vera sunt, sequitur Petrum bicorporeum fuisse, & Romæ, atque Antiochiæ simul & eodem tempore sedisse. Denique Damasus dicit *Petrum firmasse quatuor Evangelia suo testimonio*. Quod si verum est, sequitur eum vixisse post Evangelium à Iohanne æditum. Sed Iohannes scripsit Evangelium post exortam Cerinthi & Hebionitarū hæresin. Irenæus lib. 3. capite 11. *Hieronymus in præfat. ad Matth.*

& in catalog. viror. illust. C. Iohannes. Hieronym. Tom. 3. fol. 16, 6. Cerinthi verò & Hebionis hærelis exortæ sunt anno Dom. (sequor Funciū) *nonagesimo quinto*, hoc est, anno *sexagesimo primo* post resurrectionem Domini. Idem Damasus dicit, *Petrum tricesimo octavo anno post passionem Domini trucidatum esse*. Quæ omnia si vera sunt, sequitur, Petrum tricesimo primo anno postquam mortuus erat, aliorum Evangelia approbasse. Deinde Damasus dicit, *Petrum sedisse primò in Cathedra Episcopatus Antiochie*. Sed Hieronymus testatur, *Marcum esse primum Episcopum Antiochie*, in præfat. Comment. ad Matth. & in Catalogo virorum illustrium. C. Marcus, & in præfat. in Marcum. Conciliet qui potest. Postremò Damasus docet, *Petrum venisse Romam Nerone Cæsare, & ibi sedisse annis 25*. Reliqui autem Scriptores testantur, Petrum trucidatum esse anno ultimo Neronis. At Nero tantum regnavit annis 13. Quæ si vera sunt, tum Nero 12. annis post mortem suam trucidavit Petrum. Denique Damasus dicit, *eum Nerone Cæsare venisse Romam*, sed Eusebius affirmat, *eum secundo anno Claudij illuc venisse*. Ex his apparet quantum sit tribuendum huic personato Damaso. De reliquis idem iudico. Nisi igitur Bellarminus meliores auctores producere potest, incerta relinquitur eius assertio, qua asseuerat *Marci Evangelium Latine scriptum esse*. Sed nunc indubitatis testibus ostendam nullum librum Novi Testamenti scriptum esse originaliter latinè. Patres enim vnanimiter affirmant omnes libros Novi Testamenti, præter Evangelium Matthæi & Epistolam ad Hebræos scriptos esse

esse Græcè. Hos autem duos Hebraicè. Augustinus libro 1. de consensu Evangelistarum capite 2. *Horum sanè quatuor, inquit, solus Matthæus hebraeo scripsisse perhibetur eloquio, ceteri græco.* Hieronymus præfat. in Nouum Testamentum ad Damasum. *Nouum, inquit, Testamentum Græcum esse non est dubium, excepto Apostolo Matthæo, qui primus in Iudæa Evangelium Christi hebrais literis edidit.* & hæc est communis omnium doctorum sententia. Manifestum igitur neminẽ ex Scriptoribus N.T. scripsisse latinè. Ac proinde si sacra Scriptura non debet alia Lingua legi, quàm qua scripta est, sequitur eam latina Lingua legi non debere. Item si sacra publica non alia lingua celebrari debent, quàm qua sacra Scriptura scripta est. Sequitur ea Lingua latina celebrari non debere. Disputo enim in hunc modum.

Quibus linguis Scriptura originaliter scripta est, ijs tantùm legi, & sacra publica ijsdem tantùm celebrari debent. Sed hebræa & græca lingua tantùm Scriptura originaliter scripta est. Ergò Scriptura his tantùm duabus linguis legi, & iisdem sacra publica administrari debent.

Maior est posita à Bellarmino, minor vnanimi veterum testimonio, & omnium doctorum consensu confirmatur, Viderit Bellarminus quid sit ad hoc argumentum responsurus. Si hoc medium concludit, progredior in hunc modum.

Qua Lingua originaliter Scriptura scripta non est, in ea neque Scriptura legi, neque Sacra publica administrari debent. Sed *Latina lin.*

*na Lingua* scriptura originaliter scripta non est. Ergo in latina lingua neque scriptura legi, neque sacra publica administrari debent,

Viderit Bellarminus quid sit responsurus ad hoc argumentum. Si autem scriptura latina lingua originaliter scripta non est, & tamen in ea legi, & sacra publica in eadem administrari possunt, nihil obstat quo minus & in Germanica, Gallica, Anglica, & in qualibet alia lingua idem fieri possit. Atque hæc ad Bellarmini paralogismum. Quod autem Scriptura tantum Hebræa & Græca lingua originaliter scripta est, non ideò factum est, ut nunc & ignota lingua legatur, & sacra publica ignota lingua administrantur. Sed longè alia causa est. Vetus enim Testamentum ideò Hebraicè scriptum est, ut ab omnibus Ecclesiæ membris intelligeretur. Quicunque enim ad Ecclesiam Iudaicam pertinebant, intelligebant Hebraicè. Omnes autem libri Veteris Testamenti sunt scripti Hebraicè. Ergo ab omnibus intelligi potuerunt. Quod cum ita sit, vides ipse quàm validum sit tuum argumentum. Sic enim argumentaris,

Sacra scriptura & publica sacra hebræa Lingua apud Hebræos scripta & facta sunt, ut ab omnibus intelligerentur. Ergo scriptura & sacra publica apud Christianos lingua omnibus ignota legi & celebrari debent.

Idem de Nouo Testamento dico. Cum enim Apostoli scriberent, Græca lingua ferè omnibus gentibus cognita erat. Policarpus n. Romæ celebrauit *Eucharistiam* græcè. Euseb. lib. 5. c. 24. Epiphanius Episcopus Cypri, docuit suos *lingua* græca. Parthi illustrent



serunt Crassolinguæ græcæ. Plutarch, in Crasso, Origenes, Athanasius, Cyrillus Alexandria Episcopi docuerunt suos græcè. Alter Cyrillus Hierosolymæ docuit suos græcè. Hieronymus in Prologo libro 2. ad Gala. Totus oriens, inquit, usus est sermone græco. Vnde apparet linguam græcam penè per vniuersum terrarum orbem eo tempore diffusam fuisse. Hoc disertè docet Cicero pro Archia. Atque idè Apostolos scripsisse græcè, vt vel ab omnibus, vel à pluribus intelligerentur. Vt sacra scriptura per orbem faciliùs seminari & in alias linguas transferri posset. Augustinus de doct. Christ. lib. 2. cap. 5. Græca, inquit, lingua tum penè ab omnibus populis potuit intelligi. Sed Apostoli scripserunt græcè. Ergo eorum scripta penè ab omnibus populis intelligi potuerunt. Hinc autem inferre, nos debere scripturam ignota lingua legere, & sacra publica ignota lingua celebrare, perinde est ac si dicas: Apostoli scripserunt græcè, vt ab omnibus, vel à pluribus intelligerentur: Ergo scriptura nunc debet legi lingua ignota, & sacra publica ignota lingua celebrari, vt à nemine intelligantur. Opus equidem acumine Chrysippe ad talia argumenta refutanda.

Sextum argumentum. *Quia sacra scriptura nunc nō debet alijs linguis legi, neque sacra publica alijs linguis administrari debent, quàm in primitiua Ecclesia factum est.*

Quibus linguis scriptura in primitiua Ecclesia legi, & sacra publica administrari solebant, iisdem & nunc tantum legi & administrari debent. Sed scriptura in primitiua Ecclesia tantum legebatur hebræa, græca & latina lingua



& Sacra publica tantum his tribus linguis administrabantur. Ergo & hoc tempore tantum illis tribus linguis scriptura legi, & sacra publica administrari debent.

Maiorem huius argumenti libenter admittimus, modò non de primo principio Ecclesiarum intelligatur. Iohannes enim Baptista, Christus & Apostoli in Iudæa, ante donum linguarum tantum prædicarunt *Lingua Iudaica*. hoc est manifestius, quàm ut probari debeat. Ergo si argumentum de eo tempore intelligi debet, tum neque maior neque minor vera est: Si autem argumentum intelligitur de eo seculo, quod Apostolorum ætatem secutum est, usque ad Augustini ætatem, aut circiter, tum maiorem libenter concedimus, & nisi idoneis testibus probare possimus, omnes populos in nativa lingua scripturam legisse, & sacra publica administrasse, æquum est, ut cum Papis verbum Dei ignota lingua legamus, & Sacra publica lingua omnibus incognita administremus. Priusquam verò aperiamus, quid antiquitas de hac re senserit, excutiemus minorem, & eam simpliciter negamus. Bellarm. minorem probat duabus rationibus, quas examinabimus. Prima ratio est. Quia Aug. l. 2. de doct. Christ. cap. 11. dicit ad intelligentiam scripturarum, esse necessariam cognitionem tantum trium Linguarum, *Hebraica, Græca & Latina*. Argumentum tale:

Quæ Linguae sunt necessariae ad S. scripturarum cognitionem, in ijs tantum scriptura exstare & legi, ac sacra publica administrari debent. Sed hæ tres nempe Hebræa, Græca & Latina sunt tantum necessariae ad S. scripturarum cognitionem. Ergo his

his tribus linguis tantum exstare scriptura & legi, & sacra publica administrari debent.

Huius paralogismi Maiorem concedimus, quæ n. linguæ sunt necessariæ ad sacrarum literarum cognitionem, ijs linguis S. scriptura legi, & exstare debet, nisi n. eis linguis exstet & legatur, intelligi non potest. Minorẽ verò prorsus negamus. Bellarm. eam probat ex Aug. loco citato. Verum Bellarmine, locum Augustini aut non inspexisti, aut non bona fide adduxisti. Non n. dicit Augustinus *omnibus hominibus* simpliciter his tribus linguis, videlicet Hebræa, Græca & Latina opus esse ad scripturarum cognitionem. Sed dicit. *Latine quidem Lingue homines, quos nunc instituendos suscepimus, & duabus alijs ad scripturam habent opus, Hebræa sc. & Græca, ut ad exemplaria præcedentia recurratur, si quam dubitationem attulerit Latino- rum Interpretum infinita varietas.* Vnde apparet omnes homines ad scripturam cognoscendam in primis opus habere, ut eam in cognita lingua legant, siue ea sit Latina, siue Gallica, siue Anglica, siue Germanica, siue alia aliqua lingua. Deinde ut præter eam linguam, in qua scripturam legunt, & Græcam & Hebræam linguam cognoscant. Nam ut *Latine lingue homines* opus habent & Græcæ & Hebræicæ linguæ cognitione, ita & Germanicæ & Gallicæ & Britannicæ & aliarum linguarum homines, ad scripturam cognoscendam præter Vernaculam linguam, & Hebræa & Græca lingua opus habent. Hoc arg. & verum est, & ex Augustino commodè colligi potest.

Quod en. latinæ linguæ hominibus opus est ad script. cognoscendam, hoc omniũ linguarũ ho-

minibus ad eam cognoscendam opus est. Sed Latinæ linguæ homines opus habuerunt ad scripturam cognoscendam, ut eam in *latina natina* legerent, & ut præter latinam linguam intelligerent græcam & hebræam, ut exemplaribus variantibus possent eam sententiam eligere, quæ cum græcis hebræisque fontibus maximè congruit. Ergo & aliarum linguarum homines opus habent, primò ut scripturam legant in lingua Vernacula, deinde ut præter linguam Vernaculam intelligant græcam & hebræam linguam.

Hæc est genuina mens Augustini. Dicere autem: Latine linguæ homines opus habent græca & hebræa lingua ad scripturam cognoscendam, idque propter interpretationum latinarum varietatem. Ergo aliarum linguarum homines debent scripturam ignota lingua legere; Deo & hominibus illudere est. Deinde quemadmodum licitum fuit Latinis, ut legerent scripturam in latina lingua; ita etiam licitum est, ut Germani eam legant in lingua Germanica, & singuli alij populi in paterna & nativa lingua. Prætereà Bellarmine ex hoc loco discite hebræum textum Veteris Testamenti, & Græcum Novi Testamenti esse authenticum.

Illi enim libri ad quos variæ & discrepantes versiones corrigi debent, sunt autentici. Sed Hebræi & Græci libri, &c. Ergo.

Deinde, si hoc est idoneum argumentum, tum sequitur sacram scripturam in nullam aliam linguam verti debere. Errat igitur Papa Romanus, dum contrarium

trarium dispensat. Quod enim illicitum est, in eo Papa dispensare non potest.

Secunda ratio est. *Quia nullus antiquus autor meminit ullius alterius versionis.*

Cuius rei apud antiquos scriptores mentio nulla fit, ea res nunquam exstitit. Sed Vernacularū versionum nulla mētio fit apud antiquos scriptores. Ergo nullæ vnquam vernaculæ versiones fuerunt.

Hoc argumentum est prorsus Iesuiticum. Nos & Maiorem & Minorem negamus, illam quia apud antiquos creationis scriptores, nulla fit mentio *creationis Angelorum*. Ergo dicere nullos Angelos creatos esse, nimis temerarium esset. Eodem modo etsi apud antiquos scriptores nulla mētio fieret Vernacularum versionum, tamen magna temeritas esset, pronunciare nullas vnquam Vernaculas versiones fuisse. Deinde & minor non tantum falsa est: sed magnam etiam antiquitatis imperitiam arguit. Socrates enim *lib. 4. cap. 33. hist. Ecclesi.* narrat Vlphilam transtulisse sacras literas in *Gothicam* linguam. Beda *in hist. Angl. libro 1. capite 1.* facit mentionem *Anglicanæ* versionis. *Syriacæ, Chaldaicæ, Ethiopicæ, Arabicæ, Ægyptiacæ* versionis vestigia adhuc exstant, Hæ autem omnes tam antiquæ sunt, vt plerique docti testentur eas ipso Apostolorum tempore exstitisse. Hæc ad Minoris falsitatem ostendendam sufficiant. Cū igitur neq; Maior neq; Minor vera sit, sequitur cōclusionē verā esse nō posse. Hoc igitur argumentum in aduersarios nostros retorquemus, & dicimus Vernaculas versiones, earumque lectiones in primi-

tiua Ecclesia licitas fuisse. Ergo & nunc licitas esse. Nam quod in primitiua licuit ecclesia, hoc & nunc illicitum non est. Sed in primitiua ecclesia licuit sacras scripturas in *Syriacam, Egyptiacam, Ethiopicam, Arabicam, Chaldaicam, Anglicam, Gothicam, Frisicam*, & in alias Vernaculas linguas vertere, & in iisdem linguis legere, licuit & in illis sacra publica administrare. Ergo illud nunc illicitum esse nō potest. Maior est Bellarmini, ac proinde ab eo negari non potest. Minorem probant prædicta exempla. Gothi enim legerunt scripturam in lingua Vernacula, idem fecerunt Angli. Syriaca translatio tota adhuc exstat, & Chaldaea. In Syriaca ecclesia etiam hoc tempore sacra publica administrari lingua Syriaca testatur Tremell. *in præf. Syriac. Test. Arabice* versionis multi libri adhuc exstant. Sanè doctissimus vir & Orientalium linguarum peritissimus *Franciscus Iunius* aliquos libros *Novi Testamenti* ex Arabica lingua vertit in Latinam. Guillelmus Postellus dicit se vidisse *Euangelia* lingua *Ethiopica*, in epistola ad Ambrosiū Theſeum. Ipse Ambrosius Theſeus sæpè allegat *Indorum Psalterium*, quod à Ioanne Potten testatur caractere Syriaco editum esse. Ex *Armenicis* verò *Euangelis* integras sæpè paginas ad verbum recitat descriptas caractere Armenico, Prophetarum etiam testimonia & Psalmorum producit ex *autographis Dalmaticis*. Testaturq; *Chaldeis & Syris* fuisse à Leone decimo (cuius tempore ille hæc scripsit) *permisſum*, ut *Liturgiam sua Lingua Roma celebrarent*, in introduct. in Chaldaicam, Syriacam, Armenicam, & decem alias Linguas. Apud doctissimum virum Franciscum Raphelingium

phelingium Professore Hebraicæ linguæ in Academia Leidenſi exſtat *pentateuchum Moſis Lingua Perſica Hebraico charactere deſcriptum*, in quo ille (vt decus Belgicæ nobilitatis Philippus Marnixius ad me ſcripſit) dicit multas voces exſtare, quæ ad Belgicam linguam quàm proximè accedunt. In Bibliotheca D. Hermannii Comitis de Nevvenar ſolet exſtare liber vetuſtiſſimus, aureis argenteiſque characteribus in papyro exaratus, continens vniuerſum *Novum Teſtamentum Lingua antiqua Friſonum*, vt idẽ Aldegundius me docuit. Ex hoc libro idem Aldegundius dicit ſe habere *deſcriptam orationem Dominicam Friſico vel Saxonico antiquo charactere*, qui non *multum à Muſcouitico charactere differre*, & ad *Græcum accedere videtur*. Eius initium eſt: *Atta unſar thu in himina, waikmi namo thein, &cet. Ethiopicum & Egyptiacum Pſalterium* his annis in lucem reduxit illud decus politionum literarum Ioſephus Scaliger. Armenios uſurpaſſe *Armenicã verſionem* docet Sixtus Senenſis. *Bib. libro 8.* Sed & Dalmatæ uſurparunt *verſionem Dalmaticam*. Alfoñſ. de Caſtro. lib. 3. capite 13. Eccius in Enchiridio. C. de Miſſa Latina. Eraſmus in Indice operum Hieronymi, quæ perierunt. Slauonica eccleſia uſurpauit *verſionem Slauonicam*. Auent Anal l. 4. & vt vno verbo dicam, Singuli populi tempore primitiux eccleſiæ uſurparunt Scripturam in lingua Vernacula. Auguſtinus lib. 2. de doct. Chriſt. cap. 5. dicit *Diuinam ſcripturam per varias Interpretum Linguas longè latè que diffuſam innotuiſſe*. Chryſoſtomus homilia 1. in Ioh. dicit *Syros, Egyptios, Indos, Perſas, Ethiopas & alias*

*innumeras gentes dogmata diuina in suam linguam transluisse, atque ita homines barbaros philosophari didicisse. Theodoret. libro . de corrigendis Græcorum affectibus. Hebraici, inquit, libri non tantum in Græcum sermonem conuersi sunt: sed in Romanam quoque linguam, Ægyptiacam, Persicam, Indicam, Armenicam, Scythicam, atq; ad cœ Samromaticam, & ut semel dicam, in omnes linguas conuersi sunt, quibus nationes ad hunc usque diem vtuntur. Num adhuc Bellarm. audebit dicere nullū veterē scriptorē alterius alicui⁹ versionis meminisse?*

*Sept. Argument. ab exemplo vniuersalis Ecclesiæ.*

*Quod vniuersalis Ecclesia facit, hoc & nos facere debemus. Sed vniuersalis Ecclesia semper legit scripturam lingua Latina, Græca & Hebræa, & in iisdem sua sacra administrauit. Ergo nos omnes debemus scripturam ignota lingua legere, & in eadem sacra publica administrare.*

*Respondemus hoc argumentum nihil concludere, sunt n. 4 termini. Minor n. debebat sic formari, Vniuersalis Ecclesia semper legit scripturam ignota lingua, & sacra publica administrauit semper ignota lingua. Deinde & minor est falsa, quemadmodum in superiore argumento demonstratum est. Imò ne maior quidem vera est. Non enim quicquid vniuersa Ecclesia facit, nos facere debem⁹. Nam cū Christus pateretur, vniuersalis Ecclesia erat vel apud sūmum Sacerdotem, & Iudæos; vel apud Apostolos; vel apud vtrosque: si apud Iudæos, tum verum est quod dixi, *Iudæi enim consultarunt contra Christum, Matth. 26, 3.* Si verò apud Apostolos, tum æquè verum est, quod dixi. *Apostoli enim omnes fugerunt à Chri-**



*Christo*, Matth. 26, 56. Si denique apud utrosque Ecclesia fuit, tum etiam verum est quod dixi. Nam & Iudæi & Apostoli simul errarunt. Ergo non quicquid vniuersalis facit Ecclesia, nos facere debemus. Et nequis Apostolos præposterè excuset. Manifestum est eos in *Christo* offendisse. Matth. 26, 31. Eodem tempore Iudæi oppugnabant Christum, & eius discipulos: negabant omnes Christum esse verum Deum & redemptorem mundi. Si igitur apud eos fuit vniuersalis Ecclesia, errarunt in doctrina. Apostoli verò putabant Christum esse *Dominum terrenum*, & eius regnum esse terrenum, Acto. 1, 6. Si ergo penes hos fuit vniuersalis Ecclesia, errarunt etiam omnes in doctrina. Si penes utrosque fuit vniuersalis Ecclesia, idem sequetur. Manifestum igitur non quicquid facit vniuersalis Ecclesia, id nos facere debere. Cum igitur in eo Argumento sint 4. termini, & ambæ præmissæ sint falsæ: sequitur conclusionem veram esse non posse. Hoc ad argumentum 7. sufficeret. Sed quoniam Bellarmino libuit utramque præmissam probare, age excutiamus etiam eius prosyllogismos. Ille igitur Maiorem probat auctoritate Augustini & Greg. Aug. epist. 118. *Contra id quod vniuersa facit Ecclesia disputare*, inquit, *insolentissima insania est*. Idem contra Donat. dist. 1. 4. c. 24, & Leo in sermo. de Ieiunio pentecost. *Id quod in vniuersa Ecclesia seruat, si non possit assignari eius initium de Apostolica traditione, descendere, & sic semper fuisse merito creditur*. Arg. tale est:

Quicquid dicit Aug. hoc verum est, sed Aug. dicit illud oib. homin. obseruandum esse, quod vniuersa Ecclesia docet. Ergo hoc ita fieri debet.



Maiorem refutat ipse Augustinus : dicit enim se in omnibus patrum scriptis ea arripere , *quæcum sacris literis congruunt: quæcum ijs non congruunt, reprobare, & eandem libertatem alijs in suis scriptis concedit.* C. Neque. Dist. 9. C. Noli meis, C. negare, C. quis nesciat. eâdem . Hoc Papæ in sua decreta retulerunt. Ergo de omnibus patribus intelligendum. ac proinde de Leone idem dicere possumus. Sed conuertamus nunc argumentum in Bellarminum.

Quicquid facit vniuersa ecclesia, hoc nobis faciendû est. Sed vniuersa ecclesia legit scripturam lingua cognita , & administravit Sacra lingua cognita. Ergo & nunc scriptura legenda est lingua cognita, & sacra publica administranda sunt lingua cognita.

Maior est Bellarmini, ergo ab eo negari non potest, minor nota est ex argumento præcedente. Hæc de maiore. Nunc accedit Bellarminus ad minorem probandam, & enumeratione omnium populorum, ostendit in toto orbe scripturam tantum extitisse lingua *Latina, Græca & Hebræa*. Existimo Bellarminum hoc fecisse, nō quod ita *putarit*, sed vt Geographicam quandam scientiam ostentaret , vel vt imperitorum oculos perfringeret.

Ac priuim dicit in toto Oriente in publico vsu fuisse tantum versionem Græcam , sed hoc falsum esse ostendimus argumento sexto, Syri enim vsi sunt versione *Syra*, Arabes *Arabica*, *Ægyptij Ægyptiaca*, Chaldæi *Chaldaica* , Indi *Indica*, singuli alij populi vsi sunt versionibus Vernaculis. Interea tamen nō nego fuisse aliquos in Syria, *Ægypto*, & reliquis  
Orientis

Orientis Regionibus, qui Græca versione vſi ſunt. Origenes enim, Athanaſius & Cyrillus, Alexandriæ locuti & concionati ſunt Græcè, ſed Alexandrini Græcam Linguam intelligebant, Epiphanius docuit Cyprios lingua Græca, ſed illi Græcam linguam intelligebant, ita & Parthi intellexerunt græcè, Crallum enim *irriſerunt ſermone Græco*, vt eſt apud Plutarchum in vita Cralli. Quin & Nyſſeni græcè ſciuerunt, vt ex Gregorio, qui illorum Epiſcopus fuit, commodè intelliḡi poteſt. Ephelio ſciuiſſe græcè extra controuerſiam pono, & ne rem per ſe notam multis perſequar, Cicero dicit in oratione pro Archia, *Græca ab omnibus Gentibus legi*. Cōrad. Hershach. in Orat. de laude Græc. Lingu. dicit, *Græcam linguam in Cyprū, Rhodū, Cretam, Aſiam minorem, Macedoniam, Epyrum, Myſiam, Illyrium, Thraciā, Dalmatiam, Syriam & Aegyptum eſſe ob Alexandri magni victoriam propagatam*. Vnde colligo eos, qui græcam linguam ſciuerunt, legiſſe ſcripturam lingua græca, qui verò eam non ſciuerunt, illos legiſſe ſcripturam lingua patria. Argumentum igitur tuum tale eſt:

Aliqui in Oriente non ſciuerunt græcè, ſed aliqui in Oriente legerunt Scripturam lingua græca, Ergo ſcriptura in linguas Vernaculas verti, & in ijs legi non debet, & ſacra publica in ijs adminiſtrari non debent.

Hoc eſt topographicum illud Ieſuitarum argumentum, & credibile eſt, hoc valdè placere Papiliſtis, ante Bellarminum enim Hardingus eodem argumento vſus eſt, verùm cū illud tam grauiter ab Iuello

Iuello esset refutatum, non debuit à Bellarmino resummi. Sed ad rem, si vis contra nos concludere Bellarmine, sic collige.

Græca lingua fuit in tota Oriente ignota. Sed Orientales legerunt scripturam lingua græca, Ergo legerunt scripturam lingua ignota.

Deinde ex hoc infer, quod fecerunt Orientales, hoc & nos facere debemus, sed illi legerunt scripturam, lingua ignota. Ergo & nos idem facere debemus.

Atque istis argumentis fundata est vestra religio, Equidem non opus est, ut hæc Papistica argumenta refutentur, si verborum plumis nudantur, & syllogisticè tantum proponuntur, hoc sufficit ad turpitudinem eorum patefaciendam. Perlustrato Oriente venit Bellarminus in Occidentem, & dicit omnes populos Occidentis legisse scripturam lingua Latina, sed hoc verum non est. Angli enim vsi sunt versione *Anglica*, Dalmatæ *Dalmatica*, Slauones & Bohæmi *Slauonica*. Frisij *Frisica*. Quin ipse Hardingus concedit *Russos & Musconos legisse scripturam lingua Russica, & Musconica, ut cap. 6. ostensum est*. Interea non negabo aliquos populos Occidentis legisse scripturam lingua Latina, sed & illi Latinè sciebant. Augustinus monet populum, *ut non rideat sacerdotes, si minus grammaticè loquatur*. de catechizandis rudib. c. 9. quomodo ridebunt vitia Grammatica, nisi intelligant. Idem dicit, *se Psalmum quendam Latino sermone composuisse, ut in vulgi & Idiotarum notitiam perueniret*. l. 1. Retract. c. 20. Vnde apparet Latinam linguam in Africa tum fuisse Punica notiolem. Idem dicit, *hoc dicam vobis Latinè, quia non omnes nostis Punicè*. ser. 25. de verb.

verb. Apost. Vnde colligo illos qui punicè tantum sciebant, legisse script. punicè, & fecisse sacra publica punicè. qui verò latinè sciebant, illi legerunt scripturam lingua Latina, & fecerunt sacra publica lingua Latina. Idem dicit *se Latinam linguam inter blandimenta nutricum didicisse*, l. i. confess. cap. 14. Hispani fortè etiam legerunt scripturam lingua Latina, sed illi sciebant latinè. Hispani enim plerique eam linguam didicerant, quia ea Ius dicebatur. *Strabo libro 3.* De Gallia incertum est, qua lingua sacra administrauerint. Intereà tamen constat factum esse lingua nota. Nam cùm lector cui legendi eo die officium erat, deesset, turbatis Ministris, dum expectatur qui non aderat, *unus ex circumstantibus sumpto Psalterio, quem primum uersum inuenit, arripuit. Psalm. aut hic erat, Ex ore infantium & lactentium perfecisti laudem tuam. Quo lecto populi clamor attollitur, & pars aduersa cōfunditur.* Seuerus Sulpi. in vita D. Martini. Vnde apparet populum script. intellexisse. Quomodo n. pars vna acclamaret, & pars altera cōfunderet, si neutra quicquid intelligeret? Argum. igitur Bellarm. tale:

Aliqui populi Occid. nō sciuerūt latinè, & alii legerunt script. latinè, & fecerūt sacra latinè. Ergo nemo debet script. lingua Vernacula legere, neque sacra publ. lingua Vernacula administrare.

Tātū n. ex Topogr. hac disputatiōe colligi potest, verū Bellarmine in hunc modū cōcludere debebas.

Nullus populus Occid. sciuit latinè, & oēs populi Occid. legerūt script. latinè, & fecerūt sacra latinè. Ergo nemo debet script. in lingua Vernacula legere, neque sacra in lingua Vernacula facere.

Sed

Sed vtantè monui, hæc argumenta tam putida sunt, vt refutatione opus non sit, nudasse sufficit.

Totum autem hoc argumentum retorqueo in Bellarminum.

Quod vniuersalis primitiua Ecclesia fecit, hoc nos facere debemus. Sed tota vniuersalis primitiua Ecclesia legit scripturam lingua nota, & sacra administruit lingua nota. Ergo & nos idem facere debemus.

Maior illius argumēti est Bellarmini, minor probata est argumento sexto & septimo. Hæc ad Topographicum hoc argumentum sufficiant.

Octauum argumentum. Quia facit ad vnitatem fidei seruandam, *vt omnes populi vna Lingua scripturam legant, & faciant sacra, &c.*

Quod facit ad fidei vnitatem seruandam, hoc nos conseruare debemus. Sed scripturam legi vna lingua, & sacra publica administrari vna lingua, facit ad, &c. Ergo nos hoc conseruare debemus,

Minor huius Syllogismi est falsa, Veteres enim vsi sunt linguis varijs, & tamen conseruauerunt fidei vnitatem. Ergo & fidei vnitas etiam nunc conseruari posset, etiamsi varijs linguis vtamur. Atq; hoc ipsum docet experientia. Angli enim, Belgæ, Hungari, Poloni, Heluetij, Galli, Germani, Scoti, Dani vtuntur diuersis linguis, & tamen beneficio Dei fidei vnitatem hactenus conseruauerunt.

Nonum argumentum, *quia nullam vtilitatem affert, scriptura in Vernacula lingua à plebe legi.*

Quod nullam vtilitatem affert, hoc desiderare nō debemus.

debemus, sed scripturam in Vernaculalingua à plebe legi, nullam vtilitatem affert. Ergo non debet hoc fieri.

Maiore prætermiſſa negamus minorem. Nemo enim eſt tam idiota, quin aliquam vtilitatem ex ſacrarum ſcripturarum lectione conſequatur, modò cùm ſerio Dei timore ad earum lectionem accedat. Bellarminus probat minorem, & dicit, primam lectionis vtilitatem eſſe intellectum: populum autem legendo nihil intelligere, neque legendo proficere. Sed hoc falſum eſt. Omnes enim Patres hortantur populum ad ſcripturarum lectionem, & affirmant populum multum vtilitatis ex ſacrarum literarũ lectione conſequi. *Ioh. 5. & Act 17. Chry. in Mat. Homil. 2. & in ad Colloſenſ. homilia 9. Idem de Lazaro, homil. 3. Origen. in Eſaiam. homil. 2. Idem in Iof. hom. 20. Idem in Num. homil. 27. Hieronymus in Nahum. cap. 3. Idem ad Colloſſ. 3. Auguſtinus in Pſalmum 85. & in Pſal. 93. Idem in De ſcala Paradysi. Idem ſer. 1. ſer. 6. poſt paſſionem Domini. Origenes inter cætera in Iof. hom. 20. Dici poteſt, ſcriptura ſunt difficiles (inquit) at nihilominus, ſi eas legeris, profuerint tibi. Dominus enim Ieſus ſi nos in ſcripturis occupatos inuenerit, & huiusmodi ſtudijs vacantes, non ſolùm ipſe refici & paſci dignatur in nobis, verùm etiam ſi has epulas viderit apud nos apparatus, patrẽ ſuum ad nos adducet. Deinde quod dicit Bellarminus Laicos prorsus nihil intelligere, hoc falſum eſt. atq; hoc malo Auguſtini, quàm meis verbis explicare. Ille igitur ſer. 1. ſer. 6. poſt Dom. paſs. Adhuc, inquit, bonum habemus ſolatiũ, diuinarum ſcripturarum lectionem, quia ſacrarum ſcripturarum lectio non parua cogni-*

io est diuina beatitudinis. In his enim tanquam in speculo homo seipsum considerare potest, qualis sit, vel quò tendat. Lectio assidua purificat omnia, timorem Gehennae incutit, ad gaudia superna cor legentis inuestigat, lego instigat, Qui vult semper cum Deo esse, frequenter debet orare & legere. Nam cum oramus, ipsi cum Deo loquimur. cum legimus, Deus nobiscum loquitur.

Decimum argumentum, Quia scripturam à plebe in Vernacula lingua legi, damnum adfert.

Quod damnum adfert, illud expetere non debemus. Sed scripturam in Vernacula lingua legere damnum adfert. Ergo nemo debet scripturam in Vernacula lingua legere, eadēq; ratione scriptura in Vernacula lingua exstare non debet.

Hoc argumentum est planè Iesuiticum, & dignū tanto auctore. Nos respondemus ad maiorem, illam veram esse, si per se intelligitur. Si autem per se & per accidens simul, tum ea est falsa. Euangelium enim, quod per se est odor vite, per accidens est odor mortis, 2. Cor. 2, 16. Christus qui per se est iustitia nostra, per accidens est Petra offendiculi, 1. Petr. 2, 8. non tamen propterea non expetendus. Deinde ad minorem dicimus eam per se falsam esse, Lex enim Iehoua perfecta est, conuertens animas. Testimonium Iehouae fidele est, sapientem efficiens paruulum. Præcepta Iehouae recta, letificantia cor. Præceptum Iehouae purum, illuminans oculos, Psalm. 19, 8. & talis est lectio Diuini verbi, vt argumento superiore probauimus. Si autem minor per accidens accipitur, tum illa quidem vera est, sed nihil sequitur, sunt enim quatuor termini,

Nam



Nam maior per se accipitur, minor per accidens. Scholæ vocant fallaciam accidentis. Quod autem verbum Delectum aliquibus mortem affert, fit vitio legentium, & non culpa ipsius verbi, eodē modo & Christus est petra offensionis, non fit culpa Christi, sed culpa offendentium.

Vndecimum argumentum. Quia propter linguarum mutationes versiones Vernaculæ singulis ætatibus mutandæ essent.

Si oportet scripturas lingua vulgari publicè legere; oportet etiam singulis ætatibus mutare versiones. Sed hoc fieri non potest. Ergo neque illud.

Connexum Maioris probat, Quia linguæ vulgares singulis ætatibus mutantur. Horatius in arte.

*Verborum vetus interitatas,*

*Et iuuenum ritu florent modo nata vigentq.*

Nos respondemus connexum Maioris infirmum esse, & eius probationem nihil ad rem facere. Nam non integræ linguæ immutantur, sed tantum aliqua verba aliquando innouantur. Exemplo sunt omnes linguæ. Eadem enim est nunc Germanica lingua, quæ fuit tempore Lutheri. In Latina, Græca & Hebræa ling. hoc est manifestius. Politior n. est lingua Latina tēpore Ciceronis & Salustij, quàm tempore Plauti: tamē qui Salust. & Ciceronē p̄bè intelligit, ille & Plautum intelligit. de similibus est idem iudicium. Deinde quod ad verborum quorundam innouationem attinet, non desunt singulis ætatibus homines pij, & docti, qui in sua vernacula & patria lingua, pro verbo obsoleto vsitatum substituere possunt.



sunt. Quod autem Bellarminus dicit id præbiturū occasionem multis erroribus, fit per accidens. Verbū n. Dei in Vernaculas versum per se non affert errores, sed eos tollit & adimit, vt argumēto sup. est ostēsum. Deniq; quod dicit *Papam Rom. non posse de tam multis linguis indicare*. Inde non sequitur Bellarmine, versiones Vernac. esse abiiciendas, sed Papā Rom. nō sufficere omnibus Ecclesijs, ac proinde non esse vniuersalem. Atque hæc de tuis argumentis contra versiones Vernaculas, & nisi possis fortiora argum. adducere, pronunciamus S. scripturā in oēs Vernac. linguas verē debere, vt ab omnibus intelligatur.

## CAPVT VIII.

*• Status controuersie de Sacris publicis explicatur.*

**B**ellarmini argumēta contra versiones Vernaculas refutauimus capite superiore, sequitur vt de precibus & sacris publicis disputemus. Priusquā verò ad disputationem ipsam accedemus; ostendemus, quis sit controuersie status. Principalis autem quæstio est; *Qua lingua sacra publica fieri debeant*. Papistæ dicunt, *illa non debere Vernacula, sed tantum Latina lingua fieri*. Nos contrā asserimus ea non debere Latina, sed Vernacula lingua celebrari. Hæ duæ sententiæ ex Diametro pugnāt, Ergo simul veræ esse non possunt. Nos prius more nostro Bellarmini argumenta examinabimus. Deinde nostram sententiam inmotis rationibus asseremus.

## CAPVT IX.

*Refutantur argumenta Bellarmini contra sacra Vernacula.*

Statum

**S**Tatim controuersia explicuimus capite superiore, sequitur ut Bellarmini argumenta, quæ contra preces, cantiones, & cætera Vernacula sacra obiecit, expendamus. Verum Bellarminus tota hac disputatione usus est argumentis communibus, eaq; & ad Vernaculas versiones, ad earum lectionem, & ad S. publicam accommodauit. Illa autem refutauimus cap. 7. & ex omnibus illis tantum vnum est, quod ad sacra peculiariter pertinet, quod excutiemus hoc cap. Est autem huiusmodi: Nos debemus latina lingua sacra facere, *quia illas est reliquis grauior & magis veneranda.* Argumentum tale.

Sacra publica debent graui & veneranda lingua fieri. Sed latina lingua est grauis & veneranda, Ergo debent latina lingua fieri.

Hoc argumentum tetigimus c. 7. argum. 2. Sed quoniam Bellarmino libuit illud reponere, afferemus ad illud diligentiorẽ solutionem. Ac primum negamus maiorem. Apost. n. ex afflatu Spiritus varijs linguis loquebantur, Acto. 2. quo Sp. Sanctus significare voluit omnes linguas esse in Christo sanctificatas. Deinde Apostolus tollit discrimen inter Indem, & Græcum, Barbarum & Schytam, Col. 3. 11. Malè igitur Papistæ inter illos distinguunt. Præterea cum Papa & Cardinales nõ vellēt Methodio & Cyrill. cõcedere, ut pop. Dalmatico ser. erudirēt; Vox de cælo audita est, *Ois Spiritus laudet Dominũ, & omni lingua confiteatur ei.* Æneas Sylu. Bohem. hist. cap. 13. Et ut illa lingua tantum Barbara est, quæ non potest Deum laudare, Bed. in 1. ad Cor. c. 14. Ita & illa neq; grauis neq; veneranda est, quæ non potest Deũ adorare; relique

omnes in Christo sanctificatæ sunt. Denique idem sensit primitiua Ecclesia. Nam vt inquit Origenes libro 8. contra Celsum. *Græci græcè Deum nominant, Romani latine, & singuli item Vernacula lingua Deum precantur, & laudibus pro se quisque extollit. Ille enim qui est linguarum omnium Dominus, audit quauis lingua orantes, idq; non secus quàm si unam vocem audiret, ex varijs linguis expressam. Deus enim cùm præsit machina vniuersi, non est quasi vnus aliquis, qui linguam vel Græcam vel Barbaram sit sortitus, vt ceteras nesciat. Postremò Deus non est tanquam humanus princeps, vt nolit preces, nisi graui aliqua & polita lingua conceptas audire. Sed quicunque cum in spiritu & veritate inuocat, ille exauditur ab eo, Ioh. 4, 23. Hæc ad Maiorem. Deinde negamus & minorem. Latina enim lingua non est reliquis grauior, neque magis veneranda. hoc probauimus argumento secundo, cap. 8. Nunc addimus eam toti populo barbaram esse. Quā enim quisque linguam non agnoscit, illa ei Barbarā est, 1. Cor. 14, 11. Nisi igitur sciuerim vim vocis, ero ei, qui loquitur Barbarus, & qui loquitur, apud me Barbarus est. Hieronymus in 1. ad Corinth. 14. Omnis sermo qui non intelligitur, Barbarus indicatur. Ouidius, Barbarus hic ego sum, & nō intelligor ulli. Anacharsis, Schyta Athenis, & Atheniensis in Schytia est Barbarus. Sed ex toto populo nemo est, qui intelligit latinam linguam. Ergo toti populo est barbarā, imò nemo ex doctis eam intelligit, nisi in schola didicerit. Ergo omnibus hominibus, exceptis ijs, qui eam in scholis didicerunt, est barbarā. Cùm igitur neque Maior neque minor vera sit, sequitur conclusionem veram esse*

esse non posse. Hæc de argumentis Bellarmini, reliqua refutata sunt capite septimo.

## CAPVT X.

*Sacra publica debere Vernaculis linguis fieri.*

**A**Rgumenta Bellarmini contra sacra Vernacula refutauimus capite superiore: sequitur vt immotis argumentis ostendamus, sacra publica non debere ignotis, sed Vernaculis linguis fieri. Primum nostrum argumentum est, quia Deus hoc mandauit.

Quod Deus mandauit, hoc omnibus hominibus est faciendum, Sed Deus mandauit, vt preces & sacra publica nota lingua faciamus. Ergo preces & sacra publica nota lingua administrare debemus.

Maiores citra omnem controuersiam vera est, Minorem ponit Apostolus, 1. Cor. cap. 14, 9. *Si incertum sonum tuba dederit, quis apparabitur ad bellum, ita & vos nisi per linguam bene significantem vocem edideritis, quomodo intelligetur, quod dicitur, eritis enim in aëra loquentes.* Hoc esse mandatum constat ex versu 37. *Qua scribo vobis, sunt Domini mandata.* Bellarminus excipit, & dicit hic agi de exhortatione, & non de publicis officiis. Sed hoc falsum est. versu enim 14. scriptum est. *Si precer lingua, spiritus meus precatur, sed intelligentia mea est infructuosa. Quid est igitur precabor spiritum, sed precabor etiam intelligentia, psallam spiritum, sed psallam etiam intelligentia.* Hoc de precibus, cantionibus & gratiarum actionibus necessario intelligitur, & primitiua Ecclesia hoc ita intellexit. Chrys. Theophyl. Ambro. ad dictum locum. Basil. quæst. 278. *diseritè*

dicit, hoc de ijs intelligendum esse, qui lingua audientibus  
 ignota orationes edunt. Cùm igitur Bellar. videret hu-  
 ius exceptionis infirmitatem, excogitauit aliam, vi-  
 delicet hîc quidē agi de precibus & cantionibus, & gra-  
 tiarum actionibus. Sed dicit, non esse necesse, vt omnes in-  
 telligant, sufficere n. vt ille qui locum idiota supplet & re-  
 spondet, intelligat, vers. 16. Caterùm si benedixeris spiritu,  
 quomodo is, qui supplet locum idiota, dicit Amen. Sed  
 ἀναπληρῶν τὸν τόπον τοῦ ἰδιώτου: non significat eum, qui lo-  
 cum idiota supplet; sed eū, q̄ sedet inter idiotas, h. e.  
 ipsum idiotā. Hier. ad dictum locū, significat Laicum,  
 qui nullo Ecclesiastico gradu fungitur. Chrysostomus  
 ἰδιώτην δὲ λαϊκὸν λέγει. Interpres vertit promiscuam turba.  
 Eodem modo explicat Theoph. & Occumenius ad  
 dictū locū. & vt commodi⁹ intelligatur. Totus pop.  
 olim respondebat, Amen. Iustin. in 2. Apologetico,  
 πᾶς ὁ λαός, inquit, πνευματικῶς. Hier. in 2. Procemio ad  
 Gal. Tota Ecclesia instar tonitru i reboat Amen. Vnde ap-  
 paret hoc Papist. effugiū non satis tutū esse. Quod cū  
 videret Bellar. excogitauit aliā exceptionē, videlicet  
 hic quidem agi de precibus & cantionibus, non tamen de  
 diuinis officijs, & hanc sententiā mordicus tuetur. Sed  
 & hoc falsum est. v. n. 16. dicit se loqui de ijs precibus, ad  
 quarū terminationē pop. acclamabat Amen. hoc aut nō  
 fit nisi in pub. precib. siue diuinis officijs. Deinde v.  
 19. dicit se loqui de ijs precibus, cantionibus & gratiarū  
 actionibus, quæ sūt in Ecclesia, illa aut p̄tinent ad pub.  
 siue diuina officia. Præterea oēs patres testātur totū  
 pop. eo tempore in diuinis officijs publicè precatū esse, &  
 cecinisse. Basil. hexam. hō. 4. Virorū inquit, mulierū, pue-  
 rorumq̄, Deo preces fundētū, strepitū instar fluctus littora  
 verberantis

verberantis visum esse. Chry. in 2. ad Cor. 18. *Comunes* inquit, preces & a pop. & à sacerdote fiunt, & oēs unā dicunt orationem. Bene precatur sacerdos pop. et bene precatur populus sacerdoti. Idē ibidē. Et cum Spiritu tuo, quibus verbis pop. respondet sacerdoti, nihil aliud est, inquit, quā ea qua sunt Eucharistia, Communia sunt oīa, neq. n. ille solus gratias agit, sed populus omnis. Nazianzenus in funeb. oratione Basilij. Valens Imperator, inquit, in Ecclesiam ingressus, in qua Basilius predicabat, psalmodia fuit quasi tonitru percussus. Clemens Alexandrinus Stromatum libro 7. In Orationibus quasi unam vocem communem habent, & unam mentem. Chry. in 2. ad Cor. hom. 18. Non modò sacerdos gratias agit Deo, sed populus etiam totus: quid autem miraris, quando sacerdotem & populum in precibus colloquentem vides? Basilius Epistola 63. ad Neocæsarienses. De nocte consurgit apud nos populus ad domum orationis, & in labore ac tribulatione, & assiduis lachrymis confiteentes Deo, postremum surgentes ad orationem & Psalmodiam perueniunt, & nunc bifariam diuisi alterna vicissitudine inter se psallunt, simul quidem meditationem oraculorū inde corroborantes, simul autē & attentionem, & cordis ab alijs rebus alienatam mentionem sibiipsis parantes. Deinde uni permittentes auspicari cantū, reliqui subsonant, & sic in Psalmodia varietate, noctem sufferentes precibus intermixtis, die iam illucescente omnes in commune, velut ex uno ore, & ex uno corde confessionis psalmum proferunt Domino, propria sui ipsorum unusquisq. verba poenitentiae facientes. Iustin. Martyr in 2. Apologet. Die qui Solis dicitur, omnes tum qui in oppidis tum qui in agris morantur, in unum convenimus, & ex Commem. Apost. & Prophetarum scriptis recitatur, quā-

tum licet. Deinde ubi destitit, qui recitat, antistes orationē habet, qua admonet adhortaturq; ad pulchrarum illarum rerum imitationem. Postea omnes una surgimus ac precamur. Postquam autem à precibus destitimus, profertur panis & vinum & aqua. Tum antistes similiter precatur, & gratias agit, quanta potest intentione, populusq; acclamat, dicens, Amen, & ijs super quibus acta sunt gratie, unusquisq; participat. Si oppidanos & agrarios in unū conuenire, & in isto conuentu scripturam sacram prælegere, eamque concionando explicare, deinde totum istum cœtum precari, in eoque cœnam Domini administrare, post cœnam gratias agere, populum ad gratiarum actionem Amen acclamare, non sunt partes sacri, atque adeò non ipsa publica sacra, vel Diuinum officium in se continent; tum non erubescam, cum Bellarmino dicere, Paulum non loqui hoc loco, de publico officio. Deinde Chrysostomus dicit, Paulum agere de ijs precibus, quarum finis est in secula seculorum, & ad quas plebeius respondet Amen. in 1. ad Cor. homilia 35. Excutiat Bellarminus publicas preces, & doceat an ista clausula alibi, quàm in diuinis officijs inueniatur. Itē an plebeius ad vllas alias preces, quàm ad eas, quæ ad diuina officia pertinent, Amen responderit. Porro diuinum officium erat eotempore latiùs diffusum, sparsumq; inter eos omnes, qui Spiritu Sancto afflati vellent aliquid, vel ad Dei laudem, vel ad populi ædificationem in medium proferre. Atque hoc ipsum munus re ipsa vnum & idem erat. modo verò vocationis, & ordine proponendi distinctum. Primùm enim ordinarij doctores docebant, deinde reliqui proponebant,



bant, quòd à Spiritu Sancto acceperant, neque quicquam proferebant, nisi quod vel ad doctrinam, vel ad Dei laudem pertinebat. Erat enim vel *Psalmus*, vel *doctrina*, vel *prophetia*, vel *revelatio*, vel *benedictio*, vel *precatio*, vel *gratiarum actio*, quod ab ijs proferebatur, vt ex Paulo colligi potest. At hæc omnia nō minus pertinent ad diuinas λειτουργίαι; quàm illa quæ ab ordinarijs pastoribus proferebantur, imò erant patres τῶν θείων λειτουργίαι. Et ob eam causam cū illa desinerent, sermocinationes plebis & sacerdotis in veteribus liturgijs vsurpatæ in eorū locum successerunt. Chrysostomus homilia 37. in 1. ad Corinth. *Cælum, inquit, Ecclesia tuum fuit, Spiritu cuncta administrante, cuncta Ecclesia capita moderante, afflatu suo unumquemque corripiente, nunc verò vestigia tantū millarum rerum tenemus. Duo loquimur aut tres, & seorsim quidem, & altero silente incipit alter: Verū hæc signa tantū sunt & monumenta rerum. Vbi igitur nos cepimus loqui, & cū Spiritu tuo plebs respondet: ita quondam se locutos significare volens. Manifestum igitur eas preces, cantiones, benedictiones, prophetias, gratiarum actiones, &c. de quibus Paulus loquitur, esse partes τῶν θείων λειτουργίαι. Hoc cū videret Bellarminus, & tamē in sententia perseueraret, addidit aliquam probationem, & dicit. *Sacra publica tuum administrata esse lingua Græca, & eam omnes Corinthios intellexisse. Ergo Apostolum non esse locutum de Sacris publicis. Hoc potest in genere de omnibus sacris, vel in specie de sacris Corinthiacis intelligi. Si putat Bellarminus omnia sacra publica eo tempore Græcè celebrata esse, valdè errat. Indos enim rem diuinā**



fecisse lingua Vernacula fatetur Eccius in locis communibus. Lyra & Thomas affirmant in primitiua Ecclesia commune officium vulgari lingua celebratum esse, in 1. ad Corinth. capite 14. Hieronymum preces publicas Dalmaticè faciendas curasse fatetur Eccius in locis communibus C. de Missa Latina. Preces publicas in primitiua Ecclesia lingua populari & vsitata necessario factas esse testatur Hardingus, articulo 3. §. 28. contra Iuëllum. Ephremus Edessæ Diaconus erat Græca lingua ignarus, & Syra lingua utebatur. Theodoretus libro 4. capite 29. Ergo fecit sacra lingua Vernacula, id est, Syra. Idem composuit cantiones Syras, quæ in festis Martyrum decantarentur. Theodor. libro 4. ca. 29. In funere Paulæ, Psalm. Hebræo, Græco, Latino & Syro sermone cantatos esse narrat Hieronymus in Epitaphio Paula. Veteres in oblationibus & tractatibus, aliquando Hebræa, aliquando Syra lingua vsos fuisse testatur Ambrosius in 1. ad Corinth. capite 14. Basilii cum recensisset, quomodo omnes simul precarentur, & psallerent, subiungit: Si nos propterea fugietis, fugietis Ægyptios, fugietis vtriusq; Libya incolas, Thebanos, Palestinos, Arabas, Phanices, Syros, & eos qui ad Euphratem habitant, & in summa omnes, apud quos communes vigilia, Psalmodia, & preces in honore sunt. Vnde apparet, omnes populos Vernacula lingua sacra publica administrasse. Omnes homines lingua Vernacula Deū precari, auctor est Origenes contra Celsum, libr. 8. Idē affirmat Hieronymus ad Heliodorum in Epitaphio Nepotiani. Nunc passionem Christi, inquit, & resurrectionem eius, cunctarum gentium & voces & litteræ sonant. Taceo de Hebræis, Græcis & Latinis, quas nationes

nes sua crucis titulo Dominus dedicauit. Bessorum feritas  
 & pellitorum turba populorum, qui mortuorum quondam  
 inferys homines immolabant, stridorem suū in dulce Chri-  
 sti refrigerunt melos, & totius mundi una vox est Christus.  
 Ex his apparet omnes populos tempore primitiuar  
 Ecclesiæ sacra publica fecisse lingua Vernacula. Si  
 autem putat publica sacra, quæ Corinthi fiebant,  
 facta esse græcè: sciat illa, partim ab ordinatis docto-  
 ribus, partim ab ijs, qui Spiritus Sancti instinctu ex-  
 traordinariè loquebantur, facta esse: & ab illis qui-  
 dē græcè, ab his verò linguis ignotis. Hanc consue-  
 tudinem reprehendit Paulus, & vult vt *quicquid in*  
*Ecclesia ex Spiritus instinctu protulerint, faciant lingua*  
*nota.* Quod autem ijs qui ordinario munere funge-  
 bantur idem non præcipit, causa est, quòd ex ijs om-  
 nibus nemo tam amens erat, vt ignota lingua vtere-  
 tur: & quòd multi putabant ea, quæ ex Spiritus af-  
 flatu proferebātur, peregrinis linguis inculpatè pro-  
 poni posse. Dum verò Paulus ea reprehendit, quæ  
 ex peculiari Spiritus instinctu, peregrino idiomate  
 proferuntur: certè multò minus tollerate ea, quæ  
 ordinario modo proferuntur, peregrina lingua pro-  
 poni. Deinde Paulus omnia quæ in Ecclesia fiunt,  
 iubet ad ædificationem fieri, 1. Corint. 14, 26. *Quo-*  
*ties conuenitis, quisque vestrum canticum habet, doctrinā*  
*habet, linguam habet, reuelationem habet, interpretationem*  
*habet: omnia qui oīa dicit nihil excipit ad ædifi-*  
*cationem fiant.* At quod ignota lingua sit: neminem  
 ædificat. *Illud enim nemo audit,* 1. Cor. 14, 2. *neque*  
*quicquam prodest.* 1. Cor. 14, 6. *& est tanquam vox in aë-*  
*rem prolata.* 1. Cor. 14, 9. *imò est audientibus barbarum.*

1. Cor. 14, 11. Amb. in 1. ad Cor. 14. *ex ea re nullus profectus est.* Quæcunque igitur preces, cantiones, in tepretationes, benedictiones, gratiarum actiones in publicis Ecclesiæ conuentibus fiunt, debent lingua promiscuæ plebi nota fieri. Et ita factum esse in primitiua Ecclesia constat ex prioribus. Sanè Thomas Caietanushoc argumento ita motus est, vt dixerit *melius esse ad adificationem Ecclesiæ, orationes publicas, quæ audiente populo dicuntur, dici lingua communis Clericis et populo, quam dici latinè.* in 1. ad Cor. 14. Sixtus Senensis bib. 6, 263. Hoc cùm Bellarminus videret, excogitauit aliam solutionem, & dicit tempore primitiuæ Ecclesiæ fuisse paucos Christianos, & eos omnes potuisse respondere, et propterea à lingua populari sacra celebranda fuisse. Nunc verò diuisa esse diuina officia, et soli clericis relictum esse, vt communes preces, et laudes in Ecclesia peragant, sufficere igitur, vt Clerici intelligant preces, vt populus eas intelligat, non esse necesse. Sed diuisio hominum in Laicos & Clericos, contra Dei verbum est, Omnes enim fideles sunt clerus Domini, 1. Pet. 5, 3, *Neque vt dominantes cleris, sed vt sitis exemplaria gregis.* vbi illi, quos nunc Laicos vocant, cleri vocantur. Deinde hæc institutio, qua soli Clerici cantant & precantur, populus totus tacet, est contra Dei verbum, Paulus enim vult vt *Idiota respondeat Amen.* Omnes item Patres in primitiua Ecclesia testantur totius populi esse precari, et canere, Prætereà patres Apostolorum ætatem secuti statuerunt, vt populus alternatim caneret, Augustinus libro 9. confessio. capite 7. dicit *Ambrosium eam rationem Mediolani ad multitudinis solatium instituisse.* Theodor. libro 2.

capite 24. hi primi, loquitur de Flauiano & Diodoro in duas partes diuisis cœtibz Psalmos accinentium instituerunt alternis Davidicam Melodiam decantare, quod Antiochia fieri cœptum, peruagatum usque quaque est, & ad fines orbis terrarum peruenit. Basilii Epistola 63. ad Neocæsarienses, De nocte surgit apud nos populus, & ad domum orationis contendit, Deoq; se in labore et afflictione, et continuis lachrymis consistentes, postremum exurgunt à precibus, et Psalmodym instituunt, et nunc in duas partes diuisi alternatim sibi inuicem canunt, Atque hæc consuetudo omnibus alijs Dei Ecclesijs congruebat. Postremò officia diuina nunc non sunt diuisa, ut dicit Bellarminus: sed sunt populo prorsus ablata. Populus enim nunc nullas partes habet in Papisticis sacris. At in primitiua Ecclesia fuerunt populo in diuino officio quædam partes tributa, tempore enim Apostolorum totus populus respondebat in diuinis officijs. Bellarminus libro 2. de verbo Dei capite 16. Iustinus Martyr Apologeti. secundo, dicit totum populum respondere consueuisse, Amen. Hieronymus in prolo. libro 2. ad Galat. dicit. In Ecclesijs urbis Roma quasi cœleste tonitru andiri populum roboantem, Amen. Chrys. in 2. ad Corinth. hom. 18. Sacerdos in Sacra liturgia populum alloquitur, et populus Sacerdotem. Idem ibidem. Non modo Sacerdos gratias agit Deo, sed populus etiam totus: quid autem miraris, quando Sacerdotem et populum in precibus colloquentem vides. Idem ibidem. Sacerdos et populus in sacra liturgia colloquuntur. Sacerdos ait Dominus vobiscum, Populus respondet et cum spiritu tuo. Ob has causas populus debet preces intelligere, rectè Augustinus. Quamobrem Sacerdos vocem extollit, aliq; precatur in Ecclesijs.

*Ecclesia? Non ut Deus, sed ut populus illum exaudiat: quo ipsius audita voce, et mente percepta admonetur, et consensione quadam coniungatur, atque ad Deum excitetur. Cum hac Augustini sententia congruit Cyprianus, de Orat. Domi. Ideo Sacerdos ante orationem, præfatione præmissa parat fratrum mentes, dicendo, sursum corda: ut dum respondet plebs, habemus ad Dominum, admonetur, se nihil aliud quam Dominum cogitare debere. Ex quibus omnibus apparet, hoc populo contra primitivæ Ecclesiæ exemplum ademptum esse, & preces ignota lingua concipere, pugnare cum Dei verbo, & primitivæ Ecclesiæ consuetudine, ac propterea ita fieri non debere.*

Nam quod pugnat cum Dei verbo & cum primitivæ Ecclesiæ consuetudine, hoc fieri non debet. Sed publica sacra administrare ling. ignota pugnat cum Dei verbo, & cum primitivæ Ecclesiæ consuetudine. Ergo non debent ignota lingua celebrari.

Deinde quoniam hoc cum Apostolorum scriptis & primitivæ Ecclesiæ consensu pugnat, neque Apostolorum, neque Sanctorum Episcoporum tempore usitatum fuit; manifestum est esse inuentum novum & humanum. Nam quod publicæ preces, & cantiones Latina lingua fiunt, causa est, quia à solis sacrificiis fiunt. Sed & hoc est inuentum novum & humanum. Humanum, nam secundum Dei verbum preces & cantiones ab omnibus fieri debent. Novum, quia ita non est factum in primitiva Ecclesia. Est igitur hoc corrigendum, & publica liturgià ad præscriptum Apostolorum, & ad exemplum primitivæ Ecclesiæ mutanda

mutanda est. Hoc cū videret Bellarminus, excogitavit aliud subsidium, & dixit nunc esse *aliū finē publicorum sacrorū*, & in primitiua Ecclesia aliū esse finem istarū cantionum, precum, benedictionum, gratiarum actionum, doctrinæ, prophetiæ, & reliquorum, de quibus Apostolus in priore ad Corinth. capite 14. loquitur, & quæ ego partes diuinarum liturgiarum esse probavi. Horum enim finem in primitiua Ecclesia fuisse populī ædificationem, Nūc autem publicorum sacrorū finē esse cultum Dei. Hoc miror homini docto potuisse excidere. Dicere enim istarū *precum, cantionum, benedictionum, gratiarum actionum, prophetiarum*, & reliquorū de quibus Apostolus loquitur, & quæ ego diuinarum liturgiarum partes esse antè necessarijs argumentis probavi, aliū fuisse finem tempore Apostolorum, & aliū esse finem diuinarum liturgiarum nostro tempore, est cū Deo & cū Ecclesia ludere. Istorum enim de quibus Apostolus loquitur, & omniū publicorum sacrorum duo erant fines tempore Apostolorum. Vnus respectu Dei, alter respectu populi. Respectu Dei, gloria & honor Dei. Respectu populi, ædificatio populi. Gloriam Dei esse eorum finem respectu Dei, docent sacræ literę, 1. Cor. 10, 31. *Omnia facite ad gloriam Dei.* 2. Cor. 8, 19. *Sed etiam suffragijs electus est, ab Ecclesijs socius peregrinationis nostra, cum hac beneficentia, quæ administratur à nobis, ad ipsius Domini gloriam.* Ædificationem autem esse eorum finem respectu nostri, etiam tradunt sacræ literę. 1. Cor. 14, 12. *Quandoquidem studiosi estis Spirituū, ad ædificationem Ecclesiæ querite vt excellatis.* & vers. 26.

Omni

*Omnia ad ædificationem fiant.* Origenes in Leuit. ca. 7. *Non essent necessaria hæc legi in Ecclesia, nisi ex his aliqua ædificatio audientibus præberetur.* Eidem fines publicorum sacrorum adhuc sunt, neque existimo Bellarminum adedò contemnere posteritatis iudicium, ut audeat negare sacrarum precum, cantionum, & totius Ecclesiastici minist. finē esse etiā num Dei gloriā, & hominis ædificationē. Sanè quod ad Dei gloriam attinet, eam adhuc affirmat esse finem publicorum Sacrorum; quod verò ad proximi ædificationē attinet, cogitur cōcedere, velit, nolit. Apost. n. Paulus adedò perfectus non erat, quin ædificaretur, etiam cū alios doceret. ad Rom. i. cap. vers. 12. *hoc est ad communem exhortationem percipiendam apud vos.* Quamdiu igitur Bellarminus non probavit Laicos Papisticos esse Paulo doctiores, vel esse adedò doctos, ut amplius discere nihil possint, tam diu sacrorum publicorum finis est populi ædificatio. Equidem adedò segniter instituitur populus apud Papistas, ut multos viderim *Septuagenarios, qui non poterant orationem Dominicam, neque Symbolum Apostolorum, neque Decalogum Domini recitare.* An verò tales homines non opus habent ædificatione? Melius Apostolus i. ad Thessal. 5, 11. *adhortamini alij alios, & ædificate singuli singulos.* Relinquitur igitur & gloriam Dei, & populi ædificationem etiamnum esse sacrorum publicorum fines. Verū cū sacra administrantur ignota lingua, tum neque Deus honoratur, neq; populus ædificatur. Illud manifestum est. Nam ignota lingua cantare, vel precari, *est quasi animum voce santare.* Meruli enim & psittaci, et corui, et pica, et huiusmodi



*iusmodi volucres saepe docentur ab hominibus cātare, quod nesciunt. vt docet Augustinus in Psal. 18. Vnde apparet illos, qui ignota lingua precantur, similes esse auibus, quæ voces sonare edocentur, & earum vim ignorant. Sed si quis auē doceat pronunciare Symbolum Apostolorum ( quod de Cardinali Ascanio refert Cœlius Rhodiginus) vel orationem Domini, vel salutationem Angeli, ille profanaret Dei verbū. Planè eodē modo, qui ignota lingua preculas quasdam recitat, Dei verbum profanat, & naturæ ordinem inuertit. Sermo enim homini datus est, vt per eum homo alijs sententiam suam explicet, & per eūdem aliorum sententiam intelligat. Atqui Papisticæ preces & cantiones non solū indoctæ plebeculæ; sed ipsis etiam Sacrificulis sæpè ignotæ sunt. Quid enim iste sacrificus intellexerit, qui baptizabat in nomine Patriæ, & Filia, & Spiritu Sancta. Item quid ille intellexerit qui scripsit, Cuius Dominus humilitatem respiciens, concepit redemptorem mundi, iudicet Bellarminus: Sanè Sixtus Senensis veritate victus, cogitur fateri non solū eum, qui supplet locum Idiotæ; verū etiam ipsos Presbyteros & Diaconos, qui orant, sæpenumerò non intelligere, quid oretur. Bib. 6. annot. 263. Dicat nunc Bellarminus, an tales sacrificuli à mernlis & psittacis, de quibus Augustinus loquitur, quicquam differant, imò annon isti Sacrificuli Deum & homines rideant, eiusq; verbum profanent? tantum abest vt Deum per eiusmodi ineptias honorent. Sed neque homo per preces ignotas ædificatur, Ambrosius in 1. ad Corinth. 14. Si utique ad adificandam Ecclesiam conuenitis, ea dici debent,*

*quaintelligent audientes. 1. ad Cor. 14. vers. 6. Si veniam ad vos lingua loquens, quid vos inuabo? hoc est, vt Oecumenius explicat, non sum vobis vlla in re utilis. & vers. 9. Nisi per linguam bene significantem sermonem edideritis, quomodo intelligetur quod dicetur, eritis enim in aëra loquentes, hoc est, vt Oecumenius explicat, frustra & inutiliter loquemini. vel vt Chrysostomus explicat, homilia 35. in 1. ad Corinth. Disceditis nullum lucrum capientes ex voce quam non intelligitis. Augustinus libro 12. de gen. ad litteram. cap. 8. nemo edificatur audiendo, quod non intelligit. & vt hoc argumentum concludam, ipsa ratio hoc docet. Nam cum verba sint signa rerum, clarum est res non intelligi, nisi verba intelligentur: ac proinde qui verba non intelligit, ille eorum sensum non percipit, & non edificatur. Cum igitur per preculas ignota lingua conceptas, neque Deus honoretur, neque populus edificetur, manifestum est eas ab homine Christiano vsurpari non debere. Hæc est ipsa veritas.*

*Secundum Argumentum quia preces ignota lingua conceptæ inutiles sunt. Argumentum tale;*

*Quod inutile est, hoc in Ecclesia fieri non debet.*

*Sed preces ignota lingua conceptæ inutiles sunt. Ergo preces in Ecclesia non debent ignota lingua concipi.*

*Maiores est manifesta, Ex quo enim nulla vtilitas colligi potest, illud in sacro cœtu vsurpari non debet. Minor probatur. Mat. 15, 8. Appropinquat mihi Populus hic ore suo, & labijs honorat me, cor autem eorum procul abest à me. 1. Cor. 14, 14. Nam si preces lingua Spiritus*

*Spiritus meus precatur, sed intelligentia mea est infructuosa.* Bellarminus negat minorem, & dicit *publicam Ecclesiæ orationem ignota lingua conceptam esse populo utilem, quia non fit populo, sed Deo: ac proinde non esse necesse, ut populus eam intelligat, satis esse si Deus eam intelligit.* Hæc Bellarmini responsio primùm implicat contradictionem. Eam enim vocat *publicam Ecclesiæ orationem*, quæ non est Ecclesiæ. Cætus n. in templo conuocatus, hoc est, tota multitudo Euangelij audiendi causa congregata est Ecclesia. Hæc autem multitudo tacet, & non precatur, neque potest precari. Ergo oratio papistica, quæ fit in templo, non est Ecclesiæ oratio. Nec est quod regerat *Sacrificos precari.* Illi enim non sunt Ecclesia: sed tantum præcones (dico non qui sint, sed qui esse debeant) in Ecclesia. Ac proinde illorum precatio nō potest Ecclesiæ precatio dici, nisi Ecclesia idem cum illis vel aperta voce, vel tacito consensu oret. Sed populus idem cum illis nec aperta voce orat; linguam enim ignorat: nec tacito consensu, nihil enim intelligit. Deinde dicit *publicam Ecclesiæ precatorem non fieri populo: sed Deo pro populo.* Manifestè igitur inter Ecclesiam, & populum Euangelij audiendi causa in templo congregatum distinguit. Atqui iste populus est ipsa Ecclesia. Nisi hoc fateatur, doceat, quænam sit *ista Ecclesia, quam presbyteri debent pascere?* Actor. 20, 28. Cùm igitur hæc Bellarmini distinctio inter populum Euangelij audiendi gratia in templo congregatū & Ecclesiā falsa sit, cumq; hoc dogma ex ista distinctiōe ortum sit; ipsum etiam dogma falsum esse necesse est. Præterea quod dicit Bellarminus *publicas*

*blicas preces non fieri populo, falsum est. Deus enim iubet vt Idiotæ, hoc est, vt Chrysostomus interpretatur, promiscua plebs ad eas respondeat Amen, 1. Cor. 14, 16. Sed illud, ad quod promiscua plebs Amen respondere debet, fit populo. Populus enim cū Amen dicit, confirmat orationem. Nam, vt inquit Ambrosius in 1. ad Corinth. 14. cap. per hos completur confirmatio precis, cū respondetur Amen, vt omnia dicta veri testimonio in audientium mentibus confirmentur. Deinde Paulus iubet omnia, quæ in Ecclesia fiunt, ad ædificationem fieri, 1. Cor. 14, 26. Sed quæ ad ædificationem fiūt, illa fiunt populo. Non enim Deus, sed populus ædificatur. Prætereā in publicis primitiæ Ecclesiæ conuentibus fiebant sacra preces, cationes, lectiones, conciones, Sacramentorum administrationes, gratiarum actiones, & prætereā nihil, atq; his partibus omnis liturgia, hoc est, Ecclesiasticum ministerium tum absoluebatur, Iustin. Apol. 2. Plin. in Epist. ad Traian. Sed hæc omnia ad populi ædificationem instituta sunt. Ergo fiunt populo. Hanc ob causam iubet Paulus eum, qui ignota lingua loquitur, tacere, si non sit interpres, ac vult, vt sibi & Deo loquatur, 1. Cor. 14, 28. hoc est, vt interpretatur Ambrosius, tacite intra se oret, aut loquatur Deo, qui audit muta omnia, & addit causam: In Ecclesia enim, dicens, ille loqui debet, qui omnibus prodest. Idem docet Chrysost. homil. 36. in 1. ad Corinth. Si, inquit, non est interpres, sileto: Nam supernacaneum nihil fieri debet, neq; ad ostentationem. Sibi ipsi verò loquatur & Deo, hoc est, animo & cogitatione, aut sine strepitu priuatim. Hinc apparet, omnia illa, quæ in Ecclesia fiunt, Deo, non populo;*

populo, debere tacite fieri : & contrà omnia illa, quę in Ecclesia fiunt populo, debere alta voce, eaque omnibus nota fieri. Si igitur Sacrificuli *Deo canunt & precantur*, vt inquit Bellarminus, *tum loquantur sibi & taceant*, vt iubet Paulus, *aut orent tacite intra se*, vt docet Ambrosius, aut deniq; *loquantur animo & cogitatione, & sine strepitu priuatim*, vt præcipit Chrysostomus. Hoc docet Augustinus, generaliter enim dicit *non opus esse locutione, id est, sonantibus verbis, cum oramus, nisi forte, sicut sacerdotes faciunt, mentis significanda causa, non vt Deus, sed vt homines audiant, & cōsensione quadam per commemorationem suspendantur in Deum*. De Magistro capite 1. Aut igitur taceant Sacrificuli, aut orent lingua nota. Nam qui lingua auditoribus ignota orat, ille *mentem suam non significat*, à nemine enim intelligitur, neque cum *quisquam audit*, vt inquit Paulus 1. Corinth. 14, 2. Nam vt docet Cicero *in ijs linguis, quas non intelligimus, surdi sumus*, Tusc. Quæst. libro 5. in fine. Hanc ob causam Iustinianus iubet. Authēt. 123. *vt omnes Episcopi (nota Imperatorem posse Episcopis iubere, & Ecclesiasticas leges ferre) pariter & Præsbyteri non tacito modo, sed clara voce, quę à fidei populo exaudiatur, sacram oblationem, & preces in sacro baptismo adhibitas celebrent : quo maiore exinde deuotione in promendis Dei laudibus audientium animi offerantur*. Ita enim & D. Paulus docet, *dicens in 1. ad Cor. Epist. Enimuero si solummodò benedicas spiritu, quomodo is, qui priuati locum implet, dicet ad gratiarū actionem Dei, ipsum Amen. Quandoquidem quid dicas nescit. Tu quidem pulchrè gratias agis, alter aut non ædificatur*.

*Hisigitur de causis conuenit, ut inter ceteras preces, & ea quæ in sancta oblatione dicuntur, clara voce à religiosissimis Episcopis & Presbyteris Domino nostro Iesu Christo cum Patre & Spiritu Sancto proferantur: scituris religiosissimis sacerdotibus, quod si quid horum neglexerint, & in horrendo iudicio magni Dei de his rationem reddent, neque nos hac cognoscentes (nota Imperatorē posse Episcopos punire) relinquemus inultis. Cum hoc Imperatoris edicto consentit Cyprianus, in sermone, de orat. Dom. in fine, Sacerdos, inquit, ante orationem præfatione præmissa, parat fratrum mentes dicendo, sursum corda, ut dum respondet plebs, habemus ad Dominum, admoneatur se nihil aliud, quàm Dominum cogitare debere. Dupliciter igitur errat Bellarminus, primùm quòd preces ignota lingua faciendas putet, Deinde quòd eas populo fieri neget. Et dum illud per hoc probat, petit principium, & illud quod incertum est, probat per illud, quod æquè incertum est. Cæterùm publicas preces, imò tota λειτουργία, hoc est, Ecclesiasticum ministerium fit populo & Deo, Deo, ut glorificetur, populo ut ædificetur. Hi duo fines semper sunt & fuerunt Ecclesiastici ministerij fines, ut præcedente argumento probauimus. Atque inter eos gloria Dei est vltimus finis, ædificatio populi est finis subordinatus. Suntque hi duo fines ita inter se iuncti, atque deuincti, ut alterum sine altero, assequi non possis. Nam si ministerium ita instituis, ut populus ædificari non possit, tum ex eo ad Deum nulla gloria redit. Et contrà si illud ita instituis, ut Deus per illud glorificari non possit, tū ex eo populus non ædificatur. Hæc sunt manifestiora, quàm*

ra, quàm vt probatione opus sit. Cùm igitur legitimus ministerij finis, sit populi ædificatio, negare illud populo fieri, nihil aliud est, quàm dicere, Solẽ meridie non lucere. Porro tempore primitiue Ecclesiæ preces fiebant populo, & populus eo tempore in publicis precibus suas partes habebat, preces item tum concipiebantur lingua audientibus nota, vt antè ostendimus. Cùm igitur in nostris Ecclesijs idem facere cupiamus, desinant nobis religionis nouitatem exprobrare papistæ, imò recipiant priscos Apostolicos ritus, atq; doctrinam, & libenter ad illorum societatem redibimus; aut si scientes & volentes in erroribus perseuerabunt, tolerant saltem, vt nos corruptam religionem ad pristinam integritatem emendemus. Secunda ratio qua Bellarminus Minorem negat, est. *Quia Ecclesia utiliter orat pro absentibus, qui sapè non sciunt pro se orari, tantum abest vt intelligant quid oretur: Orat item Ecclesia sapè utiliter pro infidelibus, qui non volunt pro se orari, & contemnunt nostras preces, tantum abest vt intelligant eas, vtrumque autem fit cum fructu. Ergo & preces ignota lingua conceptæ in Ecclesia, inutiles esse non possunt.* Respondeo esse magnam dissimilitudinem. Vt enim pro alijs etiam absentibus, & pro infidelibus etiam hostibus nostris oremus, est mandatum Dei, & habet exemplum in scriptura, Iacob. 5, 16. *Orate alij pro alijs.* Matth. 5, 44. *Orate pro persequentibus vos.* Lucæ 23, 34. *Christus orat pro ijs, à quibus crucifigitur.* Rom. 1, 9. *Paulus orat pro Romanis, qui aberant.* Sed ignota lingua in Ecclesia precari, neque est mandatum Dei, neque habet exemplum in scripturis. Mandatum verò est in scriptura,



ut preces fiant lingua nota, ut antè probauimus: & ita factum est apud omnes gentes in tota primitiua Ecclesia. Deinde inter quæstionem, & medium terminum nulla est cohærentia. Longè enim aliud est, orare pro alio ut absente & ignorante, & precari cum alio ut presente & sciente, vel cum Ecclesia, ut Ecclesia ipsius membrum communes preces ad Deum fundere. In Ecclesia enim docemur exemplo Christi & Apostolorum, non alij pro absentibus & ignorantibus precari: sed *προσκαρτερεῖν ὁμοθυμαδὸν τῇ προσυχῇ καὶ τῇ διήσει*, concorditer vel unanimiter precari. Vnde apparet preces quæ ab Ecclesia fiunt, ita fieri pro Ecclesia, ut ab ipsa Ecclesia proficiscantur. In Ecclesia enim nihil fieri debet, nisi à tota Ecclesia, & nomine totius Ecclesiæ consentientis, approbantis & respondentis Amen, ac proinde intelligentis id, quod agitur: & ita factum esse in primitiua Ecclesia docuimus ante. Tertia ratio qua Bellarminus Minorem negat, est. *Quia Sacerdos in Iudæica Ecclesia*, Leuit. 16. *ingrediebatur in sanctuarium cum oraret, populus autem stabat foris, neque audiebat eius vocem, tantum abest, ut intelligeret, quid oraret.* Ergo, inquit Bellarminus, preces ignota lingua concepta à Sacrificio inutiles esse non possunt. Respondeo esse magnam dissimilitudinem, illud enim erat à Deo mandatum Leuitic. 16, 17. *Nullus autem homo erit in tabernaculo Ecclesia, dum ingreditur ipse* (loquitur de Sacerdote) *ad emundandum in Sanctuario, donec egrediatur ipse, &c.* Ostendat Bellarminus expressum mandatum ex Sacris literis, quo Deus præcipit sacra ignota lingua celebrari, & assentiemur ei. Deinde illud est typicū, quemadmodum in epist. ad Hebr. copiosè explicatur.

tur. Sacerdos enim in Veteri Testamento, vt imago Christi venturi, intercedebat inter Deum & homines, & ob eam causam solus introibat in sanctuariũ. Nunc verò Christus mediatorem agit inter Deum & homines, & in cœlesti sacrario pro omnibus Ecclesiæ membris apparet, eorumque preces Deo patri gratias efficit. Præsbyteri igitur & Episcopi nunc non ampliùs mediatoris officium administrant; sed vt Ecclesiæ membra vnà cum ipsa Ecclesia cõmunes preces per vnum illum mediatorẽ ad Deum fundũt. Ac proinde velo scisso non amplius quasi pro absente, & atrij interstitio exclusa Ecclesia precantur; sed more Apostolorum, & totius primitiux Ecclesiæ consuetudine preces suas cum plebis precibus coniungunt, Heb. 10, 9. *Cũ igitur fratres habeamus libertatem ingrediendi sacrarium per sanguinem Iesu, accedamus cum vero corde, id est, accedat tota Ecclesia.* Per verbum enim *accedamus*, intelligit seipsum, qui scribit, & omnes eos, ad quos scribit. Porro ex hoc loco apparet nostrum pontificem suum sacrariũ omnibus credentibus aperuisse. Et ob eam causam populum nunc non foris expectare vt in Veteri Testamento; sed intus cum sacerdotibus vnã & communem orationem Deo offerre. Chrysost. in 2. ad Corinth. Homil. 18. *Communes preces à sacerdote & ab ijs fiunt, & omnes vnã dicunt orationem.* At quomodo populus cum sacerdotibus vnã dicet orationẽ, nisi eam intelligat; Quarta ratio qua Bellarminus minorem negat. *Quia Iudæ colebant Deum varijs ceremonijs & figuris, quarum significationes multi non intelligebant.* Ergo preces ignota lingua conceptæ inutiles esse

*non possunt.* Respondeo, est magna item dissimilitudo. Nam vt Iudæi Deum figuris & ceremonijs cohererent, erat mandatum Dei, vt autem ignota lingua precemur, est contra mandatum Dei, & contra primitiue Ecclesiæ exemplum. Deinde nemo erat in populo Iudaico, qui prorsus ignoraret, quid illi ritus sibi vellent, quotidie enim instituebantur à Leuitis, sacerdotibus & prophetis. Sed sunt multi qui ne *re* quidem de omnibus sacris papisticis intelligunt. Nam vt antè dixi, noui ego multos papistas senes, qui neque *orationem dominicam*, neque *symbolū Apostolorum*, neque *decalogum Domini* tenebant. Quid autem tales homines proficerent ex precibus ignota lingua deblateratis? Quinta ratio, qua Bellarminus minorem negat, est, *Quia preces hæreticae secundū Augustinum sunt utiles, ergo preces ignota lingua conceptæ, non possunt inutiles esse.* Hoc argumentum indignum iudico ad quod respondeatur. Deinde hoc ipsum argumentum Bellarminum refutat. Dicit n. ex Augustino *vitium precis superari ab affectu precantis.* Vnde apparet affectum requiri, Sed si affectus requiritur, tum etiam intelligētia requiritur. Nemo enim eo, quod non intelligit, afficitur. Debent igitur preces nota lingua concipi. Sexta ratio negatæ Minoris est. *Quia nullus homo perfecte intelligit psalmos, & tamen multi utiliter orant psalmos Davidis.* Ergo dicit Bellarminus *preces ignota lingua conceptas non esse inutiles.* Respondeo esse fallaciam à dicto secundum quid ad dictum simpliciter. Nam nemo psalmos legit, quin aliquid intelligat, & si diligens esse volet, potest quotidie proficere. Ergo psalmorum  
lectio

lectio est utilis. Multi verò de precib' ignota lingua conceptis prorsus nihil intelligunt, neq; quicquam possunt proficere. Ergo preces ignota lingua conceptæ sunt prorsus inutiles.

His positis respondet Bellarminus ad scripturæ testimonia, quibus minorem probamus, ac primum ad illud Matth. 15, 8. *Populus hic labys me honorat, cor eorum longè abest à me*, & putat preces ignota lingua conceptas non flagellari hoc testimonio, dicit enim eos reprehendi, qui ore iactant pietatem, quam factis non præstant. Sed errat Bellarminus toto cælo. Christus n. reprehendit eos, qui per traditiones suas Dei mādātum irritum faciebant, vel qui homines docebant doctrinas & mandata hominum. Vers. enim 4. & 5. scriptum est, *Honora patrem & matrem, & qui maledixerit patri aut matri morte moriatur, vos autem dicitis, Quicumque dixerit patri aut matri Donum est, quocunq; a me iuvare posses, insons erit, & nequaquam honoraverit patrem suum aut matrem suam*. Hos ita per traditiones humanas Dei mandata violantes, dicit Christus, ore ad Deum appropinquare, corde verò non accedere, hæc est legitima huius loci explicatio, & ita explicat Hieronymus in 29. capite Esaiæ. Vnde extruimus hanc maximam.

Quicumque per doctrinas humanas Dei mandata violant, illi ore propinquant ad Deum, sed cor eorum longè abest à Deo. At qui docent solos sacrificos debere in Ecclesia orare, idque ignota lingua, populum autem iubent prorsus tacere; illi per suas humanas doctrinas Dei mandatum violant. Deus enim iussit vt Idio-  
ta

ta respondeat *Amen*, & vniuersa primitiua Ecclesia obseruauit, vt *totus populus in Ecclesia caneret, & Amen responderet*, & vt omnia fierent lingua nota. Ergo qui docent preces à solis sacrificiis ignota lingua concipi debere, illi ore propinquant ad Deum, cor verò eorum longè abest ab eo.

Hæc est genuina sententia huius loci, & fatebitur hoc ipse Bellarminus, si omnia diligenter expēdet. Iam verò subiungimus:

Qui preces ignota lingua in Ecclesia concipiunt, illi tantum ore propinquant ad Deum. Sed non debemus ore tantum appropinquare ad Deum. Ergo non debemus preces ignota lingua concipere.

Deinde respōdet ad alterum testimonium, quod est, i. ad Corinth. 14, 14. *Si precor lingua, spiritus meus precatur, sed intelligētia mea est infructuosa*, & dicit hoc testimonio non comprehendere preces ignota lingua conceptas, sed his dicit præponi eas, quæ sunt nota lingua conceptæ. At hoc nobis sufficit, cum n. modum debemus usurpare in precando, ex quo plus vtilitatis consequi possumus. Sed quando precamur lingua nota, inde plus vtilitatis consequimur, quàm quādo precamur lingua incognita. Ergo debemus preces nota lingua concipere. Deinde dicit Bellarminus, Paulum non dicere orationem esse sine fructu, quia affectu proficit, sed mentem esse sine fructu, quia nihil intelligit. At hæc duo nempe proficere affectu, & tamen nihil intelligere, sunt contradictoria, & simul vera esse non possunt. Desiderium enim nō iuuatur ijs rebus, quas prorsus  
non

non intelligit. Nihil enim affectus vel desiderium tuum proficit, siue aliquot ignota verba recitas, siue non recitas. Deinde vera oratio cum fide indissolubili nexu est coniuncta. Sed fides cum bruta & crassa ignorantia simul consistere non potest. Huc accedit Bellarminum petere principium, dicit enim *si rusticus latine lingua prorsus imperitus oraret 7. psalmos latine, cum proficere affectu, & bona intentione. Ergo preces ignota lingua conceptas, non sunt inutiles.* Sed illud antecedens negamus verum esse, & suo loco ostendemus falsum esse. Est igitur inter nos controuersum, dum igitur sacra peregrina lingua cōcepta per preculas ignota lingua cōceptas probat, probat illud quod controuersum est, per illud quod æquè controuersum est. Præterea quod negat Apostolum *reprehendere preces ignota lingua conceptas*, hoc falsum est. Et vt hoc commodius intelligatur, explicabimus hoc Apostoli testimonium. *Si precer lingua, spiritus meus precatur, sed intelligentia mea est infructuosa.* Precer, accipitur in natiua significatione, & intelligitur de ijs precibus quæ fiunt *τῇ ἐκκλησίᾳ*, vers. 19. & quibus Idiota respondet Amen. vers. 16. Vnde apparet eum loqui de publicis precib⁹, & de ijs quæ fiunt alta voce. *Lingua*, loquitur de lingua incognita. Hierony. ad dictum locum, *lingua, scilicet incognita.* & vers. 2. *Qui loquitur lingua, non loquitur hominibus, sed Deo, nullus enim audit.* Cum quo congruit illud Ciceronis Tusculan. 5. *in ijs linguis, quas non intelligimus, surdi sumus.* Vnde apparet eum loqui de lingua ignota, sensus igitur est, si in Ecclesia preces ignota lingua concipiam. *Spiritus meus precatur.* Bel-  
larmi-

larminus per spiritum intelligit intentionem, affectum vel desiderium precantis, ut sit sensus, affectu & desiderio precantis proficio, sed hæc interpretatio non est sana. Spiritus n. septies usurpatur in hac disputatione, sed nunquam in eo sensu. Deinde Sp. hoc loco & v. 2. *Spiritu loquitur mysteria*, ponitur in eodem sensu. Sed *Spiritus* istic significat afflatum quem Sp. dedit. Ergo & hoc loco *Spiritus* tale afflatum qui à Spiritu datur, significat. Eodem modo explicant ferè omnes Doctores, Basil. quæst. 278. *Spiritus alicuius orat*, idem est, atque *aliquis orationem edit lingua omnibus ignota*. Eodem modo explicat Ambro. in Epistola 1. ad Corinth. capite 14. ad ea verba. *Si benedixeris Spiritu*, hoc enim secundum Ambrosium est, *Si laudes Dei loquaris lingua audientibus ignota*. Hierony. eodem modo interpretatur in 14. ad Cor. Epist. 1. *Spiritu loquitur mysteria*. Spiritus, inquit Hierony. *sterum linguam significat*, at lingua in eodem versu significat linguam ignotam. *Nam qui loquitur lingua*. Ergo & spiritus hinc secundum Hieronymum significat linguam ignotam. Et ut omnia in pauca contraham, *Spiritus* hoc cap. per Metonymiam ponitur pro eo, quod à Spiritu datur, videlicet pro afflatu, qui à spiritu proficiscitur, vel pro ignota lingua, quæ ab eiusmodi afflatu proficiscitur, vel pro verbis ignota lingua conceptis. Atque ita Spiritus toto capite accipitur, nisi quod versu 32. *Spiritus Prophetarum* ponitur pro doctrina Prophetarum, quæ à Spiritu proficiscitur, eadem Metonymia, sensus igitur est, cum in ecclesia ignota lingua precor, edo orationes lingua audientibus ignota. *Sed mens mea est infructuosa*. Hæc ferè eodem modo



papistæ nobiscum accipiunt, sed non eodem modo nobiscum applicant. Infructuosum enim est ex eorum numero, quæ sunt  $\pi\epsilon\delta\varsigma\ \tau\iota$ . Nam infructuosum est, quod alicui infructuosum est. Papistę hoc intelligunt de solo precante, & dicunt eius mentem esse infructuosam, quia per preces ignota lingua cōceptas non eruditur ille, qui ita orat. Sed hæc interpretatio pugnat cum Paulo. Vers. n. 4. dicit Apostolus, *Qui loquitur lingua, seipsum edificat*. Nos igitur dicimus Orantis mentē esse infructuosam, non sibi; sed alijs. Atq; hæc interpretatio conuenit cum textu Pauli, vult n. alios respondere *Amē*. Deinde doctiss. Patres ita explicant, Basil. quæstione. 278. *Quærit quomodo Spiritus alicuius orat, mens est infructuosa? Hoc de his qui lingua audientib. ignota orationes edūt, dictū est. Dicie n. si orem lingua, Spiritus meus orat, mens verò mea infructuosa est. Cū n. ignota fuerint presentibus verba orationis, infructuosa est mens orantis, cū nemo utilitatē capiat. Quum verò presentes intellexerit orationē prodesse audientibus potentem, tunc is qui orat, fructum habet; quod hi qui utilitatem capiunt, meliores redduntur.* Similiter loquitur Apostolus vers. 6. *Si venero ad vos loquens linguis, quid vos iuuabo?* Chry. illud explicat in hūc modū, *disceditis nullum fructū percipientes ex voce quam nō intelligitis.* Vnde apparet eū loqui, non de fructu loquētis, sed de fructu audientiū. Sēsus igitur est, cū in ecclesia preces ignota lingua fundo, profero verba lingua omnibus incognita, idque ex afflatu Sp. Sancti, sed auditores ex ista oratione, nullam vtilitatem consequuntur. Apost. verò reprehendit, & vetat illa fieri, quæ non afferunt vtilitatē, vult n. omnia re-  
ferri

ferri ad ædificationē. Ergo ꝓhibet preces ignota lingua cōcipere. Hæc etsi vera sunt, conatur tamē Bellarminus ꝓbare preces ignota lingua cōceptas non esse infrugiferas. Vers. n. 17. dicit. *Nam tu quidem benè gratias agis*, loquitur autem Apostolus de gratiarum actione ignota lingua facta. Ergo inquit Bellarminus, preces ignota lingua factæ non sunt inutilles. Respond. esse ignorationem Elenchi. Nam nō rectè opponuntur, sunt enim simul vtilles, & non vtilles. sed non iisdem: loquenti sunt vtilles, vt antè probaui, ex vers. 4. sed audientibus sunt inutilles, Dicit enim eodem versu, *sed alius non edificatur*. Rectè Ambrosius ad ista verba: *Tu quidem benè gratias agis*, de eo dicit, *qui cognita lingua sibi loquitur, quia scit, quid dicat.* & ad ea verba. *Sed alius non edificatur*, rectè idem Ambrosius. *Si utique ad edificandam Ecclesiam conuenitis, ea debent dici, quæ intelligant audientes. Nam quid prodest, vt quis lingua loquatur, quam solus scit, vt qui audit, nihil proficiat? Ideo tacere debet in Ecclesia, vt ñ loquantur, qui profunt audientibus.*

Vnde sic colligo:

Qui non profunt audientibus, debent tacere in Ecclesia, sed qui ignota lingua vtuntur in Ecclesia, illi nō profunt audientibus. Ergo q̃ ignota lingua vtuntur, illi debēt tacere in Ecclesia.

Expende hoc argumentum Bellarmine, & respōde Ambrosio. Deinde dicit Apostolum loqui de ea lingua, quam nemo, imò ne ipse quidem loquens intelligit. Sed lingua latina, qua papistæ sua sacra faciunt, intelligitur à Sacrificis. Ergo Apostolus non loquitur de lingua latina. Respond. Maiorem falsam esse,

esse, vers. enim 4. dicit, *Qui loquitur lingua, seipsum edificat*, Sed ædificatio non est absque intellectu. Ambrosius ad istum locum annotat, *Per id quod forte solus sit, lego scit, q̄ loquitur, se solū edificat, Nam qui prophetat, omnem plebem edificat, dum intelligitur ab omnibus, quid loquatur.* & vers. 17. dicit, *Et tu quidem benè gratias agis*, vbi Ambrosius, *de eo dicit, qui cognita sibi loquitur, quia scit, quod dicat.* Vnde apparet maiorem falsam esse, falsa igitur & cōclusio. Sed & minor quandoq; falsa est. Pleriq; n. Monachi & sacrifici nihil intelligunt, neq; quicquam benè pronunciant in Ecclesia. Exemplum istius sacrifici, qui dicebat, *Baptizate in nomine Patria, & Filia, & Spiritu Sancta*, & ille fuit inter Monachos doctissimus. Nam multi sunt, qui tantum non possunt pronunciare, Vnde sequeretur omnia Sacra ab indoctis Monachis facta, esse illicita. Non n. intelligunt linguam, qua utuntur. Addit Bellarminus, *licet mens Rusticorum manet sine fructu, tamen affectus eorum non manet sine fructu.* Sed ante probavi, hoc esse principium petere, & cōtrouersum probare per controuersum. Postremò dicit Bellarminus, *fructum mentis, qui deest idiotis, multis alijs fructibus compensari. Primò quia sacra illis sæpè communissima lingua, id est, latina praeleguntur,* Sed hoc est ridiculum & falsum. Ridiculum, siue enim ignota verba semel, siue millies, siue nunquam audiant, nihil consequentur utilitatis. Tales enim Sacrifici sunt *οἱ ἀγνοῦντες τὰ λαλῶντες*. Falsum, quia latina lingua non est communissima, imò ne communis quidem. Commune enim est, quod est duorum, vel plurium, & lingua quælibet illis communis est, qui

simul sciunt, & vsurpant illam linguam. Quod autem alicuius non est, neque usu, neque possessione, hoc illi cum nemine commune est, imò hoc prorsus ad eum non pertinet. Iam verò latinam linguam non sciunt, neque vsurpant Idiotæ, neque possunt vsurpare. Ergo illa non est Idiotis cum alijs communis. Imò nullo modo ad Idiotas pertinet. Et vt vno verbo dicam, tam est Idiotis latina communis, quàm hebræa. Imò latina lingua non tantùm non cõmunis est idiotis cum doctis, sed ad illos nullo modo pertinet. Est enim illis prorsus incognita, & ob eam causam Idiotæ nullam vtilitatẽ ex ea percipere possunt. Sacra igitur publica ea lingua prorsus fieri non debent. Tertium argumentum, Quia preces publicæ ita institui debent, vt populus illas intelligere possit.

Quod à populo intelligi debet, hoc nota lingua concipiendum est. Sed preces publicæ à populo intelligi debent. Ergo preces publicæ nota lingua concipiendæ sunt.

Maiores non opus habet probatione, Minores probabo, 1. Corinth. 14, 14. *Quia ille qui locum Idiota supplet, debet respondere Amen.* Ille verò est ipse Idiota, Ambrosius ad dictum locum, *eum, qui Idiota locum implet, vocat imperitum.* Hieronymus ad dictum locum dicit, *Laicum intelligit, qui nullo gradu in Ecclesia fungitur.* Chrysostomus Homil. 35. in 1. ad Corinth. *Ἰδιώτην δὲ λαϊκὸν λέγει.* Interpres Chrysostomus vertit. *Idiotam promiscuam turbam, & rectè. Idiota enim per Synecdochē, promiscuam multitudinem significat.* Iustinus enim in Apologetic. 2. *πᾶς ὁ λαὸς ἐπευφημῶ Ἀμήν.* Hiero.  
in

in Proœmio, 2. libr. ad Galatas. *Totus populus instar tonitruï respondet Amen.* Augustinus in psalm. 54. *Vnum psalmum cantamus, unum respondemus Amen.* Bessarion de Sacrament. Eucharist. Sacerdote verbaila pronunciante, *populus assistens in utraque parte respondet Amen,* Vnde apparet totum cœtum debere acclamare *Amen.* Et ita factum est in primitiua Ecclesia. Sed nemo potest respondere *Amen,* nisi intelligat, quid dicatur. *Respondere enim Amen est confirmare benedictionem,* vt Ambrosius interpretatur, vel est *benedictioni consensum vel testimonium perhibere,* vt explicat Hieronymus. Hoc autem nemo facere potest, nisi intelligat id, cui consensum vel testimoniũ perhibere debet. Rectè Ambrosius ad dictum locum. *Imperitus audiens quod non intelligit, nescit finem orationis, & non respondet Amen, id est, sit verum, vt confirmetur benedictio.* Per hos enim impletur confirmatio precis, qui respondent *Amen,* vt omnia dicta veri testimonio in mentibus audientium confirmentur, Chrys. hom. 35. in 1. ad Corinth. *Si tu benedixeris spiritum, id est, si tu peregrina lingua gratias agis, quam nec ipse intelligas, nec ceteris interpreteris, plebeius non potest subijcere Amē.* August. de Cate. Rudib. cap. 9. *Et populus ad id quod plane intelligit, dicat Amen.*

Ad quod populus debet respondere *Amen,* hoc debet intelligere, sed ad preces publicas debet respondere *Amen.* Ergo populus debet preces publicas intelligere: & ob eam causam debent preces ea lingua concipi, vt à populo intelligi possint.

Quartum Argumentum. Quia Innocentius, 3.

*inbet, ut Episcopi populis diuersarum linguarum & rituum diuina sacra celebrent, secundum diuersitatem linguarum & rituum.*

Magna equidem Papæ habenda est gratia, dū hoc permittit, quod Deus mandauit. Bellarminus respōdet tantū agi de *lingua Græca & Latina*. Sed hoc nō est verisimile. Nam qui Constantinopolin ceperant, erant ex Gallis, Germanis, Anglis, Italis & alijs gentibus collecti. Dum igitur promittit se velle idoneos viros prouidere, qui diuina officia diuersis linguis administrarent, manifestum est eum loqui de omnibus & singulis populis, qui istam urbem subegerant, & ibi adhuc hærebant. Deinde dicit, Illud nunquam in Italia obseruatum esse. Respondeo non esse nouum, ut Paparum cōstitutiones in ipsa Italia negligantur, & propter hanc vel negligentiam, vel tyrannidem conqueruntur saniores papistarum doctores. Lyra in 14. ad Corinth. *Quod si populus intelligit orationem vel benedictionem Sacerdotis, melius reducitur ad Deum, & deuotius respondet Amen.* Et paulò post, *Quid proficit populus simplex & non intelligens? quasi dicat, nihil, aut modicum, quod nescit se confirmare tibi, qui es minister Ecclesie, respondendo Amen, propter quod in primitiua Ecclesia benedictiones, & cætera communia fiebant in vulgari.* Caietanus in 1. ad Corinth. cap. 14. *Ex hac Pauli doctrina habetur quod melius ad Ecclesie adificationem est, orationes publicas quæ audiente populo dicuntur, dici lingua communis clericis & populo, quam dici latine.* Hinc intellige nō rectum esse, quod fit in Italia, sed quod fieri debet.

Quintum Argumentum. Quia finis diuinorum  
• offi-

officiorū est populi instructio, consolatio, & ædificatio, sed ex sacris ignota lingua conceptis neque instructio, neque consolatio, neque ædificatio percipi potest. Ergo non debent ignota lingua concipi. Minor probatur ex 1. ad Cor. 14, 26. *Omnia sunt ad ædificationem.* 1. Cor. 14, 19. *Malo quinque verba ex intelligentia mea loqui, ut alios instituam.* Bellarminus negat Maiorem, & dicit ædificationem non esse factorum publicorum finem. Hanc negationem destruximus argumento 1. Ibi enim ostendimus duos esse fines diuinorum officiorum, vnum à parte Dei, alterum à parte nostri, à parte Dei, eius honorem & gloriam, à parte nostri, ædificationem, institutionē & consolationem. Gloriam Dei esse finem diuinorum officiorum concedit Bellarminus, ædificationem verò illorum finem esse negat. Hoc etsi à nobis probatum est argumento primo, tamen nunc diligentius probandum est. Et ut hoc rectè fiat, ostendemus quidnam sit diuinum officium, vel sacrum publicum. Illud autem ex nulla re commodius colligi potest, quàm ex mandato, quo Apostoli à Christo instructi illud administrarunt. Mandatum verò illud est hoc, Matthæi 28, 29. *Docete omnes gentes, baptizantes eos in nomine Patris & Filij & Sp. Sancti, & docentes eos seruare omnia, quæ mandauimus vobis.* Marci 16, 15. *Prædicate Euangelium omni creature,* Lucæ 24, 47. *Oportuit in eius nomine prædicari resipiscentiam & remissionem peccatorum apud omnes gentes.* Actorum 9, 15. *Instrumentum electum est mihi iste, ut perferat nomen meum in conspectum gentium & regum & filiorum Israel.* Romæ. 1, 1. *Paulus Apostolus separatus ad prædicandum*



*Euangelium Dei.* Hoc Apostoli tantum fecerunt. Act. 5, 42. & quotidie in templo & domatim non cessarunt euangelizare Iesum Christum. Paulus cum redditionem sui facti, Act. 20, 25. inquit, *Et nunc ecce, ego scio non amplius visuros faciem meam ullos ex vobis omnibus, per quos transui predicans regnum Dei. Ideo testor vobis hodierno die me purum esse a sanguine omniū. Non enim subterfugi quò minus vobis annuntiarem omne Dei consilium.* Idem fecit Christus ipse, Lucæ 4, 45. *Certe & alijs urbibus oportet me euangelizare regnū Dei, nam ad hoc missus sum.* Vnde necessariò colligo: Euangelizare Euangelium esse diuinum hoc officium. Illud enim sacrum quod Christus primū administravit, & ad quod ille missus est, & quod suis Apostolis præcepit, & quod Apostoli solum celebrarūt, illud, inquam, est hoc diuinum officium, de quo loquimur. Sed euangelizare Euangelium Dei est illud sacrum quod Christus ipse celebrauit, & ad quod Christus missus est, quod Christus suis Apostolis mandauit, & quod solum Apostoli administrarunt. Ergo euangelizare Euangelium Dei, est illud diuinum officium, de quo loquimur. Hoc adeò certum est, ut nullus vnquam Papista sit contrarium vel diuersum ex sacris literis probaturus. Aniles autem nugas extra & contra Dei verbum excogitatas, nunquā pro sacro diuino, vel pro diuino officio assumemus, & ad illa omnia quod attinet, dicimus ea esse inter nos controuersa. Itaque de illorum finibus non sumus solliciti. Vbi verò ad illa refutanda accesserimus, probabimus ea contra Dei verbum instituta esse, neque esse ulli homini Christiano obseruanda, Gal. 1, 8. Si

quis

*quis aliud Euangelium prædicauerit anathema sit.* Istis igitur missis vel in aliud tempus reiectis, loquimur de eo sacro, quod à Christo immediatè in verbo scripto expressum est. Quod denique ipse Christus instituit, quod idem Christus administrauit, quod, inquam, idē Christus suis Apostolis præcepit, & quod Apostoli administrarunt, & præter quod Christus & Apostoli nullum aliud celebrarunt. Hoc autem sacrum vno verbo, est Euangelium prædicare. Huius autem sunt multæ partes, vt adhortari, docere, consolari, orare, Deo gratias agere, eundem celebrare, & laudare, idque vel submissa voce, vt loquendo, vel alta voce, vt canendo, Sacramenta administrare, disciplina honesta omnes coercere. Hæc inquam omnia prædicatione Euangelij continentur, & ita iudicauit primitiua Ecclesia. Iustinus Martyr Apologetico secundo. *Die qui Solis dicitur, omnes tum qui in oppidis, tum qui in agris morantur, in vnum conuenimus, & ex commentarijs Apostolorum vel Prophetarum scriptis recitatur quantum licet. Deinde ubi desistit qui recitat, Antistes orationem habet, qua admonet adhortaturq; ad pulchrarum illarum rerum imitationem. Postea omnes vna surgimus & precamur. Postquam autem à precibus desistimus, profertur panis, vinum & aqua, tum Antistes similiter precatur & gratias agit, quanta potest contetione, populusq; acclamat dicens Amen: & ijs super quibus acta sunt gratia, vnusquisque participat.* Horum autem omnium, imò omnium illarum rerum quæcunq; tempore primitiue Ecclesiæ in Ecclesia fiebant, finis est ædificatio. Ideò dicit Ambrosius illos tacere debere, quos nemo intelligit, vt i loquantur, qui prosunt audienti-

*bis*, in 1. ad Cor. 14. Hoc etsi verum est, tamen lubet audire, quibus argumētis Bellarminus probet finem diuinorum officiorum, non esse ædificationem, sed cultum Dei. Ac primum argumentum est, Quia solorum clericorum est sacrificium laudis Deo immolare, Num igitur soli clerici non opus habent ædificatione? At omnes historiæ testantur eos maximè opus habere. Sed ad rem, Bellarmini Argumentum tale est,

Quod soli clerici faciunt, eius finis non est ædificatio. Sed soli clerici immolant Deo sacrificiū laudis. Ergo finis publicorum sacrorum non est ædificatio, sed cultus Dei.

Maiorem credo esse verissimam. Eius enim officij, quod soli clerici administrant, finem non esse ædificationem testatur totus mundus. Quod verò ad minorem attinet, est illa ambigua. Nam si per Sacrificium laudis intelligit commemorationem beneficiorum Dei, & pro ijs gratiarum actionem, quæ propriè sacrificium laudis est. Tum illa est falsa, hoc non conuenit omnibus & singulis hominibus. Hebr. 13, 15. *Per ipsum igitur assidue offeramus Deo sacrificiū laudis, id est, fructum labiorum confitentium nomini eius. Officium, 14, 3. reddemus* (loquitur de toto Israhel) *vitulos labiorum nostrorum.* Vnde apparet totius multitudinis esse Deum laudare, & ita factum est in primitiua Ecclesia. Iust. Martyr. apologet. 2. *Postea omnes unā surgimus ac precamur.* Basiliius hom. 63. *Ex nocte enim consurgit apud nos populus ad domum orationis, & in labore ac tribulatione & continuis lachrymis confitētes Deo. Postremo surgentes ab oratione ad Psalmodiam conueniunt.*

Idem

Idem ex omnibus alijs Patribus probari potest. Si verò intelligit, de Missa, petit principium. Neque hoc pugnat cum Esaia, qui cap. 62, 9. dicit *Custodes neque die neque nocte tacere debere.* Nam si Sacerdotes semper debent pro populo Deum laudare, orare, & vigilare; istinc non sequitur populum ipsum neq; laudare Deum, neque orare, neque vigilare debere. Vtrumque enim fieri debet, sed cum hac differentia, vt singuli ferè pro sese, sacerdotes pro vniuerso cœtu gratias agant. Secundum argumentum est. Quia nemo est nisi imperitissimus qui non intelligat latine. Hoc ita falsum est vt sola negatione destruat. Omnes n. ferè Laici in multis regionibus nihil intelligunt de latina lingua. Postremò dicit loca ex 1. ad Corinth. 14. suæ sententiæ non aduersari. Fatetur n. scripturas afferre vtilitatem, sed hoc fieri dum docti eas legunt, & dum illæ indoctis à cōcionatoribus explicantur. Hoc etsi verum est, magnam tamen vtilitatem afferunt, etiam cū indocti eas legunt. vt cap. 4. ostendimus.

Sextum Argumentum. Quia Christus & Apostoli Vernacula lingua in sacris publicis vli sunt. Quemadmodū Christus & Apostoli sacra publica administrarunt, ita etiam & nunc administrari debent. Sed Christus & Apostoli administrarunt sacra publica nota lingua. Ergo & nunc nota lingua administrari debent.

Hoc argumentum Bellarminus eludit, & dicit à prædicatione ad scripturam non valere consequentiam. Apostolos enim *predicasse quidem varijs linguis, & tamen una tantū lingua nempe Græca scripsisse.* Verum

X 5

quod

quod Apostoli vna tantū lingua scripserunt, hoc alij etiam Apostolorū sæculo, in innumeras linguas trāstulerūt, vt antè ostendimus. Deinde contradictionē implicat. Hic n. dicit Apostolos *solum græcè scripsisse*, at cap. 15. huius lib. fol. 176. lin. 15. asseruit Apost. scripsisse *latinè, græcè & hebraicè*. Aut igitur hoc, aut illo loco errat Bellar. Prætereà hæc responsio manifestè arguit eū non tantū hæcere, sed etiā teneri. Nos igit hoc argum. paulò magis illustrabimus. & dicimus

Quemadmodū Christ⁹ & Apostoli & vniuersa Ecclesia primitiua, sacra publica administravit, eodē modo moderni ministri ea administrare debent. Sed Christus, Apostoli & vniuersa primitiua Ecclesia administrarunt sacra publica lingua omnibus nota. Ergo moderni ministri debēt s. publ. administrare lingua omnib⁹ nota.

Qui Maiorē negat, ostēdit se non esse dignū, qui in Ecclesia loquatur. Minor est trimembris. Vnum membrū est de *Christo*, illū administrasse sacra lingua nota. fatebūtur oēs, quicunq; 4. Euangelia perlegerunt. Alterū membrū est, *Apostolos* administrasse sacra lingua nota. Hoc nemo negabit, qui saltem acta Apost. perlegit. Tertiū membrū est, *Vniuersam primitiuam Ecclesiā* administrasse sacra lingua nota, hoc etsi ex præcedētibus notū est, tamen quibusdā testimonijs illud nunc probabo, & ex ijs, quæ ante sparsim dicta sunt, quædā iterabo. Primū oēs homines in primitiua ecclesia celebrasse sacra pub. lingua omnib⁹ nota fatetur Hardingus *artic. 3. §. 28. cōtra Iuellū*. Idē fatentur Lyra & Thomas in 1. *ad Cor. 14*. Idem docet Origenes cōtra Celsū, *lib. 8*. Idē docet Basil. Epist.

Epist. 63. ad Neocesarienses, simile docet Theodoretus l. 2. c. 24. Deinde Hieronymū composuisse *Dalmatis publicas preces lingua Dalmatica docet* Eccius in locis cap. de Missa latina. & *Indos fecisse sacra lingua Indica*, docet Eccius ibidem. Ephremum Edessæ Antistitē fecisse sacra lingua Syra docet Theodoretus libro 4. cap. 29. In funere Paulæ cantatos fuisse Psalmos lingua *greca, latina, hebraea, & syra* docet Hieronymus in Epitaphio Paulæ. Veteres in oblationibus & tractatibus aliquando *hebraea*, aliquando *syra* lingua vfos esse testatur Ambros. in 1. ad Cor. c. 14. Basil. cū recensuisset quomodo oēs simul & precarētur & psallere, (quod nisi nota lingua fieri non potuit) *dicis Egyptios, Libyos, Thebanos, Palestinos, Arabas, Phinices, Syros, & Euphratis incolas, & omnes homines in quibus vigilia, psalmodia & preces in honore sunt, idem facere*, ad Neocæsarienses, epist. 63. Huiusmodi multa exempla sunt apud Patres. Quin in ipso publico officio erant certæ partes populo attributæ. Iust. Martyr in Apologetico secundo. *Totus populus respondet, Amē.* Idem docet Hieronymus in Proœmio 2. libr. ad Galatas. Sed hoc fieri non posse, nisi populus ea intelligat, ad quæ respondet *Amen*, probatum est. Chrysostomus in 2. ad Corinth. homilia 18. *Sacerdos in sacra Liturgia populum alloquitur, & populus sacerdotem.* Idem ibidē, *Non tantū Sacerdos gratias agit Deo, sed populus totus, quid autem miraris quando Sacerdotem & populum in precibus colloquentem vides.* Idem ibidē, *Sacerdos & populus in sacra Liturgia colloquuntur*, Sacerdos ait ad populum, *Dominus vobiscum*, populus respondet, & *cum Spiritu tuo*, Cyr. in Nat. Dom. Sacerdos

dos ante orationem prefatione premissa parat fratrum mē-  
 tes, dicendo *Sursum corda*, plebs respondet *habemus*  
*ad Dominum*. Similia passim apud veteres. Ex his  
 liquide constat, sacra publica in vniuersa primitiua  
 Ecclesia facta esse lingua nota. Manifestum igitur  
 aut eos non errare, qui sacra publica nota lingua ce-  
 lebrant; aut Christum Apostolos & vniuersam pri-  
 mitiuam Ecclesiam, qui idem fecerunt, errasse. Imò  
 aut Christus, Apostoli aut tota primitiua Ecclesia er-  
 rarunt; dum sacra publica lingua nota administra-  
 runt, aut Papistæ errant, dum publica sacra ignota  
 lingua administrant. Sed Christus, Apostoli & uni-  
 uersa primitiua Ecclesia non potuerunt errare, Er-  
 go Papistas errare necesse est.

Septimum Argumentum. Quia Morauī, Ruthe-  
 ni, Armenij, Ægyptij & alij vtuntur lingua no-  
 ta in sacris publicis. Ergo Protestantibus hoc  
 negari etiam non debet.

Respondet Bellarminus se horum exemplo non  
 magis moueri, quàm Luteranorum & aliorum hæ-  
 reticorum. Hoc responsum dignum est Doctore  
 Iesuitico, plenum enim est Christianæ mansuetudi-  
 nis & pietatis, si vellem tibi, Bellarmine, eodem mo-  
 do respondere, dicerem Heracleonem & alios Hæ-  
 reticos inusitata verba in publicis sacris vsurpasse, vt  
 est apud August. in lib. de hæ. cap. 16. Papistæ idē  
 faciunt, nos igitur papistarum exemplo non magis  
 moueri, quàm illorum hæreticorum. Sed non vtar  
 ista responsione, verùm longè alia, nempe: Tota &  
 vniuersa primitiua Ecclesia vsa est lingua nota in pu-  
 blicis sacris. Ergo moueat te auctoritas vniuersæ  
 Ecclesiæ,



Ecclesiæ, vt idem nobis concedas. Si verò hæc te non commouet. Omnes Apostoli celebrarunt sacra publica lingua nota, moueat ergo te horum auctoritas. Si verò neque horum auctoritate moueris, ipse Dominus & saluator noster vsus est lingua nota in publicis sacris. Moueat igitur te huius auctoritas. Quòd si te neque Iesu Christi auctoritas commouet, palam ostendis te non Iesu Christi, sed Antichristi ministrum esse. Verùm siue te huius auctoritas moueat, siue non moueat, nos malumus cum Christo, Apostolis & tota primitiua Ecclesia vulgari & nota lingua populum ædificare, quàm cum Papistis inani incognitoque sono ærem verberare.

( : )

FINIS.

## SIBRANDI LVBBERTI

De

*Principiis Christianorum dogmatum*

Liber quartus.

CAPVT I.

*Status controuersie proponitur.*

LIBRO superiore disputauimus de sacro Vernaculo, sequitur vt de Obscuritate canonicarū Scripturarum differamus. Statum huius controuersie vel ignorauit Bellarminus vel peruertit. Non enim nostra sententia est, scripturam adeò perspicuam esse, vt nulla interpretatione opus habeat, neque dicimus eam adeò facilem esse, vt quilibet idiota eam perfectè intelligat. Palam enim asserimus donum interpretationis esse in Ecclesia necessarium, fatemur etiam in sacris scripturis multa adeò obscura esse, vt non tantum idiotis, sed etiam doctissimis quibusque negotium facessat, nec à nobis nisi in altera vita perfectè cognosci possint. Interea tamen negamus omnia obscura esse, vel ita obscura esse, vt vel nihil in iis absque Cōmentariis intelligi, vel vt Idiotæ ex earum lectione nihil proficere possint. Errat igitur Bellarminus dum dicit nos asserere totam scripturam adeò perspicuam esse, vt ad eam intelligendam nulla opus sit explicatione. Dum verò hanc sententiam Luthero affingit

affingit, facit, sanctissimo viro iniuriam, & eius sententiam peruertit. Lutherus quidem in præfatione assertionis articulorum à Leone damnatorum. Oportet, inquit, *Scriptura iudice hanc sententiam ferre, quod fieri non potest, nisi scriptura dederimus principem locum in omnibus, quæ tribuuntur Patribus, h. e. ut sit ipsa per se certissima, facillima, apertissima. sui ipsius interpres, omnium omnia probans, iudicans, & illuminans.* Sed hoc non iuuat calumniâ Bellarmini. Hæc n. sententia est bimembris: Vnū membrum de iudice cōtrouersiarū, alterū de scripturæ perspicuitate. Posterius nūc tantū in controuersiā trahitur. Itaq; ad illud tantū respondebimus. Dicimus igitur hanc sententiā neq; nouā, neq; falsam esse, modò rectè intelligatur. Noua non est. Chrysoft. n. homilia 3. in 2. epist. ad Thessal. dicit, *omnia clara & perspicua esse in diuinis scripturis.* Clemens in exhortatione ad Gentes, *Audite, inquit, qui estis lōgē, audite qui estis propē, nullis celatū est verbum Dei, lux est cōmunis, oībus illucescit hominibus, nullus est in verbo Cimmericus, festinemus ad salutē.* Epiphani. contra Ariomanitas hæc. 69. *Oīa sunt, inquit, clara & lucida, et nihil contrariū, neq; mortis cōplexus speciē habens in diuina scriptura.* Idem contra Anomæos hæc. 76. *Omnia sunt clara, inquit, in diuina scriptura his, qui ratiocinatione sermonem diuinum adire volunt, & nō diabolicam operationē in seipsis conceperūt, ac seipsos in barathrum mortis conijcere conantur.* Laëtantius lib. 6. capite 21. *Nūm, inquit, Deus & mentis & vocis & lingua artifex disertè loqui nō potest? Imo verò summa prouidētia carere voluit fūco ea quæ diuina sunt, ut oēs intelligerēt quæ ipse oībus loquebatur.* Chrysoft. hō. 12. in Gen. *Scriptura*  
inquit

inquit, *seipsam exponit, & auditorē errare non sinit.* Quin ipse Bellarminus lib. 1. c. 2. de verbo Dei, *Sacris Scripturis*, inquit, *qua Prophetis & Apostolicis literis continentur, nihil est notius, nihil certius.* Ex his & similibus apparet hanc sententiam non esse nouam : Sed neq; falsam eam esse probabimus suo loco. Priusquam autem progrediamur, Lutheri mentem paucis explicabimus. In scriptura sunt duo consideranda, Verba & Dogmata. Verba sunt obscura & ex eorū obscuritate sæpè Dogmatum obscuritas nascitur. Cū verò verba, hoc est, grammaticū sensum rectè intelligimus, tum ipsum Scripturarū sensum rectissimè assequimur. Hinc infert dogmata esse perspicua. In lib. de Seruo Arbitr. *Res ipsa*, inquit, *sunt in luce, non curandum si quadam rerum signa sunt in tenebris.* h. e. In Grammatico sensu sæpè est difficultas; Dogmata verò, quæ ad salutem necessaria sunt, & quorum summa Symbolo Apostolico cōprehensa est, sunt perspicua. Idē docet Theodoret. libro 5. de græc. affect. *Pasim videas*, inquit, *nostratia dogmata, non à Doctoribus tantum, sed à plebeis intelligi.* & Bellar. de verbo Dei, lib. 2. cap. 3. *Mysteria*, inquit, *redemptionis etiā rustici & mulieres intelligunt.* Sed, inquis, oīs scripturæ difficultas secundum Lutherum ex ignorantia sensus grammatici oritur. At Origines & Hieronymus fuerunt optimi grammatici, & tamen subinde in dogmatis errarunt. Respondeo fuisse illos quidem bonos grammaticos, sed non optimos. Errarunt enim sæpè in sensu grammatico; quid mirum igitur si & ipsa dogmata interdū non intellexerunt. Sed ipsa etiā dogmata, inquis, sæpè obscura sunt. Verū hoc

hoc fit per accidens. 2. Corinth. 4. versu 3. *Si rectum est Euangelium, ijs qui pereunt, rectum est.* Quemadmodum n. Sol est lucidus; sed cæcis, & ijs qui oculos claudunt, non est lucidus: ita verbum Dei perspicuū est; sed peruerlis & excæcatis perspicuū non est. Deinde dogmata duobus modis, nempe externā & internā perspicuitate perspicua sunt. Externā etiā quibusdā non regeneratis perspicua sunt, Iacob. 2, 19. *Diaboli credunt & contremiscunt.* Internā verò non nisi ijs innotescunt, quorum mentibus Spiritus S. illa reuelat & obsignat. Qui igitur grāmaticum sensum rectē intelligunt, & à Spiritu sancto illuminati sunt, illis dogmata Christiana sunt perspicua. Sed hīc obseruandi sunt aliqui gradus. Quo n. quisque in grammatica plus profecit, & à Spiritu s. magis illuminatus est: eò etiam plus de dogmatis intelligit. Hanc esse legitimam Lutheri sententiam expræfat. psalter. colligi potest. Scio, inquit, *impudentissima esse temeritatis affirmare se unum Scripturae librum in omnibus perfectē intelligere.* Ibidem, *Nolim, inquit, ab ullo hoc de me præsumi, quod nullus sanctissimorum & doctissimorum adhuc præstare potuit, Psalterium videlicet me in omnibus in suo legitimo sensu intelligere, & docere. Sat est aliquos et eosdem ex parte intelligere.* Multa sibi reseruaui Spiritus, quò nos semper discipulos habeat. multa solum ostēdit, ut alliciat. multa tradit, ut efficiat. Ex his, opinor, manifestum est, non esse Lutheri mentem, omnem scripturam ita facilem esse, ut nulla explicatione indigeat. Deinde sæpè accidit, Bellarmine, ut homines docti non vbique æquē perspicuē loquantur. Quid si idem acciderit Luthero? Vt tacetam Lutheri

Y opinio-

opinionem non esse nostræ sententiæ regulam. Sed frustra hæc disputo. Palam enim fatemur in sacra Scriptura quædam esse obscura, donum item interpretationis esse in Ecclesia necessarium. Dum igitur Bellarminus hanc sententiam oppugnat, pugnat sine aduersario, & dum eam nobis tribuit, facit nobis iniuriam. Cæterum an Bellarminus errore, an verò malitia fecerit, committo Dei iudicio: Dissimulare tamen non possum eum in principio tertii libri dicere quæstionem esse, *Sint ne sacra Scriptura per se facillime, atque apertissima, an verò interpretatione indigeat?* & in eodem capite, Argumento sexto concludere, *Non igitur Scriptura sola sufficit dirimere controuersias.* Vnde eò adducor, vt credam Bellarminum hæc cōtra conscientiam scripsisse, neque ausum fuisse verum controuersię statū proponere, ne eius argutiolæ & paralogismi innotescerent. Quæstio enim & Conclusio res & subiecto idem sunt: differunt autem sola ratione, & habitudine quadam, vt Dialectici loquuntur. Si igitur rectè conclusit *Scripturam non sufficere ad controuersias dirimendas*, tum quæstionē ante non rectè proposuit. Nos autem ex hac conclusione verum controuersię statum formamus esse hunc, *Sint ne omnes controuersię in Christiana religione ex Dei verbo scripto dirimendæ?* vel quod idem est. Sufficiatne Dei verbum scriptum ad omnes controuersias in Christiana religione dirimendas? Harū affirmationes nos sustinemus, aduersarij verò earum negatiuas defendunt. Hoc ita esse fatebitur ipse Bellarminus, si rem diligentius expendet. Non n. controuersia est, an Scriptura ita sit perspicua, vt nulla inter-

interpretatione opus sit. Hoc enim & Papistæ & Orthodoxi negant. Neque controuersia est an Scriptura ita sit perspicua, vt idiotæ eam citra omnem explicationē intelligāt. Sed cōtrouersia est, An Scriptura ita clara, certa, & perspicua sit, vt indocti ex ea doceri, & contumaces ex eadē refutari possint? Vel quod idem est, An Scriptura ita clara, certa & perspicua sit, vt controuersiæ in Christiana religione ex ea dirimi possint? Huius negatiuam defendunt Papistæ, eius verò affirmatiuam veram esse contendunt Orthodoxi: Nos prius aduersariorum sententiam proponemus, eorumq; argumenta diluemus: deinde nostram sententiam explicabimus, eamque im-  
motis argumentis astruemus.

## CAPVT II.

*Argumenta pro obscuritate Canonicarum Scripturarū ex Dei verbo petita refutantur.*

**Q**uamvis sit huius controuersiæ status, ostendimus capite superiori. Sequitur vt argumenta, quæ Bellarminus pro sua sententia adduxit, diluamus. Eius sententia est, totam scripturam adeo esse obscuram, vt absque interpretatione nihil in ea intelligi, & Idiotæ ex eius lectione nihil proficere possint. Hanc probat multis argumentis, quæ omnia ad quinque classes reduci possunt. Prima classis est eorum, quæ ducuntur ex sacra Scriptura. Primum argumentum sumitur ex Psal. 119. versu 18. *Rege oculos meos, vt intuear mirabilia ex lege tua.* Et versu 34. *Faça, vt intelligā, vt custodiā, conseruemq; eam ex tota anima.* Et versu 135. *Faça, vt praluceat facies tua seruo tuo,*



*& doce me statuta tua.*

Quod absque peculiari spiritus reuelatione non intelligitur, hoc adedò obscurum est, vt in eo absque interpretatione nihil cognosci, & Laici ex eius lectione nullum fructum cōsequi possint. Sed sacra Scriptura absque peculiari Spiritus illuminatione non intelligitur. Ergo Scriptura adedò obscura est, vt in ea absque Interpretatione nihil cognosci, & Laici ex eius lectione nullum fructum capere possint.

Bellarminus præterita Maiore probat Minorem. Eius probationes suprà allegauimus. Sed nos respondemus ad Maiorem, eam esse bimebrē. Vnum membrū est, nihil posse in Scriptura cognosci absq; interpretatione. Alterum, Laicos ex eius lectione nullum fructū cōsequi. Nos ad vtrumque distinctè, & primū ad posterius respondebimus. Si Maior in hunc modum formatur, Quod absque peculiari Spiritus reuelatione non intelligitur, hoc adedò obscurum est, vt Laici ex eius lectione nullum fructum capere possint. Si, inquam, Maior, in hunc modum formatur, tum est falsa. Deus enim vtrumque, hoc est, illuminationem & studium priuatum coniunxit. Studium, 1. Timoth. 4. versu 13. *attende lectioni.* Iohan. 5. versu 39. *Scrutamini scripturas.* Act. 17. cap. vers. 11. *fuerunt autē illi Iudei generosiores illis qui erant Thessalonica, vt qui receperint sermonem cum omni alacritate, quotidie scrutantes scripturas, an hæc ita se haberent.* Illuminationem, Act. 2. cap. vers. 17. *Effundā ex Spiritu meo in quamuis carnem.* Iohan. 16. cap. versu 13. *Spiritus ille veritatis ducet vos in omnem veritatem.*

Cūm

Cùm itaque Deus vtrumque coniungat, & velit nos Scripturæ operam dare, ac promittat Spiritus illuminationem: manifestum est nos malè argumētari ab vnius positione ad alterius remotionē. Perinde enim est, ac si dicam, nemo potest absque peculiari Spiritus gratia conuerti. Ergo ministri frustra laborant in docendo. Eodem prorsus modo non sequitur, Scriptura absque Spiritus illuminatione non intelligitur. Ergo Laici in ea legenda operam perdunt. Imò, Bellarmine, licet homo absque peculiari Spiritus gratia non conuertatur, vtiliter tamen minister ad conuersionem hortatur, & ministerium illud Deus fortunat suo spiritu, iuxta illud, *Paulus plantat, Apollorus rigat, Deus dat incrementum*, 1. Corint. 3. versu 6. Eodem modo licet Scriptura absque Spiritus illuminatione non intelligatur, vtiliter tamen Laici se in eius lectione & meditatione exercent, & studium hoc Deus suo spiritu secundat, iuxta illud Luc. 11. versu 9. *Querite & inuenietis*. Vtrumque igitur coniungi potest, imò coniungi debet. Requirit enim Deus summum studium à nobis ac diligentiam, & simul vult vt suum auxiliū quotidie imploremus. Etsi igitur absque peculiari Spiritus gratia nihil possumus, priuatum tamen nostrum studium inutile non est. Hoc ad secundum membrum, nunc ad primum. Si Bellarminus ita intelligit Maiorem, quòd ex Spiritus reuelatione intelligitur, hoc prorsus obscurum est, tum sequitur ex hoc argumento, Scripturam non tantum Laicis, sed etiā doctis, imò omnibus, qui non sunt diuinitus illuminati, obscuram esse, ac proinde vī huius argumenti, non tantum

Laici, sed etiam docti ab eius lectione arcerentur, Quod ut intelligatur, formabo argumentum in hunc modum. Quod ex Sp. sancti reuelatione intelligitur, hoc prorsus obscurum est, ac proinde legi non debet, sed sacra scriptura absque Sp. sancti illuminatione non intelligitur, Ergo prorsus obscura est, & legi non debet. Resp. aut esse puras particulares, aut exclusiuam addendam esse medio termino, ut æquipolleat vniuersali, verbigratia; Quod ex Spiritus s. reuelatione tantum intelligitur, hoc prorsus obscurum est, sed Scriptura ex Sp. sancti reuelatione tantum intelligitur, Ergo Scriptura prorsus obscura est. Sed iam Minor falsa est. Licet n. Scriptura absque Spiritus reuelatione non intelligatur, tamen non p. solam Spiritus illuminationem intelligitur, Instituit n. Deus ministerium, præcipit, ut ipsi scrutemur & legamus. Quod utique non fecisset, si omnis lectio, & omne priuatum & publicum studium, esset superuacuum. Ergo Maior corrigenda est in hunc modum. Quod absque Spiritus reuelatione non potest intelligi, hoc adeo obscurum est, ut sola lectione vel humano studio cognosci non possit. Deinde respondemus ad Minorem. Si illa formatur in hunc modum, Scriptura sola Spiritus reuelatione intelligitur, tum est falsa. Multi enim partim per ministerium, & partim per illuminationem scripturam intelligunt, ut Beroenses Act. 17. & Lydia Act. 16. & passim. Si autem Minor formatur in hunc modum, Scriptura absque Spiritus illuminatione non intelligitur, tum nihil aliud concluditur, quam solum humanum studium ad eam intelligendam non sufficere, Sed hoc concedimus. Fatemur n. omne

omne nostrum studiū esse irritum, nisi Spiritus auxilium accesserit, neq; diffitemur Sp. illuminationē sufficere. Sed Deus non semper immediatē agit, aliquando enim per seipsum, absq; medijs, hominem instruit, vt Moſen, Ezaïam, Paulum, & alios: aliquādo verò cum medijs gratiam suam coniungit, vt in Beroēnsib. Lydia & aliis. Præterea scriptura potest dupliciter cognosci, externo modo, & interno. Externo modo sepè absque peculiari Spiritus reuelatione intelligitur, vt Iacobi, 2. versu 19. *Demonia credunt & horrescunt*, hoc est, historicè intelligunt ea, quæ in scripturis narrātur. Interno verò modo scriptura nunquā absque peculiari Spiritus reuelatione intelligitur. Hic autē intellectus est, cūm spiritus nobis testatur, non tantū omnib. sed etiā nobis vera esse, quæ in scriptura narrātur, & in nobis generat tales motus, ex quibus certò cognoscimus, ea, quæ in scripturis traduntur, ad nos pertinere, qui intellectu semper cum vera resipiscētia coniunctus est. De hoc loquitur Dauid. Petit n. sibi istam legis intelligentiā dari, qua legem ipsam obseruet & faciat. Hæc autē intelligentia vt non datur absq; peculiari Spiritus gratia, Ita Sp. s. multis medijs ad eam nobis instillandā vtitur. Nō rectè igitur ab vnus positione ad alterius remotionem argumentatur Bellarminus. Deniq; si scripturæ intelligentia ex sola Sp. reuelatione concipitur tū inutilis est omnis interpretatio. Si igitur hæc est Bellarmi sententia, viderit ipse quot gradib. absit à castris Suencfeldii. Si autem vult studium nostrū non esse inutile, & spiritum per illud esse efficacem, tū non contradicit nobis, illud enim fate-

à Spiritu sancto non separamus : Si verò hoc dicis, tum concedimus Maiorem. Sed tum nihil aliud sequitur, quàm verbum Dei à Spiritu s. separatuma-  
 deò obscurum esse, vt vera sententia in rebus controuerfis ex eo erui non possit. At hoc nostram causam non lædit. Et si enim verbum Dei à Spiritu s. auxilio separatum non sufficit ad veram sententiam in rebus controuerfis ostendendam : sufficit tamen ad veram sententiam in reb. controuerfis ostendendam, quando cum Spiritu sancti illuminatione coniungitur. Est igitur fallacia à secundum quid ad simpliciter. & est perinde ac si dicas, verbum Dei absque Spiritu s. auxilio non sufficit ad veram sententiam in rebus controuerfis ostendendam, Ergo prorsus non sufficit. vel quod idem est, etiam cum Spiritu sancti illuminatione coniunctum non sufficit ad veram sententiam in controuerfis ostendendam. Secundum argumentum sumitur ex Luc. cap. 24. versu 27. *Interpretabatur illis in omnibus scripturis, quæ de se scriptæ erant.* Et Actor. 8. cap. versu 31. *Qui enim possum, nisi quis mihi præierit.*

Quod absque interpretatione intelligi non potest, hoc est adeò obscurum, vt Laici in eo legendo frustrà laborent. Sed Scriptura absque interpretatione intelligi non potest. Ergo Scriptura est adeò obscura, vt à Laicis legendi cognosci non possit.

Respondeo Maiorem esse falsam. Duo enim subalterna inter se non pugnant. Ergo quemadmodum priuatum studium, & publica interpretatio consistere possunt, ita etiã interpretatio & priuata lectio

se mutuò non tollūt, sed simul cōiungi possunt. Ad Minorē dico, non omnia prima lectione à nobis apprehendi; Sed quæ primū erant difficilia, ea deinde reddi facilia, si diligens studiū, & ardens Iesu Christi inuocatio accesserit, imò vt Eunuch. primū legebat, & accedentē interpretationē non aspernabatur: ita etiā nos cum publ. interpretatione priuatum studiū coniūgere debemus. Deinde ex hoc loco colligi potest eo tempore nihil fuisse vlitatius, q̃ scripturā legi à Laicis. Eunuchus n. erat Laicus, & in via scripturā legebat. Præterea discipuli quos Christ⁹ instituebat, tristissimo spectaculo quasi stupore quodā ita erāt perculsi, vt quod verū erat, id nemine mōstrante videre non possent. Huc accedit eos nō de externa intelligentia fuisse sollicitos, externum enim scripturę sensū vtcunq; intelligebāt: sed de interna *πνευματικῆς* laborasse. Hoc constat ex iis verbis Luc. 24. v. 21. *nos autē sperabamus illum esse, qui redempturus esset Israël.* Atque hanc internam certiorationem à nobis priuato studio apprehendi non posse, iam antè ostēdimus: non igitur si omnia diligenter expendūtur, ex hoc loco plus colligi potest, quàm interpretationē scripturæ esse in Ecclesia necessariā, at hoc nunquam negauimus, sic igitur argumentum corrigendum.

Illud sine quo scriptura intelligi non potest, est in Ecclesia retinendum. Sed sine interpretatione scriptura in Ecclesia intelligi non potest. Interpretatio igitur in Ecclesia retinenda est. Hoc autem libenter concedimus, neque aliud quippiam ex hoc argumento colligi potest.

Postremò

Postremò Eunuchus fuit valdè rudis in scriptura, quod constat ex vers. 34. capitis 8. Actor. *Rogo te de quo Propheta hoc dicit? de se ipso, an de alio quopiam.* Discipuli verò obstupescit suppelicio Christi videre non potuerunt. Quid mirum igitur, si interpretatione opus habuerūt? Si verò argum. ad cōtrouersia accōmodari debet, formandū est in hunc modū.

Quod absque interpretatione intelligi nequit, hoc adedò obscurum est, vt vera sententia, in rebus controuersis, ex eo colligi nequeat. Sed verbum Dei absque interpretatione intelligi non potest. Ergo verbum Dei adedò obscurum est, vt vera sententia, in rebus controuersis, ex eo colligi nequeat.

Respondeo vt suprà. Maiorem posse duobus modis intelligi. Nempè veram sententiam in rebus controuersis ex scriptura simpliciter colligi nō posse. Et veram sententiam absque interpretatione ex scriptura colligi nō posse. Si hoc dicis, tū non oppugnās nostrā sentent. si illud dicis, tū argumētaris à secūdū quid ad simpliciter. Perinde n. est, ac si dicas, Vera sententia nō potest ex scriptura omni interpretatione destituta colligi. Ergo, prorsus ex ea colligi non potest, vel quod idē est, vera sententia in rebus controuersis ex scriptura per rectā interpretationē explicata colligi nequit. Tertium argum. deducunt ex 2. Pet. 3c. v. 16. *vt qui in omnibus ferè Epist. loquatur de istis, inter quæ sunt nonnulla difficilia intellectu, quæ indoctis parūque stabiles detorquent, vt et reliquas Scripturas suo ipsorum exitio.* Ad quem locum addit Bellarminus. *Petrus non dicit quadam esse difficilia indoctis*



*indoctis & instabilibus, ut heretici exponunt, sed difficultas absolute.*

Quæ absolute difficultia sunt, ea opus habent interpretatione, sed quædam in Scriptura absolute difficultia sunt, Ergo quædam in Scriptura opus habent explicatione.

Respondeo totum argumentum à nobis concedi. Non enim excludimus interpretandi munus ex Ecclesia. Quòd autem ex hoc argumento vult inferre, totam scripturam esse obscuram, nimis insulsum est, à particulari enim ad vniuersale nihil sequitur affirmatiuè. Vt n. non possum dicere, aliquod animal est rationale, Ergo omne animal est rationale. Ita etiam non possum inferre, quædam in scriptura sunt difficultia, Ergo omnia quæ sunt in scriptura sunt difficultia. Imò ne sequitur quidem, quædam in scriptura sunt difficultia, Ergo ipsa scriptura est difficilis. Quemadmodum non sequitur, Quædam in mari sunt pisces, Ergo ipsum mare est piscis. Sæpè enim accidit vt auctor res difficiles perspicuè explicet. Potest igitur scriptum perspicuum esse, & res scripto comprehensæ, obscuræ. Si hoc argumentum ad controuersiam accommodari debet, formandum est in hunc modum,

Quod absolute difficile est, hoc adeò obscurum est, vt vera sententia in rebus controuersis ex eo erui non possit. Sed quædam in sacra scriptura absolute difficultia sunt. Ergo, tota scriptura adeò obscura est, vt vera sententia in rebus controuersis ex ea erui non possit.

Sed tum aliud est in conclusione, quàm in præmissis

missis. Si autem dicis, saltem quædam in Scriptura esse adedò obscura, vt vera sententia in rebus contro- uersis ex ea erui non possit : tum dico esse quatuor terminos. Aliud enim est, ipsam Scripturam esse difficilem, & aliud, quædam in Scriptura esse diffici- lia. Si verò dicis, in quo sunt quædam difficilia, hoc adeo obscurum est, vt vera sententia in rebus con- trouersis ex eo colligi non possit: Sed in Scriptura, Ergo. Tum respondeo Maiorem esse falsam. Non n. si quædam obscura sunt, ideò omnia obscura sunt. Si denique dicis, in quo sunt quædam obscura, ex eo in quibusdam vera sententia erui nequit. Sed in Scriptura, Ergo. Tum etiam Maior est falsa. Res n. obscuræ in aliquo lib. perspicuè tradi possunt. Deĩ- de aliquod potest difficile esse, & tamen non pror- sus obscurum. Denique *nihil de istis obscuritatibus e- ruitur, quod nō alibi planissimè dictum reperiatur*, vt do- cet Augustinus de doct. Christ. lib. 2. cap. 6. Diffici- lia igitur per facilia explicari possunt. Sed hæc suf- ficient ad illa argumenta, quæ Bellarminus ex Dei verbo petiuit. Quibus si existimat se posse Laicis scripturam ex manibus excutere, valdè errat. Perin- de enim est, ac si diceret, Scriptura est difficilis, Ergo omne priuatum studium abijciendum. Cū po- tiùs contrarium sequatur, nempè, Scriptura est dif- ficilis, Ergo summa nobis diligentia adhibenda est, vt eam discamus. Sin verò Bellarminus voluit ostē- dere, omnem scripturam ita obscuram esse, vt per solam reuelationē intelligi possit, viderit ipse, quid sit Suencfeldio responsurus. Sin denique vult quæ- dam in ea obscura, ac proinde legitima interpreta-  
tione

tione explicanda esse, ostendit libidinem pugnandi. Quærit enim pugnam, vbi nulla est controuersia. Omnes enim vtrò & sponte etiam Bellarmino non monente hoc fatemur.

## CAPVT III.

*Argumenta ex Patribus pro Scripturarum obscuritate adducta, refutantur.*

**A**Rgumentis, quæ Bellarminus ex scriptura pro eius obscuritate adduxit, refutatis, diluemus ea quæ pro eadem scripturarum obscuritate ex Patribus sumpsit. Primum est ex Irenæo libr. 2. cap. 27. *Postquam docuisset in rebus creatis quedam obscura esse, addit nos per Dei gratiam in scripturis quedam scire, quedam autem Deo commendare, ut in hac vita, & futura Deus semper doceat, homo semper discat.*

In quo quedam cognoscimus, quedam ignoramus, hoc totum est obscurum. Sed in scriptura quedam cognoscimus, quedam ignoramus, Ergo tota scriptura est obscura.

Respondeo Maiorem esse falsam. Non enim si quedam sunt obscura, ideo omnia sunt obscura. Verbi gratia: Quedam in homine sunt ossa, Ergo quicquid in homine est, est os; non sequitur. Si verò Maior in hunc modum formatur. In quo quedam cognoscimus, quedam ignoramus, in eo quedam sunt obscura, quedam perspicua, tum illa quidem vera est. Sed nihil aliud concludit, quàm in scriptura quedam obscura esse, quedam perspicua, sed hoc nunquam negauimus. Deinde nō hoc vult Irenæus, quod colligit Bellarminus, sed propter quedam ista obscura

obscura, quæ in altera vita ab ipso Deo discemus, vult neminem in hac vita perfectam sacrarum literarum cognitionem consequi. At hoc non negamus. Si hoc argumentum ad controuersiam accommodari debet, formandum est in hunc modum.

In quo sunt quædam obscura, ex eo vera sententia in rebus controuersis erui non potest: In scriptura sunt quædam obscura, Ergo ex scriptura vera sententia in rebus controuersis erui non potest.

Sed tum maior est falsa, illa enim obscura alicubi clariùs explicantur, ex quorum collatione veritas erui potest. Atq; hanc esse mentem Irenæi constat ex lib. 3. cap. 12. Disertè enim docet *ostensiones, quæ sunt in Scriptura, non nisi ex Scriptura ostendi posse*. Deinde propter quædam obscura dicere omnia esse obscura, est cum ratione insanire.

Secundum Argum. sumit ex Origene lib. 7. cont. Celsum: *Qui docet cordatos viros scrutando scripturam intellectum eius inuenire potuisse, licet in ea multa sint obscura. Idem Homil. 12. in Exod. dicit nobis semper orandum esse, ut veniat agnus de Tribu, Iuda & nobis librum signatum aperiat.*

In quo sunt multa obscura, hoc totū obscurum est, sed in scriptura sunt quædam obscura. Ergo scriptura est tota obscura.

Respondeo Maiorem iterum esse falsam. Nam nō sequitur, vt dixi, quædam in scriptura obscura sunt, Ergo tota scriptura obscura est. Si autē vult quædā in scriptura obscura esse, tū pugnat sine aduersario, libenter enim fatemur quædā in scriptura obscura esse

esse. Hoc argumentum ad controuersiam accommodatum refutauimus cap. 2. arg. 3. & cap. 3. arg. 1. Ex. 12. autem Homil. in Exod. Argumentum tale formari potest.

Quod absq; agni reuelatione non intelligimus, hoc prorsus obscurum est, sed scriptura absq; agni reuelatione non intelligitur. Ergo prorsus obscura est.

Priusquam respondeam, dico duplicem esse reuelationem, vnam vniuersalem, qua Deus vniuersaliter omnes homines illuminat, hæc illuminatio est naturæ, ipsi naturæ sc. ab initio generationis insita. Alia particularis, solis electis propria. Hæc illuminatio est interna, & semper cū sanctificatione coniuncta. De hac loquitur Origenes, & si Bellarm. argumentum de ea intelligit, concedimus illud totum: Fatemur enim nullum dogma esse in scriptura, quod nos nostris viribus secundum intellectū sanctificationis intelligere possumus, semper enim valet ista regula, *animalis homo nō intelligit ea, quæ sunt spiritus, nec potest intelligere.* 1. Corinth. 2. v. 14. Debemus igitur semper orare, quemadmodū docet Origenes, *ut agnus veniat de tribu Iuda, & aperiat librū*, hoc est, vt det nobis Sp. Sanctum, qui nos sanctificet, & mentes nostras illuminet, vt piē viuamus, & verbū Dei rectē intelligamus. Hoc argumentum ad controuersiam accommodatum refutauimus cap. 2. arg. 1. Tertium argumentum ducit ex Ruffino, qui. lib. 11. cap. 9. docet *Basilium & Nazianzenum omnib. secularibus scientiis expolitos, post quam 13 annos collega fuissent, sacræ scripturæ operam dedisse, idq; longo tempore.*

Cui

Cui docti viri operam dant, idq; longo tempore,  
hoc est totum obscurum, sed S. Scriptura est id,  
cui docti viri operam dant, idq; longo tem-  
pore, Ergo S. Scriptura est tota obscura.

Respondeo ad Maiorem, non sequi illud totum  
obscurum esse, cui docti viri operam dant. Possunt  
enim in eo quædam perspicua esse, quædam obscu-  
ra. Ad Minorem dico, eos doctores non qualem-  
cunq; cognitionē desiderasse, ut quæ laicis suffice-  
ret; sed desiderasse eximiam eruditionem, qua alios  
erudire possent. Erant enim doctores, & alios do-  
cebāt, sed qui tales sunt, ab iis requiritur maior sciē-  
tia. Quid mirum igitur, si Basilius & Gregorius ma-  
iorem diligentiam ad S. literas discendas adhibue-  
runt. Sanè & hoc tempore maior eruditio, maior-  
q; diligētia requiritur à doctoribus, quàm ab idio-  
tis. Idiotæ enim multa cum laude nesciunt, quæ do-  
ctores sine turpitudine ignorare non possunt. Si  
hoc argumentum ad controuersiam accommodari  
debet, formandum est in hunc modum,

In quo discendo docti viri multum industriæ po-  
nunt, hoc adeò obscurum est, vt vera sententia  
in rebus cōtrouersis ex eo erui non possit. Sed  
sacra Scriptura est illud, in quo discendo docti  
viri multum industriæ ponunt. Ergo sacra  
Scriptura adeò obscura est, vt vera sententia  
in rebus controuersis ex ea erui non possit.

Sed tum minor est falsa. Nam & in rebus Mathe-  
maticis, naturalibus & Iuridicis discendis docti viri  
multum laboris ponunt. Et tamen ex ijs vera sen-  
tentia in rebus controuersis erui potest. Eodem

Z igitur

igitur modo, si quis debitum laborem ad res sacras cognoscendas confert, & quotidie Deum de Spiritus sancti gratia interpellat, non dubium est, quin veram sententiam in iis inuenire possit. Quartum argum. est ab auctoritate Chrysost. Is Homil. 40. in Iohan. ad illa verba *Scrutamini scripturas*, dicit, *Non dixit, legite scripturas. sed scrutamini. Diuina n. summa indigent diligentia. Christu relegauit Iudaos non ad nudam lectionem, sed ad diligentem inuestigationem.*

Quod sine summa diligentia intelligi nequit, hoc totum est obscurum, Sed S. scriptura sine summa diligentia intelligi nequit, Ergo tota S. scriptura est obscura.

Respondeo ad Maiorem. Ex summa diligentia non sequi totalem obscuritatem. Possunt n. quædã esse obscura, quædam perspicua. Deinde Chrysostomus istuc non concludit totam scripturã esse obscuram, sed tantum concludit eam non esse otiosè, neque oscitante legendã. Quod nos non negamus. Fatemur enim summam simul & diligentiam, & pietatem à sacrarum literarum studiosis requiri.

Quintũ argum. sumitur ab auctoritate Ambrosij, is Epist. 44. *Scriptura, inquit, diuina est, mare habens in se profundos sensus, altitudinem diuinorum anigmatum.*

Quod habet quosdam profundos sensus, hoc est totum obscurũ, sed scriptura habet quosdã profundos sensus. Ergo tota scriptura est obscura.

Respondeo Maiorem esse falsam, nam vt sæpè dixi, propter quædam obscura, non est necesse, vt omnia sint obscura, neque hanc esse Ambrosij sententiam, potest colligi ex sequentibus, vbi præter profundos



fundos sensus etiã nuncos fluuios esse in scriptura asserit.

Sextũ argum. sumitur ab auctoritate Hieronymi, ille in Epist. 13. ad Paulinum dicit, *non posse scripturã disci sine magistro*. Idem in præf. ad Gal. dicit, *Quanto studio praeceptores audierit. Et quodiam vir Alexandriam profectus sit, ut Didymum de quibusdam ambiguis interrogaret*. Idem in Epistola 119. capite 21. dicit epistolam ad Romanos nimis obscuritatibus inuolutam esse. Sed ex his omnibus nihil aliud colligi potest, quàm eos, qui volunt in Theologia excellere, debere doctos viros adire, ac diligẽter discere: & esse in Theologia quædam obscura. At neutrum vnquam negauimus. Deinde ab omnibus hominibus non requiritur tanta scientia, quanta ab Hieronymo.

Septimum Argum. ducitur ab auctoritate Augustini. Is lib. 2. de Doctrina Christ. capite 6. *Sed multis, inquit, & multiplicibus obscuritatibus, & ambiguitatibus decipiuntur, qui temerẽ legunt, aliud pro alio sentientes: Quibusdam autem locis quid vel falsò suspicentur, nõ inueniunt, ita obscure quædam dicta densissimã caliginem obducunt, quod totum prouisum diuinitus esse non dubito ad edomandam laboris superbiam, & intellectum à fastidio renocandum, cui facile inuestigata plerunque viluerunt*. Respondeo Augustinũ dicere non omnia, sed quædam esse obscura, atque hoc ex eodem cap. colligi potest. *Magnificẽ, inquit, & salubriter Spir. sanctus scripturas modificauit, ut locis apertioribus fami succurreret, obscurioribus aut fastidia detergeret*. Nihil enim ferẽ de illis obscuritatibus eruitur, quod non planissimẽ dictum alibi reperiatur. Eodem libro, capite 9. in ijs, inquit, *quæ aperte in scriptura posita sunt, inueniuntur*

*tur illa omnia, qua continent fidem morésque viuendi, spem scilicet, atque charitatem. Secundus locus est ex 12. lib. Confess. cap. 14. ubi idem Augustinus, mira, inquit, profunditas eloquiorum tuorum, quorum ecce ante nos superficies blandiens paruulis, Sed mira profunditas Deus meus, mira profunditas, horror est intendere in eam, horror honoris, & tremor amoris. Respondeo nos hoc non negare. Fatemur enim multa esse obscura in sacra Scriptura, sed non omnia. Idem enim Augustinus lib. 2. de doct. Christ. cap. 8. in ijs, inquit, qua aperte in scripturis posita sunt, inueniuntur illa omnia, qua continent fidem, morésque viuendi. Tertius locus est, Epist. 3. ibi, Tanta, inquit, est profunditas Christianarum literarum, ut in eis quotidie proficerem, si eas solas ab ineunte pueritia usque ad decrepitam senectutem maximo otio, summo studio, meliore ingenio conarer addiscere, non quod ad ea, qua necessaria sunt saluti, tanta in eis perueniatur difficultate, sed cum quisque ibi fidem tenuerit, sine qua piè etèque non uiuitur, tam multa, tamque multiplicibus mysteriorum umbraculis opaca intelligenda proficientibus restant, tantæque non solum in verbis, quibus ista dicta sunt, sed etiam in rebus, qua intelligenda sunt, latet altitudo sapientiae, ut annosissimis, acutissimis, flagrantissimis cupiditate discendi hoc contingat, quod eadem Scriptura quodam loco habet, cum consummauerit homo, tunc incipit. Respondeo ex his omnibus nihil aliud sequi, quædam, non oia obscura esse in scriptura. Augustinus enim eodem loco asserit, Ea qua necessaria sunt saluti, non magna in eis difficultate inueniri. Deinde Modus ipse, inquit, dicendi, quo sancta Scriptura contextitur, quam omnibus accessibilis, quamuis paucissimis penetra-  
bilis*

*bilis, ea qua aperta cōtinet quasi amicus familiaris sine fūco ad cor loquitur indoctorum atque doctorum. Ea verò que in mysterijs occultat, nec ipsa eloquio superbo erigit, quò non audeat accedere mens tardiuscula & inerudita, quasi pauper ad diuitem, sed inuitat omnes humili sermone, quos non solum manifesta pascit, sed etiam secreta exerceat veritate, hoc in promptis, quod in reconditis habens. Vnde necessariò sequitur non omnia, sed quædam tantum esse in scripturis obscura. Idem respondeo ad Gregorium, hom. 6. in Ezech. Et vt omnia in pauca cōtraham. Si Bellarminus ex his colligit, Quædam sunt obscura, Ergo omnia sunt obscura, tum aberrat, quemadmodum ostensum est: si autem vult tantum quædam esse obscura, non omnia, & propterea in Ecclesia necessariam esse interpretationem, tum pugnat absque aduersario; libenter enim fatemur in scripturis multa obscura esse, asserimus etiam donū interpretandi esse in Ecclesia retinendum. Si deniq; vult propter quædam ista obscura veram sententiā in rebus controuersis erui non posse, tum contradicit Augustino. Ille enim asserit *de istis obscuritatibus nihil ferè erui, quod non alibi planissimè dictum reperitur.* l. 2. de Doct. Chr. c. 6. At quæ obscura sunt, illa per ea, quæ planissimè dicta sunt, explicari possunt. Et ob eam causam vera sententia in rebus controuersis ex scriptura erui potest.*

## CAPVT IIII.

*Argumentorum à re sumptorum pro Obscuritate Canonicarum Scripturarum Refutatio.*

**P**ATRUM auctoritatibus de Scripturarum Obscuritatibus explicatis, diluemus argumenta quæ à

re sumuntur. Primum argum. *Quia in Scriptura summa mysteria traduntur.*

In quo traduntur summa mysteria, in eo omnia sunt obscura, sed in scriptura traduntur summa mysteria. Ergo tota scriptura est obscura.

Bellarminus præterita Maiore, probat Minorem, de qua non est controuersia. Fatemur n. in scriptura esse multa mysteria, *que nemo principum huius sæculi cognouit.* Sed nos concessa Minore, negamus Maiorem. Non enim sequitur omnia esse obscura propter quædam mysteria, quæ in ijs obscura sunt, vt non sequitur omnes homines esse Philosophos, etsi quidam Philosophi sint. Deinde mysteria, quæ in scripturis traduntur, duobus modis sunt obscura, & nō obscura. Primum enim in se, siue sua natura sunt obscura, secundum modū autem doctrinæ, qui & facilis est, & simplicissimus, non sunt obscura. Per se siue sua natura sunt obscura, vt *Deum esse unum, et trinum*, rem ipsam vel naturam huius rei nemo penitus cognoscere potuit. Modo doctrinæ non sunt obscura. Idem enim, nempè *Deum esse unum & trinum*, tam simplici & perspicua doctrina traditū est, vt & pueris & senibus, viris & fœminis, doctis & indoctis ignotum esse nec possit nec debeat. Deinde eadem mysteria, secundū *oculos nature* sunt obscura, secundum *oculos fidei* non sunt obscura. Secundum *oculos nature* sunt obscura. Quis enim vnquam naturæ lumine assequi potuit, hæc omnia esse *creata ex nihilo*, vel quis vi ingenij sui intellexit, quomodo *Sara, quæ in iuuentute erat sterilis, in senectute facta sit fecunda.* Eadem credenti, hoc est ei, cui Deus fidem dedit

dedit ad credendum, non sunt obscura. Atque ita ferè intelliguntur omnia illa difficiliora in scripturis. Testis Apost. ad Hebr. cap. 11. v. 3. *Per fidem intelligimus constructum esse mundum verbo Dei, ut quæ cernimus, sint ex non apparentibus facta.* Idem testatur Paulus ad Romanos 4. versu 18. *Qui contra spem sub spe credidit, ut fieret pater multarum gentium: secundum id, quod ei dictum fuerat, ita erit semen tuum.* Ac minime imbecillis fide, non considerauit suum ipsius corpus iam emortuum, cum centum circiter natus esset annos, nec emortuam vuluam Sara. Aduersus autem promissionem Dei non disceptauit infidelitate: sed robustus factus est fide, tributa gloria Deo: ac plenè persuasum habens, eum quod promiserat, posse etiam facere. Ex his apparet illa quæ secundum naturam obscura sunt, secundum fidem non esse obscura. Sed Laici æquè habent idem, atque homines docti. Quin ipse Christus gratias agit Patri, quod hac mysteriis reuelauerit paruulis, & absconderit eadè a sapientibus, Matth. 11, 25. Possunt igitur & Laici illa mysteria intelligere. Postremò istorum mysteriorum est duplex scientia: vna perfecta, altera quæ ad salutem sufficit, siue quæ ad salutem est necessaria. Perfectam nemo in hac vita consequitur, 1. Corinth. cap. 13. v. 9. *Ex parte cognoscimus, & ex parte prophetamus.* Et si igitur multi se variè torqueant in illis vel euoluendis, vel inuoluendis: tamen omnes cogimur cum Augustino dicere, *plura esse in Theologia, quæ nescimus, quam quæ scimus.* Salutarem verò istam scientiam, quæ in fide, & sancta simplicitate consistit, etiam Laici in hac vita assequi possunt. Non igitur omnia my-

steria ita sunt obscura in sacris literis, quin Veritas in rebus controuersis ex ijs colligi possit, & Laici, præsertim fideles in illorum meditatione, lectione, auscultatione, & studio cum vtilitate versari possint. Secundum Argumentum, Quia *phrasis siue modus dicendi est in scriptura obscurus.*

In quo quædam dicendi formulæ sunt obscuræ, illud totum est obscurum. Sed in scriptura quædam dicendi formulæ sunt obscuræ. Ergo tota scriptura est obscura.

Bellarminus dissimulata Maioris vanitate, probat Minorem, quæ non est controuersa, & ostendit in sacra scriptura esse *quasdam non veras, sed apparentes tantum antilogias; esse item quasdam hystero-logias, Hebraismos, Tropos & similia*, & probat illud, quod non est necessarium, & quod nemo negauit. Sed nos cōcessa Minore, negamus Maiorem. Etsi enim quædam dicendi genera in scriptura sunt obscura, isthinc tamen non sequitur totam scripturam esse obscurā. Deinde illa talia sunt, vt adhibito diligenti studio, & sedula institutione facile addisci possint. Postremo ex istis multa sunt, quæ quidē doctōri sunt cognitu necessaria, sed tamen à Laicis citra periculum salutis ignorari possunt. Tertium Argumentum, *Quia Lutherani scribunt multos Commentarios in vniuersam scripturam.*

In quod Lutherani multos Commentarios scribunt, hoc totum est obscurum. Sed Lutherani multos Commentarios scribunt in vniuersam scripturam. Ergo tota & vniuersa scriptura est obscura.

Respondeo

Respondeo Maiorem esse falsam. Posset enim scriptura intelligi, etiamsi tam multi Commentarii in eam non scriberentur. Deinde Commentar. scribuntur vt illa quæ mediocriter intelliguntur, meliùs intelligantur. His addo hoc seculum laborare multitudine Commentariorum. Lectores enim per lectionem Commentariorum ab ipso textu abducuntur, & sunt nonnulla, quæ in istis Commētarijs (loquor non tantùm de Commentarijs Lutheranis, sed etiam Papisticis) non euoluuntur, sed inuoluuntur; & obscurantur, non illustrantur. Quartum Argumentum. *Quia ipsi Lutherani fatentur in scriptura esse multa obscura.*

Quod Lutherani fatentur, hoc est verum, Sed Lutherani fatentur in scriptura esse quædam obscura. Ergo in scriptura sunt quædam obscura.

De præmissis huius Syllogismi nihil dicam. Sunt enim ex Hypothesi, & ob eam causam contra Lutheranos, non pro ijs adduci possunt. Ijs igitur missis, tantùm dico de conclusione, quæ si vera est, sequitur falsum esse, quod dixit Beilarminus in principio huius disputationis, Lutheranos dicere *totam & vniuersam scripturam esse facilem & perspicuam*. Esse enim quædam in scriptura obscura, & totam ac vniuersam scripturam esse perspicuam, sunt contradictoria, & simul vera esse non possunt. At hîc Beilarminus ex eorum sententia dicit quædam in scriptura esse obscura, Ergo falsum est, quòd illic ex illorum sententia dixit, totam scripturam esse perspicuam, neque opus habere Interpretatione. Deinde



ex Luth. nunquam probabit Bellarm. omnia in scriptura esse obscura. Si igitur ab aliquibus obscuris, omnia obscura esse disputat, tum errat, quemadmodum antè ostensum est. Si verò contendit quædam in scripturis obscura esse, & quædam perspicua, tum pugnat line aduersario. Idē n. asserimus, & docemus Interpretationem in Ecclesia necessariam esse. Libenter n. cum Augustino fatemur, *Sp. sanctum ita modificasse scripturas, ut locis apertioribus fami succurreret, obscurioribus fastidia detergeret, nec quicquam ferè de illis obscuritatibus erui, quod non planissime dictum alibi reperitur.* de Doctrina Christ. lib. 2. cap. 6.

CAPVT V.

*Orthodoxorum sententia de Scripturarum Obscuritate proponitur.*

**S**uperioribus capitibus Papistarum argumenta de Scripturæ obscuritate refutauimus; sequitur ut Orthodoxam Ecclesiæ Christianæ sententiā proponamus, & defendamus. Illa est huiusmodi. In sacris literis esse quædā, non omnia obscura; ac proinde opus esse interpretatione, quædam tamen absq; interpretatione intelligi posse. Deinde ea, quæ obscura sunt, si sunt ad salutem necessaria, per ea, quæ perspicua sunt, explicari. Ac p̄inde scripturam ita perspicuā esse, ut vera sententia in rebus controuersis ex ea erui possit. Hæc sententiam esse veram primū probabimus ex s. literis, Deut. 20. cap. v. 1. *nam hoc præceptū, quod præcipio tibi hodie, non est occultum à te, neque est remotum, Non in cælo, ut quis dicat, quis ascendet pro nobis in cælum, ut tollat illud nobis, & recitet illud nobis, & impleamus illud. neq; trans mare est, ut dicas, quis trans-*  
*fretabit*

*freitabit pro nobis mare, ut afferat illud nobis, et recitet nobis, ut impleamus illud. Sed propinquum est tibi verbum valde, in ore tuo, & corde tuo, ut facias illud.*

Quod non est occultum à nobis, neq; est remotum à nobis, sed est nobis propinquū, in ore & corde nostro, illud prorsus obscurum non est. Sed verbum Dei non est occultū à nobis, neque remotum à nobis, sed est nobis propinquum, in ore nostro, & in corde nostro. Ergo verbum Dei non est prorsus obscurum.

Bellarminus concessa Maiore respondet ad Minorē, ac primū dicit Moſen loqui non *de facilitate intelligendi scripturā, sed de facilitate implendi*, hoc pbat testimonio Tertulliani, Ambrosij, Chrysostomi. At si hæc responsio vera est, tum etiam de facilitate intelligendi legem non intelligi nō potest. Nam quod factū facile est, hoc intellectu difficile non est. Sed verbum Dei factū facile est, secundū hos doctores. Ergo intellectu difficile non est. Maior est manifesta. Nam quod prorsus non intelligimus, hoc facere non possumus. Intelligentia n. actionem præcedit. Minor est vera ex hypothesi. Hac igitur respons. nō contentus Bellar. addit alteram, *nempè posse etiā intelligi de facilitate cognoscendi*. Quod si ita est, habemus quod volumus. Nam si verbum Dei facile intelligitur, sequitur illud prorsus obscurum non esse. Sed dicit Bellarminus, id tantū de Decalogo intelligi debere, hoc probat quod *omne verbum Dei, quod nunc extat, eo tempore non extabat*. Quod enim nondum est, hoc neq; facile neque difficile esse potest. Sed verbū Dei tum præter Decalog. nullū erat.

Ergo

Ergo neque facile, neque difficile esse potuit. Minor huius Syllogismi est falsa. Verbum enim Dei, quod ad salutem necessarium erat, tum erat. Fuit n. in Paradyso promulgatum, & omnes sancti, qui ante Mosén vixerunt, illud obseruarunt, neque vlla est differentia inter verbum Dei ante Mosén, & inter illud, quod est post Mosén, nisi quod ante non fuerit literis comprehensum, post verò literis cōsignatum. Nam quod ad substantiam attinet, verbum non scriptum idem est, quod verbum scriptum. Si igitur omne verbum, quod tempore Mosi erat, facile erat; sequitur verbum non scriptum facile esse. Verbum enim Dei quod tum fuit, non est difficile, sed tum fuit verbum non scriptum. Ergo verbum non scriptum non est difficile. Sed verbum scriptum quo ad substantiam, & modum salutis consequendæ, nihil aliud est, quàm verbum non scriptum. Ergo & verbum scriptum, quo ad substantiam, & modum salutis consequendæ, non est difficile. Maior est vera ex hypothesi. Minorem & eius consequentiam non negabit Bellarminus. Deinde quod dicit falsum est. Cùm enim Mosés Deuteronomiũ scribe-  
*δεύτερος νόμος*, quod lex in priorib. libris scripta in hoc libro iteratur. Manifestum igitur est quatuor priores libros, & triginta capita quinti lib. eo tempore scripta esse. Si igitur illud verbum, quod tum scriptum erat, est facile; tum isti quatuor priores lib. & maxima pars 5 lib. hoc est, 30. priora cap. quinti lib. sunt facilia. Isti enim 4. lib. cum 30. prioribus capitibus quinti lib. eo tempore scripti erant.

Quicquid

Quicquid tempore Moſis ſcriptum fuit, hoc eſt intellectu facile, ſed tempore Moſis 4. priores libri, & maxima pars 5. lib. ſcripta fuit. Ergo 4. priores libri & maxima pars 5. lib. non eſt intellectu difficilis.

Maiores eſt vera ex hypotheſi, Minorem Bellarminus negare non poteſt. Præterea quatuor priores libri Moſis cum 30. capitibus quinti libri non ſunt intellectu difficiles, ſed in ijs ſcripta ſunt, quæcunq; ſunt ad ſalutem neceſſaria. Ergo quæcunque ſunt ad ſalutem neceſſaria, illa non ſunt intellectu difficilia. Minorem non negabit Bellarminus, Maior eſt vera ex hypotheſi. Sed & alia ratione probari poteſt tum plura, quàm ſolum Decalogum ſcriptum eſſe. Verſu enim 10. meminit non tantum *præceptorum*, quæ ſunt decalogus, ſed etiam *ſtatutorum* vel *ceremoniarum*, quæ non ſunt in decalogo. Et verſu 16. meminit non tantum *præceptorum* & *ſtatutorum*, ſed & *Indiciorum*, quæ etiam non ſunt in decalogo. At *ſtatuta & Indicia eo tempore ſcripta erant*. Falfum igitur, quod dicit Bellarminus, præter Decalogum eo tempore nihil ſcriptum fuiſſe. Deinde ſi omnia illa ſunt facilia, quæ illo tempore ſcripta erant, tum ſequitur omnia *præcepta*, *ſtatuta*, & *indicia Iehouæ* eſſe facilia. Illa enim omnia tum ſcripta erant. At quicquid eſt ad ſalutem neceſſarium, hoc *præceptis*, *ſtatutis*, & *Indicijs Iehouæ* continetur. Ergo quod ad ſalutem neceſſarium eſt, hoc non eſt intellectu difficile. Deinde ſi quis diſputandi gratia concederet ſolum Decalogum eſſe intellectu facilem, tamen obtinerem⁹ quod volumus. Non enim dicimus totam ſcripturam facilem.

facile esse, sed quædā tantū in scriptura esse facilia. Quod necessariò verū est, si Decal. est intellectu facilis, vt inquit Bellar. Decalog. n. est pars scripturæ. Si igitur hæc est Bellar. sentētia, frustrā nobiscū litigat. Prætereā tota scriptura diuiditur in Legē & Euangeliiū, & quæcūq; in V. & N. Testamēto scripta sunt, illa sunt explicationes Legis & Euāgelij. Vnde sequitur dimidiā scripturæ partē, vtpote quæ vel legē tradit, vel eam explicat, etiā ex Bellar. sentētia esse facile. Sed vt pedē paulò propius figamus. Bellar. concedit verbū Dei de quo Moses loquitur, facile esse. At loquitur nō de aliqua parte, sed de toto Dei verb. Loquitur n. de *præceptis, statutis & iudicijs*. At *præcepta, statuta & iudicia* sunt totū Dei verbū. Deinde loqui eum de *lege* cōcedit Bellar. Et loqui eū de Euang. docet Paul. in Epist. ad Rom. c. 10. v. 6. Loquitur n. de ea lege, *quæ nobis affert iustitiā ex fide*. Illa autē Lex est Euang. Si igitur illud verbū, de quo loquitur Moses, non est obscurū, sequitur neq; Legē, neq; Euang. esse obscurū. Loquitur n. de *Lege & Euāgelio*. At *Lege & Euang.* cōprehenditur totū Dei verbū. Ergo omne Dei verbū est intellectu facile. Vbi tamen notandū est, multa in Dei verb. ppter corruptionē nostræ naturæ esse obscurā. Quæ verò in ijs ita sunt ad salutē necessaria, vt citra eorū cognitionē nemo salu' fieri possit, illa regeneratis sūt facilia. Atq; hæc sent. ex hoc loco Moysis c. 30, 11. Et ex Pau. ad Rom. 10, 6. euidēter colligi p̄t.

Secundum argumentum, ex Psalm. 119. v. 8. *Testimonium Iehoua fidele est, sapientem efficiens paruulum, præceptum Iehoua purum est, illuminans oculos*, Psal. 119. v. 105. *Lucerna pedi meo verbū tuū, & lumē semite meæ*. Prou. 6, 23. *Quia vt lucerna est mandatū, & lex vt lux.*

Quod

Quod efficit hominem sapientem, & illuminat oculos nostros, item, quod pedes nostros dirigit, & in via lumen est, hoc adeò clarum est, ut veram sententiam in rebus controuersis ostendere possit, sed verbũ Dei efficit hoĩem sapientẽ, & illuminat oculos nostros, dirigit pedes nostros, est nobis lumen in via, & affert nobis lucẽ. Ergo verbũ Dei adeò clarũ est, ut verã sententiã in rebus cõtrouersis ostẽdere possit.

Bellarminus concessa Maiore respondet ad Minorem, & dicit hoc non de tota scriptura, sed de aliqua parte, nempe de *lege Decalogi* intelligendum esse. Sed hoc est falsum. Dauid enim loquitur de tota lege. Psalm. enim 119. v. 8. meminit *Legis & Testimonij*. v. 9. meminit *Præcepti*. Hoc Hieronymus explicat *Nouum Testamentum*. v. 10. meminit *Iudiciorum*. At hæc omnia non pertinent ad solum Decalog. Deinde v. 8. dicit *Legem conuertere animam*, at hoc de solo Decalogo dici nequit. Cũ igitur Legem nomet, & eiusmodi propria addat, quæ non nisi de Evangelio inteiligi possunt, manifestum est, eum non nisi de toto Dei verbo agere. Psal. autem 119. meminit *Verbi, Legis, Iudiciorum, Testimoniorum, Præceptorum, statutorum*. At hæc omnia de solo Decalogo accipi non possunt. Deinde ipse Bellarminus hoc de tota scriptura explicat lib. 3. cap. 2. *Dauid*, inquit, *nomine legis non intelligit decem illa præcepta solum, sed omnes diuinas scripturas*. Idem docet Augustin. Sermone 23. in Psalm. 118. *Quid est hoc verbum*, inquit, *quod ita lumen dicitur, ut Lucerna sit, nisi verbum intelligamus, quod factum est ad Prophetas, vel quod predicatum est per Apostolos? Non verbum Christum, sed verbum Christi, de quo scriptum*

*scriptum est, fides ex auditu, auditus autem per verbum Christi. Nam & verbum Propheticum lucerna comparans Apostolus Petrus, habemus, inquit, certiore Propheticum sermonem, cui benefacitis intendentes velut lucerna lucenti in obscuro loco. Quod itaque hic ait lucerna pedibus meis verbum tuum, & lumen semitis meis, verbū est, quod scripturis sanctis omnibus continetur.* Hac igitur Responsione non contentus Bellarminus, concedit Dauidem agere de tota scriptura, & hanc dicit esse *lumen & lucem, &c.* non quod *lumen in se habeat, sed quod intellecta lucem afferat.* Sed hic admittit fallaciam consequentis. Effectum enim dicit causę causam esse. Vult enim scripturam ideò lucidam, vel lucem esse, quod *intellecta illustrat.* Sed hoc est manifestè falsum. Non enim quia scriptura intellecta illustrat, ideò lux est, Sed quia lux est, ideò illuminat, & lucem affert. Quod item dicit *scripturam lucidam non esse, nisi nos intelligamus eam,* falsum est; quemadmodū enim Sol lucidus est, etiam si omnes homines essent cæci; eodem etiam modo scriptura lucida est, etiam si omnes homines suos oculos ab ea auerterent. Neque tamen negamus *scripturam intellectam illuminare mentes nostras,* sed non propterea lucida est, quod à nobis intelligitur. Ita enim illius lux penderet à nostra intelligentia; & si nos eam intelligeremus, esset lucida; Si verò non intelligeremus, non esset lucida. Vel quod idem est; si hic homo eam intelligeret, esset lucida; si alter eam non intelligeret, non esset lucida; atque ita vno eodemque tempore esset lucida, & non lucida. Vtrumque æquè absurdum. Vt autem hoc rectiùs intelligatur, explicabo paulò latiùs.

Scriptura



Scriptura dicitur duobus modis lucida, vno, *respectu sui*, altero, *respectu nostri*. Respectu sui, semper per se est lucida, & lucem semper in se habet. Respectu nostri, est nobis lucida, quando nos eam percipim⁹. Hoc est, quæ semper in se lucida est, illa etiam nobis incipit lucida fieri, cùm nos eius lucem percipimus. Dum igitur Bellarminus dicit,

Quod nobis lucidum non est, hoc omnino lucidum non est, Scriptura non intellecta nobis lucida non est. Ergo scriptura non intellecta prorsus lucida non est.

Admittit fallaciam à secundum quid, ad simpliciter. Maior enim simpliciter intellecta falsa est. Nā quemadmodum Sol in se lucidus est, etiamsi nobis non sit lucidus, hoc est, etiamsi nos eum non videamus; ita etiam verbum Dei in se semper lucidum est, etiamsi nos illud non intelligamus. Intereà tamen non negamus eos, qui scripturam non intelligunt, vel quibus scriptura propter ignorantiam lucida nō est, non posse controuersias Theologiæ ex scriptura decidere: sed asserimus eos tantum posse controuersias Theologicas ex scriptura decidere, quibus illa per Spiritum sanctum lucida est. Prætereà quod Bellarminus dicit scripturam non esse lucidam, nisi intellectam, verum non est. Scriptura enim non tantum lucem in se habet, sed nobis etiam lucem affert, Psalm. 19. versu 9. *Præceptum Iehonæ purum*, inquit David, *illuminans oculos*, hoc est, *aperit oculos nostros, ut se intelligamus*, & v. 3. *Testimonium Domini fidele est, sapientem reddens paruulum*, hoc est, *imperitum instituit, & erudit*. Atque hæc est differentia inter scripturam,

& reliquas luces . Quod reliquæ luces splendent quidem, sed cæcis non splendent; Scriptura verò ijs etiam, qui in cæcitare demersi sunt, lucem affert, & intelligentiam. Cùm igitur scriptura non tantùm in se lucida sit; sed *nostros oculos etiam illuminet*, & *paruulos efficiat sapientes*, rectè dicimus eam in rebus controuerlis ad veram sententiam indagandam sufficere.

Tertium argumentum est ex Marth. 5. cap. v. 13.  
*Vos estis lux mundi.*

Omnis lux est clara. Sed Apostolica doctrina est lux mundi. Ergo Apostolica doctrina ita clara est, vt tenebras à luce, id est, errores à veritate distinguere possit.

Maiores est manifesta. Vt enim tenebræ obscuræ sunt, ita lux clara est, et viam ostendit . Minor probatur ex loco allegato. Quod autem Apostoli sint lux mundi, de illorum doctrina intelligi debet. Doctrinâ enim vniuersum mundum illuminât. Hieronymus ad dictum locum . *Docet, inquam, fiduciam predicandi, ne Apostoli abscondantur ob metû, & sint similes lucernæ sub modio: sed totali libertate se prodant, vt quod audierunt in cubiculis, predicent in tectis.* Bellarminus respondet, eos *ratione vite esse lucem mundi.* Hoc quidem non negamus, sed addimus eos & ratione doctrinæ esse lucem mundi. Nam qua re mundum illustrant, ea re sunt lux mundi. Sed Apostoli sua doctrina mundum maximè illustrant, Ergo Apostoli sua doctrina maximè sunt lux mundi. Maior est extra controuerfiam posita. Minoris firmitatem cùm videret Bellarminus, concedit eam, & fatetur Apostolorum

ftolorum doctrinam esse lucem mundi: non simpliciter, sed addita hac distinctione; nempe Apostolorum doctrinam esse lucem mundi, *non quòd sit facilis ad intelligendum, sed quod intellecta mundum illuſtret.* Hoc etſi à nobis antè refutatum eſt, iterum tamen à nobis excutiendum eſt. Ac primùm inquirendum eſt, an Apoſtolica doctrina non ſit in ſe lux? hoc eſt, an non ſit ſuæ naturæ ratione clara & lucida. An verò tum tantùm ſit lux, cùm à nobis intelligitur? Bellarminus dicit, eam tantùm lucem eſſe, cùm à nobis intelligitur. Non autem in ſe, & ratione ſuæ naturæ lucem eſſe. Nos verò affirmamus eam etiam in ſe lucem eſſe. Omnis enim lux in ſe lux eſt. Sol enim lucidus eſt, etiamſi nullus homo eum videat. Ignis item lucidus eſt, etiamſi à nemine videatur. Vanum igitur eſt, quòd Bellarminus Apoſtolorum doctrinam negat eſſe lucem mundi, niſi à nobis intelligatur. Et vt hoc rectiùs cognoſcatur, meminerimus antè à nobis dictum eſſe, omnem lucem duob. modis lucidam eſſe, nempe *reſpectu ſui, & reſpectu noſtri.* Reſpectu ſui Apoſtolorum doctrina ſemper lucida eſt, neque vnquam lucida eſſe non poteſt. Reſpectu autem noſtri lucida eſt, quando nobis lucida eſſe incipit, vel quando nos eam apprehendimus. Sol enim reſpectu ſui ſemper lucidus eſt, & quamdiu Sol eſt, non lucidus eſſe non poteſt. Homini autem lucidus non eſt, niſi quando ille eum intuetur. Eodẽ modo Apoſtolica doctrina reſpectu ſui ſemper lux eſt, & quamdiu Apoſtolica doctrina eſt, non lux eſſe non poteſt: nobis autem tum demùm lucida fit, quãdo eam intelligere incipimus. Dum igitur Bellarminus

in hunc modum disputat. Nulla lux est lucida, nisi videatur, Doctrina Apostolorum est lux. Ergo Apostolorum doctrina nō est lucida, nisi intelligatur. Dum, inquam, hoc modo disputat, admittit fallaciā à dicto secundum quid, ad simpliciter. Potest enim Sol lucidus esse, etiamsi homini cæco lucidus non sit. Deinde omnis lux clara est, & omnibus lucem affert, nisi sit impedimētum, vt, Sol omnibus hominibus lucem affert, nisi inter nostros oculos & corpus solare sit nubes interiecta, vel nisi homo sit cæcus, vel oculos sponte auertat: eodē modo, Doctrina Apostolorum est nobis lucida, nisi quis sit natura deprauatus, aut à Sathana excæcatus, aut data opera scire nolit. Vt igitur homines Solis luce illustrati, possunt inter tenebras, & lucem distinguere, ita ijdē lumine Apostolicæ doctrinæ illustrati, possunt inter veram & falsam doctrinam discernere. Interea tamē non volumus reliqua omnia, doctrinam, studium, illustrationem, illuminationē esse superuacua. Hæc non est nostra sententia: sed dicimus eos omnes, qui per Spiritum sanctum sunt illuminati, & qui diligentem operam, studium, & laborem in scriptura cognoscenda posuerunt, posse ex scriptura de falsa & vera doctrina iudicare. Indoctis autem & impiis hominibus hoc iudiciū non concedimus, & vt apertius dicamus; dicimus scripturam per Spiritum sanctum nostris mentibus patefactam adeo perspicuā esse, vt ex ea in singulis controuersijs vera sententia à pijs, diligentibus, & doctis hominibus erui possit, Quod autem Bellarminus dicit, *eam intellectam tantum lucidam esse*, falsum est. Nam vt antè dictum est,

Scriptura

Scriptura Apostolica lux est, & lucem in se habet, etiam si omnes homines cæci essent, neque hoc tantum, sed nobis etiam lucem affert, quemadmodum præcedente argumento ostendimus. Cum igitur Apostolica doctrina in se lucida sit, & nobis lucem afferat, sequitur eam ita claram esse, ut in rebus controuersis ex ea vera sententia erui possit.

Quantum Argumentum ex 2. Pet. 1. v. 19. *Habemus firmissimum sermonem propheticum, cui rectè facitis, quod attendatis velut lucernæ splendentis in obscuro loco.*

Omnis lucerna splendens in obscuro loco tenebras pellit, & viam monstrat. Verbum Dei est lucerna splendens in obscuro loco, Ergo verbum Dei tenebras pellit, & viam monstrat, hoc est, errores patefacit, & veritatem manifestat.

Ex quo argumento hoc deduco.

Quod errores patefacit, & veritatem manifestat, hoc est ita perspicuum, ut ex eo in rebus controuersis vera sententia indagari possit. Verbum Dei errores patefacit, & veritatem manifestat, Ergo verbum Dei adeò perspicuum est, ut ex eo in rebus controuersis vera sententia indagari possit?

Bellarminus respondet ad Maiorem, *Prophetarum doctrinam vocari lucernam splendentem, non quòd facile intelligatur, sed quòd intellecta illuminet.* Ergo nisi intelligatur, non est lucerna splendens. Idem sophisma quod prius. Perinde enim est, ac si dicas, Sol non est lucidus, nisi videatur. At si homo faciem auerteret, vel Solem intueri nollet, num propterea Sol non esset lucidus? Est autem fallacia à nō causa ut causa.

Non enim quia intelligitur, ideò est lucerna splendens; Sed quia lucem & claritatem in se habet, eamque alijs, in quibus non est impedimentum, affert, ideò est lucerna splendens. Aspectus n. non est causa splendoris, sed eius effectus. Splendor aut, & claritas sunt causæ aspectus. Potest etiã esse fallacia cõsequentis. Nam nō quia facilè intelligitur, ideò est lucerna splendens, sed quia est lucerna splēdens, ideò facilè intelligitur. Quoniã igitur *splendet in obscuro loco*, ideò facilè videtur, & non contrà, quicquid dicat Bellarminus: Nam non quia Bellarminus Solem videt, ideò Sol clarus est. Est enim lucidus & clarus, etiam si Bellarminus eum non videret. Sed quia lucidus est, & clarus, ideò eum videt. Planè eodem modo, Non ideò verbum Dei lucidū est, quòd homo illud intelligit, Est enim lucidum, etiam si nullus homo illud intelligeret; sed quia lucidū est, ideò homo illud intelligit. Potest igitur doctrina lucida esse, etiã si tibi lucida non sit. Dum igitur quod tibi lucidum non est, simpliciter lucidum esse negas, admittis fallaciam à dicto secundum quid ad simpliciter, vt antea ostensum est. Relinquitur igitur, Scripturam & in se lucidam esse, & nobis lucem afferre, ac proinde sufficere ad veram sententiam in dogmatum controuersijs ostendendam.

Quintum Argumentum ex 2. Corinth. 4. versu 3. *Quod si tectum est Euangelium nostrum, ijs qui pereunt, tectum est.* Vnde apparet illud fidelibus apertum esse & clarū. At quod clarum est, & apertū, hoc sufficit ad verã sententiã in rebus controuersis ostendendã. Sed doctrina script. clara est, & apta. Ergo doctrina  
scrip.

scrip.in reb.cōtrouersis ad veritatē ostēdēdā sufficit.

Bellarminus Maiore cōcessa respondet ad Minore, & negat doctrinam scripturarum hoc loco per Euangelium significari. Sed hoc est falsum. Omnes n. Patres hunc locum de doctrina accipiunt. Ambrosius ad dictum locum, *Deum*, inquit, *secularium hominum oculos occacare, ne videant gloriā maiestatis Christi*. Hieronymus item hūc locum de predicata doctrina intelligit, *Ita manifestum est*, inquit, *apud omnes homines, verum esse, quod dicimus, ut eorum conscientia testimonium perhibeat nobis, qui resistant*. Deinde ad verba allegata dicit, *Quasi illi aliquis obiecisset, quod hanc non oēs intelligent veritatem. Sed non credentes, inquit, vel subdoli, nō fideles*. Chrysost. Homil. 8. in secundam ad Corinth. *Nihil*, inquit, *habemus adumbratum, neque in vita solē ista, sed etiam in ipsa predicatione*. & paulo post, *Nos verò*, inquit, *predicationem nudam facimus, ut omnes illam cognoscant, quod autem increduli illius virtutem ignorāt, hoc non sit nostra culpa, sed illorum stupore*. Theophylactus inquit, *Euangelium adeò clarum esse, ut etiam impiorum oculos perstringat, atque ita ferè explicant omnes doctores*. Deinde Paulus hoc eodem capite, versu 2. ait, *se non falsare sermonem Dei*. Per sermonem autem Dei intelligit totam doctrinam. Hoc pono extra controuersiam. At loquitur versu 3. de eadē re, de qua versu 2. Nam cū versu 2. diceret, *se non falsare sermonē Dei*, posset obijci, quare igitur omnes non intelligunt sermonē Dei? Hoc preoccupat & dicit, *Si quibus Euangelium opertum est, hoc non fieri propter Euangelij obscuritatem, sed propter aliam causam*. Vnde apparet aut Apostolum non satisfacere



tacitæ quæstioni, aut Responſionem debere intelligi de eadem re, de qua quærebat. Sed quærebat de Sermone Domini. Ergo vox Euangelij etiã de Sermone Domini intelligi debet. Sermo autem Domini est doctrina scripturarum. Falsum igitur est, quod Bellarminus dicit, Euangelium hoc loco de doctrina scripturarum intelligi non debere. Hoc cum videret Bellarminus, excogitauit aliam Responſionem, & dicit hinc agi de *intelligentia, & fide in Christum*. Quod existimo illi vel imprudenter elapsum, vel à veritate extortum esse. *Fidem enim & cognitionem Christi* accipit per Metonymiam, pro doctrina fidei & cognitionis Christi. Concedit igitur doctrinam fidei & cognitionis Christi esse apertam & facilem. At hoc tantum volumus. Concedimus enim in scripturis multa obscura esse, sed quæ ad fidem & cognitionem Christi pertinent, ea esse perspicua & clara. Si igitur hæc est Bellarmini sententia, inter nos non est controuersia. Quoniam igitur illa quæ ad fidem, & cognitionem Christi pertinent, perspicua & clara sunt, sequitur scripturam ita perspicuam esse, vt in rebus controuersis vera sententia in ijs dogmatis, quæ ad *fidem & cognitionem Christi* pertinet, ex ea erui possit. Deinde dicit Bellarminus homines in Veteri Testamento *non vidisse mysteria Christi, nisi per velamen figurarum & umbrarum*. In Novo autem Testamento dicit nos figuris omnibus impletis reuelata facie gloriam Domini spectare, & non esse animum, vel puerum Christianum, qui non sciat Deum passum, incarnationem, &c. Vnde apparet mysteria Christi, Incarnationem, Passionem &c. secundum Bellarmini sententiam

tiam ita esse clara & perspicua in Nouo Testamēto, *ut qualibet anus, & puer ea intelligat.* Quod si ita est, tum equidem vera sententia in rebus controuersis, præsertim ad Christi mysteria pertinentib<sup>9</sup>; ex scriptura colligi potest.

## CAPVT VI.

*Idem probatur ex Patribus.*

**S**cripturam ita perspicuam esse, vt cum Spiritus Illuminatione serioq; discēdi studio coniuncta, sufficiat ad veram sententiam in rebus controuersis ostendendam, probauimus ex ipsa scriptura. Idem nunc probabimus ex testimonio primitiuæ Ecclesiæ. Ac primū ex Augustino, qui lib. 2. de doctr. Christiana cap. 6. *Magnificè, inquit, & salubriter Spiritus sanctus ita scripturas modificauit, ut locis apertioribus fami occurreret, obscurioribus autem fastidia detergeret, nihil enim ferè de istis obscuritatibus eruitur, quod non planissimè alibi dictum reperiatur.*

Quæ doctrina nihil ferè obscurum tractat, quin idē alibi planissimè explicet, illa ita perspicua est, vt vera sententia in rebus controuersis ex ea erui possit. Sed verbum Dei nihil ferè obscurum tractat, quin idem alibi planissimè explicet, Ergo verbum Dei ita perspicuum est, vt vera sententia de rebus controuersis, ex eo erui possit.

Bellarminus concessa Maiore respondet ad Minorem, & dicit, Augustinum non simpliciter dicere *omnia esse in verbo Dei planissimè explicata, sed ferè omnia.* Ergo dicit quædam obscura esse, quæ nullo loco

sunt explicata, vt *Principium & finis Ezechielis*. At hoc nos non negamus; sed addimus, illa quæ obscura, & nusquam explicata sunt, non esse ad salutē valde necessaria. Quæ verò ad salutem necessaria sunt, illa non esse obscura, sed planissimè explicata. Et hoc ex Augustino colligi potest. Dicit enim eam ad *famem sedandam sufficere*. At illa famem non sedaret, nisi quæ ad salutem necessaria sunt, intelligerentur. Hanc esse veram Augustini mentem, constat ex sermone de blasphemia in Sp. sanctum. *Apertis*, inquit, *Scriptura locis pascimur, obscuris exercemur*. Et Tractat. 45. in Iohann. *Pascit nos*, inquit, *manifestis, exercet occultis*. Ex quibus sequitur Bellarmine, ea, quibus pascimur, esse manifesta & clara. At hoc volumus, nempe quæ ad salutē necessaria sunt, nō esse obscura, ac proinde veram sententiam de rebus ad salutē pertinentibus in dogmatis cōtrouersis, ex scriptura colligi posse. Cū igitur Bellarminus videret se Augustini auctoritate planè conuinci, deflectit ab Augustino, & producit duo exempla, quibus probare conatur, Scripturam, ad veram sententiam in rebus cōtrouersis ostendendā, non sufficere. Primū est Mat. 26. *Hoc est corpus meum*. Hæc dicit Papistis clara, Zuinglianis obscura esse. Quòd vocat nos Zuinglianos, facit nobis iniuriam. Et si n. Zuinglium habeamus pro fideli Christi ministro, vt qui Christum non tantum fideliter prædicauerit, sed suum etiam sanguinem pro eo fortiter suderit: tamen non in Zuinglij, sed in Christi nomine baptizati sumus, neq; Zuinglium Ecclesiæ nostræ caput vel Spōsum villo modo, sed Christum solū agnoscimus, & ob eam causā nō de

de Zuinglio, sed de Christo nomē gerimus. Deinde quòd dicit hunc locum nobis obscurum esse, in eo errat. Explicamus n. hunc locum, vt tota primitiua Ecclesia explicuit. Tertullianus lib. 4. cont. Marcionem, *Acceptum, inquit, & distributum discipulis corpus suum, illum fecit, hoc est corpus meum dicendo, hoc est figura corporis mei.* Origenes in Leuitic. Homil. 7. *Agnoscite, inquit, quia figura sunt, quæ in diuinis voluminibus scripta sunt: & idèò tanquam spirituales & non tanquam carnales examine & intelligite, quæ dicuntur, si n. quasi carnales ista suscipitis, ledunt vos, & non alunt. Est enim in Euangelio litera quæ occidit: non solum in Veteri Testamento litera occidens deprehenditur: Est in Nouo Testamento litera quæ occidit eum, qui non quæ spiritualiter dicuntur, aduertit. Si enim secundum literam sequaris, hoc quod dictum est, nisi manducaueritis carnem filij hominis, non habetis vitam in vobis, occidit hæc litera.* Cyprianus Sermone de Christo, *Dedit igitur Dominus noster in mensa, in qua ultimum participauit cum Apostolis conuiuium, proprijs manibus panem & vinum: in cruce verò manibus militum corpus dedit vulnerandū. Vt in Apostolis secretius impressa sincera veritas, & vera sinceritas exponeret gentibus, quomodo vinum & panis caro esset & sanguis: et quibus rationibus cause effectibus conuenirent, & diuersa nomina vel species ad vnā reducerentur essentiam, & significātia & significata iisdem vocabulis censerentur.* Augustinus contra Adimantum cap. 12. *Non dubitauit, inquit, dominus dicere, hoc est corpus meum, cum daret signum corporis sui, & in Psalm. 3. Dominus, inquit, Indam adhibuit ad conuiuiū, in quo corporis & sanguinis sui figurā adūbrauit.* Theodoret. dial. 1.

Seruator,

*Servator, inquit, noster nomina mutavit: & corpori quidam id, quod erat symboli, ac signi nomen imposuit: symbolo autem, quod erat corporis.* Ex his apparet nobis hunc locum obscurum non esse, nisi velit Bellarminus eū toti primitivæ Ecclesiæ obscurum fuisse. Nam ut primitiva Ecclesia, ita & nos eum intelligimus. Hæc nunc de isto dicto sufficiant. Vberius enim id suo loco explicabimus. Alter locus est, quem pro scripturarum obscuritate adducit, Marci 14. *Bibite ex ea omnes.* Hunc locum Papistis facilem, nobis autem obscurum esse asserit. Sed errat. Non esse enim illū obscurum ostendemus suo loco. Deinde quod dicit, *solis duodecim Apostolis hoc loco calicem concedi*, seipsum implicat. Nam si tantum duodecim discipulis calix conceditur, certè ad ramos Sacrificulos non pertinet. Illi enim non tantum ex istis duodecim discipulis, sed ne quidē omninò ex Christi discipulis sunt, quemadmodum suo loco ostendemus. Deinde ad quos dixit, *Edite*, ad eosdem dixit, *Bibite*. Sed *edite* dixit ad omnes adultos fideles, Ergo ad eosdē dixit *bibite*. Sed nunc non statuimus hunc locum penitus excutere. Sufficiat ostendisse, eum obscurū non esse, & orthodoxam Ecclesiam eum rectè cum primitiva Ecclesia cōtra Papistas intelligere, ac p̄inde scripturam ita perspicuam esse, ut vera sententia de rebus controuersis ex ea erui possit.

Secundum Argumentum, Quod Chrysostomus Homilia 3. de Lazaro. *Apostoli, inquit, & Propheta omnia contrà fecerunt, manifesta claraq; que prodiderūt, exposuerunt nobis, veluti communis orbis doctores, ut per se quisque discere possit ea, que dicuntur vel sola lectione.*

Quæ

Quæ ita manifesta & clara sunt, vt vel sola lectiōe intelligi possint, ex ijs in rebus controuersis vera sententia erui potest, Sacra autem scriptura ita manifesta est & clara, vt vel sola lectione intelligi possit. Ergo ex sacra scriptura in rebus controuersis vera sententia erui potest.

Bellarminus concessa Minore respondet ad Maiorem, & contendit ex Chrysostomi sententia multa esse obscura in sacris Scripturis. Atqui hoc non negamus. Concedimus n. libēter in sacris Scripturis esse multa obscura. Sed illa quæ ad salutem necessaria sunt, non esse obscura contendimus. Et illud probamus ex Chrysost. Homil. 3. in post. ad Thessal. ille probat suam sententiam, & dicit Chrysostomum ad torporem excutiendum multorum, qui possent scripturā legere, si vellent, *illis amplificationibus*, vti. Sed dum Bellarminus probat quædam in scripturis esse obscura, probat rem non necessariam. Illud enim vltro fatemur. Deinde quum dicit, *multos posse sacram Scripturam cum fructu legere*, si vellent, seipsum implicat; Per *multos* enim, aut eos intelligit, quos Chrysostomus alloquitur, aut errat. Sed tantum Theologum aberrare à mente Chrysostomi dicendum non est. Ergo eos intelligit, quos Chrysostomus alloquitur. Alloquitur autem *sutores, piscatores*, & vt vno verbo dicam, *Idiotas*. Ergo ex Idiotis etiam multi sunt, qui secundum Bellarmini sententiam, scripturam etiam cum fructu legere possunt. Quod si ita est, sequitur scripturam adeò obscuram non esse, vt contendit Bellarminus. Ex cuius enim lectione Idiotę proficere possunt, hoc non est valdè obscurū.

Sed

Sed ex scripturæ lectione Idiotæ proficere possunt. Ergo scriptura adeò obscura non est: Deinde dicit *ista perspicua, quæ in scripturis sunt, de historijs intelligenda esse*, idque secundum Chrysostomi sententiam. Si Bellarmin. propterea indefinitè loquitur, ut doceat quædam historica esse perspicua, & præter illa etiam, ista quæ sunt ad salutem necessaria, esse perspicua, non habet nos aduersarios. Si autem indefinitam istam locutionem intelligit exclusiuè, & sentit historica tantum esse perspicua in sacra Scriptura, tum facit Chrysostomo iniuriam. Chrysostomus enim dicit, *Spiritum sanctum ista dispensasse, & attemperasse, quò publicani, piscatores, tabernaculorum opifices, pastores, Idiotæ illiterati per hos libros salui fierent, ne quis Idiotarum ad hanc difficultatis confugere posset excusationem, ut omnia facilia conspectu essent ea, quæ dicuntur, ut & opifex, & famulus, & vidua, & mulier, & omnium hominum indoctissimus, ex audita lectione aliquid lucri & commodi reportaret.* Ex hoc loco apparet non tantum historica, sed & illa per quæ salui fieri debemus, esse in Scripturis perspicua. Quod & totidem verbis dixit Homil. 3. in poster. ad Thessal. Similia dicuntur in Homil. 1. in Iohann. & Homil. 1. in Matth. Concludimus igitur ex Chrysostomi sententia, illa, per quæ saluamur, vel quæ sunt ad salutem necessaria, esse in scripturis perspicua & clara. Idem docet Epiphanius contra Ariomanitas Hæres. 69. *Omnia, inquit, sunt clara & lucida, & nihil contrariū neque mortis complexus speciem habens in diuina scriptura.* Idem contra Anomeos Hæres. 76. *Omnia clara sunt, inquit, in diuina scriptura, His qui ratiocinatione sermonem de-*



nimum adire volunt, et non diabolicam operationem in seipſos conſciuerunt, ac ſeipſos in barathrum mortis conijcere conantur. Laſtantius lib.6. cap.21. Num Deus, inquit, & mentis, & vocis, & lingua artifex, diſertè loqui non poteſt? imò verò ſumma providentia carere ea fueo voluit, quæ diuina ſunt, vt omnes intelligerent, quæ ipſe omnibus loquebatur. Idem docet Chryſoſt. Homil. 12. in Genef. Scriptura, inquit, ſeipſam exponit, & auditorem errare non ſinit, & in Pfalmum 95. Neque oportet, inquit, quicquam ſine teſtibus dicere, ſolaq; animi cogitatione. Nam ſi quid dicitur abſque ſcriptura, cogitatio claudicat, nunc annuens, nunc heſitans, & interdum friuolum ſermonem auerſans, interdum vt probabilem recipiens. Verùm ubi è ſcriptura diuina vocis prodijt teſtimonium, & loquentis ſermonem, & audientis animum conſtat. Ex his & ſimilibus cum primitiua Eccleſia concludo ſacram Scripturam ita perſpicuam eſſe, vt ad veram ſententiam in dogmatis controuerſis oſtendendam ſufficiat.

## CAPVT VI I.

*Idem probatur ratione.*

**P**rimitiuæ Eccleſiæ Iudicium de Scripturæ perſpicuitate oſtendimus, & Bellarmini contra illud exceptiones refutauimus capite ſuperiore, nunc idè ratione probabimus, ac primùm, quia ſumma totius Scripturæ, quæ in oratione Dominica, Decalogo, Symbolo & Sacramentis cōſiſtit, habet in ſcriptura apertiſſima teſtimonia.

Quæ in ſcriptura habent apertiſſima & clariſſima teſtimonia, illa adèd perſpicua ſunt, vt vera ſententia

sententia ex ijs in rebus controuersis erui possit, sed quæ in Decalogo, Symbolo, & Sacramentis continentur, habent apertissima testimonia in sacris literis, Ergo vera sententia in rebus controuersis ex Scriptura erui potest.

Bellarminus nescit Enthymema, vt tantò faciliùs incautum lectorem decipiat, & dicit *nos propter ista quadam perspicua concludere, totam scripturam esse perspicuam.* Atque ita negat consequentiam. Bellus homo, cùm non possit elabi, fingit sibi somnia, cum quibus relicta controuersia bellum ineat. Nos autem non dicimus omnem vel totam scripturam esse perspicuam, *sed illa esse perspicua, quæ in scriptura habent manifesta, & clara testimonia,* & hoc nunquam refutabit Bellarminus, etiamsi omnes sophistarum arculas excuteret. Deinde negat Minorem, hoc est Antecedens Enthymematis, & dicit, si omnes articuli Christianæ fidei haberent tam manifesta scripturæ testimonia, tum nullæ essent in Ecclesia controuersia, q.d.

De quibus est controuersia, illa non sunt manifesta, sed de omnibus articulis Christianæ fidei est controuersia, Ergo nulli articuli Christianæ fidei sunt perspicui & clari.

Sed hìc Bellarmine te implicas contradictione. Paulò enim antè dixisti, *anus & pueros scire Deum esse incarnatum, passum, &c.* Argumento etiam 9. dixisti, *Rusticos intelligere mysteria Redemptionis.* At si hæc adeò perspicua sunt, vt rustici, anus, pueri ea intelligant, tum utique non sunt obscura. & vice versa, si obscura sunt, tum rustici, anus, & pueri ea nō intelligunt

ligunt. Deinde Maior est falsa. Non omnia enim obscura sunt, de quibus aliqui controuersiam mouent. Multi enim superbia, & vanitate inflati, etiam illa, quæ clara & perspicua sunt, suis quæstionibus inuoluunt, & obscurant. Alij per liuorem, alij ex præiudicio multis contradicunt; sunt etiam, qui à Diabolo excæcati veritatem agnoscere nō possunt. Logici vocant fallaciam Accidentis. Deinde si omnia controuersa sunt obscura, tum nihil in tota Theologia est perspicuum. Nihil enim est in tota Theologia, de quo non aliquando fuit controuersia. At hoc non vult Bellarminus, fatetur enim in scriptura quædam esse perspicua. Ergo hoc argumentum est infirmum. Cū igitur omnia illa, quæ in Decalogo, Oratione Dominica, & Sacramētis continentur, habeant perspicua & clara testimonia in sacris literis; sequitur multa esse in sacra Scriptura perspicua, & de ijs posse veram sententiam in rebus controuersis ex scripturis erui.

Secundum Argumentum. *Quia in Veteri Testamento liber erat signatus, Ezaïæ 29. v. 11. In Novo autē Testamento liber est apertus, Apocalyp. 5. v. 5. Quod apertum est, hoc adeò perspicuum est, vt sufficiat ad veram sententiam in rebus controuersis ostendendam. Sed verbum Dei apertum est. Ergo verbum Dei sufficit ad veram sententiam in rebus controuersis ostendendam. Bellarminus concessa Maiore respondet ad Minorem, & dicit non totum Dei verbū apertum esse, sed mysteria redemptionis aperta esse concedit, eaq; ita aperta esse asserit, vt rustici & mulieres ea intelligant. At nos fatemur totam scripturam apertam*

non esse, & mysteria Redemptionis aperta esse cum Bellarmino agnoscimus. Ergo si Bellarminus ex animo loquitur, nulla est inter nos cotrouersia. Nostri ad defendendam orthodoxam sententiam producunt Hieronymum in 44. caput Ezechielis ubi ille hoc eodē modo explicat, atq; nostri. Bellarminus non respondet ad locum Hieronymi allegatum, sed allegat alium locum, ex Epist. 13. ad Paulinum. Vbi Hieronymus dicit *non solum esse velamen in facie Mo-  
sis, sed etiam in facie Euangelistarum, ac proinde orandum  
nobis cum Propheta, reuela oculos meos. Atq; ita Hiero-  
nymum opponit Hieronymo.* Hoc disputandi genus etsi ridiculum est; tamen in gratiam Bellarmini excutimus. Hieronymus in 44. caput Ezechielis. *Postquā,  
inquit, ille pependit in cruce, & loquutus est ad Latronē,  
hodie mecum eris in paradyso, statim velum templi scissum  
est, & aperta sunt omnia, ablatōq; velamine dicimus nos  
oēs reuelata facie gloriam Domini contemplantēs in ean-  
dē faciē transformamur à gloria in gloriam.* Idem Epist.  
13. ad Paulinum, *Dicit adhuc hodie manere velamē non  
solum in facie Mo-  
sis, sed etiam in facie Apostolorum &  
Euangelistarum. Ideò cum Propheta orandum, reuela  
oculos meos. Vtique illa duo, velamē ablatum est, & ve-  
lamē manet adhuc hodie in facie Mo-  
sis & Apostolorum*  
ex diametro pugnant. Ideò secundum idē & ad idē  
vera esse non possunt. Proinde si Hieronymus hæc  
eodem mōdo intellexit, tum aut errauit in Epist. 13.  
aut in Commentar. ad 44. caput Ezechielis. Elige  
Bellarmino, quam sententiam voles. Ac proinde de-  
sine patrum allegationes tantopere posthac contra  
nos iactare. Nam si intellexisti hæc pugnare, & tamē  
allegasti,

allegasti, tum manifestum est, te hanc disputationem instituisse, non vt lucem afferres, sed vt tenebras effunderes. Si autem non sciuisti Hieronymum de diuersa intelligentia loqui, tum sequitur te non esse benè versatum in scriptis patrum. Hieronymus enim in 44. caput Ezechielis loquitur de *Intelligentia cum Sp. Sancto coniuncta*. Nam cùm Spiritus Sanctus nobis mētes illustrat, velamen ablatum est. In Epist. verò 13. ad Paulinum loquitur de *Intelligentia a Sp. Sancto disuncta*. Nisi enim Sp. sanctus nobis mentes illustret, omnis scriptura nobis difficilis est, & obscura. Alio igitur modo scriptura aperta est, & alio modo reuelata. Cùm enim Spiritus S. velamen aufert ab oculis nostris, & nobis veram fidem largitur, tum nobis scriptura aperta est, cùm verò velamen non aufert, neque fidem largitur, tum veram sententiam scripturæ assequi non possumus. Hanc esse mētem Hieronymi patet ex loco allegato. Dauid enim eo tempore habebat externam intelligentiam scripturarum, sciebat Hebraicè, & historiam mediocriter intelligebat. Sed præter illam petebat etiam internam intelligētiam, hoc est, illuminationem à Sp. Sancto, non quod illam omninò non haberet, sed vt illa in se augeretur: Eodem modo aperta est nobis scriptura sensu externo, sensu autem interno aperta non est, nisi Spiritus Sanctus oculos nostros reuelet, ac proinde orandum cum Dauide, *reuela oculos meos*. Et quibus oculi reuelati sunt, illis etiam orandum est, vt Spiritus sanctus illorum oculos quotidie magis ac magis reuelet. Vno verbo, vnus locus de Intelligentia cum Spiritu sancto coniuncta, alter de

Intelligētia à Sp. Sancto disiuncta, vel vnus de principio illuminationis, alter de eius incremento intelligi debet. Atque hæc de conciliatione locorum Hieronymi. Ex quibus apparet neutrum locum rectè intellectum cum nostra sententia pugnare. Et si enim myſteria Redemptionis externo ſenſu nobis clara ſunt, interno tamen ſenſu eadem nobis obſcura ſunt, donec Spiritus ſanctus oculos noſtros reuellet. Neque nos hoc negamus. Non enim volumus Scripturam à Spiritu ſancto diſiunctam ſufficere ad veram ſententiam in rebus controuerſis oſtendendam; ſed contendimus verbum per Spiritum ſanctū intellectum ſufficere ad veram ſententiam in rebus controuerſis oſtendendam.

Tertium Argumentum. Quia Patres ſua ſcripta per Scripturam probant.

Per quod Patres ſua ſcripta probant, illud eſt notius, quàm ſcripta Patrum, ſed ſcriptura eſt illud, per quod patres ſua ſcripta probant. Ergo Scriptura eſt notior, quàm ſcripta patrum.

Bellarminus exagitat hoc argumentum tanquam Sophiſticum, & auctorem Sophiſtam vocat: ſed in eius refutatione præbet ſe ridiculum, & oſtendit ſe philoſophiæ imperitum eſſe. Reſpondet ad Maiorem per diſtinctionem, & dicit Notius accipi dupliciter, nempe *quoad verba*, & *quoad veritatem*. Equidẽ omnes Philoſophi, qui hætenus in Scholis auctoritatem habuerunt, dicunt aliud *natura* notius eſſe, aliud *nobis*. Ariſtoteles libro 1. Phyiſic. Auſcultat. cap. 1. & libro 1. poſter. Analyt. cap. 2. & paſſim. Ita loquuntur omnes docti Thomas, Albertus, Zabarella, Sueſſa-

Suessanus, Burana, Louanienses, Colonienses, Themistius, Philoponus, Auerrhoës, & vt vno verbo dicam, omnes doctores, qui hactenus in Scholis Philosophorum auditi sunt. Dum igitur Bellarminus à communi loquendi consuetudine discedit, iudicet ipse, an Lutherus, an potius ipse Sophistices condennari debeat? Sanè quoniam inusitatis & hactenus inauditis phrasibus vtitur, ideò difficiliùs intelligi potest. Quid enim per *Notius veritate*, & *notius verbis* intelligat, nisi ex subiectis exemplis percipi non potest. Illa sunt hæc, *Anima mouetur*, & *Anima viuit*. Inter quas propositiones dicit illam secundum *Noticiam veritatis* notio-rem esse. Ergo *Notius* secundum veritatem est illi idem, quod *notius nobis*. Moueri enim est effectum vite, ac proinde notius nobis, quàm viuere, vt ex Aristotele libro 2. de Anima cap. 2. & ex eius expositoribus, Albertò, Thoma, Auerrhoë, Iauello, Titelmanno, Velcurione, & ex alijs constat. Deinde & res ipsa hoc docet. Viuere enim est natura *Notius*. Nam non quia homo mouetur, ideò viuit: sed quia vivit, ideò mouetur: at viuere & moueri non sunt nobis æquè nota. Ergo moueri est nobis notius. Quod igitur nobis notius est, hoc dicit Bellarminus secundum veritatem notius esse. Vnde sequitur quod Natura notius est, hoc illi secundum verba notius esse. At dicit sacram Scripturam esse secundum veritatem notio-rem, quàm scripta patrum, hoc est, sacram Scripturam esse nobis notio-rem, quàm scripta patrum. Deinde dicit sacram Scripturam non esse secundum verba notio-rem, quàm scripta patrum, hoc est, Scripturam sacram non esse natura



notiorem, quàm scripta patrum. Vtramque sententiam examinabimus, vtemur autem phrasibus vſitatis. Prima sententia est, sacram Scripturam esse nobis notiorem, quàm scripta patrum. Quod si verum est, tum consistit non tantum nostrum Argum. sed etiam sequitur scripturam apertam & perspicuam esse. Nam quod nobis notum, hoc etiam apertum & manifestum est. At scripta patrum secundum Bellarm. sunt perspicua & clara. Ergo & scriptura est perspicua & clara. Scriptura n. nobis notior, vt Bellarminus vult, quàm scripta patrum. Deinde quemadmodum ex scriptis patrū in reb. controuersis verā sententiā eruere possum⁹: ita etiam ex scriptura in reb. controuersis veram sententiā elicere possumus. Nā si vera sentētia ex eo elici potest, quod nobis ignotius est, tū multò magis ex eo, quod nobis notius est, colligi potest. At scripta patrum sunt ignotiora quoad nos, & tamen ex ijs vera sentētia, secundum Papistas, in reb. controuersis elici potest. Ergo vera sentētia in reb. controuersis, multò magis ex s. Scriptura (illa n. secundum Bellarm. est notior quoad nos) colligi potest. Secunda sententia est. Sacram Scripturam non esse naturā notiorem, quàm scripta patrum. Sed hoc est falsum. Scriptura enim est causa omnis veritatis, quæ est in scriptis patrum. Hoc docet Basiliius Epistola 80. *Non putamus iustum, obtinentem apud ipsos consuetudinem legem ac regulam facere recta doctrina. Igitur Scriptura diuinitus inspirata arbitè à nobis constituitur, & apud quos inuenta fuerint dogmata diuinis sermonibus concordantia, his omnino veritatis suffragium etiam accedit.* Idem in Moralibus. Summa 79. cap. 1.

*Eruditi, inquit, auditores debent ea probare, quæ à doctõ-  
ribus dicuntur, & quæ consona sunt scripturæ, suscipere;  
quæ aliena, reijcere. Origenes in Ieremiam, necesse no-  
bis est, inquit, Scripturas sanctas in testimonium vocare:  
Sensus quippè nostri, & enarrationes sine his testibus non  
habent fidem. Idem in Matth. Homilia 25. Ad testi-  
monium omnium verborum, quæ in doctrina querimus,  
debemus sensum Scripturæ referre, quasi confirmantem  
quem exponimus sensum. Sicut enim omne aurum, quod  
fuerit extra templum, non est sanctificatum, sic omnis sen-  
sus, qui fuerit extra scripturam, non est sanctus, quia non  
continetur à sensu scripturæ. Chrysostomus in Psalm.  
95. Si quid dicitur, inquit, absque scripturæ, auditorum  
cogitatio blandicat. Verùm ubi è Scripturæ diuinæ vocis  
prodit testimonium, & loquentis sermonem, & audientis  
animum confirmat. Tertullianus aduersus Hermoge-  
nem Scriptum esse, inquit, doceat Hermogenis officina,  
si non est scriptum, timeat ut illud adijcentibus, aut de-  
trahentibus destinatum. Ex his manifestum est, sacram  
scripturam per se veram esse, scripta patrum pro-  
pter scripturâ. Deinde & ipsa ratio hoc docet. Scri-  
ptura enim est causa omnis veritatis, quæ est in scri-  
ptis patrum, & ob eam causam natura est notior, quàm  
scripta patrum. Possem hæc prolixius persequi, sed  
quoniam Bellarminus inusitatis terminis usus est, i-  
dedò plura non addam. Hoc tantum dico, scripturâ  
esse semper natura notiores, quàm scripta patrum, non  
autem semper notiores quoad nos. Quandoque n.  
Scriptura est notior nobis quàm scripta patrum, quan-  
doque non est. Patres n. sæpè ea, quæ in Scripturis ob-  
scura sunt, suis Commentarijs illustrant; sæpè etiam*

ea, quæ in scripturis perspicua sunt, & clara, suis cōmentariis inuoluunt & obscurant. Cū igitur scriptura semper secundum naturam notior sit, quàm scripta patrum, quandoque etiam nobis notior sit, quàm scripta patrum, & ex scriptis patrum, secundū aduersarios, vera sententia in rebus controuersis elici possit, manifestum est scripturam in reb<sup>9</sup> controuersis ad veram sententiam ostendendam sufficere.

Quartum Argumentum. Quia patres in primitiua Ecclesia scripturam absque commentarijs intellexerunt.

Quod absque patrum commentarijs in primitiua Ecclesia intelligi potuit, hoc ita perspicuum est, vt ad veram sententiam in dogmatis controuersis ostendendam sufficiat. Sed scriptura tempore primitiue Ecclesiæ absque commentarijs intelligi potuit. Ergo scriptura ita perspicua est, vt ad veram sententiam in dogmatis controuersis ostendendam sufficiat.

Bellarminus cōcessa Maiore negat Minore, & dicit illos quidē nō habuisse scriptos comment. Sed hoc nihil facit ad rem. Non n. doctrinam, neq; Institutionem ex Ecclesia eiicimus, neq; quæritur, vtrum Institutione in Ecclesia opus sit, nec ne? Sed quæstio est, an in Scriptura quædam ita sint perspicua, vt adhibito diligenti studio & labore, vera sententia in rebus controuersis ex ea elici possit. Deinde dicit in primitiua Ecclesia *commentar. scriptos esse ab Irenæo & Iustino, & præsertim in Apocalypsin*, idq; probat ex Hier. in Catalogo de viris illustribus. C. Iohan. Sed hoc non satis liquet. Hierony. n. in eod. lib. C. Irenæus & capite

& C. Iustinus, omnes eorum libros recenset, huius autem nullam facit mentionem: quod utique non fecisset, si sciisset aliquid ab ijs in hunc librum scriptum esse. Et si maximè scripssissent in Apocalypsin, tamen isthinc non sequeretur, eam ab illis illustratam esse. Fuerunt namque auctores erroris Chiliastarum. Vnde non tam illustrasse, quàm obscurasse scripturam merito dici possent. Denique totum argumentum nihil iuuat causam Bellarmini. Nam etiamsi Apocalypsis fuerit diligentissimè ab ijs illustrata, num propterea tota scriptura fuit ab illis illustrata? Sequitur igitur etiam Bellarmino teste scripturam excepta Apocalypsi, à veteribus, absque Commentarijs lectam & intellectam esse. Denique sequitur ante Iustinum & Irenæum vniuersam scripturam absque commentarijs lectam & intellectam fuisse. Hoc sufficit ad probandum scripturam etiam hoc seculo, absque Commentarijs legi & intelligi posse, ac inde quædam in scriptura ita perspicua esse, ut vera sententia in rebus controuersis, ab hominib. mediocriter doctis, ex ea colligi & erui possit.

(:)

FINIS.

DE PRINC. CHRIST. DOGM. Cap. 2. 395  
duæ sententiæ inter se pugnant. Ergo simul veræ  
esse non possunt. Nos more nostro prius destrue-  
mus aduersarij sententiã: deinde & nostram immo-  
tis argumentis asseremus.

CAPVT II.

*Scriptura sensus non est multiplex, & argumenta Bel-  
larmini pro ea opinione destruuntur.*

**S**Tatu controuersiæ explicato, ad rem ipsam acce-  
demus. Dicit igitur Bellarminus, *Scriptura sensum  
esse multiplicem; Literalem siue Grammaticum, & Spiri-  
tualem siue Mysticum.* Hoc probat quatuor argumen-  
tis, quæ ordine expendemus. Primum argumentũ.  
Quia Paulus dicit, *ista omnia accidisse Iudeis in figura,  
& scripta esse ad correctionem nostram*, 1. Cor. 10, 11. At  
hoc loco Paulus, neque directè, neque indirectè do-  
cet, multiplices esse scripturarum sensus, eosque ger-  
manos & genuinos: Sed veterem historiam, quæ se-  
cundum literam tantũ intelligenda est, accommo-  
dat ad Corinthios, & docet illa, quæ veteribus acci-  
derunt, *esse typos*, id est, imagines, & tabulas, vt in ijs  
videre possint, quid fugere, & quid sequi debeant.  
Item quomodo Deus erga peccatores affectus sit.  
Deinde dicit, *ea ad nostram correctionẽ scripta esse*, q. d.  
Illa exempla literis mandata esse, vt in ijs tanquam  
in imagine quadam videre possimus, quæ pœna nos  
maneat, si illorũ facta imitabimur. Secundum ar-  
gumentum. Quia Hieronymus in secundum cap.  
Ezechielis dicit, *librum scriptum fuisse antè & retrò, de  
futuris, & de præteritis; vel certè foris in historia litera, in-  
tas intelligentia Spirituali.* Sed neque ex hoc loco pro-  
bati

bari potest, multiplicem esse scripturarum sensum. Ipse enim Hieronymus dubitavit, quid significaret *externa, & interna scriptura*. Hoc docet particula, *vel certè*. Deinde Hieronymi verba de sensu externo, quo etiam impij scripturam intelligunt, & de sensu interno, quo Sp. sanctus solis credentibus scripturarum intelligentiam obsignat, accipi possunt.

Tertium Argumentum. Quia Philo dicit in libro de vita contemplatiua, *Essenos existimare, totam legem habere animalis similitudinem, quòd præcepta corpus referant, animam verò sententia retrusiores, sub velamine verborum abdite*. At hoc nihil notat, quàm Papistici dogmatis infirmitatem. Si enim alia pro multiplici scripturarum sensu argumenta haberent, non peterent patrocinium ab Essenis, iuratis Christianæ religionis hostibus. Deinde Esseni apud Philonem docèt, *totam legem habere similitudinē animalis*, hoc est, habere multiplicem sensum. At hoc est falsum. Sunt enim multa in lege Domini, quæ nullo modo admittunt multiplicem sensum. Bellarm. lib. 3. cap. 3. *Non inuenitur Spiritus sanctus in omni sententia scriptura, nec in Testamento Veteri, nec in Novo. Illud enim, Diliges Dominum Deum tuum ex toto corde tuo, & similia præcepta, nō habent nisi unum sensum, id est, literalem*. Præterea anima corpori præstat: & Philo Spirituale sensum cum anima, literalem cum corpore confert. Spiritus igitur Literali præstantior est. Sed Bellarminus dicit *ex solo sensu literali peti argumenta efficacia, & eum sensum, qui ex verbis immediatè colligitur, esse sensum Spiritus sancti*, lib. 3. cap. 3. At sensus Spiritus Sancti, & ille, ex quo efficacia argumēta peti possunt, est

est præstantior eo, qui non est Spiritus sanctus, & ex quo non possunt efficacia argumenta peti. Ergo sensus literalis Spiritualis præstantior. Imprudenter igitur facit Bellarminus, quòd Philonem ad hoc dogma probandum allegat.

Quartum argumentum. *Quia* Nazianzenus ad Nemesium, *sicut verbum, inquit, Dei genitum habet naturam diuinam inuisibilem, & humanam visibilem: ita verbum Dei scriptum habet sensum externum, & internum.* Sed in meo exëplo nihil est Nazianzeni ad Nemesium. Deinde hoc ipsum intelligi potest de externo sensu, quo impij scripturam intelligunt, & de interno, qui cum plerophoria coniunctus est. Præterea ex hoc argumëto sequitur, sensum allegoricum, qui cum inuisibili verbi natura confertur, esse literalis præstantiorem. Sed hoc falsum esse, docuimus argumento præcedente. Vt taceam talia media nihil probare. Atque hæc sunt Bellarmini argumenta pro multiplici scripturarum sensu.

## CAPVT III.

*De sensu literalis proprio, & figurato.*

**G**Rammaticum sensum definit cum esse, quem verba immediatè præ se ferunt. Hunc diuidit in simplicem & figuratum. Simplicem dicit eum esse, qui consistit in proprietate verborum. Figuratum, quo verba transferuntur à naturali significatione ad alienam. At hæc, Bellarmine, simpliciter falsa sunt, & se mutua contradictione tollunt. Primum enim dicis, *Grammaticum sensum eum esse, quem verba immediatè præ se ferunt.* deinde asseris alteram speciem sensus Grammatici



matici esse, quando verba à nativa significatione, ad alienam transferuntur. Hæc duo simul vera esse non possunt, necessario enim sequitur, te aut genus, aut speciem malè definiuisse. Nam si ille in genere est literalis sensus, quem verba immediatè præ se ferunt, tum ille non est literalis, quo verba à propria significatione ad alienam transferuntur. Et contrà, si ille sensus est literalis, quo verba à propria significatione ad alienam transferuntur, tum ille in genere non est literalis, quem verba immediatè præ se ferunt. Duo n. contradictoria de eodem subiecto simul vera esse non possunt. Deinde definitio generis debet omnibus eius speciebus convenire; ut definitio animalis convenit homini, & bestia. At hæc definitio generis non convenit omnibus eius speciebus: ad sensum enim figuratum prorsus accommodari non potest. Bellarmini igitur definitione reiecta, dicimus eum esse literalem sensum, quem litera, hoc est, verba siue propriè, siue impropriè sumpta præ se ferunt. Huius descriptionis sunt duæ partes: Una, eum esse literalem sensum, quem verba propriè sumpta, præ se ferunt. Altera, eum esse literalem sensum, quem verba impropriè sumpta præ se ferunt. Thomas prima Parte, Quæstione 1. articulo 10. *Sensus parabolicus*, inquit, *sub literalis continetur*. Nam per voces significatur aliquid propriè, & aliquid figurativè. Nec est literalis sensus ipsa figura, sed ipsum figuratum. Non enim, cum scriptura nominat Dei brachium, est sensus literalis, quòd in Deo sit membrum huiusmodi corporale, sed id, quod per hoc membrum significatur, sc. virtus operativa.

## CAPVT IV.

*De Sensu Spiritualis in genere.*

**S**piritualē sensum dicit hunc esse, qui aliorefer-  
tur, quā verba immediatē pra se ferunt. Sed & hoc  
falsum est, & se mutua contradictione perimit. Nam  
sensus literalis, quem figuratum dicit, est, quo ver-  
ba à propria significatione transferuntur ad alienam. At  
sensus Spiritualis, vt Bellarminus definit, est is, qui  
aliò refertur, quā verba mediātē pra se ferunt, hoc  
est, quo verba à propria significatione ad alienam trans-  
feruntur. Aut igitur sensus literalis figuratus à Spi-  
rituali non differt, aut falsæ sunt eius definitiones.

## CAPVT V.

*De Sensu Spiritualis Allegorico.*

**S**piritualē sensum dicit esse triplicem, *Allego-  
ricum, Anagogicum, & Tropologicum*. Allegori-  
cum vocat, cū verba Scripturæ præter literalem sen-  
sum significant aliquid in N. Testamento, quod ad Chri-  
stum, vel ad Ecclesiam pertineat: In hac definitione pe-  
nè tot sunt errores, quot sunt verba. Nos vnum atq;  
alterū indicabimus. Primus error est, quod sensum  
allegoricum à Grammatico figurato distinguit. *Al-  
legoria enim de arte Grammatica est*, vt inquit Hiero-  
nymus in Epistola ad Gal. cap. 4. Vbi tamen paulò  
post Hieronymus sensum allegoricum vocat *Spiritua-  
lem*. Sed si Allegoricus sensus de Grammatica est, &  
Allegoricus sensus est Spiritualis: tum & aliquis  
sensus Spiritualis de Grammatica est. Sed Allego-  
ricum sensum esse Grammaticū, docēt omnes Rhe-  
tores. Est enim nihil aliud, quā continuata quadam  
metaphora.

metaphora. Cicero in Oratore, *Cum fluxerunt alia plures translationes, alia planè sit oratio. Itaque genus hoc Græci appellant ἀλληγορίαν.* Et licet Fabius lib. 8. cap. 6. aliam adducat definitionem allegoriæ, fatetur tamē eam figuram esse, & in eo consentiunt omnes Rhetores, & Grammatici. Vnde sequitur, orationem Allegoricam esse orationem figuratam: ac proinde, aut Spiritualem sensum non esse diuersum à Grammatico, aut Allegoricum sensum non esse Spiritualem. Deinde dicit in definitione, Allegoriam tum esse, *cum præter literalem sensum aliquid significatur, quod ad Christum, & ad Ecclesiam pertinet.* At hoc totum falsum est. Nam quæ in alicuius rei definitione ponuntur, illa, vel sunt isti rei essentialia, vel sunt isti rei, in cuius definitione ponuntur, propria, idque quarto modo. Vnde sequitur, non posse Allegoriam esse, nisi quando significatio est, de Christo, & Ecclesia. Sed hoc est falsum. Omnes enim prophani libri sunt allegoriarum pleni. Horatius,

*O naus referent in mare te noni*

*Fluctus, ô, quid agis, fortiter occupa*

*Portum.* Et multa similia. Vbi tamen nulla

significatio de Christo, & Ecclesia. Quin ipse Hieronymus fatetur in *prophanis scriptis esse multas allegorias.* Ad Gal. cap. 4. Præterea, quod in definitione dicit, eum sensum esse Allegoricum, cum verba scripturæ præter literalem sensum significant aliquid in Nouo Testamēto, quod ad Christum & Ecclesiam pertineat, hoc potest ita resolui, vt in Allegorijs, & literalis sensus sit semper verus, & ille etiam sit verus, qui præter literalem intelligitur. At hoc non est semper  
verum

verum. In Allegoria enim plerumque *aliud dicitur, & aliud significatur*. Erasm. ad Gal. 4. vel, vt inquit Hieronymus, *aliud præsens in verbis, & aliud intelligit in sensu*, ad Gal. 4. vel, vt Augustinus inquit in Psalm. 103. *Cum aliquid aliud videtur sonare in verbis, & aliud in intellectu significare*. At si in Allegorijs aliud dicitur, & aliud intelligitur, tum non vniuersaliter verum est, & literalem sensum intelligi, & præter illum etiã aliud intelligi. Deinde Allegoria est *continua Metaphora*, vt docet Erasmus ad Gal. 4. & Cicero in Oratore. At sermo totus Metaphoricus secundum proprietatem verborum intellectus de eodem subiecto, plerumque falsus est. Ex eo enim sæpè nullus commodus sensus elici potest, nisi verba à natia significatione ad alienam transferantur. Sensus igitur Allegoricus, qui propriè & verè Allegoricus est, secundum proprietatem verborum intellectus, plerumque est fictitiuus. E. G. *Super aspidem, & basiliscum ambulabis*. Hoc allegoricè intellectum verum est. Si verò secundum verborum proprietatem accipitur, semper falsum est. Christus enim propriè loquendo super aspidem, & basiliscum nunquam ambulauit. Huiusmodi innumera exempla ex sacris literis afferri possunt. Denique cum præter literalem sensum aliquid in Nouo Testamento significatur, quod ad Christum, & ad Ecclesiam pertinet, illud non est allegoricum, sed typicum. Basil. de Spiritu sancto. cap. 14. ἵς ὁ τύπος προσδοκῆται δι' αὐτοῦ, διὰ μιμήσεως ἰδιωτικῆς τὸ μᾶλλον περποφάντων. *Est enim typus expectandorum declaratio, per imitationem ostendens, quod futurum est*. Istic vide innumera exempla typica, quæ aduersarij alle-

gorias esse somniant. Exemplum, quod Bellarminus adducit, causam non iuvat. Non enim est allegoricum. Quod autem Apostolus ea vocat *ἀλλυγορέματα*, ad Gal. 4. 24. hoc fit per Catachresin. Chrysostomus *abusiue figuram dixit allegoriam*. Erasmus ex Chrysostomo docet, *Paulum ab usum hac voce Allegoria, pro typo, & figura*. At instas, siue typicum dicatur, siue allegoricum, res eodem redit. Sunt enim duo sensus huius loci. Vnus Literalis, vt verba sonant; alter Typicus, qui præter literalem sensum intelligitur. Respondeo, in ipsis verbis esse veram historiam, & illam historiam esse typum, siue figuram alterius cuiusdam mysterij. Rectè Erasmus, *Apostolus*, inquit, *hic veram historiam refert, quæ typus sit alterius*, ad Gal. 4. Hinc intelligitur, illum sensum, qui ex verbis immediatè colligitur, non aboleri, neque novos sensus, eosque varios & multiplices affingi; sed literalē sensum manere integrum & saluum, atque ex eo aliquid quod scriptum non est, per similitudinem colligi. E. G. Abraham habuit duas vxores, Agar, & Sarā. Ex ijs genuit duos filios, Ismael & Isaac. Ille natus est diuina natura, & fuit ab hereditate exclusus: hic vi promissionis, & fuit hæres. Hæc est literalis huius loci sententia, à qua nequitiquam discedendum est. Verum ex ea per similitudinem aliud colligi potest, nempe eos Iudæos qui per legem iustitiam quærunt, non iustificari; eos verò, qui eam per fidem apprehendunt, iustitiam obtinere. Abraham enim est typus Dei: Agar est typus legis: Sara Euangelij, Ismael est typus Iudæorum, ex lege quærentium iustitiam. Isaac verò eorum, qui ex fide quærunt iustitiam. Vt

igitur

igitur Ismaël naturali generatione ex Agar genitus, ab hæreditate exclusus est; ita Iudæi quærentes iustitiam per legem, ad iustitiam non peruenient: & ut Isaac vi promissionis genitus est, & hæreditatem obtinuit: ita illi, qui promissionem fide amplectuntur, gratis iustificantur. Hic verò non est nouus sensus; sed est concinna quædam deductio ex priori.

## CAPVT VI.

*De Sensu Spiritualis Tropologico.*

**A**llegoricum sequitur Tropologicus. Hunc dicit esse, *cum verba, aut facta referuntur ad aliquid significandum, quod pertineat ad mores.* Vt Deut. 25. *Boui trituranti os non obligabis.* Verus huius loci sensus est: Nos boui, qui pro nobis triturat, alimentum debere. Vnde optimè per similitudinem colligi potest, eos etiam esse à nobis alendos, qui pro nobis laborant, siue sint bruta animalia, nostris vltibus inferuentia, ut equi, boues: siue sint homines, qui aliquo munere funguntur, ut concionatores, doctores, &c. Verum hæc deductio non est nouus sensus, sed tantum accommodatio ad alia. Simile est; *Calamum quassatum non confringet*, Es. 42, 3. Ergo hominem fractum, & penè desperatum, non abiciet. Item *Abraham periculosum bellum suscepit, ut Lothum liberaret.* Ergo amicos nostros in periculis deferere non debemus. Idem *exigua manu debellauit quinque reges.* Ergo victoria non pendet à multitudine pugnantium. Hæc & similia non sunt noui sensus, sed sunt quasi institutiones, siue applicatiões, quæ ex genuino sensu ad populum erudiendū commodè deduci possunt.

possunt. Ob hanc causam Augustinus in libro de Vtilitate cred. capite 3. omnes scripturæ exponendæ modos recensens, eum præterit. *Quatuor*, inquit, *modi à quibusdam scripturarum tractatoribus traduntur legis exponendæ; secundum Historiam, secundum Allegoriam, secundum Analogiam, secundum Actiologiam.* Idē docet in lib. Imperf. de Genes. ad literam, cap. 2.

## CAPVT VII.

*De Sensu Spirituali Anagógico.*

**P**OST Tropologicum ponit Anagogenicum. Eum dicit esse, *cū facta, vel verba referuntur ad vitam æternam significandam.* Pro exemplo adducit illud Psal. 94. *Quibus iuravi in ira mea, si unquam ingredietur in requiem meam.* At relatio dictorum & factorum ad vitam æternam, non est nouus sensus, sed est eorundem ad vitam æternam applicatio. Quod ad exemplum attinet, illud est figuratum. *Requies* enim per Metonymiam significat terram Chanaan. Terra enim Chanaan erat finis laborum Israëlitis, & ob eam causam requies dicitur. Deinde terra Chanaan per eandem figuram significat regnum cælorum. Est enim typus regni cælorum. Dum igitur à typo excluditur, etiam à re per typum significata excludi iudicantur. Manifestum igitur, hoc exemplum sub Grāmatico sensu comprehendere debere. Nam nō ille tantū Grāmaticus sensus est, *quem verba sub cōmuni, & vsitata significatione referunt*; sed ille etiam Grāmaticus sensus est, *quem verba sub metaphorica significatione representant*, vt docet Sixtus Senens. lib. 3. Biblioth. Vt taceam, nos antè ex Thoma docuisse, alteram



alteram speciẽ Grammatici sensus, nempe sensum figuratum, non esse figuram; sed ipsum figuratum. Vt cum scriptura Deo brachium tribuit, non vult Deum habere tale membrum; sed significat Deum habere virtutem operatiuam, quæ per tale membrum significatur. p. p. q. 1. a. 10. Planè eodem modo: Cùm dicit scriptura, Deum non pati, vt *Iudei veniant in requiem suam*; inuit, Deum non pati, vt *Iudæi perueniant ad illud*, quod per requiem significatur. Hic est verus sensus huius loci. Ab hac sententia non videtur Augustinus dissentire. Ille enim in lib. de vtilit. cred. cap. 3. Omnes scripturæ explicandæ modos recenset, & hunc præterit. Idem facit in libro imperfect. de Genesi ad literam cap. 2. Sed & Hieronymus eum præterit ad Hebidiã q. 12. & in Amos cap. 4.

## CAPVT VIII.

*Allegoricum, Tropologicum, & Anagogicum non esse legitimos Scripturarum sensus.*

**H**Actenus ostendimus, quæ sit aduersariorum sententia de multiplici Scripturarum sensu. Nunc ostendemus Allegoricum, Tropologicum, & Anagogicum non esse legitimos, nec genuinos scripturarum sensus, Ac primùm is est genuinus, & legitimus Scripturarum sensus, ex quo efficacia argumenta peti possunt: At ex solo *luerali sensu efficacia argumenta peti possunt*: Bellarm. de Verb. Dei, lib. 3. cap. 3. Verùm si ex solo literalis sensu efficacia argumenta peti possunt, sequitur, ea ex Allegorico, Tropologico, & Anagogico sensu peti non posse. Deinde is est genuinus, & legitimus Scripturarum sensus

qui est Spiritus sancti. Bellarminus libro 3. cap. 3. de verbo Dei. *At sensus mystici, & Spirituales varij sunt, & licet adfiscient, cum non sunt contra fidem, aut bonos mores: tamen non semper constat, an sint à Spiritu sancto intenti.* Bellarminus de Verbo Dei, libro 3. capite 3. Ergo sensus mystici, & Spirituales, vt Allegoricus (loquor non de vera Allegoria, sed de ea, quæ secundum aduersarios talis est) Tropologicus, & Anagogicus non sunt legitimi, neque genuini Scripturarum sensus: Denique genuinus, & legitimus scripturarum sensus, non ex humano cerebro, sed ex Sp. sancto proficiscitur. *Scriptura enim debet per eundem Spiritum explicari, per quem scripta est.* Bellarminus de verbo Dei, lib. 3. cap. 3. *At sensus Spirituales deducuntur ex humano cerebro.* Sixtus Senens. Biblioth. lib. 3. Deinde genuinus & legitimus scripturarum sensus non est sibi contrarius: sed vt ipsa scriptura sibi per omnia consentanea est: ita verus eius sensus secum per omnia consentit. At sensus Spirituales sæpè inter se pugnant. Addo eos aliquando ridiculos, & ineptos esse. Hieronymus in 7. & in 10. caput Esaiæ. Augustinus Epist. 48. ad Vincent. Vt taceam eos quandoque ipsam scripturam peruertere. Sanè Hieronymus docet, eiusmodi explanationē vitandam esse, imò esse hæresin, vt quæ manifesta subuertit, & prestigias quasdam Ecclesiis conatur inducere: in 19. cap. Ieremiæ. *Vnde eorum deliramenta conticescant, qui umbras & imagines in veritate querētes, ipsam conantur euertere veritatem, vt flumina & arbores, & paradysum putent se Allegorie legibus debere subruere.* Hieronymus in 10. caput Danielis. Idem Hieronymus miratur quosdam

dam prophetiam, quam Euangelista Matthæus ad Dominum Salvatorem refert, & tunc completum esse dicit, cum Apostoli Dominum fugerent, Allegoricis interpretationibus velle tenuare, & dum plus cupiunt videri nosse, quam ceteri, veritatis regulam non tenere. In Zachar. cap. 13. Possem ego hæc pluribus probare; sed non est necesse. Hæc enim sufficiunt ad ostendendum, Spirituales & mysticos sensus non esse genuinos & legitimos scripturarum sensus. Deinde primitiua Ecclesia nihil certi de hac re statuit. Augustinus enim *Anagogicum*, & *Tropologicum* præterit, de Vtilitate credendi, capite 3. Et in eorum locum substituit Analogicum, & Ætiologicum. Idem facit in lib. Imperfect. de Genesi ad literam, capite 2. Sed & Hieronymus ad Heb. quæstione 12. *Anagogicum* præterit. Idem facit in Amos cap. 4. Quin Origenem, quem vocat *Allegoricum* (lego *Anagogicum*: exemplum enim videtur *Anagogicum* esse) *Interpretem, delirare dicit*, in caput 24. Ieremiæ. Origenes libro 4. πρὸς Ἰερμ., capite 2. tantum meminit sensus literalis, & Spiritualis. Alij plures comminiscuntur. Vid. libr. 3. Biblioth. Sixti Senensis. Vnde existimo de hac re in primitiua Ecclesia nihil certi statutum fuisse.

## CAPVT. IX.

*Allegorias & Tropologias non in sola S. Scriptura: sed etiam in prophanis libris inueniri.*

**Q**Uod autem Bellarminus dicit, *Scripturam propterea habere multiplices sensus, quod Deum auctorem habeat*, ridiculū est. Nā si ideo habet multiplicē sensū,

tum omnis scriptura habet multiplicem sensum. Omnis enim scriptura à Deo est, 2. Tim. 3, 16. *Tota scriptura est diuinitus inspirata*, 2. Pet. 1. 27. *Acti à Sp. Sancto locuti sunt sancti Dei homines*. At omnis scriptura non habet multiplicem sensum. Nam, vt inquit Bellarminus, *Spiritualis sensus non inuenitur in omni sententia Scriptura, nec in Testamento Veteri nec in Novo. Illud enim*, Diliges Dominum Deum tuum ex toto corde tuo, Deut. 6. & Mat. 22. & similia precepta non habent nisi unum sensum. i. literalē, vt recte docet Cassia. Collat. 8. cap. 3. De Verb. Dei lib. 3. cap. 3. Sed neque sola Scriptura tales applicationes admittit. Omnes enim prophani libri sunt pleni Allegorijs, & Tropologijs. Allegorijs plenos esse omnes poëtarum, & oratorum libros, fatetur Hieronymus lib. 2. ad Gal. in cap. 4. Et ipsa experientia hoc testatur; vt, *πῦρ σιδήρεον μὴ σκαλίσαι*, hoc est, viri potentis iracundiam non esse conuitijs irritandam. Et, *ἰριῶδινες sub eodem tecto ne habeas*, hoc est, ingratum conuictorem esse ablegandum. Et, *Νουacula in cotem*, hoc est, homo lædendi cupidus, incidit in eum, à quo retundi potest: & multa similia. Tropologiæ ferè sunt in singulis adagijs, apologis, fabulis. Vt, *donum quodcumque probato*, hoc est, omne consilium, & auxilium, quod ab amico offertur, boni consulere debes. Et, *ne allia comedas & fabas*, hoc est, non debes te in bellum conijcere, neque ad Rempublicā, vel adiudicia accedere. Quamuis in hoc postremo, Allegoria cum Tropologia concurrit. Et, *ἄγροις περισκεπῶν τις ἀγροσκοπός, Πίπλις λαλητῶς πρὸς φελας*. Vnde discimus, nos non debere absentia vel futura curare, &

ca, quæ

ea, quæ præsentia sunt, negligere. Et, *En Rhodus, en saltus*, hoc est, non debes gloriose de tuis rebus loqui, nisi eas è vestigio probare possis. Et, *Scarbans aquilam ulcisci potuit*. Ergo non debemus ullû hostem, quantumvis infirmum contemnere. Similia passim occurrunt in profanis libris. Errant igitur, qui dicunt, Allegorias, & Tropologias tantum in sacris literis inueniri.

## CAPVT X.

*Verum & legitimum Scripturarum sensum tantum esse unum.*

**N**Am cum nō sint plures sensus, quàm quatuor: tres videlicet Spirituales, & vnus Grammaticus, & tres isti non sint legitimi; sequitur hunc vnū legitimum esse. Deinde is tantum est legitimus sensus, ex quo efficacia argumenta peti possunt. Sed *ex solo Grammatico efficacia argumenta peti possunt*. Bellarminus de Verbo Dei, libro 3, cap. 3. Thom. p. p. q. 1. a. 10. Præterea ille est legitimus scripturarum sensus, qui est Spiritus sancti. *Sed ille, qui ex verbis immediatè colligitur, est sensus Spiritus sancti*. Bellarminus de Verbo Dei, lib. 3. cap. 3. Denique ille est legitimus scripturarum sensus, qui ad dogmatum probationem vim habet. *Sed nulla expositio ad dogmatum probationem vim habet, nisi illa, qualiter sententiam verè, purè & germanè explicat*. Sixtus Senens. lib. 3. Biblioth. Huc accedit, verbum Dei esse purum, argentum excoctum in fornace terrea, defacatum septemplex. Psal. 12, 7. hoc est, esse certum, verum, ratum, atque indubitatum; idem esse, repurgatum valde: Psal. 119. v.

esse rectè dici potest. Chrysostomus homilia 12. in Genes. *Scriptura seipsam exponit, & auditorem errare non finit.* Sed quod iuxta tam varios sensus explicari potest, hoc auditorem errare finit. Deinde Lactant. lib. 6. cap. 21. *Num Deus & mentis, & vocis, & lingua auctor disertè loqui non potest: imò verò summa providentia carere fūco voluit ea, quæ diuina sunt, ut omnes intel- ligerent, quod ipse omnibus loquebatur.* At, quod tam varios sensus admittit, id disertè dictum non est, ne- que fūco carere (ut iam ante dictum est) rectè dici potest. Falsum igitur est, quod papistæ somniant, *scripturam esse quasi nasum careum, non præbentem certā & immotam sententiam; sed in varias formas flecti posse.* Cens. Colon. Dialogo 4. Habet enim scriptura tantum vnum, verum, germanum, & genuinum sen- sum. Sed hîc interroget aliquis, an nusquam alijs sensibus locus sit? Ad hoc respondeo: Si omnia si- ne discrimine velimus trāsformare in varios sensus, nihil habebit certi scriptura. Itaque iure reprehenditur Origenes, qui omnia, quantumlibet simpli- citer dicta, tamen in Allegorias transformat. Hæc interpretandi ratio maximè labefecit auctoritatem Scripturæ. Nam & Porphyrius hoc nomine irrisit Christianā doctrinā, & scripsit eam nihil habere cer- ti: Si quidē non aliter atq; fabulæ poëtarum in alios quosdam sensus, præter Grammaticum, omnia trās- ferenda essent. Literalis sensus itaque, quem aliàs hi- storicum seu Grammaticum appellant, semper erui debet: quando is solus certas & perspicuas parit sen- tentias: solus aptus est ad ducenda argumenta, qui- bus dogmata religionis confirmantur: solus proba-  
tiones

tionem necessariasuppeditat, Neque vnquam simplicem & germanam verborum sententiam licet relinquere, nisi aut verbis insint tropi; aut oratio ipsa propriè accepta absurdi, nescio quid, significet, quã ob causam necesse sit ad tropum confugere. Verùm ne tum quidem à Grammatico sensu disceditur. *Sensus enim Parabolicus sub literali continetur*, vt inquit Thomas p. p. q. 1. artic. 10. a. 3. Vel sensus literalis non tantùm est is, quem verba sub usitata & propria significatione referunt; sed ille etiam literalis sensus est, quem verba sub metaphorica, hoc est, impropria significatione representant. Sixtus Senens. lib. 3. Biblioth. Rectè igitur, & prudenter facit, qui sensum literalem rectè sequitur. Illa verò interpretandi forma, quam Augustinus *Aetiologicam* vocat; de Vtilit. cred. cap. 3. & lib. Imperf. de Genesi ad literam cap. 2, ad hoc ipsum genus referri omninò debet. Neque enim in ea à sensu grammatico disceditur: sed tantùm exposita causa facti, vel dicti, illustrior redditur sententia. Equidem hoc ipsum est valde necessarium in cuiuslibet scripti explicatione. Nam vtile est, vt auctoris consilium sæpè ante oculos ponatur, atque velut digito intento monstretur, quò tendat oratio, quò sit instituta, quantum ponderis singulæ probationes habeant. Alteram interpretandi rationem vocat Augustinus *Analogicam*. Sed neque illa ab interpretatione Grammatica diuelli potest. Nihil n. aliud est, quàm collatio quædam, qua quæ dicta vel facta sunt in Veteri Testamento, conferuntur cum ijs, quæ dicta vel facta inueniuntur in Nouo Testamento. Vt si quis demonstret, verba Christi & Apostolorum



stolorum congruere cum ijs, quæ à Mose & à Prophetis prædicta sunt. Quiuis enim intelligit, dum illud fit, nequaquã mutari aliquid in sensu Grammatico, sed tantum facta collatione, adhibitisque docendi causâ exemplis, splendorem, euidentiãque orationi accedere. Interpretatio *Tropologica* etiam non est remota ab eo sensu, quem verba orationis pariunt: sed est accommodatio eius, quod verbo innuitur, ad vitæ ac morum institutionem. Vt quando obuia est historia inebriati Loth; rectè adijcimus per Tropologiam, ebrietatẽ esse modis omnibus fugiendam. Vel si quis explicet historiam Davidis & Barsabæ, & adijciat, occasionem peccati esse ijs vitandam, qui peccatum vitare cupiunt. Hoc modo scriptura secundum literalem sensum explicatur, & ex ea colligitur, quod ad vitia fugienda, & ad virtutes expetendas inducit. Et quisquis vult cum fructu sacras literas legere, is optima quæque ad suam vitã rectè instituendam colligere debet. Rectiùs hæc forma Ethica, quàm Tropologica diceretur. Etsi enim, *reges* & modum viuendi, & *christum* orationis simul significat: tamen sæpissimè pro orationis schemate usurpatur. *Anagoge* reipsa non differt ab Allegoria. Hoc ex vtriusque definitione, & ex primitiue Ecclesiæ auctoritate probabo: Deinde ostendã quomodo cum literali sensu congruat. Dicunt Anagogicam explicationẽ esse, *qua scriptura ita explicatur, ut à primitiua verborum significatione paululum discedẽdo, aliquid colligitur, quod ad cœlestem gloriam post hanc vitam expectandam pertinet*: vel, ut inquit Bellarminus, cum verba, vel facta ad vitam æternam significandam referuntur,

referuntur, de Verbo Dei, lib. 3. cap. 3. Allegorica verò interpretatio est, cum verba scripturæ, à literalis sensu referuntur ad aliquid significandum, quod ad Christum, & ad Ecclesiam pertinet: Bellar. de Verbo Dei, lib. 3. cap. 3. Vnde apparet, Anagogen, quod ad artificium, & explicandi formam attinet, ab Allegoria non differre. Quod verò ad materiam attinet, discrimen quidem, sed perquam exiguum, idque non necessarium incidere. Ob eam causam primitiua Ecclesia has duas species confundit. Sanè Augustinus Anagogè vel prorsus reijcit, vel eam sub Allegoria comprehendit; quod posterius etiam ipse Bellarminus agnoscere cogitur, de Verbo Dei, lib. 3. cap. 3. Deinde cap. 30. de vera religione, ita definit Allegoriam, ut ea, quæ sunt Anagoges propria, disertè ponat in definitione Allegoriæ. *Quis, inquit, est modus interpretandæ Allegoriæ? Virum à visibilibus antiquioribus, ad visibilia recentiora, eam perducere sufficiat, an usque ad anime affectiones atque naturam, an usque ad incommutabilem aeternitatem, &c.* ubi posterius membrum ad Anagogen pertinet. Hieronymus ad Hebidiam quæst. 12. triplicem agnoscit interpretandi formam, nempe *Historicā, Tropologicā, & Spiritualem*. Per Spirituale intelligit vel solā Allegoriam, vel Allegoriā & Anagogè simul. Et ob eā causam, vel Anagogè non agnuit, vel eam ab Allegoria separandam esse non censuit. Deinde in Comment. ea sæpè vocat Anagogica, quæ sunt Allegorica. Ut Es. cap. 1. ad ista verba, *cognouit bos possessorem suum. Bos per Anagogen, inquit, significat Israël, qui portauit onus legis*: Et ad illa verba, *Derelinquetur filia Sion, sicut umbraculum in*

*vineæ, Per vineā, inquit, iuxta Anagoge, significatur homo,*  
*cui si mens præsuerit, habet vñtis custodē Deū, &c.* Et paulò  
 post ad illa verba; *Quomodo facta est meretrix ciuitas*  
*fidelis.* Hæc omnia per *Anagogen*, inquit, possumus re-  
 ferre ad animam sancti quondam viri, in qua prius Dei  
 iustitia cōmorata est, postea verò in eadem *Damones com-*  
*morantur.* Hæc omnia vocat *Anagogica*. At si quis  
 ea rectè expendet, videbit omnia ad vitam præsen-  
 tem referri, nec quicquam in ijs contineri, quod ad  
 vitam alteram pertineat. Quam ob caussam *Allego-*  
*rica* hæc sunt, non *Anagogica*. Quinetiam in mul-  
 tis alijs locis Hieronymus hæc miscet. Vnde appa-  
 ret inter *Allegoriam* & *Anagogiam* realem differen-  
 tiam nullam esse. Sed *Allegoriam* vt tropum, siue  
~~expositum~~ contineri sub sensu Grammatico, iam antè &  
 Hieronymi auctoritatē, & ratiōne probaui, & nunc  
 paulò plenius ostendam. In sacris literis extant que-  
 dam facta & ceremoniæ, quæ ad id fuerunt institute,  
 vt aliud quiddam significarent. In his est locus *Al-*  
*legoriæ*, (*Allegoriam* dico ex communi opinione)  
 vt historia Ionæ, qui post triduum reuixit, ma-  
 gnatatio Agni paschalis, & aliæ ceremoniæ. In his  
 verò non est literalis sensus abijciendus, sunt enim  
 mandata Dei, quæ non licet mutare sine auctoritate  
 diuinæ. Sed ipsa facta, & ritus conferuntur cum alijs  
 rebus similibus, quæ alibi simpliciter, & sine figuris  
 propositæ sunt. Nam ea quæ acciderunt ante pate-  
 factum Euangelium, aliquid de Euangelio significa-  
 bant, quæ deinde in Nouo Testamento explican-  
 tur. Quare in Euangelij sermone consistere nos o-  
 portet, nec præter Grammaticū sensum nouam do-  
 ctrinam quærere. *Allegoria* igitur sequitur literalē  
 sensum

sensum, vbi res similes ad literalem sensum; velut ad exemplum, aut imaginem cōparare possumus. Bel-  
larminus pro exemplo adducit *historiam de duobus*  
*filijs Abrahæ*, ex qua Paulus ad Galat. deducit, eos,  
qui per legem iustitiam quærunt, ab hæreditate ex-  
cludi, eos verò, qui eandem per fidem apprehendūt,  
ad hæreditatem regni cœlestis peruenire. Verùm in  
hoc exemplo Paulus à literali sensu non discedit, sed  
ex eo per similitudinem quandam aliud concinnè  
colligit, quemadmodum in præcedentibus ostensum  
est. Similia exempla passim occurrunt in sacris &  
prophanis literis. Vt si quis Apologiam de Aquila  
& Scarabæo enarrat, ille à literali sententia non dis-  
cedit, sed ex ea per similitudinē aliud colligit, nempe  
nullum hostem quantumvis impotētem, & infirmū  
contemnendum esse. De similibus est idem iudiciū.  
Cū igitur Allegorica explicatio ab Anagogica re-  
ipsa non differat, atque hæc ipsa, vt & Tropologica,  
Anagogica, & Aetiologica nullum nouum sensum  
afferant, sed literalem sensum saluum relinquant, at-  
que ex eo aliud per similitudinem deducant; mani-  
festum est, tantū vnum esse germanum, & genuinū  
Scripturarum sensum, eumque literalem vel gram-  
maticum. Sed hīc obseruandum est, vnum & eun-  
dem scripturæ locum quandoque secundum pro-  
prietatem verborum intellectum, absurdū sensum  
parere, si verò verba ad alienam significationē trans-  
feruntur, nihil incommodi ex eo sequi. Vt Psal. 91,  
13. *Super aspidem & basiliscum ambulabis*: hoc secun-  
dum proprietatē verborum intellectum est falsum,  
si verò verba ad alienam significationē transferūtur,  
est

est verissimum. Et Esa. 65, 26. *Lupus & agnus pascē-  
tur simul.* Hoc in proprietate verborum est falsum:  
si verba improprie, hoc est, Allegoricè accipiuntur,  
est verum. Quandoque verò verba in natiua signi-  
ficatione intellecta verū sensum pariunt, & ad rem  
alienam translata nihil incommodi afferunt, vt: *boni  
tritुरanti non obligabis os.* Siue enim de boue, qui tri-  
turat, accipis, is alendus est. Siue de homine, qui pro  
te laborat, & per bouem triturantem significatur, ac-  
cipis, is etiam alendus est. Verū in vtraque specie  
à literalis sensu non disceditur. In illa non discedi à  
literalis sensu manifestum est. Nam, vt ante probaui,  
ille etiam literalis, siue Grammaticus sensus est, *quem  
verba in aliena, siue metaphorica significatione represen-  
tant:* vt cū scriptura Deo brachium tribuit, non  
vult Deum hoc membrū habere; sed illud, quod per  
hoc membrum significatur. Ita lupus & agnus, in N.  
Testamento non simul pascentur; sed illi, qui per lu-  
pum & agnum significantur. In hac verò à literalis  
sensu etiam non disceditur. Locus enim intelligi-  
tur, vt verba sonant; deinde ex eo aliud per simili-  
tudinem colligitur. V. G. Bos qui triturat alendus  
est. Ergo per similitudinem, quicunque pro te la-  
borat, ei alimentum denegare non debes.

## CAPVT XI.

*Plenior Allegorici sensus explicatio.*

**E**T si ex præcedentibus satis intelligi possit, quid  
de Allegoria sentiendum sit: tamen paulò ple-  
niùs de ea differemus, & simul ostendemus, quando  
ad eam confugere debeamus, & quomodo à typo

D d

differat,

differat. Ac primum videndum est, quid sit? Augustinus vult eam esse *tropum*, quo aliud ex alio intelligitur, de Trinitat. libro 15. cap. 9. At hæc definitio nimis latè vagatur. Nam & per Synecdochen, & per Metonymiam, & per Metaphoram, & per Ironiam ex alio aliud intelligitur. Hieronymus dicit, *Allegoriam aliud prætere in verbis, & aliud significare in sensu*, ad Galatas, capite 4. Sed & hæc est latior, quàm par est. Omnes enim tropi, quos iam nominaui, aliud prætere in verbis, & aliud significant in sensu. Bellarminus dicit eam esse, *cum verba Scriptura præter literalem sensum aliquid in Novo Testamento significans, quod ad Christum & ad Ecclesiam pertinet*, de Verbo Dei, libro 3. capite 3. Sed iam antè ostensum est, non omnem Allegoriam præter literalem sensum aliquid aliud significare: neque omnem Allegoriam esse in Novo Testamento; neque omnem Allegoriam significare aliquid de Christo. Ut taceam hanc definitionem magis convenire typo, quàm Allegoriæ. His igitur definitionibus posthabitis, dicimus Allegoriam nihil aliud esse, quàm *continuum Metaphoram*, & in hoc differre à Metaphora, quod hæc vnum atque alterum verbum in aliqua sententia; illa verò totam sententiam à nativa significatione ad alienam transferat. Ut, *Deus eripuit me ex ore Leonis*, 2. ad Tim. cap. 4, 17. Est Metaphora; os n. Leonis posuit pro potestate Neronis: reliqua accipiuntur propriè. At, hæc sententia, *semen mulieris conteret caput serpentis*, Genes. 3. est Allegoria. Totam enim sententiam à nativa significatione ad alienam transfertur. *Semen mulieris*, pro eo, qui ex muliere nascitu-

nasciturus erat. *Serpens*, pro Sathana, *conteret*, pro superabit. Est enim idem, ac si dicas, Iesus Christus filius virginis destruet opera Diaboli. Hæc est vera & orthodoxa doctrina de Allegoria. Iam verò in quibusdam locis verba vel propriè, vel impropiè accepta, rectè explicantur, & ex ijs per similitudinē aliquid colligitur. Exempla sunt passim obuia. At talis collectio, quæ ex Grammatico sensu per similitudinē deducitur, non est nouus sensus, sed est tantum eius, quod explicatum est, ad rem præsentem applicatio, vt antè ostensum est. Hæc de Allegoriæ definitione sufficiant. Nunc ostendemus, quando scripturam per Allegoriam explicare debeamus. Et licet ea res certis regulis coërceri vix possit, dabimus tamen operam, vt ijs, qui veritatem intelligere cupiunt, veram viam ostendamus. Dicimus igitur, tres causas esse, ob quas ad Allegorias confugiendum est, Prima, cùm verba propriè intellecta, absurditatem pariunt. vt, Rom. 12, 20. *Carbones ignis coaceruabis super caput eius*, hoc est, inimici animus emollietur per accepta beneficia. Secunda, cùm verba propriè intellecta flagitium notant, vt Iohann. 6. *Nisi manducaueritis carnem filij hominis*, hoc est, nisi passioni Domini communicaueritis, & memoria recolueritis, carnem eius pro nobis crucifixam esse. Tertia, cùm verba propriè accepta falsitatē arguunt, vt Psal. 91, 13. *Super Aspidem & Basiliscum ambulabis*, hoc est, incolumis euades ex omnib. periculis tuis, vel quod idem est, superabis ea, quæ per Aspidem & Basiliscū significantur. In reliquis rectè feceris, si ab Allegoria abstinueris, nisi ex aliqua sententia, per Allegoriā



aliquid commodè ad rem præsentē accommodari possit. Sed tum, vt dixi, non fit nouus sensus; sed tantum fit enarrati loci ad rem præsentem applicatio. Cæterū Allegoricę istæ & explicatiões & applicationes nō habēt vim argumenti, nisi alibi manifesta aliqua scriptura confirmentur. August. n. in epistola ad Vincent. dicit, *eum impudentissimè facere, qui aliquid in Allegoria positum pro se interpretatur, nisi habeat manifestissima testimonia, quorum lumine illustrantur obscura.* Chrysostomus in 5. caput Esaia. *Hæc lex, inquit, ubicunque locorum diuina scriptura est, si quando Allegorico sensu quiduis tegit, subnectere consuevit, & interpretationem Allegoriae, vt qui volunt omnia pro libidine ad Allegoriam trahere, non versentur in errore.* Hieronymus in 13. caput Matthæi dicit, *parabolam, & dubiam anigmatum explicationem, nihil posse ad dogmatū probationem proficere.* Quin ipse Thomas disertè dicit, *Spiritualement sensum nihil continere fidei necessarium, nisi Scriptura idem per literalem sensum alibi manifestè tradat.* p. p. q. 1. a. 10. Hæc de Allegoria sufficiant. Definitio verò illa Allegoriæ, quam Bellarmin. posuit, magis conuenit Typo, quàm Allegoriæ. Est enim Typus, cū factū aliquod accersitur è Veteri Testamento, idque ostenditur præsignificasse vel obumbrasse aliquid gestum, vel gerendum in Nouo Testamento. Vt, Ionas deuoratus à pisce, & post triduū eiectus, est typus Christi sepulti, & post triduū suscitati. Serpens æneus est typus Christi. Iudæi, qui per aspectum sanabantur, sunt typi eorum, qui per fidem in Christum iustificantur. Duo filij Abrahæ sunt typi eorum, qui per legē, & per fidē quærunt iustitiam.

iustitiam. Mare rubrū est typus Baptismi. Petra est typus Christi. Et multa alia. Verū in his non gignitur nouus sensus, neque literalis sensus conuelligitur, neque ei nouus sensus affingitur. Sed literalis sensus manet saluus, & integer, vt antè dictum est, & ex eo per similitudinē illud colligitur, quod iam antè per eum obumbratum, & præfiguratum erat. Cū igitur Allegoria sit de Grammatica, & typus nullum nouum sensum afferat; sed illud ex literalis sensu colligat, quod per eum iam ante fuit præfiguratum, & obumbratum. Cū deniq; Anagoge & Tropologia nullum nouū sensum pariant, sed literalem saluum & integrum relinquant, & ex eo aliquid per similitudinē diducant, quod ad rem præsentē accōmodent; manifestum est, tantū vnū esse genuinū & legitimū sensum canonicarum Scripturarum.

(:)

FINIS.

Dd 3

SIBRAN-

## SIBRANDI LVBBERTI

De

*Principiis Christianorum dogmatum*

Liber sextus.

## CAPVT I.

*Status controuersia proponitur.*

**G**enuinum & legitimum sensum Canonicarum Scripturarum tantum esse vnum, ostendimus libro superiori. Sequitur, vt, quisnam ille sit, ostendamus. Aduersarij dicunt eum esse legitimum & verum Scripturarum sensum, quem approbat Papa Romanus cum Concilio. Bellarminus de Verbo Dei, libro 3. capite 3. Vel quem solus Papa approbat. Vt idem Bellarminus docet in controuersia de Papa & de Concilijs. Orthodoxi verò dicunt approbationem Papæ nec veram causam, nec verum signum legitimi sensus esse; sed verum eius signum esse analogiam fidei. Ac proinde asserunt eum esse verum & genuinū Scripturarum sensum, qui ex verbis siue propriè siue impropriè acceptis immediatè colligitur, & cum fidei analogia congruit.

CAPVT

*Destruuntur argumenta, quibus Bellarminus ex Veteri Testamento probare conatus est, Interpretationem Papa esse sensum Spiritus Sancti.*

**S**Tatu controuersię cognito, aduersariorum argumenta destruemus. Illi probant suam sententiam multis argumentis, quæ omnia ad 6. classes reduci possunt. Nos ea ordine expendemus. Prima classis est eorum argumentorum, quæ ducuntur ex Veteri Testamento. Ac primùm ex Exod. cap. 18. versu 13. & deinceps, *ubi Moses dicitur omnes causas diiudicasse.*

Quicquid fecit Moses in Ecclesia Iudaica, hoc etiam Papa facere debet in Ecclesia Christiana: Sed Moses in Ecclesia Iudaica iudicauit omnes causas. Ergo Papæ interpretatio in Ecclesia Christiana est sensus Sp. sancti.

Respondeo aliud esse in conclusione, quàm in præmissis. Quæstio enim est, an Papæ interpretatio sit verus sensus Scripturæ. Huius neque subiectum, neque prædicatum est in præmissis. Deinde & Maior falsa est. Moses enim fuit *Propheta*, Deut. 18. v. 15. Papa autem non est propheta. Deinde Moses est *immediatè à Deo vocatus*, Exod. 3. v. 10. At Papa neque *mediatè*, neque *immediatè à Deo vocatus* est, quemadmodum suo loco ostendemus. Præterea *Moses vertit virgam in colubrum*, Exod. 7. v. 10. Et *vertit aquam in sanguinem*, Exod. 7. v. 19. *Extensa manu super aquas produxit ranas*, Exod. 8. v. 6. *Percussio*  
Dd 4 *pulvere*

*pulvere adduxit pediculos, Exod. 8. v. 17. Sparso cinere  
 fornacis concitavit varia ulcera, Exod. 9. v. 10. Extensa  
 manu produxit locustas, Exod. 10. v. 12. Extensa item  
 manu produxit tenebras, Exod. 10. v. 22. Virga diuise  
 mare, Exod. 14. v. 16. E percussa petra eduxit aquam,  
 Exod. 17. v. 6. Elevatione manus profligauit Amalech.  
 Exod. 17. v. 11. Si igitur Papa & Moses habent idem  
 officium, faciat & hæc Papa Romanus, & habebim⁹  
 ei fidem. Si autem hæc facere non potest, manifestū  
 est eum cum Mose nō habere eandem vocationem.  
 Denique Moses fuit extraordinarius, & eius officiū  
 fuit extraordinarium. Papa autem est ordinarius, &  
 eius officium est ordinarium. Non igitur Papa &  
 Moses habent idem officium. Præterea si omnia quę  
 in Iudaica Ecclesia facta sunt, debent fieri in Eccle-  
 sia Christiana, tum omnes ciuiles lites ab vno ciuili  
 magistratu determinari debent. Nam ita factum est  
 apud Iudæos per Mosem. Sed hoc apud Christianos  
 fieri non debet. Ergo neque omnes Ecclesiasticę  
 causę ab vno determinari debent. Deinde Moses  
 habuit expressum mandatum de eo, Exod. 3. v. 7.  
 Ostendat Papa Roman. expressum mandatum. Po-  
 stremò disputatio de Mose nihil facit ad rem. Nam  
 si Moses ratione officij iudicauit omnes lites Eccle-  
 siasticas, hoc fecit vel respectu Regni, vel Prophetię,  
 vel Sacerdotij. At nō fecit respectu regni; Iudicare n.  
 causas Ecclesiasticas non pertinet ad Regem. Neq;  
 respectu prophetię. Aaron enim & eius successo-  
 res id etiam fecerunt, nec tamen fuerunt prophetę.  
 Ergo si fecit, fecit ratione sacerdotij. Volunt enim  
 hoc*

hoc supremum iudicium pertinere ad sacerdotem. At Moses non fuit Sacerdos. Aaron enim erat Sacerdos. Sed dicis ex Psalm. 99. v. 6. Moses & Aaron inter Sacerdotes eius. Respondeo vocem כֹּהֵן apud Hebræos esse æquivocam. Quandoque enim significat Sacerdotem, aliquando Principem politicum vt 2. Sam. 9. v. 7. *Sadok verò filius Achitub, & Achimelech filius Ebiathar erant sacerdotes.* Et v. 18. *filij Davidis erant Sacerdotes.* At illi erant è tribu Iuda. Ergo Sacerdotes esse non poterant. Deinde 1. Paralip. 18. v. 17. ijdem vocantur הראשונים *primi ad manum regis.* Eodem modo *Zaduc filius Nathã Sacerdos dicitur,* 1. Reg. 4. v. 5. qui tamen non erat è tribu Leui, ac proinde Sacerdos esse non poterat. Hinc apparet non esse Sacerdotem qui apud Hebræos כֹּהֵן dicitur. Ac proinde ex loco Davidis producto nihil pbari posse. Deinde probat *Mosen esse Sacerdotem,* quod omnia Sacerdotis officia subierit, Exod. 18. c. v. 29. quod sacrificauerit, Sacerdotem vnixerit, & docuerit. Sed si omnes isti sunt Sacerdotes, tum Samuel etiam Sacerdos est. Docuit enim. Hoc ita manifestum est, vt probatione non sit opus. *Vnxit Davidem in Regem,* 1. Sam. 16. v. 13 *Et sacrificauit,* 1. Sam. 16. v. 2. Et tamen Samuel non fuit Sacerdos. Bellarminus lib. 3. cap. 4. de Verbo Dei. Fol. 218. v. 20. Ergo neque hoc argumentũ quicquã concludit. Inter cã fatemur Mosen fuisse Sacerdotem. Sed ab eo tempore, quo Aaron fuit creatus in Sacerdotẽ, negamus eum fuisse summum Sacerdotẽ. Neque contrariũ vnquam probabit Bellarminus euidenti Scripturæ testimonio. Nos

aút ad id probandú habemus rationē euidentem. In V. enim Testamēto, vno & codē tempore, non erant plures summi Sacerdotes legitimè electi, q̃ vnus. Erat n. typus Christi. Ab eo igitur tempore, quo Aaron summus Sacerdos creatus erat; Moses summus Sacerdos esse non potuit. Sed tota hæc disputatio nihil facit ad rem. Moses n. & Papa Romanus non plus simile habent, quàm quilibet Sacerdos Veteris Testamēti, & Episcopus N. T. Nisi igitur habeas firmiora argumēta, manifestú est te extraneú p̃ extraneú p̃bare, & principiú petere, quoties à Moysi auctoritate, Papæ iudiciú esse Interpretationis regulam adstruis. Secundum Argumentum sumitur ex Deut. cap. 17.9.

Quicquid fecit summus Sacerdos, in V. T. hoc debet Papa Roman. facere in N. T. Sed summus sacerdos in V. T. habuit summam auctoritatē scripturarum interpretandarum. Ergo Papa non potest errare in scriptura interpretanda.

Respondeo Maiorē esse falsam. Sūmus Sacerdos n. in V. T. semel quotannis ingrediebatur in sanctú Sanctorú. Summus itē sacerdos in V. T. offerebat victimas cruētas. Hęc aút nō facit Papa Rom. Deinde summus Sacerdos in V. T. fuit à Deo cōstitutus. Papa autē Rom. non est à Deo constitutus, vt suo loco ostendemus. Non igitur habent idē officiú Papa Rō. & Sacerdos summus in V. T. neq; eundē auctorem. Imò ne simile quicquā inter eos est. Summus n. Sacerdos in V. T. erat vniuersalis Sacerdos toti<sup>9</sup> Ecclesię. Papa autē Rom. nō modo nō vniuersalis Sacerdos, sed



sed ne quidē sacerdos est, vt suo loco ostendemus. Non igit magis à summo sacerdote ad Papā, q̄ à luce ad tenebras argumētari potes. Dicere n. Summus Sacerdos in V. T. habuit summā potestātē scripturarum interpretandarū. Ergo & Papa eam habet. Perinde est ac si dicas, lux est clara, Ergo & tenebræ sunt claræ. Hæc de Maiore. Sed neq; Minor est simpliciter vera. Non n. summus sacerdos habuit potentiam quidlibet statuēdi etiā contra legē Domini : sed eius potētia fuit certis limitibus & regulis finita & determinata. Deut. 17. c. v. 11. *& docuerint te iuxta legē eius.* Idē multis alijs locis præceptū est. Leuit. 19. c. v. 15. *In iustitia iudicabis proximum tuum.* Leuit. 24. c. v. 11. *ut exponeret eis iuxta sermonē Iehouæ.* Deut. 1. c. v. 16. *Iudicate iuste.* Deut. 27. c. v. 19. *Maledictus qui peruertit iudiciū.* Hinc apparet summo sacerdoti præceptū esse, vt secundū legē Domini iudicaret. Bellar. respondet illud *iuxta legē eius, non esse in Hebraeo, sed tantum in vulgata.* At hoc sufficit. Vulgatam enim habent pro authentica. Ergo ex ea fortiter repelli possunt. Deinde quod dicit falsum est. In hebræo n. est על בי התורה. Hac igitur responsione deiectus, affert aliam, & dicit illud *secundum legem, non esse mandatum, sed promissionem.* Num. igitur Bellar. vult summū sacerdotē in V. T. non errare, etiamsi contra Dei verbū pronunciet? Sed accipiamus esse promissionē. Atqui Bellarmine quod Deus p̄mittit, hoc præstat. Non est n. homo, vt mētiatur. Promisit autē sacerdotes (loquor ex hypothesi) semp secundū legē suā, p̄nunciaturos esse. Quæro igitur cū Caiphas pronūciaret Christi doctrinā esse blasphemiam, Christū esse populi seductorē, Christum

quàm vnus & solus DEVS. Nunc argumentum formabimus.

Quod fecit Deus in Veteri Testamento, hoc faciet Papa Romanus in Nouo Testamento. Sed Deus in Veteri Testamēto verbum suum Prophetis reuelauit. Ergo Papa Romanus in scriptura interpretanda errare non potest.

Argumentum aliter formari non potest. At Maior non tantum falsa, sed etiam blasphema & impia est. Neque tamen hic conqueratur Bellarminus nos eius sententiam peruertere: Licet enim nunc Papiſtæ ita loqui non audeant, tamen ita eos in corde suo sentire, testantur eorum scripta. Decreta enim docent *Papā non debere à quoquam iudicari etiamsi multos populos perderet*, Distinct. 40. C. Si Papa. 9. quæst. 3. C. aliorum, & C. sic omnes. Distinct. 19. *Deinde discunt Papam contra Dei verbum dispensare posse*, de cōcess. præbēdæ C. Proposuit, & ibi glossa, & Dist. 34. C. lectori & ibi glossa. Distinct. 82. C. Presbyter & ibi glossa. 15. quæst. 6. C. auctoritatem. Hæc omnia quoniam blasphema esse negare non audes, miror quòd hoc argumentum contra nos reposueris. Possémne eodem modo argumentari. Deus creauit res omnes, Ergo & Papa creauit res omnes. Est enim eadem ratio consequentiæ. Deinde Ecclesiastes eo loco non loquitur de interpretatione scripturarum, sed de earum origine. Nempè vnde scriptura profecta sit, & respondet *ab vno Deo omnium sapientium verba profecta esse*. non existimo te eodem modo dicturum esse, omnium sapientiū verba à Papa Romano profecta esse. Postremò aliud est in conclusione quàm

quàm in præmissis. Nam neque subiectum conclusionis, neque prædicatum, est in antecedente.

Quartus locus est Aggei 2. cap. v. 12. *Interroga Sacerdotes legem.* Verus huius loci sensus est, quemadmodum rectè explicat Hieronymus, *Sacerdotis officium esse legem scire, & de ea interroganti respondere.* Si Sacerdos est, inquit, sciat legem Domini. Si ignorat legem, ipse se arguit, non esse Domini Sacerdotem. Sacerdotis n. est scire legem, & ad interrogationem respondere de lege. Deinde dicit hoc non tantum pertinere ad doctores Veteris Testamenti: sed etiam ad ministros Noui Testamenti. Et ne forsitan, inquit, in veteri solum instrumento hac præcepta videantur, loquitur & Apostolus ad Timoth. Episcopum non solum irreprehensibilem esse debere, sed etiam doctorem. Et paulò post, hac prolixius, inquit, posui, ut tam ex Veteri, quàm ex Novo Testamento Sacerdotum officium esse nouerimus scire legem Dei: & respondere, ad qua fuerint interrogati. Nunc formabo argumentum.

Quale fuit officium Sacerdotum in Veteri Testamento, tale est officium Papæ Romani in Nouo Testamento. Sed Sacerdotum Veteris Testamenti officium erat, de lege respondere.

Ergo & Papæ Romani officium est, de lege respondere.

Si aliter colligis, facies loco adducto vim, aut aliud colliges quàm fuit in antecedente. Totum autem hoc argumentum Bellarmine causam tuam non iuuat. Nam omnes ministros, qui sunt legitimè vocati, debere legem explicare, & de ea respondere, vltro concedimus, addimus etiam, si quis in Ecclesiâ irrepsit,

irrepperit, qui hoc facere non potest, eum non esse idoneum Episcopum. Sed totum hoc argumentum, vt dixi, causam tuam non iuuat. Ita enim inferri debebat,

Quicumque habet potestatem interpretandi scripturam, illius interpretatio est vera. Sed omnes Sacerdotes Veteris & Noui Testamenti habent potestatem interpretandi scripturam. Ergo omnium ministrorum Veteris & Noui Testamenti interpretatio est vera.

Maiores hanc vides falsissimam esse, quemadmodum reliquæ omnes fuerunt. Nam apud Matth. c. 5. legimus, *Veteres Interpretationes, quæ ab omnibus Sacerdotibus eo tempore approbatae erant, reijci à Christo, & reprehendi.* Quis nescit multorum patrum interpretationes falsas, imò impias esse, vt Origenis de *Paradyso*, Lactantij de *1000. annis* & similes. Hæc igitur argumēta licet per se corruant, & indigna sint, quæ à nobis refutentur, tamen aliquid commodi & vtilitatis ex ijs percipimus: Videmus enim quàm infirma sit vestra religio, & cū alia argumenta ad eam probandam inuenire non possitis, sanè ostenditis eam deploratam penè esse. Omnia enim principia debent esse certa & indubitata, alioqui enim principia esse non possunt. Vestra autem hæc principia, non tantum dubia sunt, & incerta; sed palam etiam falsa & absurda. Facile igitur intelligere possumus, cuiusmodi illa dogmata sint, quæ ex talibus principiis extruuntur. Nam quod tu ignorare non potes, Hæc quæstio, An omnis Papæ Interpretatio sit certa? inter nos controuersa est. Tu

eam

eam probas, quodam argumento, quod non magis facit ad rem, ac si dicas, Cæsaris Romani officium est Rempublicam administrare, & hostes imperij armis coërcere. Ergo Papa Romanus non potest errare in scriptura explicanda. Licet igitur principia deberent esse indemonstrabilia, tamen cùm tu ea probare velles, debuisses fortiora argumenta adducere, aut causam tam deploratam, & certo exitio destinatam non attingere, neque eius vanitatem tam manifestè prodere.

Quintus locus est, Malach. 2. v. 7. *labia Sacerdotis custodiant sapientiam, & ex ore eius requirant legem.* Et hoc loco describitur verum Sacerdotis officium. Dicit enim Malachias non quales sint, sed *quales esse debeant.* Nam in eodem capite, v. 8. *Vos autem declinastis de via mea, & infirmos fecistis multos in lege, corripistis testamentum Levi.* Argumentum principale tale est,

Qui debent custodire legem Dei, illi eam semper rectè explicant, sed Sacerdotes debent legem Dei custodire, Ergo Sacerdotes eam semper rectè explicant.

Minorem hanc concedimus, sed Maior est falsa. Non enim Prophetæ semper fecerunt in Veteri Testamento, quod facere debuerunt. Eza. 28. v. 7. *Sacerdos & Propheta nesciuerunt præ ebrietate, Absorpti sunt à vino, errarunt in ebrietate, nesciuerunt videntem, ignorarunt iudicium.* Ierem. 26. cap. v. 8. *Et fuit cùm finem loquendi fecisset Ieremias, omnia quæ præceperat ipsi Iehona, ut loqueretur ad uniuersum populum, apprehenderunt eum Sacerdotes & Propheta dicendo, moriendo morieris.*

*rieris. Ezechiel. 7. v. 26. Lex peribit à Sacerdote. Ezech. 22. v. 26. Sacerdotes eius contempserunt legem meam, & polluerunt sanctuaria mea, inter sanctum & profanum non habuerunt distantiam, & inter pollutum & mundum non intellexerunt, & a sabbathis meis auerterunt oculos suos. Zophon. 3. v. 4. Sacerdotes eius polluerunt sanctitatem, transgressi sunt legem. Micheæ 3. v. 11. Sacerdotes eius pretio docent, id est, pecunia accepta docent non veritatem, sed quodcumque placet ijs, quos docent. vt interpretatur Vatablus. Ex his manifestum est, Sacerdotes Veteris Testamenti non fuisse semper tales, quales esse debebant. Idem de doctoribus Noui Testamenti affirmari potest. Qui enim Apostolos sequuti sunt, non ita verbum Dei semper explicuerunt, vt debuerunt. Proinde ex hoc loco nihil colligere potes. Perinde enim est, ac si dicas, Monachi & Beginæ debent esse casti, ergo sunt casti. Hoc et si sufficeret, tamen subnectam argumentum, quod Bellarminus intendit...*

Quicquid fecerunt Sacerdotes in Veteri Testamento, hoc facere debet Papa in Nouo Testamento. Sed Sacerdotes in Veteri Testamento custodiuerunt legem. Ergo quæcunque interpretatio à Papa affertur, ea est vera.

Hanc esse veram mentem Papistarum, manifestum est ex C. Sic omnes. distinct. 19. Ibi enim docent omnes Paparum constitutiones esse accipiendas, ac si Petri ore prolata essent. Sed nos hoc negamus. Nam vt sæpè dictum est, inter Papam & Sacerdotes Veteris Testamenti nulla est similitudo. Habent enim diuersa officia, & auctores diuersos. Deinde aliud est

Ee in.

in Conclusionem, quàm fuit in Præmissis. Corrigen-  
 dum igitur argumentum in hunc modum. Quomodo-  
 dum sacerdotum in V. Testamento officium erat, ver-  
 bum interpretari, ita & ministrorum Noui Testamēti  
 officium est verbum interpretari. Et ob eam causam,  
 qui legem Dei ritè interpretari nequit, ille neque sa-  
 cerdotio, neque ministerio dignus est. Hæc est vera  
 consequentia: Sed quid hæc ad Papam Romanum?  
 Nam ille non est minister Ecclesiæ, quemadmodum  
 suo loco ostendemus. Imò quid hoc argumentum  
 ad causam præsentem? Nam vt sacerdotes Veteris  
 Testamenti sæpè aberrarunt, ita & ministri Noui Te-  
 stamenti sæpè aberrarunt, & vt responsio sacerdotum  
 in Veteri Testamento non idèo erat vera, quia à sa-  
 cerdote profecta erat: sed quia cū lege Dei congrue-  
 bat, idèo erat vera: ita expositio ministri in Nouo  
 Testamento non propterea est vera, quia à ministro  
 profecta est, sed quia cum lege Dei congruit, idèo  
 est vera. An autem expositio aliqua Papæ Romano  
 probetur vel improbetur, tantum curamus, quantum  
 torrentia flumina ripas, nisi quod penè verum sit,  
 quod Papæ displicet, & è contrariū, quod ei pla-  
 cet. Subiungit Bellarminus in eodem argumento,  
*non esse privatorum hominum iudicare sententias legis Do-*  
*mini, sed sacerdotis, qui cum sit Angelus Dei, ad eum per-*  
*tinere ex officio explicare sententiam Dei.* Hoc ipsum  
 contra quem dicat, equidem non assequor. Fatemur  
 enim sacerdotum proprium esse scripturas explica-  
 re, quin ipse Bellarm. antè factus est inter nos con-  
 uenire, *scripturam debere eodē spiritu explicari, quo scri-*  
*pta est,* lib. 3. cap. 3. fol. 215. v. 10. Et adducit locum ex



2. Pet. 1, 20. atq; ad illius loci explicationē addit, *non debere scripturas exponi ex proprio ingenio, sed secundum dictamen Spiritus sancti*, quia non sunt scriptæ humano ingenio, sed ex inspiratione Spiritus sancti. Vnde apparet hoc ipsum, quod hoc loco dicit, nihil ad rem facere. Deinde ex hoc ipso colligi potest, omnem interpretationem, quæ non est secundum dictamen Spiritus sancti, esse priuatorum hominum. Sed pleræque interpretationes Paparum non sunt secundum dictamen Spiritus sancti, Ergo pleræque interpretationes Paparum sunt priuatorum hominum. Ratio est manifesta. Pleræque enim Interpretationes Paparum ex diametro pugnant cum sacra Scriptura, & ob eam causam non sunt secundum dictamen Spiritus sancti. Si dicis Papam esse personam publicam, nihil dicis; nam & sacerdotes, qui Jeremiã apprehendebant, & qui negabant Christum esse filium Dei, erant personæ publicæ: & tamen illorū interpretationes erant priuatæ, nullam aliam ob causam, quàm quòd nō essent secundum dictamen Spiritus sancti. Planè eodem modo & Paparum interpretationes censentur priuatæ, quando non sunt secundum dictamen Spiritus sancti. Et ob eam causam, an Bellarminus dicat, an Papa dicat, an Iesuita dicat, an Monachus dicat, susque de quæ habemus. Non enim quia vel Papa, vel Monachus, vel alius quispiam dicit, idèd verum est; sed quia cum verbo Dei congruit, ideo verum est. Hoc volui tibi subijcere, ne posthac priuatas interpretationes nobis exprobrares, & vt videres, te illud negare, quod antè affirmasti, ac simul disceres Papæ Interpretationem

cum scriptura pugnantem esse æquè priuatam, atque tuam, si à scriptura aberrat.

Sextus locus est, 2. Paralip. 19. v. 5. & deinceps. *Ubi rex Iosaphat Zebadiam fecit prasidem concily politici, & Amorrhiam constituit prasidem concily Ecclesiastici, & addit, vides quam clarè hic rex distinguat officium Pontificis ab officio regis.* Sed quis nesciuit, Bellarmine, officium regis ab officio sacerdotis distinctum esse? Deinde addit, *soli Pontifici tribuit iudicium de dubys legis.* Sed neque hoc tuam caussam iuuat. Argumentum enim tale est,

Cui tributum est officium respondendi de dubijs legis, ille errare non potest. Sed summo sacerdoti in Veteri Testamento tributum est officium respondendi de dubijs legis. Ergo Papa Romanus non potest errare in scripturis explicandi.

Nos negamus Maiorem. Sacerdotes enim in Veteri Testamento sæpè aberrarunt in doctrinæ explicatione. 2. Paralip. 36. v. 14. *Omnes principes sacerdotum & populus auxerunt prauaricationem secundum omnes abominationes gentium, & polluerunt domum Iehoua, quam sanctificauit in Ierusalem.* Deinde Christum esse filium Dei, & esse Redemptorem Ecclesiæ, præcipua Ecclesiasticæ doctrinæ pars est. At hanc doctrinam dixit ipse Pontifex maximus *blasphemiam esse.* Marc. cap. 14. v. 64. Plura exempla antè attulim⁹. Deinde ostendimus Minorem certis limitibus circumscriptam esse. Sacerdotes enim Veteris Testamenti non habebant potestatem de quolibet loco quidlibet responderdi: sed tantum habebant potestatem

statem secundum *legem Dei* respondendi. Præterea à sacerdote Veteris Testamenti ad Papam argumentari, ridiculum est. Summus enim sacerdos in Veteri Testamento fuit sacerdos, Papa autem in Ecclesia Christiana sacerdos non est, nedum summus sacerdos. Solus enim Iesus Christus in sua Ecclesia est summus sacerdos. Deinde summus sacerdos in Veteri Testamento à Deo fuit constitutus, Papa autem à Deo constitutus non est. Cum igitur inter Papam & summum Sacerdotem nulla sit similitudo, neque summus sacerdos in Veteri Testamento habuerit potestatem quidlibet de quolibet respondendi, cum etiam in doctrina sæpè errauerit, manifestum est Papæ interpretationem non esse, propter summum pontificem Veteris Testamenti, omnis interpretationis regulam.

## CAPVT III.

*Argumenta, quibus Bellarminus ex Nouo Testamento probare conatus est, Papæ iudicium esse omnis interpretationis regulam, refutantur.*

**D**estructis argumentis, quæ Bellarminus ex Veteri Testamento adduxit, sequitur, ut argumenta ex Nouo Testamento pro eadem re adducta, expendantur. Primus locus est. Matth. 16. v. 18. *Et tibi dabo clauēs regni cœlorum, & quodcunque ligabis supra terram, erit ligatum in cœlo, & quodcunque solueris super terram, erit solutum in cœlo.* Ex hoc loco volunt probare, omnem interpretationem Papæ esse legitimam & rectam. Argum. absque prosyllogismo cōfici nō potest, formabimus autem illud in hunc modum,

Ec 3 Qui-

Quicumq; habet ligandi & soluendi potestatem, eius interpretatio est omnis interpretationis regula. Sed Petrus habet ligandi & soluendi potestatem. Ergo Petri interpretatio est omnis interpretationis regula. Deinde,

Quicquid dici potest de Petro, hoc etiam de Papa Romano dici potest. Sed de Petro dici potest, quod ipsius interpretatio sit omnis interpretationis regula. Ergo & de Papa dici potest, quod ipsius interpretatio sit omnis interpretationis regula.

Nos primùm negamus Maiorem. Non enim quicumque habet officium soluendi & ligandi, ille non errat in doctrina. Omnes enim ministri legitimè vocati habent potestatem ligandi & soluendi. Vnde sequeretur nullū ministrū posse errare in doctrina. Deinde non quicumque habet officium ligandi & soluendi, ille semper rectè ligat, & soluit. Hieronymus n. ad dictum locum, *istum locum*, inquit, *Episcopi & Presbyteri non intelligentes, aliquid sibi de Phariseorū sumunt supercilio, ut vel damnent innocentes, vel soluere se noxios arbitrentur, cum apud Deum non sententia sacerdotum, sed reorum vita queratur.* Vnde apparet Episcopos non rectè semper ligare & soluere. Præterea argumentum totum nihil facit ad rem. Quæstio enim est non de ligatione, & solutione peccatorum; sed de vera & legitima script. interptatione. Perinde n. est, ac si dicas: Apostolorum officiū fuit baptizare, ergo Papa non potest errare in scriptura explicanda, est enim eadem vis consequentiæ. Deinde sæpè accidit, ut aliquis rectè doceat, & tamen non rectè

rectè liget; contingit etiam aliquando, vt aliquis rectè liget, & tamen non per omnia rectè doceat. Ergo à ligatione ad doctrinam, & è contra, non valet consequentia. Quod autem Bellarminus dicit scriptum esse, non *Quemcunque*, sed *Quodcunque*; & isthinc infert *legum dispensationes, pœnarum relaxationes, ex arbitrio eius, qui habet ligandi & soluendi officium, pendere*, ridiculum est. Antè n. ostendimus, omnes Episcopos habere hoc officium, & tamen Bellarminus non vult, nullos Episcopos posse errare in scriptura explicanda. Deinde qui apud Matth. 16. v. 18. dicit, *Quodcunque ligaueris*. Idem apud Iohann. cap. 20. v. 23. dixit, *quorum remiseritis peccata, remissa sunt, & quorum retinueritis, retenta sunt*. Ergo neque de dispensatione legum, neque de pœnarum relaxatione, neque de dogmatum explicatione agitur, vt somniat Iesuita: sed de sola solutione, & ligatione peccatorum. Et si quis disputandi gratia diceret, hoc etiam ad interpretationem pertinere, non tamen iuuaret Bellarminum. Nullus n. Apostolus habuit potestatem pro libitu explicandi verbum Dei, qualem sibi Papa arrogat; sed quemadmodum ostendi summum sacerdotem in Veteri Testamento habuisse mandata certis limitibus comprehensa: ita etiam in Nouo Testamento, Apostoli non habuerunt potestatem quidlibet statuendi etiam contra Dei verbum: sed habuerunt mandatum certis limitibus & terminis finitum & determinatum, Matth. 28. v. 20. *Docentes eos seruare omnia*, non quaecunque vobis videntur, sed *quæ ego vobis mandauit*. Actor. 2. v. 4. *Apostoli loquuti sunt varijs linguis*, non quicquid illis in buccam veniebat,

sed prout Spiritus ille dabat eis eloqui. Act. 26. v. 22. *Paulus prædicauit*, non quælibet, neq; ea, quæ erant contra Dei verbum; sed ita temperauit suam prædicationem, vt nihil diceret extra ea, quæ Propheta ac *Moses futura prædixerant*. Vnde colligi potest, si Apostoli quicquam dixissent, vel explicuissent aliter, quàm Christus mandauerat, ac Spiritus sanctus dabat eloqui, ac Moses prædixerat, eam interpretationem futuram fuisse contra mandatum, ac proinde illegitimam. Gal. 1. 8. *Si nos aut Angelus è cælo euangelizauerit præterquam quod euangelizauimus vobis, anathema sit*. Et ob eam causam euidenter concludo, tantùm eam interpretationem veram esse, quæ cum mandatis conuenit, vel quæ cum *ys*, quæ Spiritus sanctus suggerit, vel cum eo ipso Euangelio, quod ex ipsa Domini reuelatione Paulus acceperat, vel deniq; cum *ys*, quæ Propheta & Moses prædixerunt, congruit. Quæ verò cum mandatis Christi, vel cum *ijs*, quæ Spiritus suggerit, vel quæ Moses & Prophetæ prædixerunt, vel cum Euangelio non congruit, eam non esse veram neq; legitimam, etiamsi omnes Papæ Rom. eam approbarent, imò eam esse pro anathemate habendam, etiamsi ab iplis Angelis, vel ab ipsis Apostolis, nedum à Romanis Papis proficisceretur. Quod ad Minorem attinet, illa non de solo Petro; sed de omnibus Apostolis, imò de omnib. Episcopis vera est. Nam omnes Apostoli habuerunt officium ligandi & soluendi. Quod enim Christus ad solum *Petrum* dicit, Matth. 16. v. 8. hoc apud eundem Euangelistâ, 18. v. 18. ad omnes Apostolos dicit. *Amen dico vobis, quacunque ligaueritis super terrâ, erunt ligata in cælo, etc.*

Et

Et Ioan. 20. v. 23. *accipite Spiritum sanctum, Quorum remiseritis peccata, remittuntur eis, & quorum retinueritis peccata, erunt retenta eis.* Hinc apparet soli Petro nihil peculiare datum esse, sed quicquid datum est, omnibus Apostolis datum esse. Hoc etiam primitiua Ecclesia agnouit. Cyprian. de Simplicitate Prælat. *Quamuis Dominus, inquit, post resurrectionem suam omnibus Apostolis parem potestatem tribuat, tamen ut unitatem manifestaret, unitatis eiusdem originem, ab uno incipientem sua auctoritate disposuit. Hoc erant utique & ceteri Apostoli, quod erat Petrus, pari consortio præditi & honoris, & potestatis, Sed exordium ab unitate proficiscitur, ut Ecclesia una monstretur.* Origenes in Matth. Tractat 1. *Hoc dictum, inquit, tibi dabo claves regni cælorum, ceteris quoque est commune.* Cyrill. in Iohan. lib. 3. cap. 20. *Apostolis, inquit, & illorum in Ecclesia successoribus plenam concessit auctoritatem.* Basil. lib. de vita solitaria, cap. 23. *Christus Petrum post se Ecclesia sue pastorem constituit, & consequenter omnibus pastoribus, & doctoribus eandem tribuit potestatem, cuius signum est, quod omnes ex æquo (nota ex æquo) ligant & absolunt, quemadmodum ille.* Ex his manifestum est, istam potestatem omnib. legitimis ministris concessam esse, & ob eam causam, si eorum interpretatio est vera, qui habent ligandi & soluendi officium; tum sequitur nullum ministrum in doctrina errare posse, sed hoc est absurdum. Ergo & illud ex quo hoc sequitur. Cum igitur ligare & soluere non sit hoc loco scripturas interpretari, nec omnes rectè liget & soluant, qui habent illud officium, neque solus Petrus, sed oēs Apostoli, imò oēs legitimi ministri habeant



ligandi, & soluendi officium. Cùm denique Apostolis non licuerit quidlibet dicere, sed ea tantùm, quæ Christus mandauerat, vel quæ Spiritus suggererat, vel quæ Moyses & Propheta prædixerāt, manifestum est, hoc argumento Bellarmini causam non iuari. Nunc ad alterum Syllogismum, ac primùm negamus Maiorem. Petrus n. fuit Apostolus, Papa non est Apostolus, Petrus fuit immediatè à Deo vocatus, Papa non est immediatè à Deo vocatus. Petrus paralyticum sanauit, Act. cap. 9. v. 33. Tabitam ex mortuis excitauit, Act. cap. 9. v. 40. faciat idem Papa Romanus. Cùm igitur Papa non sit Apostolus, neque immediatè à Deo vocatus; neque possit ea facere, quæ Petrus fecit, sequitur à Petro ad Papam non magis valere consequentiam, quàm à Petro ad quemlibet Doctorem. Quod ad Minorem attinet, illa quidem est vera, sed non de solo Petro, verùm de omnibus Apostolis. Non enim solus Petrus, sed omnes Apostoli nō poterāt in doctrina errare. Deinde quod Petrus in doctrina non errabat, causā non erat, quòd ille quidlibet pro suo arbitrio docebat, sed quòd hoc docebat, quod Christus mandauerat, vel quod Spiritus sanctus suggererat, vel quod Moyses & Propheta prædixerāt. Ac talē interpretationē libenter admittimus. Sed hinc nō sequit̃, quaslibet interpretationes etiā cū verbo Dei pugnātes, cuiusmodi sunt papales, esse veras; tantū ob eam causam, quòd Papa eas approbet. Et si n. Papa nihil habet cum Petro cōmune, tamen si quis ex hypothesi aduersariorū dicat eum esse Petri successorem, sequetur eum non habere plus potestatis, quàm à Petro accepit. At Petrus non habuit potestatem

statē quicquam docēdi, quā quod *Christus mandā-*  
*rat*, & ea sola doctrina Petri erat vera, quæ cum man-

datis Christi congruebat; nisi igitur Papa Romanus  
 eadē doceat, quæ *Christus mandauit*, transgreditur  
 officium suum, & docet mendacium. At Christi  
 mandata sunt literis Veteris & Noui Testamenti cō-  
 prehensā. Cū igitur Papæ interpretatio cum scri-  
 pturis Veteris & Noui Testamenti congruit, est ve-  
 ra; cū verò ab ea discrepat, est falsa. Nam vt Petri  
 doctrina non proptereā erat vera, quia à Petro dice-  
 batur, sed quia cum mandatis Christi congruebat:  
 eodem modo, Papæ doctrina non proptereā est ve-  
 ra, quia à Papa profecta est; sed quia cum mandatis  
 Christi, id est, cum expressa sacra Scriptura cōgruit,  
 ideò vera est. Cū igitur inter Papam & Petrū nul-  
 la sit similitudo, & nō tantū Petrus, sed oēs Apo-  
 stoli nō possint errare in Script. explicāda, neq; pro-  
 ptereā doctrina Petri sit vera, quia à Petro dicta est,  
 sed quia cū mandatis Christi congruit, ideò vera sit:  
 sequitur Papæ iudicium, propter hoc Argumentū,  
 omnis Interpretationis regulam esse non posse.

Secundus locus est, Matth. 18. v. 17. *Si Ecclesiam*  
*non audierit, sit tibi velut Ethnicus, & Publicanus.* Hinc  
 educit Bellarminus tale argumentum, Quando Ec-  
 clesia fratrem peccantē admonet, tum est audienda.  
 Ergo Papæ iudicium est omnis interpretationis re-  
 gula. Acutum & prorsus Iesuiticum argumentum,  
 ad nullum enim modum, neque ad vllam figuram  
 cogi potest. Ne tamen quid præterire videamur,  
 prius illud explicabimus, deinde refutabimus. Chri-  
 stus agit isto loco de disciplina Ecclesiastica. Hoc

omnes

omnes antiquiores patres affirmant, & res ipsa docet, nec à Bellarmino negatur. Colligendum igitur in hunc modum,

Qui moribus formandis præfunt, illi sunt audiendi, sed Ecclesia, vel eius presbyteri morib. formandis præfunt. Ergo Ecclesia & eius presbyteri in vitijs corrigendis sunt audiendi.

Concedimus totum Argumentum. Presbyteri enim audiri debent, cum vitia ex verbo Dei rectè corrigunt. Cum verò vitia non corrigunt, sed vel invidia, vel liuore, vel æmulatione, vel alia iniusta causa hunc vel illum corripunt, tum illorum iudicium non est magnificandum. scitè Hieronymus in 16. cap. Matth. *Episcopi & presbyteri non intelligentes*, inquit, *aliquid de Pharisæorum sibi sumunt supercilio, ut vel damnent innocentes, vel solvere se noxios arbitrentur, cum apud Deum non sententia sacerdotum, sed morum vita queratur.* Ex his apparet presbyteros aliquando in morum censura aberrare. Non igitur sequitur. Qui morum censuræ præfunt, illi semper legitimè præfunt. Aliud enim est, *debere, quod non præstes*, & aliud, *præstare, quod debes.* Vbi igitur presbyteri benè præfunt, ibi sunt audiendi, ubi verò malè præfunt, ibi valet illud Apostoli, *Oportet Deo magis obedire, quàm hominibus.* Postremò totum hoc Argumentum nihil facit ad Papam Romanum. Christus enim loquitur de Apostolis, & eorum legitimis successoribus. Sed Papa Romanus, neque ipse Apostolus est, neq; vllius Apostoli legitimus successor est, quemadmodum suo loco ostendemus. Bellarminus quidè fatetur hîc agi de morum censura, disertè enim

enim dicit, *si peccauit in te frater tuus*. Sed ex eo per consequens colligi putat, agi etiam de scripturarum Interpretatione. Qui enim scripturam malè interpretatur, ille peccat in totam Ecclesiam. Ergo & ab Ecclesia admoneri debet. Hoc etsi falsum non est, Hæretici enim ab Ecclesia & eius presbyteris admoneri debent, tamen non iuuat causam Bellarmini. Est enim argumentum tale, Presbyteri debent hæreticos arguere, ergo Papa non potest errare in doctrina. Si quid sequitur, debet sic colligi,

Quicumq; debet hæreticos admonere, illi nō possunt in scriptura explicanda errare. Sed omnes Episcopi debent hæreticos admonere. Ergo nulli Episcopi possunt errare in scriptura explicanda.

Hæc Maior est falsa. Victor enim, qui circa annū 200. Ecclesiæ Romanæ præerat, fuit Episcopus, & hæreticos admonere debuit. Sed in Asiaticis Ecclesijs excommunicandis aberrauit. Irenæus apud Eusebium lib. 5. cap. 24. *Victorem, inquit, arguit, quòd non rectè fecerit, abscindere à corporis unitate tot ac tantas Ecclesias Dei, quæ morem sibi antiquitus traditum custodirent*. Lactantius & Irenæus fuerunt Episcopi, & debuerunt hæreticos admonere, & tamen in Chilistarum errores inciderunt. Cyprianus fuit Episcopus, & debuit hæreticos admonere, at in rebaptizandis ijs, qui in hæresin lapsi erant, errauit. Augustinus fuit Episcopus, & debuit hæreticos admonere, at sæpè errauit, docent hoc eius Retractationes. Anastasius fuit Episcopus, & debuit hæreticos monere, at grauiter errauit Distinct. 19. cap. Anastasius, Mani-

Manifestum igitur, eos, qui hæreticos debent admonere, posse in scriptura explicanda errare. Quòd ad Minorem attinet, illa est vera. Non enim hic, vel ille Episcopus tantum, sed quilibet Episcopus habet potestatem arguendi Episcopum, ad Tit. cap. 1. v. 9. Quam ob causam hoc argumēto Bellarmini causa non iuuatur. Nam nō quicunq; ex officio arguūt, semper rectè arguunt, vt ostendimus. Deinde argumētum prorsus nihil facit ad Papam Romanum. Ille enim non est Episcopus, quemadmodum suo loco ostendemus. Vnde sic colligo, Qui non est Episcopus, eius officiū non est arguere hæreticum, sed Papa non est Episcopus, ergo eius officiū nō est arguere hæreticum. Maiorē non negabit Bellar. Minorē probabo suo loco. Et si maximè Episcop⁹ esset Papa Romanus, non tamen propter hoc argum. plus auctoritatis haberet, quàm singuli Episcopi. Singulorum autē Episcoporum sentētia, non ideò vera est, quia ab Episcopo profecta est, sed quia cum verbo Dei congruit, ideò vera est. Eodē modo si Papa Romanus esset Episcopus, eius sentētia non ideò vera esset, quia à Papa profecta esset, sed quia cum Verbo Dei congrueret, ideò vera esset. Dum igitur ex hoc loco colligis Papæ iudicium esse omnis interpretationis regulam, petis principium. Papæ enim Interpretationem esse authēticam, inter nos controuersum est. Hoc probas, quia Episcopus in iudicando errare nō potest, sed hoc est æquè cōtrouersum: subiungis Papam Romanum esse Episcopum, sed & hoc controuersum est. Nisi igitur probes, nullum Episcopum posse in scriptura interpretanda errare, & Papam esse

se Episcopum, frustra agis, & cùm hoc probasti, tum tamen nihil profecisti. Nihil enim aliud probasti, quàm non esse maiorem auctoritatem Papæ, quàm singulorum Episcoporum, ac proinde non solum Papæ, sed singulorum Episcoporum Interpretationem esse authenticam. Si existimas Bellarmine nos tua argumēta minus rectè formare, sume tibi ipsi eorum formandorum laborem.

Tertius locus est, Matth. 23. v. 2. *Super Cathedram Moysi sedent Scribæ & Pharisei, quacumq; dixerint vobis, ea servate, & facite.* Vera sententia est, Scribæ & pharisæi, qui sunt doctores vestri, & vobis Moysi doctrinam proponunt, sunt audiendi, etiamsi malè viuant. Sedere enim in Cathedra Moysi, est Moysi doctrinam tradere, vt. inquit Hieronymus in 23. cap. Matthæi. Hinc educit tale argumentum, Scribæ & pharisæi docentes doctrinam Moysi sunt audiendi, Ergo Papa nō potest errare in scriptura explicanda. Sed quid hoc ad rem? Nēpè, si illi sunt audiēdi, qui sedēt in Cathedra Moysi, tū illi multò magis sunt audiēdi, qui sedēt in Cathedra Petri. At Papa sedet in Cathedra Petri, Ergo Papa nō potest errare in scriptura explicanda. Quicunque sedent in Cathedra Moysi, illi non possunt errare in scriptura interpretanda. At pharisæi & scribæ sedent in Cathedra Moysi, Ergo pharisæi & scribæ non possunt errare in scriptura explicanda.

Respondeo ad Maiorem. Si sedere in Cathedra Moysi est idem, quod Moysi doctrinam docere, tum illa est vera. Quatenus enim quis Moysi doctrinam docet, eatenus non errat. Sed tum Minor est falsa.

Phari-

Pharisei enim & scribæ in doctrinæ explicatione aliquando aberrarunt. Matth. enim cap. 5. & cap. 23. *reprehendit Christus eorum falsam doctrinam, & tandem à Mosis doctrina prorsus desciuerunt.* Nam quem Moses cap. 18. vers. 18. *audiendum esse docet*, hunc illi in crucem egerunt. Si verò Maior intelligitur de ijs, qui in eodem loco docent, in quo Moles, vel qui Mosi in docendo succedunt, tum Minor est quidem vera. Pharisei enim & scribæ successerunt Mosi in docendo; Sed Maior est falsa. Nam non quicumque bonis succedunt, ij boni sunt. Quod autem Bellarminus dicit, *quemadmodum non errant, qui in Mosis cathedra sedent, ita etiam non errant, qui in Petri cathedra sedent.* Nihil iuuat, nisi probet Papam semper sedere in Cathedra Petri, id est, semper docere doctrinam Petri, & ab ea nunquam deflectere. Argumentum tale,

Quicumque sedent in cathedra Petri, ij non possunt errare in scriptura explicanda. Sed Papa sedet in cathedra Petri. Ergo Papa non potest errare in scriptura explicanda.

Respondeo, si in Maiore cathedram intelligis de doctrina, V. G. Qui docent doctrinam Petri, ij non possunt errare in scriptura explicanda, tum illa vera est. Qui enim docet doctrinam Petri, & ab ea non discedit, ille non errat in scriptura explicanda. Sed tum Minor est falsa. Papa enim non docet doctrinam Petri. Petrus enim in 1. Epistola, v. 3. vetat, *ne Presbyteri dominentur Clero.* Papa autem dicit se esse *Dominum omnium hominum*, De Maioritate. C. vnā sanctam. Idem dicit *Papalem dignitatem esse quadragesies*



gesies sexies maiorem dignitate Imperatoria, De Maioritate C. solitæ. & ibi glossa. Idem dicit omnes Ecclesiasticos Romanæ Ecclesiæ auctoritate regi. Distinctione vigesima secunda. C. Vnam sanctam. Idem dicit, Romanam Ecclesiam esse caput & auxilium omnium, & debere omnes iudicare, nec à quoquam iudicari. Distinctione vigesima secunda. Cap. Vnam sanctam. Idem dicit, omnes Reges & Monarchas esse Vasallos Romani Pontificis, atque ipsum posse ex tollere, quem velit, & deprimere, quem velit, De Maioritate C. solitæ. Idem dicit, se nullis legibus teneri, 25. Quæst. 2. C. ideò permittente. Idem dicit, se posse omnes homines iudicare, non autem debere à quoquam iudicari, 9. Quæst. 3. C. aliorum. Idem dicit, se reliquis omnibus in iurisdictione præesse, 24. Quæst. 1. C. est aliud. Idem dicit, se habere summam in Ecclesia & Rep. Iurisdictionem, De Iudicijs. C. Nouit, Idem dicit, se habere celestis et terrestis Imperij potestatem, De Maiorit. C. Vnam sanctam. Idem dicit, se non debere reprehendi, etiamsi innumerabiles populos deducat in gehennam, Distinct. 40. Cap. Si Papa. Vnde apparet Minorem falsam esse. Papa enim, dominatur Clero. Deinde non tantum Papa sedens in cathedra Petri est audiendus, sed etiam omnes Episcopi sedentes in Cathedra Petri, hoc est docentes doctrinam Petri sunt audiendi. Non igitur ex hoc loco maior auctoritas Papæ, quam singulis Episcopis conceditur. Præterea hoc argumentum est, fortissimum ad Bellartini nugas refutandas. Nam si illi, qui sedent in cathedra Petri, id est, qui docent doctrinam Petri, sunt audiendi; tum illi qui non sedent in Cathedra Petri, id est, qui non docent doctrinam Petri, non

Efficiuntur sunt

sunt audiendi. At Papa non docet doctrinam Petri. Ergo Papa non est audiendus. Maiorem non negabit Bellarminus. Minorem probavi antè. Denique si Papa propterea audiiri debet, quòd sedet in cathedra Petri, sequitur non ipsum iudicium Papæ, sed cathedram Petri, id est, doctrinam Petri, esse omnis Interpretationis regulam, atque hoc est verum. Nam quando Papæ interpretatio cum Petri doctrina congruit, est vera, quando ab ea discrepat, est falsa. At Petri doctrina est scripta in s. Scriptura, & præsertim in Euangelio Marci. Niceph. l. 2. cap. 45. *Rogarunt Marcum, ut conciones à Petro habitas in monumentum scriptis relatas ipsis relinqueret.* Euseb. l. 2. c. 15. *Exorant Marcum, ut ea, quæ ille, (loquitur de Petro) verbo prædicabat, ad perpetuam eorum commemorationem habendam, Scriptura iraderet, quò domi forisq; in huiusmodi verb. meditationib. permanerët.* & l. 3. c. 4. *Adrianus, quæ ex ore Petri fuerant prædicata, descripsit.* Irenæ. l. 3. c. 1. *Marcus interpres Petri tradidit nobis præscripta, quæ annuntiata erant.* Quòdcunq; igitur pugnat cum s. Script. & cū Euang. Marci, vel quòd ex ijs deduci non potest, hoc nō est verū, nōq; est secundū cathedrā Petri. Proinde quādo quis docet secundū s. Script. est audiend⁹, quādo verò nō docet secundū s. Scripturam, non est audiendus. Hinc manifestum est, solam & unicam s. crām Scripturam esse normā & regulam omnis Interpretationis. Si autem Maiorem intelligis de ijs, qui in eodem loco docent, in quo Petrus, vel qui cū in docendo sequuntur, tum Minor est incerta. Nondum enim satis liquet, an Petrus vnquam Romæ fuerit. Maior verò est manifestè falsa: Petrus enim disertè dicit, *post se venturos esse falsos doctores*, 2. Pet. 2.

v. 1. Quocunque igitur flectis hoc argumentum, nihil iuuas caussam tuam. Deinde si vis à Mosis cathedra ad Petri cathedram argumentari, potes eodem modo ad Pauli, Iohannis, Andreæ, Thomæ, & reliquorum Apostolorum cathedram argumentari. Nam ut non errant, qui in Petri cathedra sedent, id est, qui Petri doctrinam docent; ita etiam non errant, qui in Iohannis, Pauli, Iacobi, & reliquorum Apostolorum cathedra sedent, id est, qui Pauli, Iohannis, & reliquorum Apostolorum doctrinam docent, atque hoc verum est. Si verò perrexeris, & cathedram acceperis pro loco, atque in hunc modum argumentatus fueris, quicumque sedet in cathedra Petri, id est, in eodem loco sedet, ubi Petrus docuit, tum falsum asseueras. Multi enim Ierosolymæ, & Antiochiæ docuerunt falsum, etiam si Petrus ibi docuerit verum. Sequeret etiam eos non posse errare, qui sedet in cathedra Pauli, & Ioan. i. qui docet in ijs locis, ubi docuerunt Paulus & Ioan. &c. & multo magis sequeretur eos non errare, qui docet Ierosolymæ, Capernaû, & in Samaria; Nā in istis locis Christus docuit, & Apost. Sed hæc oīa sunt absurda, ergo absurda ex quibus hæc consequuntur. Siue igitur cathedrā acceperis pro doctrina, siue pro loco, nihil iuuabis caussam tuam; neque iuuabis eam, si cathedram acceperis pro officio. Nam si tibi in cathedra sedere, est idem, quod in eodem officio esse, aut idem officium administrare, tum argumentum est tale. Qui sedent in cathedra Petri, id est, qui administrant cum Petro vnum & idem officium, illi errare non possunt. Sed Papa sedet in cathedra Petri, id est, administrat cum Petro vnum & idem officium, Ergo Papa non potest

errare. Respondeo Minorem esse falsam. *Petrus n. est Apostolus, Papa nō est Apostolus, Petrus est immediatē à Deo vocatus, Papa non est immediatē à Deo vocatus, Petri officium est extraordinarium, Papæ non est extraordinarium, &c.* Vnde manifestum est, eos non habere vnum & idem officium. retorqueamus argumentum.

Qui non habet idem officium cum Petro, ille potest errare in doctrina, sed *Papa non habet idē officium quod Petrus, Ergo Papa potest errare in doctrina, & per consequens, eius iudicium non est omnis Interpretationis regula.*

Maiorem non negabis, Minorem probavi antē; quodcumque igitur Bellarmine, te vertis, hæres; nam dum à *Petri cathedra* disputas, petis principium. *Papæ enim Interpretationem esse authenticam, est inter nos controuersum.* Hoc probas, quia *Papa sedet in cathedra Petri*: At si cathedram accipis pro doctrina, tum est falsum, si pro officio, tum etiam est falsum. *Papa enim cum Petro neque idem officium habet, neque eandem doctrinam docet: si pro loco, tum est incertum, & nihil concludis.* Incertum, non enim satis liquet, an *Petrus Romæ fuerit, nec si Romæ tuit, quicquam sequitur.* Quia & *Simon magus Romæ docuit, atque hæc de tertio argumento.*

Quartus locus est *Iohā. 21. cap. v. 16. Simon Petre pascere oues meas.* Sensus est, *Petrum debere homines Christianos docere, Petri item successores debere homines Christianos docere.* Hæc ita esse fatemur. Quod autem dicit Bellarminus, *omnes Christianos à Petro docendos esse, hoc quidem de Petro*

verum est, sed non tantum. Nam & reliquorum Apostolorum idem officium erat. Argumentum tale, qui homines Christianos docere debent, illi non possunt errare in Scriptura explicanda. Sed Papa debet homines Christianos docere, Ergo Papa non potest errare in script. explicanda. Respondeo Maiorem esse falsam. Matth. n 24. v. 24. *Excitabuntur enim Pseudoprophetae. et Pseudochristi, qui edent signa & miracula, ita ut seducant si fieri possit, etiam electos.* Act. 20. v. 29. *Post meum discessum lupi graues non parcentes gregi inuasuri sunt in vos.* 2. Thessal. 2. *Nemo vos seducat, non enim prius veniet dies Christi, nisi prius venerit defectio, & detectus fuerit homo sceleratus, filius inquam ille perditionis, sese opponens & efferens aduersus quicquid dicitur Deus, aut numen, adeo ut in templo Dei sedeant, tanquam Deus, pra se ferens se esse Deum.* 1. Tim. 4. v. 1. *Spiritus autem disertè dicit, fore, ut posterioribus temporibus desiscant quidam à fide, Spiritibus deceptoribus attendentes, & doctrinis Daemoniorum.* 2. Pet. 2. v. 1. *Fuerunt autem etiam Pseudoprophetae in pop. ut etiam inter vos erunt falsi doctores, qui subintroducunt hereses exitiales.* Deinde experientia testatur hoc verum esse. Arrius enim Eutyches, Nestorius & alij debuērunt quidem Ecclesiam docere, idque ex officio: sed impleuerunt has suprà scriptas Prophetias, neque hoc tantum; sed fideles etiam doctores, ut Augustinus, Cyprianus, Basilus, Irenæus, Hieronymus, & alij in quibusdā aberrarunt. Vnde apparet, Maiorem esse falsam, Nam non quicumque debet docere, rectè docet. Atque hæc de Maiore; nunc ad Minorem; Illa non tantum de Petro, sed de omnibus Apostolis, atque adeo

de omnibus ministris legitimè vocatis vera est. Illorum enim omnium officium est, pascere gregem Christi, Act. cap. 20. v. 28. *Attendite igitur vos ipsos* (alloquitur presbyteros) *& totum gregem, in quo vos Spiritus sanctus constituit Episcopos, ad pascendam Ecclesiam.* 1. Pet. 5. v. 1. *Presbyteros, qui inter vos sunt, precor, pascite gregem, qui panes vos est.* 1. Cor. 9. v. 7. *Quis pascit gregem, & de lacte gregis non edit.* Hinc apparet, pascere non solius Petri, sed omnium ministrorum legitimè vocatorum officium esse. Quam ob causam, si hoc argumentum valet, possum eodem modo colligere.

Qui habet officium docendi, ille non potest errare in doctrina, sed omnes ministri legitimè vocati habent officium docendi. Ergo nulli ministri possunt errare in doctrina.

Vides Bellarmine, quorsum te adigant tua argumenta. At dices, Petrum & eius successores pascere *omnes oves Christi*, reliquos autem ministros tantum pascere *particulares greges*. Hoc quidem de Petro verum est, de eius successoribus falsum est. Deinde non de solo Petro verum est, sed de omnibus Apostolis. Singuli enim Apostoli omnium Ecclesiarum curam gesserunt, 2. Corinth. 11. v. 28. *Urget agmen illud in me quotidie consurgens, id est, sollicitudo de omnibus Ecclesiis.* Act. 22. v. 15. *Eris ei testis apud omnes homines.* Matth. 28. cap. v. 19. *Docete omnes gentes.* Act. 1. v. 8. *Eritis mihi testes & in Ierusalem, totaq; Iudea, Samariaq;, usq; ad ultimas terras.* Vnde apparet omnium Apostolorum officium esse, quolibet homines, nullo certo loco, & tempore docere; & omnium Ecclesiarum curam gerere. At quod de Apostolis verè

dic

dici potest, hoc de eorum successoribus non æquè verè dicitur. Nam si Petri successores idèò omnium Ecclesiarum curam gerere debent, quòd Petrus omnium Ecclesiarum curam gessit: tum etiam Pauli, Matthæi, Iohannis, Iudæ & reliquorum Apostolorum successores omnium Ecclesiarum curam gerere debent; nam & illi omnium Ecclesiarum curam gesserunt. Nam si sequitur, qui omnium Ecclesiarum curam gerunt, illorù etià & successores omniù Ecclesiarum curam gerunt. Sed Petrus omnium Ecclesiarum curam gessit, Ergo eius successores omnium Ecclesiarum curam gerere debent. Tum eodem modo sequitur, Qui omnium Ecclesiarum curam gerunt, eorum etiam successores vniuersarum Ecclesiarum curam gerere debent. Sed omnes & singuli Apostoli omnium Ecclesiarum curam gesserunt, Ergo omnium & singulorum Apostolorum successores omnium Ecclesiarum curam gerere debent. At hoc est falsum etiam Bellarmino teste. Ergo falsum, ex quo hoc consequitur. Et si maximè verum esset, tamen non iuuaret causam Bellarmini. Papa enim non est Petri successor. Sic igitur concludo,

*Qui non est Petri successor, iste potest in doctrina explicanda errare. Sed Papa non est Petri successor. Potest igitur in scriptura explicanda errare.*

Maiores est vera ex hypothesi, nam si solus Petri successor in doctrina errare nequit, id què propter ea quia Petri successor est, tum ille qui Petri successor non est, errare utique potest. Minor est manifesta. Petri enim officium erat omnes homines do-



cere, Papa neminem docet. Petri officium erat o-  
ues Christi pascere, Papa eas lacerat & dissipat. De-  
inde Petri officium erat extraordinarium, Papæ offi-  
cium non est extraordinarium. Petrus fuit imme-  
diatè à Deo vocatus, Papa non est immediatè à Deo  
vocatus, eligitur enim ab hominibus, nempe à Car-  
dinalibus. Petrus fuit Apostolus, Papa non est Apo-  
stolus. Præterea si Papa est Petri successor, osten-  
dat tabulas successionis, doceat in qua re succeffe-  
rit, nam in doctrina non successit, quam enim do-  
ctrinam Petrus docuit, eam Papa persequitur, neq;  
in officio successit, Petri enim officium erat prædi-  
care, baptizare, Papa non docet, neque prædicat, ne-  
que sacramenta administrat. Si Bellarminus putat  
Papam idèò esse Petri successorem, quòd Petrus Ro-  
mæ fuerit, & Papa in eadem vrbe habitet, tum non  
ignorathoc valdè controuersum esse. Docti enim  
non immeritò dubitant, vtrum Petrus vnquam Ro-  
mæ fuerit. Eum verò fuisse istius vrbis Episcopum,  
pugnabat cum Apostoli officio, erat enim omnium  
hominum doctor. At qui omnes homines docet,  
ille non est vnus vrbis doctor tantum. Siue igitur  
Petrus Romæ fuerit, siue non fuerit, manifestum est  
eum non fuisse Romæ Episcopum, ac proinde Papá  
non fuisse Petri successorem. Nemo dubitat Com-  
modum, Diocletianum, Neronem, & Caligulam  
fuisse Romæ: illorum autem industriam & beneuo-  
lentiam, in pascendis ouibus Christi imitatur, imò  
supat Papa Rō. Viderit igit Bellar. nūmne horū suc-  
cessor sit Papa Rom. Sanè quod ad externam vitā, &  
mores attinet, nulla inter Papá, & eos differētia, inter  
Papam

Papam verò & Petrum nulla similitudo. Petri n. officiũ pascẽdo definiebatur. Papa pr̃sus neminẽ pascit. Pascere n. est docere. Sed Papa neminẽ docet, Ergo neminẽ pascit, tantũ abest, vt oẽs pascat. Nã qui prorsus non pascit, ille non pascit omnes. Bellar. concessa Minore, dicit Papam pr̃scribere alijs quid docere debeant, sed hoc est ridiculum. Pascere enim non est alijs pr̃scribere, quomodo debeant pascere. Deinde Petrus non tantũ pr̃scripsit alijs, quomodo debeant pascere, sed ipse etiam pavit. Pr̃terea pr̃scribere alijs, quid debeant docere, non est Papæ Romani. Si Bellarminus regerit, hoc per *pascere* significari, tum argumentor in hunc modum. Quicumque debet pascere oues Christi, illius est omnibus ministris pr̃scribere, quomodo debeant pascere. Sed omnium ministrorum est pascere oues Christi, Ergo omnium & singulorum ministrorum officiũ est, reliquis omnibus Episcopis pr̃scribere, quomodo debeant pascere. Sed hoc est absurdum. Ergo & absurdũ ex quo hoc consequitur. Pr̃terea omnibus Episcopis pr̃scribere quid debeant docere, est solius Christi, Matth. 28. v. 9. *Docete eos ser- uare, quaecunque ego pr̃cepi vobis.* Dum igitur Papa hoc sibi arrogat, quod solius Christi est, ostendit se esse eum, *qui se extollit supra omne id, quod Deus est, 2. Thessal. 2.* Et vt finem faciam, abijciat Papa istant tyrannidẽ, subeat ipse munus docendi, doceat doctrinam Petri, & habebimus eum pro Petri successore, si verò à docendo abstinere, & Petri doctrinam oppugnare perrexerit, non possumus eum pro Petri successore, imò ne quidem pro legitimo Doctore

agnoscere, tantum abest, ut eius interpretationem habeamus pro authentica.

Quintus locus est, Luc. 22. v. 23. *Rogavi pro te, ne deficeret fides tua.* Ergo inquit Bellarminus, Papa ex Cathedra docens non potest errare.

Pro quibus Christus orat, ut illorum fides non deficiat, illi non possunt errare in scriptura explicanda. Sed Petrus est ille, pro quo oravit Christus, ne eius fides deficeret, Ergo Papa non potest errare in scriptura explicanda.

Respondeo esse aliud in conclusione, quam in premissis. Tantum enim sequitur, Petrum non posse errare in scriptura interpretanda. Deinde Maior falsa est. Nam si omnes isti non possent errare in script. explicanda, pro quibus Christus orat, ne eorum fides deficiat, tum nulli fideles possunt errare in script. explicanda. Christus enim orat pro omnibus fidelibus, ne illorum fides deficiat. Ioh. 17. v. 11. *Pater sancte serua eos per nomen tuum, quos dedisti mihi.* Et v. 20. *non tantum autem pro istis rogo, sed & pro ijs, qui per sermonem eorum credituri sunt in me.* Romanorum 8. versu 34. *Christus interpellat pro nobis,* Hebræo. 7. versu 25. *Christus semper vivit, ut interpellat pro nobis.* 1. Iohannis 2. v. 1. *Quod si quis etiam peccaverit, advocatum apud Patrem habemus Iesum Christum istum iustum.* Hinc manifestum est, Iesum Christum orare pro omnibus fidelibus. Sic igitur argumentor,

Pro quibus Christus orat, illi non possunt errare in Scriptura explicanda. Sed omnes fideles sunt isti, pro quibus Christus orat, Ergo nulli fideles possunt errare in Scriptura explicanda.

At

At hæc conclusio est falsa, Ergo aliqua ex præmissis est falsa. Falsum n. ex vero colligi non potest. Non autem Minor, extructa est enim ex manifestis Scripturæ testimonijs. Ergo Maior, nam non omnes pro quibus Christus orat, nō possunt errare in Scriptura explicanda. Causa quæ Papistas decipit, fortè est, qd fidem hoc loco accipiunt pro doctrina, & deficere in fide, pro errare in doctrina, neque negari potest, quòd fides ita aliquando accipiat. Vt 1. Tim. 4. v. 1. *Extremis temporibus deficient aliqui à fide, vt sit Argumentum tale,*

Pro quibus Christus orat, vt non errēt in doctrina, illi non possunt errare in Scriptura explicanda. At Petrus est ille, pro quo Christus orat, vt non erret in doctrina, Ergo Petrus non potest errare in scriptura explicanda.

Sed iam Minor non est vera. Aut enim Christus non orauit pro Petro, vt in doctrina non erraret, aut Christus non est assecutus, quod petiuit, Petrus n. post hanc orationem in doctrina errauit. Argumentum tale,

Si Christus orauit pro Petro ne in doctrina erraret, tum Christus nō impetrauit quod petiuit, sed hoc est absurdum. Ergo & illud.

Consequentia est manifesta. Petrus enim post orationem hanc à Christo factam *abnegauit & abiurauit Christum.* Matthæi 26. v. 74. *Et voluit Christi passionem armis impedire,* Matthæi 26. versu 31. *Putauit etiam regnum Christi esse mundanum,* Act. 1. v. 6. Sed abiurare Christum, & existimare regnum Christi esse mundanum, est errare in doctrina. Ergo

fides

fides pro doctrina accipi h. l. non potest. Accipitur igitur in nativa significatione, nempe pro fide iustificante, & defectus fidei accipitur pro finali defectu, atque ita explicat Tertullianus in lib. de fuga in persequutione, cap. 2. Sed tum nihil sequitur, nam vnū & eundem hominem non posse finaliter deficere, & posse aliquando errare, simul vera esse possunt. Testes omnes Apostoli, omnes Patres, imò omnes Christiani. Cùm igitur aliquis possit in doctrina errare, & tamen non finaliter deficere, sequitur Maiorem primi Syllogismi non esse veram. Deinde totum argumentum nihil facit ad rem. Nam etiamsi concederemus Petrū nunquam potuisse in doctrina errare, inde tamen non sequeretur Papam non posse errare in doctrina. Papa enim non est Petrus, neque habet vllam cum Petro similitudinem. Quòd autem dicis, Papam esse Petri successorem, ridiculum est. Petis enim illud, quod est in principio. Argumentum tale,

Qui nō potest errare in doctrina, eius etiam successores non possunt errare in doctrina. Sed Petrus non potest errare in doctrina, Ergo Petri successor non potest errare in doctrina. Deinde,

Petri successor non potest errare in doctrina, Papa est Petri successor, Ergo Papa non potest errare in doctrina.

Si Maior est vera, tum omnes reliquorum Apostolorum successores nō possunt errare in doctrina, æquè enim de reliquis Apostolis, atque de Petro dicitur, quòd non possint errare in doctrina, sed hoc

non

non vult Bellarminus, & ob eam causam conclusio vera esse non potest. Atque hoc sufficit ad ostendendam falsitatem huius argumenti. Si vero conclusio primi Syllogismi est falsa, tum & propositio secundi Syllogismi est falsa. Hæc enim ex illa extruitur. Deinde & Minor proximi Syllogismi est falsa. Papa enim non est Petri successor, quemadmodum suo loco ostendemus, potest igitur in doctrina errare. Prætereà multorum Paparum fides defecit. Zephyrinus enim fuit *Montanista*. Tertull. contra Praxeam Cap. 1. *Nam idem tunc, inquit, Episcopum Romanum agnoscentem iam prophetias Montani Prisca Maximilla, &c.* Hic Rhenanus ad marginem notat, *Papa montanizat.* Marcellinus *sacrificauit Idolis*. Damasus in vita Marcellini. Vide plura in 1. Tom. Concil. loco de condemnatione Papæ Marcellini. Liberius fuit *Arrianus*. Damasus in vita Liberij, *Ingressus Liberius, inquit, in urbem, consensit Constantino heretico.* Athanas. in Epistola ad solitar. vitam agent. *Liberius deinde, inquit, post exactum in exilio biennium inflexus est, minisq; mortis ad subscriptionem adductus est.* Hieronymus in Catal. C. fortunatiano, *Liberium, inquit, Romane urbis Episcopum pro fide ad exilium pergentem primus sollicitauit, ac fregit, & ad subscriptionem hæresios compulsi,* similiter narrat Liberatus in Breuiario Cap. 22. *Felix fuit Arrianus.* Hieronymus in Catal. C. Achatius, ut in Liberij locum inquit, Romæ *Felicem & Arrianum Episcopum constitueret.* Anastasius à Deo reprobatus nutu diuino percussus est, Distinct. 19. C. Anastasius, glossator istius rei causam dicit esse, quod *communicanerat Achatio in maleficio.* Achatius propter  
*hæresin*

*heresim damnatus est. 24. Quæst. 1. C. Achatius. Honorius fuit. Monet blita. Canus lib. 6. Cap. 8. Et apud eum Psellus in Carmine de septem Synodis, Tharalys ad summos sacerdotes Antiochiæ. Eius epistola dānatur in 6. Synodo, Act. 13. Eadem 6. Synodus, Act. 18. Anathemati, inquit, subiicimus Theodosiū & Petrū, qui Constantinopolios præsulatū tenuerūt, insup & Cyrum, qui Alexandrinorum sacerdotium gessit, & cum eis Honoriū, qui fuit Romæ præsul, utpote qui eos in his sequutus est. Leo in Epist. ad Constantiū, quæ extat in Act. 18. Sextæ Synodi. Anathematizamus, inquit, et execramur omnes hereses, omnesq; earum auctores & fautores, qui aduersus Apostolicā, & orthodoxam fidē Diabolicis deceptis fallacijs falsitatis errores in Ecclesiam introducere conati sunt, id est Arrium, Sabelliū, & c. pariterq; anathematizamus noui erroris inuentores, ut Cyrum, Theodorum, & c. nec non & Honoriū, qui hanc Apostolicā Ecclesiam, & nos non Apostolicæ doctrine traditione lustrauit: sed profana prodicione immaculatā fidē subuertere conatus est. Leo fuit Arrianus. Vincentius lib. 15. cap. 23. Huiusmodi exempla possunt multa adduci, sed hæc sufficiant, ex ijs sic argumentor.*

*Pro quibus Christus orat, illorum fides non potest deficere, sed multorum Paparum fides defecit, Ergo multi Papæ non sunt illi, pro quibus Christus orauit.*

*Maior est manifesta. Quicquid enim Christus petit à Patre suo, illud impetrat. Minor patet ex supra annotatis allegatis. Porro,*

*Pro quibus Christus non orat, illi possunt errare in Scriptura explicanda. Sed multi Papæ sunt illi,*  
pro



pro quibus Christus non orat. Ergo multi Papæ possunt errare in Scriptura explicanda.

Maiores est vera. Nam si sola Christi oratio est causa, quare quis non errat, tum sequitur eum errare, pro quo Christus non orat. Minor sequitur ex præcedenti argumento. Cum igitur multi Papæ non sint isti, pro quibus Christus orauit, & ob eam causam à fide defecerint, sequitur eorum interpretationem veram non esse. Plura de hoc argum. dicemus, cum de Papa differemus. Præterea plerique Papæ nunc nunquam docent, neque interpretantur Scripturam. Lægo nam tempore nullus Papa fuit, qui vel scribendo, vel concionando, vel prælegendo in Scholis vel Ecclesijs docuerit. Dicere igitur eius, qui nihil interpretatur, Interpretationem veram esse, nihil aliud est, quam cum Deo & hominibus ludere. Quod autem dicitis, Papæ interpretationem, quam ex Cathedra docet, veram esse, ostenditis non omnem Papæ interpretationem veram esse, sed illam tantum, quæ fit ex Cathedra. Sed Cathedra aliquando significat sedem, aliquando doctrinam. Si igitur intelligis sedem, falsum est, Simon enim Magus docuit Romæ, & antequam ostendimus multos Episcopos Rom. fuisse hæreticos. Si de doctrina dicis, verum dicis. Fatemur nam Papam non errare, quando docet doctrinam Petri, sed hinc sequitur non Papæ iudicium, sed doctrinam Petri esse omnis interpretationis regulam. Propter quod nam interpretatio est vera, illud est regula & causa veritatis in interpretatione. Sed Cathedra Petri id est doctrina Petri est illud, propter quod omnis interpretatio est vera. Nam quando interpretatio cum hac cathedra congruit, tum est vera, quando discrepat, est falsa. Sola igitur & unica  
Petri

Petri doctrina est regula & norma omnis interpretationis. Hoc concedimus Bellarmine, neque quifquam ex nobis id vnquam negauit. At Petri doctrina est libris Veteris & Noui Testamēti comprehensa. Ergo illa doctrina quæ in Prophetarum & Apostolorum libris scripta est, est omnis interpretationis regula. Sed Papa Cathedram Petri, id est, doctrinam Apostolicam sepè oppugnat, quemadmodū suo loco ostendemus. Vnde manifestum est eius iudicium, non magis quàm Caiphæ, esse interpretationis regulam; Quemadmodum enim Caiphas non errat, cum docet ex Cathedra Moysis, sed errat cum Christum condemnat; ita Papæ non errat cum docet ex Cathedra Petri, id est, cum docet doctrinam Petri, sed errat, cum Cathedram Petri, id est, doctrinam Petri oppugnat, eamq; flammis & incendijs persequitur. Et ob eam causam quando Papæ interpretatio cum sacra Scriptura congruit, tum est bona, cum verò cum ea non congruit, tum est mala. Non igitur Papæ interpretatio, sed doctrina Prophetica & Apostolica sacris literis comprehensa est omnis interpretationis regula.

Sextus locus est, Act. 15. cap. v. 28. *Visum est Spiritui sancto & nobis.*

Quicquid videtur Spiritui sancto hoc est verum, sed quicquid videtur Spiritui sancto, hoc videtur Papæ Romano. Ergo Papæ iudicium est omnis interpretationis regula.

Répondeo Minorem esse falsam: Spiritui enim sancto visum est solòs Propheticos & Apostolicos libros esse Canónicos; Ephes. 2. v. 20. *Superstructi*  
super

*super fundamentum Prophetarum & Apostolorum.* At Papæ Nicolao visum est, non solum libros Prophetarum & Apostolorum, sed etiam *Decretales Epistolas* esse recipiendas. Cap. Si Romanorum. Distinct. 19. Vel quod idem est, inter *Canonicas Scripturas* *Decretales Epistolas* recipiendas esse. C. Canonicos. Distinct. ead. Spiritui sancto visum est, causam Canonice auctoritatis esse diuinam inspirationem, 1. Timoth. 3. v. 16. *Tota Scriptura est diuinitus inspirata.* At Papæ Romano visum est, eius causam esse *Papæ Innocentij sententiam*. C. Si Romanorum. Distinct. 19. *Vetus Nouumq;*, inquit, *Testamentum* recipienda sunt, quod de his recipiendis *Sancti Papæ Innocentij* esse prolata videtur sententia. Spiritui sancto visum est, Apostolos verè accepisse Spiritum sanctum, Act. 2. 2. 4. *Repleti autem sunt omnes Spiritu sancto.* At Papæ Rom. visum est, non Apostolos, sed Montanum accepisse Spiritum sanctum. Tertullianus contra Praxeam. cap. 1. *Nam idem tunc*, inquit, *Episcopum Romanum* agnoscentē iam prophetias *Montani, Priscæ, &c.* Spiritui Sancto visum est, soli Deo sacrificandum esse, Iud. 13. v. 16. *Si verò feceris holocaustum, Iehoua offer illud.* At Papæ Romano visum est, non soli Iehouæ, sed etiam *Idolis* sacrificandum esse. Damasus in vita Marcellini. Spiritui sancto visum est, cum nemine in maleficio communicandū esse. 1. Pet. 1. *Sancti estote, quoniam ego sanctus sum.* At Papæ Romano visum est, cum heretico *Achatio* in maleficio communicandum. Distinct. 19. C. Anastasius, & ibi glossator. Huiusmodi exemplorum pleni sunt omnes libri decretorum, decretalium, & conciliorum. Manifestum igitur non quicquid visum est Sp.

sancto, id etiam visum est Papæ Rō. Præterea si idē papæ iudicium est regula omnis interpretationis, quia visum est Spiritui sancto. Tum sequitur non iudicium ipsum papæ, sed *iudicium Spiritus sancti* esse regulam omnis interpretationis, & ob eam causam quatenus papæ iudicium cum Sp. sancti iudicio congruit, eatenus est sequendū, quatenus verò non cōgruit, non est sequendum. Hoc verò iudicium Spiritus sancti est Propheticis & Apostolicis libris cōprehensum, 2. Tim. 3. v. 15. *Tota scriptura diuinitus est inspirata, & utilis ad doctrinam, ad redargutionem, ad correctionem, ad institutionem quæ est in iustitia, ut perfectus sit homo Dei ad omne opus bonum perfecte instructus.* Ad Galatās, Cap. 1. v. 9. *Si quis vobis euangelizauerit præter id, quod accepistis, anathema esto.* Deut. 4. cap. v. 2. *non addetis ad verbum quod Ego præcipio vobis, neq; diminuetis quicquam ex eo.* Leuit. 10. v. 1. *Nadab & Abihu obtulerunt coram Iehouā. ignem alienum, quod non præceperat eis: tum egressus est ignis a facie Iehouæ, & consumpsit eos coram Iehoua.* Ergo quicquid cum sacris literis cōgruit, id est recipiendum, & congruentia cum sacris literis est omnis interpretationis regula. Quod autē dicit Petrum præsedisse in Concilio Hierosolymitano, falsum est, ratio item, quæ hoc pbat, falsa est. Dicitur, *Petrū primum loquutum esse in eo Concilio*, inde infert, eum præsedisse. Ergo si illud falsum esse ostendero, manifestum erit & hoc falsum esse. Sed Actorum 15. v. 7. scriptum est: *Cum autem multa disceptatio esset, surgens Petrus dixit eis.* Unde apparet Petrum non esse primum in isto Concilio loquutum. Nisi igitur alia argumenta habeat Bellarminus, quibus

Petri

Petri præfidentiam probet, manifestū erit, Petrū in isto Cōcilio non præfedisſe, Et licet non conſtet quis præfederit, tamen veriliſimile eſt, Iacobū præfedisſe, nam cū ille dixiſſet, oēs iuerunt in eius ſententiā, vt ex v. 13. & 22. colligi poteſt. Sed etiā ſi Petrus præfedisſet, tamen hoc nihil faceret ad rem. Papa enim non eſt Petrus, neque cum Petro quicquam habet commune, vt ſuo loco oſtendemus. Prætereā ſi Petri ſuffragium ideò verum erat, quia à Petro dicebat, tū reliqui Apoſtoli malè fecerunt, quòd non ſimulatq; dixerat, iuerint in eius ſententiā. Equidē Sp. ſanctū ita eſſe alligatum Petro, vt quicquid viſum erat Petro, id etiā viſum eſſet Sp. ſancto, ignotum fuit Apoſtoliſ. Deniq; non quia Petrus hoc aut illud dixit, ideò verū eſt, alioqui verum eſſet, quod dixit, Matth. 26. v. 72. *non noui hominem*, & v. 74. *tunc cœpit ſeipſum deuouere, & iurare, dicens, non noui hominem*. Sed quia Spiritus ſanctus per Petrum dixit, ideò verum eſt. Planè eodem modo, non quia Papa Romanus dicit, ideò verum eſt, ſed quia Sp. ſanctus dicit, ideò verū eſt. Spiritus autem Sanctus ſuam de religione ſententiā tradidit in verbo ſcripto, & iam per nouas reuelationes non docet Eccleſiam. Ergo quod cum verbo ſcripto congruit, hoc verum eſt, quod non congruit, hoc falſum eſt. Hoc adeò verum eſt, vt ſi quid ab Epiſcopis contra Dei verbum aſſeritur, id nullam auctoritatem obtineat. Auguſt. de Vnitae Eccleſiæ, capite 10. *Nec Catholicis, inquit, Epiſcopis conſentiendum eſt, ſicuti (lego ſicubi) forte fallantur, vt contra Canonicas Dei ſcripturas aliquid ſentiant. Imò ſi quid à toto concilio contra Dei verbum aſſeritur*, Hieron.

ad Galatas. *Spiritus sancti*, inquit, *doctrina est, quæ Canoniciis libris prodita est, contra quem si quid statuant concilia, nefas duco.* Cum igitur non idem videatur *Papæ & Spiritui sancto*; neque *Papa cum Petro* quicquam habeat simile, & pleraque conciliorum *papalium decreta* pugnent cum decretis *Spiritus sancti*, frustra nobis 15. caput *Act.* obijcitur.

Septimus locus est ad Galatas 2. v. 2. *Ascendiautem ex revelatione, & exposuisti eis Evangelium, quod prædico inter gentes, sed privatim cum eis, qui sunt in pretio, ne quomodo frustracurrerem, aut cucurrissem.*

Quod fuit *Petri officium*, hoc etiam fuit officium *Papæ Romani*. Sed *Petri officium* fuit de doctrina fidei iudicare, Ergo *Papa Romanus* non potest errare in scriptura interpretanda.

Respondeo Maiorem esse falsam. *Petrus* enim fuit *Apostolus*, *Papa* non est *Apostolus*. *Petrus* fuit immediatè à Deo vocatus, *Papa* non est immediatè à Deo vocatus. Eligitur enim à Cardinalibus. Porro *Petrus* prædicauit, & sacramenta administravit, at à multis annis nullus *Papa* prædicauit, neq; sacramenta administravit. Præterea *Petrus ambulavit super aquas*, Matthæi 14. v. 9. *Paralyticum verbo sanavit.* *Act.* 9. v. 34. *Thabitæ ex mortuis excitavit.* *Act.* 9. v. 40. *Umbræ infirmos sanavit.* *Act.* 5. v. 15. Si igitur quicquid fecit *Petrus*, facere debet *Papa*, faciat hæc *Papa Romanus*. Ex his apparet Maiorem esse falsam. Ad Minorem dico, posse eam dupliciter intelligi, nempe vel *Pauli doctrinam* propter *Petri approbationem* esse veram, neque futuram fuisse veram, nisi *Petrus* eam approbasset, vel *Petrum dedisse Paulo*  
testimo:

testimonium consensus, ut falsi fratres confutarentur, & gentes facilius crederent. Si igitur Minorem accipis in primo sensu, tum est falsa. Nam ut inquit ipse Paulus, Gal. 2, 6. *Ab ijs autem, qui existimantur esse aliquid, qualescunque fuerint, nihil mihi discrepat. Nam qui sunt in pretio, nihil mecum prater ea contulerunt, imò è contrario, cum vidissent mihi concreditum fuisse Evangelium preputij: sicut Petro Circumcisionis; dexteras dederunt societatis.* Planè eodem modo Chrysostomus. *Ipsi, inquit, non erat opus discere, an in vanum cucurrisset, sed ut ijs, qui ipsum accusabant, ad plenum persuaderetur.* Et paulò post. *Non enim, inquit, cupiebat aliquid discere, corrigerè e suorum dogmatum, sed occasione adimere cupientibus alios decipere.* Et paulò post. *Cum igitur, inquit, offenderentur, palam quidè accedere, suamq; predicationem aperire non sustinebat, sed seorsum contulis cum his, qui erant alicuius opinionis, presentibus Barnaba & Tito, ut hi apud eos, qui eum criminabantur, essent idonei testes, ne Apostolis quidem visum, Pauli predicationem in gentibus peractam pugnare cum Apostolorum sententia.* Et paulò post. *Postquam cognouerant, inquit, que predicarem, nihil adiecerunt, nihil inde correxerunt, idq; cum scirent, me ea gratia venisse Hierosolymam, ut cum ipsis communicarem, ac Titum incircumcisum habebam mecum, itaque nec illi mihi quicquam dixerunt ultra ea, que prius sciueram, nec illum circumcidi.* & paulò post, *in tantum, inquit, absuerunt ab incusando, ut comprobarent etiam.* & paulò post, *Iamq; se ceteris, inquit, honore parem ostendit, nec se reliquis illis, sed ipsi summo cõparat, declarans quòd unusquisque parem sit sortitus dignitatem.* Et paulò post, *ò prudentiam, inquit, eximiam,*



*o concordia demonstrationem irrefutabilem, ostendit & illorum doctrinam ipsius, & ipsius illorum esse, eadem enim utrisque placebant. Vnde apparet esse fallaciam à non causa vt causa. Non enim vt Paulus se vel suam doctrinam confirmaret, sed vt falsos fratres, qui dicebant Paulum non idem docere, quod reliqui Apostoli docebant, refelleret, & infirmos confirmaret, profectus est Hierosolymam. Deinde & res ipsa hoc docet, 1. Corinth. 9. v. 26. Ego, inquit, ita curo, vt non in incertum. Respectu igitur sui, & doctrinæ suæ non currebat, vt in incertum, & ob eam causam non opus habebat confirmatione, respectu autē falsorum fratrum & infirmorum, vtiliter ei Apostoli testimonium consensus in doctrina præbuerunt, atque hoc modo Augustinus & Hieronymus explicari debent. Nam si quod sentit Bellarminus, intelligerent Ecclesiam Paulo simpliciter non fuisse credituram, nisi eius Euangelium fuisset à Petro confirmatum: apertè ab ipso Paulo & Luca confutarètur, qui hanc, de qua quæstio est, confirmationem, interiecto 14. annorum interuallo, Ierosolymæ demū contigisse scribunt. Atqui constat Paulum ante illud tempus lucrificasse Domino infinitas Ecclesias. Deinde etsi verum esset (quod tamen falsum esse ostendi) eas Ecclesias non fuisse Paulo credituras, nisi doctrinam eius Petrus approbaret; tamen non inde efficeretur eas ita facere debuisse. Constat enim Pauli Euangelium, non ab homine neque per hominem; sed à Iesu Christo patefactum esse. Constat item Paulum ab ipso Deo *quis* non minus, quàm ipsum Petrum vocatum esse; ita vt meritò suum*

Apostolatum non modò Petri Apostolatui comparet, sed nonnullis etiam nominibus anteponat, & se neget cum carne & sanguine, & ne quidem cum primarijs Apostolis suum Euangelium contulisse, neque Ierosolymam ad eos abiisse visendos, sed continuò profectum esse in Arabiam, atq; ibi impositam muneris functionem diligèter obijisse. Falsum igitur est quod Bellarm. ex Hieron. & Augusti. colligere conatur, ecclesias nō debuisse Paulo credere, nisi eius doctrina priùs à Petro cōfirmata esset. Deinde falsum est, quod Bellar. hinc infert. Petri & eius successorū munus esse, de doctrinis iudiciū ferre, & ppter illud iudiciū doctrinam esse veram. Hoc Pauli & oīm Apostolorū, q̃ Petri confirmationem ignorarūt, exemplis liquet. Si verò minor in hunc modum formatur, sed Petrus præbuit Pauli doctrinæ, quæ p se vera erat, testimonium consensus, tum illa quidem est vera, sed nihil aliud sequitur, q̃ papam debere doctrinæ per se veræ testimonium consensus præbere. Dum igitur colligis Bellarmine papæ iudicium esse omnis interpretationis regulam, scias te aliud concludere, quàm fuit in præmissis. Quæstio enim est, an papæ iudicium sit omnis interpretationis regula? Sed huius neque subiectum, neque prædicatū est in antecedente. Cùm igitur Maior sit manifestè falsa, & Minor non simpliciter vera, atque aliud colligatur, quàm fuit in antecedente, videris ipse Bellarmine, quantum sit tuo argumento tribuendum. Deinde non solus Petrus, sed & Iohannes & Iacobus porrexerunt Paulo dexteras societatis. Si igitur propterea Petri est de doctrina iudicare, est idē

& Iohannis & Iacobi, & si propterea est Petri successorum de doctrina iudicare; est idem & Iacobi, & Ioannis successorum de doctrina iudicare; & ob eam causam summum illud iudicium non ad solius Petri, sed etiam ad Iohannis & ad Iacobi successores pertinet. At hoc non vult Bellarminus; Ergo hoc argumentum non est idoneum ad illud probandum, quod Bellarminus intendit. Præterea totum argumentum nihil facit ad rem, nam ita colligi debet.

Cuius est de doctrina iudicare, ille non potest errare in scriptura explicanda. Sed Papæ est de doctrina iudicare. Ergo Papa non potest errare in doctrina explicanda.

Sed hæc Maior est falsa. Longè enim aliud est, officium aliquod administrare, & illud perfectè administrare. Caiphæ n. erat de doctrina iudicare; sed nō rectè iudicabat, cū Christi doctrinā vt blasphemā condemnaret. Cypriani erat de doctrina iudicare; sed non rectè iudicabat, cū Anabaptismum constitueret. Irenæi & Lactantij erat de doctrina iudicare; sed non rectè iudicabant, cū Chiliastarum errores constituerent. Victoris Romani erat de doctrina iudicare; sed non rectè iudicabat, cū Orientales propter *observationem moris antiquitus traditi* excommunicaret, Euseb. lib. 5. c. 24. Et ibi Irenæus. Anastasij Romani fuit de doctrina iudicare; sed non rectè iudicabat, cū hæresin foueret, Distinct. 19. C. Anastasius. Similia exempla passim occurrunt. Non igitur cuiuscunque est de doctrina iudicare, ille rectè iudicat, ad Minorem dico, non solius

folius Papæ, sed omnium Episcoporum esse de doctrina iudicare; imò Episcoporum iudicia sæpè sunt papali iudicio præferenda. Distinct. 20. C. Decretales. *Unde nonnullorum, inquit, pontificum constitutis, Augustini, Hieronymi, & aliorum tractatorum dicta videntur esse præferenda.* Si igitur quicumque debent de doctrina iudicare, non possunt errare, tum nulli Episcopi possunt errare. Sed hoc est absurdum etiam Bellarmino teste, Ergo absurdum ex quo hoc consequitur. Deinde excutiat Bellarminus Commentarios Hieronymi, Chrysostomi, Ambrosij, Theophylacti, Oecumenij, & aliorum in Epistola ad Galatas, & videbit neminem ex his omnibus hunc locum ita interpretari, ut inde colligat Papam non posse errare in interpretando. Denique dicere, Petrus non potuit errare in interpretando, Ergo & Papa non potuit errare in interpretando, perinde est, ac si dicas, Moses non potuit errare in iudicando, Ergo & Caiphas non potest errare in iudicando. Non enim maior necessitas est, inter Petrum & Papam, quàm inter Moysen & Caipham. Cùm igitur Maior falsa, & Minor non simpliciter vera sit, sequitur conclusionem veram non esse.

Octauus locus ex 1. Corinth. 12. v. 8. *Alij datur per Spiritum sermo sapientia, alij sermo scientia, alij Prophetia, alij interpretatio.* Hinc infert Papam non posse errare in scriptura explicanda, q. d.

Quod non datur omnibus, hoc datur Papæ Romano. Sed donū interpretandi nō datur omnib. Ergo Papa Rom. nō potest errare in script. interpretanda.

Rogandus esset Bellarminus, vt nouum organum conscriberet. Ná Aristotelis logica apud eum iā pridem euiluit. Equidē Aristotelis organū, & eius Expositores Arabas, Græcos & Latinos legi & relegi, at hæc Iesuitica mysteria in argumētis formandis, apud illos nondū repperi. Sed extra iocum. Maior est falsa. Neque existimo Bellarmine, te adeò perdidisse oēm pudorem, vt audeas eam defendere. Sequeretur enim omnium & singulorū Christianorū dona esse in vno papa coaceruata. Et hæc quidē est interna vestra sententia. Dicitis enim *omniū fideiū salutē post Deum pendere à Papa*. Distinct. 40. C. Si papa. Et *omnem religionem debere à sede Apostolica, hoc est, à papa normam sumere*. Distinct. 12. C. Præceptis, neq; licere cuiquā de iudicio summi Pontificis disputare. 17. Quæst. 4. C. si quis suadēte, & papā posse supra ius dispensare. de Concessione præbendæ. C. proposuit. *Papam item posse contra Vetus ac Nouū Testamentū dispensare*. ibid. & ibi glossa. & *Papam habere omnia iura in scriinio peccatoris sui*. in sext. de Constitut. C. Licet. Similia passim occurrūt in papisticis libris. Sed in tāta Euāgelij luce nemo mētis cōpos hæc asseruerit. Et si quis hæc asserere vellet, eū tamen paparū vita & doctrina refutarent. Vitas eorum describūt Balæus, Platina & Barnsus, easdē attingūt refutator Bruti fulminis, & Isaac Rabbothenu part. 3. cap. 6. Doctrinā eorū demonstrat prouerbiū, *Monacho indoctior*. Deinde aliud concludit, q̄ fuit in antecedēte, nam neq; subiectū, neq; prædicatū conclusionis est in præmissis, neq; quicquā aliud sequitur, quā papā habere donum interpretandi. Si quis autem hinc cuperet inferre

ferre, Papam Rom. non posse errare in interpretando, formare deberet argum. in hunc modum.

Qui habet donum interpretandi, ille nō potest errare in doctrina, vel eius volūtas est regula oīs interpretationis. Sed Papa Rō. habet donū interpretandi. Ergo Papa Rom. non potest errare in doctrina, vel Papæ Rom. voluntas est regula omnis interpretationis.

Hoc modo argumentum formari debebat, sed Maior est falsa. Nam Cyprianus habuit donum interpretandi, & tamen aliquando errauit, idē accidit Tertulliano, Ambrosio, Chrysostomo, Augustino, Hilario, Theodoro, Damasceno, Thome, Lyræ, & multis alijs. Hoc adeò manifestū est, vt nemo ausit negare. Deinde & Minor falsa est, Quotus n. quisq; papa nunc est, qui habeat donū interpretandi, & vt maximè haberet illud, ipsius tamen interpretationis eum puderet. Quid n. interpretatus est Gregorius 13. Sixtus 5. Paulus 4. & 3. Clemēs, Adrianus, Leo decimus & multi alij? an vnquā concionati sunt? an vllōs viua voce docuerunt, vel vllōs Commentar. scripserunt, aut quomodo potest eius interpretatio vera esse, qui nihil interpretatur? Prætereà donū interpretandi datur per Sp. sanctū. Sed excutiat Bellar. vitas paparum, vt illæ sunt à Platina, Barnso, Balæo, & alijs descriptæ, & respondeat, an à longo tempore existimet vllum papam habuisse Sp. sanctum? At qui Sp. sanctum non habēt, quomodo possunt donū interpretationis habere? Cū igitur neque Maior, neq; Minor vera sit, sequitur conclusionem verā non esse.

Nonum testimonium 1. Ioan. 4. v. 5. *Nolite cuius spiritui*

*Spiritui credere, sed probate Spiritus, an ex Deo sint, nam multi Pseudopropheta venerunt in mundum, hinc infert Papam Romanum non posse errare in Scriptura explicanda, quasi dicat,*

Quos Spiritus debemus probare, illi possunt errare in Interpretando : sed quemuis Spiritum debemus probare , Ergo Papa Romanus non potest errare in interpretando.

Sed quis est harum nugarum finis ? Quis ex omnibus patrib. ex hoc loco collegit, Papam Rom. non posse errare in Scriptura explicanda ? Respondeo Maiorem esse fallam. Paulus enim *probabatur à Berhoënsib.* Act. 17. cap. & tamen non poterat errare in Scriptura explicanda. Similia exempla adduci possunt. Est igitur fallacia à non causa ut causa. Nam non propterea doctrina est mala , quòd probatur, sed quia à verbo Dei discrepat, idèd est mala. Ad Minorem dico, Si illa vera est, tum & Papam debere probari, nam si omnem Spiritum probare debemus, & Spiritus Interpretes est, tum sequitur, vel & Papam probandum esse, vel papam non esse Interpretem. Eligat Bellarminus quod volet. Deinde aliud est in conclusione, quàm in præmissis. Quæstio enim est, an Papæ iudicium sit regula omnis interpretationis, sed huius neque subiectum; neque prædicatum est in præmissis. Quòd verò Bellarminus hîc de priuato Spiritu dicit, puerile est; priuatum enim non opponitur hîc publico, sed diuino, vel spirituali, vel denique ei, quod à Spiritu sancto profectum est. Et priuatum hîc non est illud, quod publico opponitur, sed est idem, quod humanum, vel quod ab homine



mine profectum est, 2. Pet. 1, 20. *Si illud inprimis noveritis nullam prophetiam Scriptura esse priuata explanationis. Non enim libidine hominis allata est olim prophetia, sed acti à Sp. sancto loquuti sunt sancti Dei homines.* Hinc apparet priuatam explanationem esse idem atque illud, quod *libidine hominum allatum est*, id est, humanum, & eius oppositum esse illud, quod profectum est à Sp. sancto. Dum igitur Bellarminus putat eam esse priuatam explanationem, quam affert homo priuatus, & eam non esse priuatam, quam affert Episcopus, hoc est homo publicus, pueriliter sophisticatur. Nam & Cyprianus erat Episcopus, tamen cùm doceret baptizatos debere rebaptizari, eius doctrina fuit priuata. Augustinus fuit Episcopus, tamen cùm doceret, *infantibus cœnam porrigendâ esse*, eius doctrina erat priuata. Victor Roman. fuit Episcopus, tamen cùm doceret, *Orientales Ecclesias propter ritum ab Apostolis acceptum esse excommunicandas*, eius doctrina erat priuata. Anastasius erat Episcopus, tamen cùm doceret, *communicandum esse cum hæreticis*, eius doctrina erat priuata. De similibus est idem iudicium. Non refert igitur an interpretes publicam an priuatam personam sustineat, cùm interpretatur. Nec illa interpretatio est publica, quæ à publica persona proficiscitur, nec illa priuata, quæ ab homine priuato proficiscitur. Sed illa est priuata interpretatio, quæ ab humano cerebro proficiscitur, & illa non est priuata, quæ à Spiritu sancto proficiscitur. Hoc adeò est manifestum, vt nemo sanæ mentis illud negaturus sit. Prætereà quibus Christus dat potestatem probandi Spiritus, illis dat iudicandi

dicandi potestatem. Doctrinam enim probare, est eam iudicare. At Christus non solis Episcopis, sed omnibus Christianis dedit iudicandi potestatem. Petrus enim alloquitur omnes fideles. Ergo non soli Episcopi, sed omnes Christiani habent probandi potestatem, & hoc verum esse docet exemplum *Berhoënsium*. Act. 17. Neque tamen discrimen inter iudicium doctoris & auditoris tollimus; sed simpliciter ex hoc loco colligimus, probationem spirituum ad oēs Christianos pertinere, & non ad solum papā. Si putat Bellar. eam interpretationē esse falsam, quæ probatur, & eam esse verā, quæ non probatur, & subiungit Papæ interpretationem non debere probari, & propterea eam esse veram, tum nititur falso fundamēto. Nam ut antè ostendimus, & vera & falsa doctrina simul probari debent, neque quia doctrina non probatur, idè vera est, sed quia cū Dei verb. congruit, idè vera est. Deinde petit id quod est in principio. Papæ enim doctrinam nō esse probandā, inter nos controuersum est, & hoc ipsum pugnat cū doctrina Petri, nam si Spiritus probare debemus, & papa Spiritus est, certè & papam probare debemus, ut taceam papam non esse maiorem Paulo, & Barnaba. Illi autē passi sunt suam doctrinam à Berhoënsibus probari. Ergo non indignè feret Papa Rom. suam doctrinam à protestantibus probari. Quod dicit nos illud, *hoc est corpus meum*, idè explicare, pro hoc significat corpus meum, quia Spiritus id nobis reuelat, non autē quia potest probari ex script. Si hoc intelligit de spiritibus priuatis, facit nobis iniuriam, non enim ad spiritus priuatos, sed ad spiritū in scriptura

ptura loquentem recurrimus. Deinde dicit falsum. Probamus enim illud ex scriptura, ex alijs phrasibus sacramentalibus, quę in scriptura vsurpantur, ex articulis fidei, & ex vnanimi consensu primitiuę Ecclesię, quemadmodum suo loco ostendemus, & ob eā causam nō est necesse, vt à Papa Rom. huius sacramenti explicationē petamus. Quodd addit de Apostolis & antiquis fidelibus, illi hoc ita explicuerunt, vt nos explicamus. Si igitur eorū iudicio standū est, falsa est sentētia papistarū, vera orthodoxorū. Addit se ostēdisse Papam Rom. semper *dirigi à Sp. sancto, ne unquā erraret.* At hoc non fecit his libris, nullū n. Argumentū attulit, quod sit argumenti nomine dignum, quemadmodum partim ostensum est, partim adhuc ostendetur. Postremò si *Spiritus*, inquit, *ipsorum* (loquitur de nobis) *est bonus, esset idem cum spiritu Apostolorum & primorum fidelium, sed spiritus eorum non volebat esse iudex, sed recurrebat ad Petrum, & concilium, & eorum sententię acquiescebat.* Ergo *Spiritus eorum qui se iudicem constituit, non est spiritus bonus.* Quod miror Bellarmino excidere potuisse. Totis enim 50. annis nihil aliud quàm concilium vrsimus. Quoties protestantes Germaniæ Cæsari supplices facti sunt, vt Concilium conuocari curaret, quoties Papa falsò promisit, se liberum Concilium in Germania indicturum esse, quoties protestantes Galliæ concilium expetuerunt, & adhuc expetunt. Verum Bellar. nos cupimus Cōciliū, in quo Cathedra Petri. i. doctrinā Petri sit iudicij norma, nō aut in quo Cathedra Antichristi, hoc est, doctrina Antichristi sit regula iudicij. Imò Bellarmine, si veritas tibi ad eō cordi est, effice

effice apud papam, vt liberum concilium indicatur, in quo non tantum papisticis, sed etiam orthodoxis Episcopis liceat sententiam dicere, in quo protestantibus liceat suam doctrinam proponere, & tueri, & papistæ cogantur de hæresibus obiectis rationem reddere, in quo Episcopi à papæ iuramento liberentur, vt possint liberè sententiam dicere, & in quo papa tyrannidem per vim occupatam non vsurpet, & videbis protestantes non fugere lucem, neque reformidare iudiciū, imò videbis illorum Spiritum à Petri Spiritu non dissidere. Si autem posthac lucem fugere, vobis de omnibus iudicandi partes sumere, nemini de vobis iudicandi potestatem concedere, & tamen quotidie concilium clamare, & vestros aduersarios indicta causa bello persequi pergetis. Scitote vos nihil aliud profecturos, quàm vt toti mundo ostendatis, vos regi isto spiritu, qui dicebat, *quid adhuc nobis opus est testibus, audistis blasphemiam, quid vobis videtur?* illi verò omnes contra eum iudicarunt, ipsum teneri mortis pœna. Desine igitur nugari, & vestram turpitudinem amplius detegere, an non concilium palàm clamando, & illud occultè fugiendo hoc effecistis, vt tota Dania, Sueuia, Anglia, Scotia, maxima pars Germaniæ, Galliæ, Belgicæ, Poloniæ, Hungariæ, Transylvaniæ, & Heluetiæ vestras fraudes intellexerint, & à papisticis hæresib. secessionem fecerint? Quin breui videbis ipsam Italiam & Hispaniam vestras hæreses abiecturas esse. Plura de hac re dicam, cùm de Concilijs disputabo. Vt autem omnia in pauca contraham, manifestum est ex præcedentibus, non soli Petro, sed omnibus Apostolis,

stolis, imò omnibus ministris legitimè vocatis clau-  
 ues datas esse, & inter *Papam* & *Petrum* nullam esse  
 similitudinem, neque claues significare interpreta-  
 tionem, neque omnes ministros semper rectè ligare  
 & soluere. Deinde ostensum est, mores formare, &  
 vitia arguere esse aliud, quàm scripturam interpreta-  
 ri, idque pertinere nò tantùm ad *Petrum*, sed ad om-  
 nes Apostolos, imò ad omnes ministros legitimè vo-  
 catos, eosque in eo officio administrando sæpè cri-  
 rare. Denique ostensum est, *Cathedram Petri* signi-  
 ficare aut locum, in quo docuit, aut doctrinam *Pe-  
 tri*, aut eius officium. *Papam* verò neque docere do-  
 ctrinam *Petri*, neque administrare officium *Petri*, &  
 quod ad locum attinet, *Simonem* etià *Magum* do-  
 cuiſſe *Romæ*. Neq; doctrinam *Petri* propterea ve-  
 ram esse, quòd à *Petro* profecta erat, sed quia cum  
 mandatis Christi congruebat, neque habuisse eum  
 potestatem quidlibet, etiam còtra mandatum *Chri-  
 sti* docendi, sed habuisse mandatum certis limitibus  
 comprehensum, nempè vt doceret ea, quæ Christus  
 mandauerat. Neque solius *Petri* doctrinam, sed &  
 reliquorum Apostolorum doctrinam fuisse veram,  
 neque eos sedere in cathedra *Petri*, qui in ijs locis  
 docent, vbi *Petrus* docuit; sed omnes eos, quicunq;  
 eius doctrinam docent, sedere in eius cathedra, idq;  
 vbique locorum & temporum. Præterea ostensum  
 est, non solùm *Petrum*, sed omnes Apostolos pa-  
 scere omnes oues Christi, Reliquos omnes Episco-  
 pos pascere quidem oues Christi, sed non omnes,  
 posse etiam eos errare, qui pascunt oues Christi, *Papā*  
 etiam non solùm non pascere oēs oues Christi, sed

ne pascere quidem omnino. Quintò ostensum est, & illos posse errare in doctrina, pro quibus Christus orat. Petrum etiam post hanc orationem in doctrina errasse, neque Christum orasse pro solo Petro, sed pro omnibus Apostolis, imò pro omnibus fidelibus. multos etiam Papas à fide defecisse. Sextò ostensum est, Petrum non præsedisse in primo Concilio, neque papam quicquã habere cum Petro cõmune, habere ite potestatem approbandi doctrinam omnes Episcopos legitimè vocatos, & eos posse errare, qui eã potestatem habent. Septimò ostensum est, Pauli doctrinam non propterea esse veram, quod à Petro approbata est, sed per se esse veram, neque Paulum magis opus habuisse approbatione Petri, quàm Petrum approbatione Pauli, Paulum verò fuisse Ierosolymam profectum, ut falsos fratres convineret, & infirmos confirmaret. Octavò ostensum est, solum Papam non habere donum interpretandi, & eis qui donum interpretandi habent, posse errare. Nonò ostensum est, omnem doctrinam debere probari, omnesque fideles habere istam probandi potestatem, posse etiam eos errare, qui doctrinam probant. Unde apparet doctrinam papisticam de regula interpretationis adhuc æquè incertam, & dubiam esse, atque apte à erat.

## CAPVT IV.

*Argumenta pro papistica interpretationis regula ab Ecclesia consuetudine ducta refutantur.*

**D**Estructis argumentis pro papistica interpretationis regula ex Nouo Testamento ductis, sequitur

sequitur vt ea refutentur, quæ à praxi Ecclesiæ petita sunt. Primum Argumentum quia papa semper præfuit Concilijs, & in ijs, controuersias Ecclesiasticas diremit. Argumentum tale;

Quicquid fit ab vniuersa Ecclesia, hoc est legitimum: sed in vniuersa Ecclesia semper obseruatum est, vt papa Concilijs præsideret, & in ijs controuersias dirimeret. Ergo papa non potest errare in scriptura interpretanda: *on*

Respondemus aliud concludi, quàm fuit in præmissis. Prædicatum enim conclusionis non est in antecedente. Deinde dicimus Maiorem esse falsam. In tota enim primitiua Ecclesia, calix dabatur Laicis, in tota autem papistica Ecclesia calix negatur Laicis. Totâ item primitiua Ecclesia libros Machabæorum, Iudith, Tobiam, Ecclesiasticum, Sapientiâ & Baruch non habuit pro Canonicis, papistica Ecclesia eos habet pro canonicis, huiusmodi plura exempla adduci possent. Aut igitur tota primitiua Ecclesia errat, aut tota papistica Ecclesia errat. Deinde cùm Elias clamaret, *se solum relictum esse, & sacerdotes omnes sacrificarent Baalim, & cùm omnes sacerdotes condemnarent Christum*, dicat quæso Bellarminus, num illud verum erat, quod vniuersa Ecclesia tum sequebatur. Quoniam verò Bellarminus addit istas voces, *semper & nunc*, videtur Maior etiam in hunc modum formari posse. Quod vniuersa Ecclesia semper fecit, & adhuc facit, illud est legitimum. Sed tunc ostendat Bellarm. vnum dogma de fide, in quo vniuersa ecclesia semper à nobis dissensit, & adhuc dissensit. Et cùm hoc fecit, tum cogitabimus de respon-



sione. Deinde & Minor falsa est. Papa enim non præfedit in omnib. Concilijs, neq; omnes contro-  
uersias diremit. Sed quoniam Bellarmino libuit Mi-  
norem probare, nos eius rationes expendemus. Pri-  
ma Minoris probatio est, quia *Petrus præfedit in Con-  
cilio Hierosolymitano, & in eo primam controuersiam di-  
remit, q. d.*

— Petrus præfedit in primo Concilio. Ergo papa  
non potest errare in Scriptura explicanda.

— Respondemus antecedens huius argumenti falsū  
esse; Eius falsitatem antè ostendimus. Deinde Pe-  
trus non fuit in isto Concilio vt papa Romanus .  
Eo n. tempore papa Romanus nondum erat in rerū  
natura. Et si daremus Petrum in eo Concilio præ-  
fedis, nihil tamen iuuaret causam Bellarmini. Papa  
enim non est Petrus, neque quicquam cum Petro  
habet commune. Cū igitur antecedens falsum  
sit, neque consequens cum antecedente vllō modo  
cohæreat, facilè apparet, quantum huic argumento  
tribuendum sit. Secunda probatio, quia *Victor Ro-  
manus diremit controuersiam de paschate*. Equidem Bel-  
larmine, si frontem habuisses, abstinuisses ab hoc ar-  
gumento. De eo enim factō Eusebius lib. 5. Eccles.  
hist. cap. 24. *Sed hoc, inquit, non omnibus placebat E-  
piscopis, quin potius è contrario scribentes ei iubebant, vt  
magis quæ pacis sunt ageret, atque concordie & unanimi-  
tati studeret.* Et paulō post. *Extant, inquit, etiam ipso-  
rum literæ, quibus asperius obiurgant Victorem, velut inu-  
tiliter Ecclesia commodis consulentem.* Nota Episcopos  
habuisse eo tempore potestatem iubendi, & obiur-  
gandi papam. Irenæus apud Eusebium eodem loco  
de

de Victore dicit, quòd fecerit abscindere à corporis unitate tot & tantas Ecclesias Dei, quæ morem sibi antiquitus traditum custodirent. Et paulò post, Illi omnes, inquit, ante ad Soterem presbyteri, qui Ecclesie, cui tu nunc præs, sacerdotium tenuerunt, Anicetum dico, & Pium, Higinumq;, & Telephorum, & Xistum, neque ipsi ita tenuerunt, neque hi qui cum ipsis erant; & tamen cum ipsi ita non observarent, pacem semper habuerunt cum illis Ecclesiis, quæ hunc observantiam morem tenebant: cum utique & ipsis contrarium videretur, quod non etiam ceteri similiter observarent. Nunquam tamen ob hoc repulsi sunt ab Ecclesie societate, aut venientes ab illis partibus non sunt suscepti: imò potius & omnes presbyteri, qui fuerunt ante, omnibus semper qui non ita observabant presbyteris Ecclesiarum, Eucharistiam solenniter trans mittebant. Et paulò post. Neque enim Anicetus Polycarpo suadere potuit, ut non observaret ea, quæ nouerat Iohannem discipulum Domini nostri, vel ceteros Apostolos, cum quibus semper fuerat, observasse: neque rursus Polycarpus Aniceto persuasit ea deferere, quæ ille dicebat à se maiorum more seruari. Cumq;, hæc ita inter se habuissent, communicarunt sibi inuicem, ita ut concederet Anicetus Polycarpo etiam sacerdotali ministerio honoris duntaxat contemplatione perfungi; & ita à se inuicem plena fide, pace integra, & firma charitate discedant, ut omnes Ecclesie, siue quæ ita de Pascha, siue quæ non ita seruarent, inter se tamen concordiam custodirent. Hinc apparet Victorem inutiliter Ecclesie consuluisse, & fraternam unitatem dissoluisse, non autem hæreses diremisisse, dum igitur hinc infert, papam non posse errare in scriptura interpretanda, perinde est ac si dicat,

Victor dissoluit Ecclesiæ unitatem, & fraternitatem, Ergo papa Romanus non potest errare in scriptura interpretanda.

Qualia sunt labra, tales sunt lactucæ. Deinde non solus Victor præfuit in Concilio Romano, sed cum eo *Palmeas*. Testis Euseb. l. 5. *Eccles. c. 23.* ex translatione Ruffini. Præterea Victoris nō erat eo tēpore in omnibus Concilijs præsidere, sed tantum in illis, *qua erant in sua duxcesi*. Imò ne quidem ex Eusebio probari potest, Victorem Romano Concilio præfuisse. Dicit enim *ἐπίσκοπος Βικτορου δαδύου*. De præsidentis auctoritate nullū verbū. Deinde Cæsariēsi præfuit Theophilus, Gallico Irenæus, Achaico Bacchylus. Testis idem *Eusebius lib. 5. Eccles. hist. cap. 23.* Vnde apparet Victorem non plus iuris habuisse in Cæsariensem, Gallicam & Achaicam Ecclesiam, quàm vel Bacchylus, vel Irenæus, vel Theophilus habuit in Ecclesiam Rom. Et si quis rem diligenter expendit, ille videbit ipsum Constantinum in Nicēno Concilio præsedisse. Ille enim Episcopos convocauit, eis-que præscripsit, vnde probationum & fidei elemēta desumere debeant, idem sententias audiuit, suffragia moderatus est. effrene contentionis studium coercuit, libellos accusatorios in ignem coniecit, episcopos ad concordiam hortatus est, & penè coegit, vtraque parte vnanimiter audita sententiam pronunciauit, & contumaces penis coercuit. Ruffin. lib. 1. cap. 1. & 2. Eusebius in vita Cōstantini lib. 3. Theodor. lib. 1. cap. 10. Tertia probatio, *quia Cornelius præfuit duobus Concilijs Romanis, in quibus Nouatus est damnatus, & Anabaptismus reijctus, vtrumque pro-*  
bar

bat ex Eusebio, illud ex lib. 6. cap. 33. hoc ex lib. 7. cap. 2. Sed neutrum dicit Eusebius. Cum igitur falsum alleget Bellarminus, fidem non habet eius probatio. Deinde etiam si istis Concilijs Episcopus Romanus præfuisse, hoc neq; esset nouū, neq; faceret ad rem. Nouum non erat, erat enim in sua diœcesi, ijs verò Concilijs, quæ erant extra suam diœcesin, vt Cæsariensi, Gallico, Achaico non præfuit, sed Episcopi, qui erant in istis locis. Neque ad rem facit. Non enim sequitur illos non posse errare, qui præsunt concilijs, alioqui n. & Bacchylus, & Theophilus, & Ireneus, & multi alij errare nō possēt. Sed hoc est absurdū, Ergo & illud. Quarta probatio, quia papa præsedit in Synodo Nicæna, eamque approbavit, & in ea Arrianismum sustulit.

Papa præsedit in Concilio Nicæno. Ergo papa non potest errare in scriptura interpretanda.

Respondeo antecedens hoc esse falsum. Nam vel Eustathius vel Hosius præsedit. Eustathius enim inter Episcopos primum locum in sessione tenuit. Theodoretus lib. 1. cap. 7. Idem potest colligi ex Euseb. lib. 3. de vita Constantini. Hosius verò in subscriptionibus primum locum tenuit, neque vt legatus papæ subscripsit, sed vt Episcopus Cordubensis. Hosius Episcopus ciuitatis Cordubensis prouincie Hispanie dixit, ita credo sicut superius scriptum est. De Victore verò & Vincentio scriptum est, quod pro Papa Romano subscripserint. Victor & Vincentius presbyteri urbis Romæ pro venerabili viro Papa & Episcopo Syluestro subscripsimus. Deinde Theodoretus lib. 1. c. 7. disertè dicit, Romanum Episcopum misisse presbyteros,

nō tres, sed *duos*. At si Hosius simul à papa missus esset, tum tres ab eo missi essent, Hosius sc. Victor, & Vincentius. Vnde apparet Hosij & reliquorum duorum subscriptiones esse diuersas, ac proinde si ille qui primus assedit, fuit præses; tum Eustathius præsedit; si verò ille, qui primò subscripsit, tum Hosius fuit præses. Sozomenus Romani Episcopi legatis quartum locum attribuit, vt est in *Tripartit. hist. lib. 2. cap. 5*. Ex omnibus autem antiquis scriptoribus nemo est, qui dicit Papæ Romani tum fuisse in omnibus Concilijs præsidere. Præfator quidem in Concilium Nicænum in 1. Tom. Conciliorum dicit, *hanc Synodum mediantibus Romana sedis presbyteris Arry venena destruxisse*. Sed nemo est idoneus testis in propria sua causa. Deinde idem præfator in eadē præfatione dicit, *Petrum & Paulum eodem die, eodemq; tempore Roma occisos esse*, idque sub Nerone. Idem in eadem præfatione dicit, *Iacobum fratrem Domini esse à Petro, Iacobo, & Iohanne Apostolis Episcopum ordinatum*, Vtrumque tam verum, quàm verum est papam in Concilio Nicæno præsedisse. Paulus enim non passus est eodem die, quo Petrus, neq; Iacobus ab Apostolis, sed ab ipso Christo immediatè vocatus est. Matth. 10. v. 3. Et Marc. 3. v. 18. Et Luc. 6. v. 15. Quòd autem dicit decreta istius Concilij esse à papa approbata, nihil facit ad rem. Eadem enim approbata sunt ab Episcopis in Illyrico, vt docet Theodoretus lib. 4. *Eccles. hist. cap. 8*. Sed & Siculi Nicænam formulam approbarunt. Sozomenus lib. 6. cap. 2. Num hinc infert Bellarminus Episcopos Illyricos, & Siculos, eorumque successores omnes & singulos

non

non posse errare in scriptura explicanda? Deinde nō papa; sed Hosius, Eustathius, & Athanasius Arrium refutarunt, neque formula Nicæna ideò vera est, quia à papa approbata est, sed quia cum Dei verbo congruit, ideò vera est; & ob eam causam etiam si nullus papa eam approbasset, tamen vera esset. Quòd autem Synodales petiuerint Romanorum approbationem, nullam aliam ob causam fecerunt, quàm vt Arrium communi consensu faciliùs euerterent. Est igitur fallacia à nō causa vt causa. Quinta probatio, quia Papa Romanus præsedit in Concilio Constantinopolitano, in eo quæ hæresin Macedonij dimit, hoc probat ex Theodoro *lib. 5. cap. 8.* At falsum allegat, nihil enim tale docet Theodoretus. Ergo fidem non habet eius probatio. Deinde nec Papa Romanus, sed *Nectarius præsedit*, ille enim primo loco subscript, vt patet ex *1. Tomo Concil.* Prætereà legimus Nectarium maximè esse auctorem Canonum Constantinopolitanorum in argumento huius Concilij, & *Distinct. 16. Cap.* Prima autem Synodus. Ex his manifestum est, Papam in istis primis Concilijs non præsedisse. Reliquas probationes excutiam controuersia quarta, hæ enim & illæ nihil faciunt ad rem. Nam etiam si papa præsedisset in istis Concilijs, isthinc tamen non sequeretur papam non posse errare in scriptura interpretanda. Dioscorus enim præsedit in Ephesino secundo, Irenæus in Gallico, Cyprianus in Carthaginensi, & tamen hi oēs aliquando errarunt. Manifestum igitur papam Rom. non præsedisse in omnibus Concilijs, & eos qui in Concilijs præsident, posse errare.

*Argumenta propapistica regula interpretationis à Paparum auctoritate ducta.*

**S**Vperiori capite refutauimus argumentum, quod Sex praxi Ecclesiæ attulit Bellarminus, nunc refutabimus illud, quod à paparum auctoritate duxit. Primum argumentum, quia aliqui *pape dixerunt causas grauiores ad iudicium Apostolicæ sedis pertinere.*

Quorundam Paparum dicta sunt vera, sed aliqui Papæ dixerunt causas grauiores ad iudicium Apostolicæ sedis pertinere. Ergo Papa non potest errare in scriptura interpretanda.

Respondeo aliud concludi, quàm fuit in præmissis. Prædicatum enim conclusionis non est in antecedente. Deinde infert conclusionem negatiuam ex præmissis affirmatiuis. Denique Maior vniuersaliter sumpta est falsa. Victor enim condemnauit Ecclesias Asiaticas, sed errasse eum in ea re anteà ex Eusebio, & Irenæo docuimus. Idem docet Hieronymus in Catalogo. C. Irenæus, & Papam posse hereticum fieri, & à fide deniare docet Gratianus, *Distinct. 40. C. Si Papa.* Quosdam etiam à fide defecisse testantur *Achatius, Anastasius, Liberius, Felix, & alij papæ*, qui in hæresin prolapsi sunt. Quin & Papa Romanus in Concilio Africano *falsitatis* conuictus est, vt patet *ex Cap. 105. istius Concilij.* Hinc apparet non verum esse, quicquid dicit Papa Romanus. Quod ad Minorem attinet, eam probat 5. testibus Damaso, Innocentio, Leone, Gelasio, & Iulio, ad quos prius



prius in genere, deinde in specie respondebo. In genere dico, papas in propria causa non esse idoneos testes. Nam cuius res in aliquo negotio agitur, ille in eo (illius enim interest) non est idoneus testis. *Institution. de Testamentis ordinandis §. sed neque. L. Nullus. 10. ff. de Testibus. L. omnibus. 9. Codic. eodem L. 1. §. in propria. ff. quando appellandum sit.* Iam in specie. Ac primum quod ad Damasum attinet, fuit homo iste arrogans, sediciosus, & superbus. Ammianus Marcellinus lib. 27, narrat, cum cum Ursinico de Episcopali sede ita pugnassee, ut Vincentius urbis præfectus in suburbanum secesserit, et in Basilica Sermini, ubi Christiani conueniebant 127. homines sint trucidati, vnde apparet eum non per vocationem Christi; sed per iniustam vim Episcopatum Rom. inuasisse. Deinde ipsa Epistola est confictitia. Damasus enim scripsit eam Stilicone & Flauio Consulibus. At tales consules tempore Damasi nulli fuerunt. Quod ad Innocentium attinet, dicit Erasmus in hac Epistola & dictionem & ingenium & eruditionem requirimus tali præfule dignam, cuius iudicio & nos subscribimus. Leo fuit homo arrogans, temerè enim & arroganter Eutychetis à Constantinopolit. Synodo legitimè damnati causam suscipit, idque contra Decretum Synodi Nicenæ. Eandem arrogantiam & impudentiam in sede Romana contra veteres canones euehenda etiam in Gelasio & Gregorio inuenies. Iulius etiam præter supradictam arrogantiam se falsarium probat. Allegat enim in primo Concilio Nicæno constitutum, omnes controuersias gravioras ad sedem Rm. pertinere. Dum igitur Bellarminus Iulium cum eodem

dem decreto Nicæno allegat, eiusdem falsi crimen effugere non potest. Cùm Apiarius à Synodo Africana esset excommunicatus, prouocabat ad Sozimum Papam Rom. hic re non audita iubet eum ad communionem admitti; & missa legatione docet Afros malè facere, in concilio enim Nicæno constitutum esse, vt res grauiores nō nisi cum consensu sedis Rō. diiudicentur. Faustinus eius legationis princeps Sozimi sententiam ex scripto legit, *Cap. 3. Concil. Africani*. Sed Episcopi Afri, vt Augustinus, & alij viri docti, cùm decreta concilij Nicæni legerent, dicunt se ista, quæ per Faustinum à Sozimo afferebantur, non inuenire, *Cap. 4. Concilij Africani*. Itaque fraudē subolentes miserunt Innocentium ad Cyrillum Alexandriæ Episcopum, & Marcum ad Atticum Cōstantinopoleos, vt authentica exempla decretorum Nicænorum afferrent. In libris autem, quos illi attulerunt, planè contrarium fuit inuentum, nempe *inferioris gradus clericos & Episcopos suis archimetro politanis apertissimè commissos esse. Cap. 105. Concil. Afric.* Scribunt igitur Afri ad Bonifacium; & reprehendūt eum, quòd *se alienis negotijs immisceat*. Deinde addunt, *in nulla Pàtrum Synodo constitutum esse, vt aliquis tanquam à Pape latere mittatur*, & statuunt canone 92. *vt excommunicetur, qui ad transmarina appellat*. Vnde sole clariùs apparet Nicænum illud decretum esse manifestum mendacium; & quoniam papistarū sententia de interpretationis regula mendacio nititur, sequitur eam ipsam falsam mendacemque esse. Atque hoc ad Bellarmini argumentum de Paparum auctoritate, in quo quoniam Maior particularis est,

& Minor idonea probatione destituitur, sequitur deploratam papistarum causam eo non iuvari.

## CAPVT VI.

*Argumenta Bellarmini pro papistica interpretationis regula ab Imperatorum auctoritate desumpta refutantur.*

**R**efutatis argumētis à Paparum auctoritate pro papisticæ interpretationis regula, sequuntur ea quæ ab Imperatorum auctoritate sumuntur. Primū tale est,

Quod aliqui imperatores faciunt, hoc est legitimum & rectum. Sed aliqui Imperatores statuunt Ecclesiasticas causas ab Ecclesiasticis personis tractari debere. Ergo Papæ iudicium est omnis interpretationis regula.

Respondeo aliud concludi, quàm fuit in præmissis. Deinde argumentum ad nullam formam potest reduci. Præterea, Maior vniuersaliter sumpta est falsa. Caligula enim, Nero, Domitianus, & alij multa statuerunt, quæ non sunt vera. Hoc ita manifestum est, vt probatione non sit opus. Quod ad Minorem attingit illa nihil facit ad rem. Quòd enim Imperatores Episcopis concesserunt iudicium Ecclesiasticarum causarum, istinc non sequitur, Episcopos non posse errare, neque sequitur, eos quidlibet debere contra Dei verbum statuere, neque sequitur debere esse ratum, quicquid ab Episcopis statuitur. Idque ob eam causam, quia ita ab Episcopis constitutum est, sed imperatores istos fuisse modestos, neque voluisse se alienis negotijs immiscere rectè sequitur, est igitur fallacia

fallacia consequentis. Si autem argumentum in hunc modum formas,

Quidā qbus Imperatores aliqui iudiciū rerū Ecclesiasticarum commiserunt, illi non possunt errare in scriptura explicanda. Sed Episcopi sunt isti, quibus Imperatores aliqui iudicium rerum ecclesiasticarum commiserunt. Ergo Episcopi non possunt errare in scriptura interpretanda.

Tum tamen nihil sequitur, sunt enim puræ particulares. Si verò Maiorem vniuersaliter formas, tum ea est falsa. Aliqui enim Imperatores, ut Nero, Domitianus, Caligula, Commodus & alij non hominibus ecclesiasticis, sed gentilib. hoc iudiciū permiserunt, atq; illi in Christianis persequēdis grauissimè errarunt. Sed neque Maior particulariter accepta est vera. Ipse n. Deus cōmisit summo sacerdoti cum suo collegio iudicium rerū ecclesiasticarū in pop. Iudaeo. Et tamē idem sacerdos in Christo condemnando, & eius doctrina profligāda grauissimè aberrauit. Plura exēpla sunt in prōptu. Siue igitur Maior vniuersaliter, siue particulariter accipiatur, est falsa. Nō enim cuiunque iudici iudicium legitimè cōmissum est, ille hoc legitimè administrat. Est enim perinde ac si dicas, Omnes Monachi debent esse casti, ergo sunt casti. Vel, Nulli homines debent peccare, ergo nulli homines peccant. Planè eodem modo concludis, Omnes episcopi debent rectè iudicare, ergo rectè iudicant, vel, Omnes episcopi debent Scripturam rectè interpretari, ergo rectè interpretantur. Sed quid verbis opus est? episcopos  
quibus

quibus iudicium ecclesiasticum commissum erat, in iudicando, & scriptura interpretanda sæpè aberrasse docent Historiæ veteres & recentes. Postremo totum hoc argumentum etsi verum esset, tamen nihil iuuaret causam papisticam: Imperatores enim non soli Papæ Romæ, sed & alijs episcopis iudicium ecclesiasticarum rerum concesserunt. Si igitur propterea Papa Rō. non potest errare, sequitur & reliquos episcopos non posse errare. Atq; hæc de Maiore. Minorem probat Bellar. octo testibus. Illorum primus est Aurelianus, sed huius testimonium non iuuat Bellarminum. Aurelianus enim non soli episcopo Romano, sed *sacerdotibus Italia idem concessit*. Si igitur ex hac concessione Papa non potest errare in Scriptura interpretanda, sequitur nullum sacerdotē Italiæ posse errare in Scriptura interpretanda. At hoc non vult Bellarminus. Deinde expende tuum argumentum Bellarmine. Aurelianus responderet, *ut templum concedatur ijs, quibus sacerdotes Italia et Episcopus Romæ hoc tradidit iubent*. Ergo papa non potest errare in Scriptura interpretanda.

Multò equidem efficacius colligeres, si concluderes in hunc modum, *ut qui in angulo stat, non potest errare*.

Baculus stat in angulo; Ergo Papa Romanus non potest in Scriptura interpretanda errare.

Eadem enim in utroq; argumēto vis consequentiæ. Deinde quod Bellarminus dicit, ridiculum est. Cui n. persuadebit Imperatorem gentile contemptorem, irrisorem, & persecutorem Christianæ religionis voluisse summum iudicium rerum ecclesiasticarum

conce-

concedere Episcopo Romano? Prætereà si sibi papa eo tempore iudicium rerum Ecclesiasticarum sumpisset, derisa & explosa fuisset eius stoliditas, & fatuitas, etiam ab Episcopis Christianis. Nam paulò post in Synodo Nicæna constitutum est, *Clericos inferioris ordinis, et Episcopos suis Metropolitanis commissos esse.* Epist. cõcil. African. ad Papam Romanũ in fine istius concilij. Deinde multis annis post in Concilio Africano constitutum est, *ut si quis ad transmarina pronocet, excommunicetur.* Concil. African. canone 42. Et cùm Sozimus Papa Rom. mitteret in Africã Faustinum, ut per eum hoc decretum impediret, fuit falsi conuictus. eodem concilio. cap. 3. 4. 5. 6. & 7. Prætereà Bellar. hoc eodem capite voluit Iulius papa probare, se esse summum iudicem controuersiarum *ex decreto Nicæno.* At nunc doces, *summum illud iudicium tempore Aureliani ad Papam pertinuisse.* Aut igitur erras, dum dicis, illud per Nicænum concilium ad Papam pertinere, aut erras dum dicis illud tempore Aureliani ad papam pertinuisse. Nam quod tempore Aureliani ad papam pertinuit, hoc per Nicænum concilium papæ acquisitum non est, & contrà. Quod per concilium Nicænum papæ primùm attributum est, hoc tempore Aureliani ad papam non pertinuit. Nisi concedas, sequitur eandem rem simul esse & non esse, id est, duo contradictoria esse simul vera. Hic obiter notandum est, 6. Imperatores fuisse inter Aurelianum & Synodum Nicenam, nempe Tacitum, Floreanum, Probũ, Carum Diocletianũ, Constantium, hos demùm sequutus est, Constantinus magnus qui inclytum illud concilium in Nicæa

cæa congregauit. Si dicis summum istud iudicium pertinuisse quidem ad papam tempore Aureliani; sed in posterioribus Synodis hoc fuisse manifestatū, tum ostendis aliam fatuitatem: Nicæni enim Patres aliter statuerunt, quemadmodum ante docui. Unde necessariò colligo,

Qui tempore primitiue Ecclesiæ summum in Ecclesia iudicium non habuit, ei nunc non competit. Sed papa tempore primitiue Ecclesiæ summum iudicium in Ecclesia non habuit; Ergo ei nunc non competit.

Deinde si omnes isti sunt hæretici, qui papæ summum hoc iudicium in Ecclesia concedere nolunt, tum tota vniuersalis primitiua Ecclesia cum omnibus doctoribus & Episcopis est hæretica. Ex omnibus enim illis nemo voluit Papam Romanum pro summo iudice in re Ecclesiastica cognoscere. Item cū Tridentinum concilium dicat illis anathema, qui non agnoscant papam esse summum in Ecclesia iudicem, neque agnoscant papam non posse in scriptura interpretanda errare, tum duo illa vniuersalia concilia *Africanum* sc. & *Nicanum* sunt maledicta & anathemati obnoxia. Sed hoc hætenus absque blasphemia nemo docuit. Ergo fatendum est Tridentinum cōcilium esse blasphemum & anathemati obnoxium. Et vt nugæ Bellarmini detegantur, *Concilium Nicanum, Carthaginense sextum, & Africanum* sunt à papa approbata. Distinct. 16. C. Sancta Cap. Quoniam. C. prima, & Distinct. 15. C. Sicut. At in illis statutum est, *Papam non esse summum iudicem*. Deinde concilium Tridentinum est à papa appro-



batum, in quo constitutum est, *Papam esse summum iudicem*. Quæ duo si simul vera sunt, sequitur papam esse summum iudicem, & non esse summum iudicem, id est, duo contradictoria esse simul vera.

Secundus testis est Constantinus, is teste Euseb. l. 3. de vita Constantini, in concilio Nicæno *non prius assedit, quam Episcopi annuissent*. Hinc infert Bellarminus Papam Romanum non posse errare in scriptura interpretanda. Argumentum tale;

Constantinus Imperator non prius assedit, quam Episcopi annuissent. Ergo Papa Romanus non potest errare in scriptura interpretanda.

Mirum si Iesuitam, qui logicus videri cupit, huius argumēti non pudeat. Sed pergit Bellar. & dicit Constantinū in isto concilio non præfuisse, inde infert Papam Rom. non posse errare in scriptura explicanda. Constantinus non fuit præses in Nicæno concilio. Ergo Papa Romanus non potest errare in scriptura explicanda.

Argumentum simile priori. Deinde antecedens falsum esse iam ante ostendimus. Sed addit Bellarminus, & dicit *Constantinum Imperatorem scripsisse ad omnes Episcopos, ut quicquid in sanctis Episcoporum Conciliis decerneretur, id divinæ voluntati in universum tribuatur*.

Quod Imperator rescripsit hoc est legitimum & obsequium. Sed Imperator rescripsit, ut quicquid in sanctis Episcoporum synodis constitutum est, id divinæ voluntati tribuatur. Ergo Papa Rom. non potest errare in scriptura explicanda.

Respondet Maiorem non esse simpliciter veram. Nam non omnium Imperatorum rescripta sunt nobis obser-

obser-

obseruanda. Semper enim tenenda est regula, *Operari Deo magis obedire, quàm hominibus.* Itaque Maiorem accipimus cum hac conditione. Omnium principum edicta, *quæ non pugnant cum Dei verbo*, ea sunt vera & nobis obseruanda. Quod ad Minorem attinet, non negamus ea obseruanda esse, quæ in sanctis Episcoporum Synodis constituuntur. Sed quid hoc ad papam Romanum? Ille enim neque sanctus est, neque Synodus est, neque sanctę Synodi sancta pars est. Deinde si illa obseruanda sunt, quæ in sanctis Episcoporum Synodis cõstituuntur, *tum papa nō est sūmus sacerdos*. ita n. statutū est in synod. Cart. 3. c. 26. Neq; *libri apocryphi sunt Canonici*. ita n. statutū est in synod. Laod. c. 59. Neq; *appellandū est ad papā Rō.* ita n. statutū est in cōcilio Afric. c. 92. Deniq; hoc argum. nihil facit ad cōcilia papalia, illa n. nō sunt sancta, Prætereà aliud cōcluditur, quàm fuit in præmissis. Nam neque prædicatum, neque subiectum Conclusionis fuit in antecedente. Sed affert Bellarminus & quartum argum. ex Ambrosio, Epist. 32. vbi Ambrosius dicit, *Constant. dedisse Episcopis liberū iudiciū.* Hinc infert Bellar. papā non posse errare in script. explicāda. Quibus Imperator liberū iudiciū dedit, illi nō possunt errare in script. explicāda. Sed Episcopi sunt isti, quib⁹ Imperator dedit liberū iudiciū. Ergo solus papa non potest errare in script. explicāda. Sanè pudet me horum argumentorum Bellarmine. Vides enim ipse aliud concludi, quàm fuit in præmissis. Deinde Maior non est vera. Sæpē enim errat & labitur, cui libera iudicandi potestas concessa est. Caiphæ enim iudicandi potestas data erat, sed

in iudicando aberravit. Dioscoro libera iudicandi potestas ab Imperatore & Imperatrice data erat, sed in iudicando aberravit. Similia exempla passim occurrunt. Deinde & alius error est in Maiore. Nam non cuicunque Ecclesiasticarum controuersiarum iudicium concessum est, ille non potest errare in scriptura explicanda. Multi enim Episcopi habuerunt iudicium controuersiarum Ecclesiasticarum, ut Augustinus in concilio Africano, & Cyprianus in concilio Carthaginensi. Et tamen hi quandoque in Scriptura interpretanda aberrarunt, plura exempla sunt in promptu, sed hæc sufficiant ad falsitatem Maioris ostendendam. Deinde & Minor non est simpliciter vera. Potest enim ita intelligi, quod Imperator, ijs nihil præscripserit, sed permiserit, ut secundum verbum Dei liberè iudicaret, & tunc Minorem concedimus. Si verò Minorem ita intelligit, ut existimet Imperatorem eis concessisse potestatem quidlibet iudicandi, etiam contra Dei verbum, tum illa est falsa. Imperator enim cum patres Niceæ congregatos alloqueretur, dixit, *sunt libri prophetici & Apostolici, qui aperte quid credendum sit, docent, de posita igitur omni hostili discordia, & diuini inspiratis scripturis sumamus earum rerum, quæ in controuersiam vocatur, solutionem.* Unde apparet Bellarmine eorum in iudicando potestatem fuisse certis limitibus & terminis comprehensam. Deinde etiam si Imperator hoc non edixisset, tamen ita fieri deberet. Apostoli enim ipsi, non habuerunt potestatem quicquam pronuncian-  
di, nisi ea, quæ Christus mandauerat, Matth. 28. Ergo multò minus patres Niceæ habuerunt potestatem quicquam

quicquam statuendi, nisi ea, *que Christus mandauerat.* Præterea si Episcopi ex Imperatoris indulgentia habuerunt liberam iudicandi potestatem, sequitur *Imperatorem esse supra Papam.* Qui enim ab altero potestatem habet, ille inferior est illo, à quo potestatem habet. Antecedens ipse Bellarminus ex Ambrosio posuit, Ergo ut consequens concedat est necesse. Denique si episcopi habent liberum iudicium propter hanc Imperatoris indulgentiam, sequitur falsum esse, quod in argumento præcedente dixit, *Aurelianus* edoctum esse summum iudicium esse penes papam Roman. Nam si summum iudicium dedit episcopis Constantinus, non habuerunt illud tempore Aureliani, et si habuerunt illud tempore Aureliani, tum Constantinus hoc illis non elargitus est. Postremo si hæc Maior & Minor sunt vera, tum sequitur non solum papam, sed nullum episcopum posse errare in scriptura explicanda. Sic enim colligi debebat.

Quibus Constantinus liberum iudicium dedit in ecclesiasticis controuersiis, illi non possunt errare in scriptura explicanda. Episcopi sunt isti quibus Imperator hoc concessit, Ergo episcopi non possunt errare in Scriptura explicanda.

Hanc conclusionem quoniam Bellarminus non concedit. Manifestum est illam Imperatoris liberalitatem non esse idoneum medium ad probandum illud quod in manibus est. Huc accedit totum hoc beneficium esse personale, eidem enim episcopi vel singuli, vel coniuncti post concilium illud solum, non habuerunt istam potestatem. Singuli non ha-

habuerunt. *Eusebius enim & alij deinde quadam statuentes, fuerunt ab Ecclesia reiecti.* Coniuncti etiam œcumenicè non habuerunt, Post solutum enim concilium non licuit illis absque Imperatoris mandato rursus œcumenicè conuenire. Adde totum hoc argumentum nihil facere ad rem. Quicquid enim imperator concessit, hoc concessit *Episcopis.* At Papa Romanus non est episcopus, ergo illi ab Imperatore nihil concessum est.

His non contentus Bellarminus addit quintum Argumentum, nempè quòd Constantinus *iudicium de Donatistis Melitiadæ Rom. Episcopo commiserat.*

Cui Imperator iudicium de Donatistis commisit, ille non potest errare in Scriptura explicanda. Sed Imperator hoc commisit Melitiadæ episcopo Romano, Ergo Papa Romanus non potest errare in scriptura explicanda.

Respondeo Maiorem esse falsam. Nam antè ostendi istos iudices sæpè aberrare, quos ipse Deus constituit, vt taceam eos errare posse, quos homo constituit. Ad Minorem dico, Imperatorem non soli Episcopo Romano, sed post eum & *Episcopo Arelatensi* hoc iudicium commisisse & post vtrumque *ipsum Imperatorem indicasse.* Vnde si sequitur eos non posse errare in Scriptura explicanda, quos Imperator ea in re iudices cōstituit, tum neque Episcopus Arelatensis potest errare in Scriptura explicanda. Sed hoc non, ergo nec illud. Deinde totum hoc est personale, & in exemplum trahi non debet. Nam vt episcopus Arelatensis propter illud iudicium post

episcopum Romanū semper iudicare nō potest, ita etiam Papa Rom. propter idem mandatum nō semper post Africanos iudicare potest. Si Bellar. hoc pertinaciū negat, sequitur Arelatensem esse supra Romanum, & Imperatorem esse supra vtrumq; Sed fuisse hoc totum personale manifestum est. Nam in concilio Africano Canone 92. statutum est, *ne quis ad transmarina prouocaret*, & in concilio Nicæno, Canone 6. statutum est, vt papa Romanus tantum *suburbicas suas Ecclesias iudicaret*. Deinde ex hoc argumento fortiū colligi potest, papā neque fuisse supremum, neque competentem iudicem Donatistarum.

Nam qui ab Imperatore in causa particulari iudex datur, ille non est ipso iure competens iudex. Sed episcopus Rom. est ab Imperatore in hac causa iudex datus. Ergo episcopus Rō. ipso iure in hac cōtrouersia competens iudex non erat.

Maiores manifesta. In qua enim causa quis ipso iure iudex est, ille nō habet opus, vt in eadem causa, singulari priuilegio iudex constituatur. Minorem posuit Bellarminus.

Deinde à quo prouocare licet, ille nō est summus iudex. Sed ab episcopo Romano prouocare licet. Ergo episcopus Romanus non est summus iudex.

Maiores manifesta. Minorem docet Augustinus epist. 162. & Donatistæ suo exemplo probaverunt. Denique si Papa esset summus iudex, potuisset Donatistam cogere, vt in sua sentētia acquiesce-

ret. Sed hoc non, ergo neque illud. Aut si Imperator existimasset Romanum pontificem esse supremum iudicem, ipse coëgisset Donatistam, ut in Romani episcopi sententia acquiesceret. Sed hoc non, Ergo Imperator non habuit illum pro supremo Iudice, neque ille se gessit pro supremo Iudice. Postremo, qui in controuersia Ecclesiastica iudices dare, appellationes suscipere, post priores Iudices, alios Iudices dare potest, & post eos omnes supremam sententiam ferendi potestatem habet, ille est supra papam Romanum. Sed Imperator potuit episcopo Romano mandare, ut eam causam cognosceret, idē potuit post latā sententiā appellationem suscipere, potuit tandem post iudicium episcopi Romani mādare episcopo Arelatensi, ut eandem rem cognosceret, & post utriusque iudicium supremam sententiā ferre. Ergo Imperator est supra papam Rom.

Tertius testis est Gratianus, Is in epistola ad episcopum Aquileiensem dicit *ab Episcopis discordantias discordis eruditionis salui debere*. Hinc infert Bellarminus papam Romanum non posse errare in scriptura explicanda.

Imperator constituit episcopos Interpretes, ita n. hoc imperatoris edictum interpretatur Ambrosius. Ergo papa Rom. non potest errare in Scriptura explicanda.

Equidem Bellarmine dici non potest, quanto pe-  
rē huiusmodi argumentis nostram causam iuues,  
videmus omnes religionem vestram esse deplora-  
tam, videmus doctissimos viros, inter quos te etiam  
numeramus, magnis etiam vigilijs nihil posse exco-  
gitare,



gitare, quod saltem speciem aliquã veri habeat. Unde euidenter colligimus, vobis aut à Deo mentem excœcatam esse, vt lumen Euangelij non videatis; vel vos causam perditam non audere deferere, ne totum vestrum regnum corruat; vel denique propter lucrum & regnandi cupiditatem scientes & volentes mendacium defendere. Hic nihil pronũciamus, tantũ rogamus, vt Deus, sicuti cœpit, ita pergat euangelium suum defendere, dumenim hæc scribo; de Guisio in Gallia supplicium sumitur, & paulò ante sanguinaria illa classis nō ab homine, sed à Deo oppressa est. Illi sit honos & gloria. Sed ad argumentum.

Quos Gratianus dicit discordis eruditionis in religione interpretes esse, illi non possunt errare in Scriptura explicanda. Sed episcopi sunt illi, quos Gratianus interpretes constituit. Ergo papa non potest errare in scriptura explicanda.

Maiorem esse falsam iam antè ostensum est. Deinde aliud cōcluditur, quàm fuit in præmissis. Papa enim irruit in cōclusionem, de quo ne gry quidem, quod aiunt, fuit in antecedente. Deinde sequetur non solũ papam, sed quemlibet episcopum non posse errare in scriptura explicanda. Hoc autem quoniam non vult Bellarmin. manifestum est, hoc medium non esse idoneum ad Bellarmini sententiam stabiliendam. Denique licet ista conclusio falsa sit, tamen si vera esset, non iuuaret causam Bellarmini, sequeretur enim solos episcopos esse Interpretes, at papa non est episcopus, quemadmodum suo loco

ostendemus. Vnde colligeretur eum non esse Interpreterem. Cùm igitur papa non sit interpret, neque habeat ius interpretationis, sequitur eum *πολυπραγμονεῖν* dum illud sibi arrogat, & quoniam aberrat dum interpretationem sibi sumit, credibile est, eum in ipsa etiam interpretatione quandoque aberrare. Et si papa esset Episcopus, hoc tamen eius causam non iuaret. Nam & illi, qui ius interpretandi habent, sæpè errant.

Quartus testis est Theodosius. Is in epist. Nicolai ad Michaëlem dicit, *eum qui non est ex ordine sanctissimorum Episcoporum, non debere Ecclesiasticis immisceri tractatibus.* Ergo inquit Bellarminus, papa non potest errare in scriptura explicanda. Argumentum prorsus Iesuiticum, vt priora. Est autem medium duplex. Vnum, Laici non debent se ecclesiasticis tractatibus immiscere. Alterum, soli episcopi sancti debent tractatus Ecclesiasticos tractare. Quod ad primum attinet, Argumentum tale est,

Qui non sunt sancti episcopi, illi non debent tractatibus ecclesiasticis immisceri, sed Laici non sunt sancti episcopi, Ergo Papa non potest errare in scriptura explicanda.

Ridicula cōclusio, cùm nihil simile sit in præmissis. Hoc autem concludi debebat. Ergo Laici non debent ecclesiasticis tractatibus immisceri, quod concedimus. Sed quid hoc ad papam Romanum?

Laici non debent ecclesiasticis tractatibus immisceri, Ergo papa non potest errare in Scriptura explicanda.

Idem est ac si dicas, Asinus non potest volare,

Ergo

Ergo papa non potest errare in scriptura explicanda. Vtrumq; medium æquè forte. Alterum argumentū.

Qui debent ecclesiastica tractare, illi non possunt errare in scriptura explicanda. Sed soli Episcopi sancti debent ecclesiastica tractare. Ergo papa non potest errare in scriptura explicanda.

Maiorem esse falsam iam antè sæpè ostendimus, & res ipsa docet eos sæpè errasse, qui ecclesiastica tractant. Deinde aliud concluditur, quàm fuit in præmissis. Subiectum enim conclusionis non est in antecedente. Hoc autem sequebatur. Ergo soli sancti episcopi non possunt errare in scriptura explicanda. Sed hanc conclusionem esse falsam docent Augustinus, Cyprianus, Chrysostomus, Ambrosius, Basilii, & alij, qui omnes sunt sancti episcopi, & tamen aliquando in scriptura explicanda aberrarunt. Deinde etiam si conclusio vera esset, tamen non iuaret causam Bellarmini. Papa enim Romanus neque episcopus, neq; sanctus, multò minus sanctus episcopus est. Sic igitur argumentū colligendum erat. Soli sancti episcopi debent ecclesiastica tractare.

Sed papa non est sanctus episcopus. Ergo papa non debet ecclesiastica tractare.

Hoc multò cōmodiùs ex Theodosij edicto colligi potest. Ut autem de consequentia cōstet, scit Bellarminus Maiorem veram esse, & Minorem doceri à Platina, Barns. Balæo in illorum vitis, & nos eam probabimus, cū de papa disputabimus.

Quintus testis est Marcianus, ille L. Nemo. C. de summa Trinitate, & fide catholica, iniuriam, inquit,

inquit, iudicio reuerendissima Synodi facit; qui semel indicata reuoluere & disputare contendit. Hinc infert Bellarminus papam non posse errare in scriptura explicanda.

Respondeo Maiorem non esse veram. Iam antè enim ostēdimus Imperatorum edicta cum hac limitatione recipienda esse, si cum verbo Dei congruūt. Sēper enim ista regula seruāda est, *Oportet Deo magis obedire quā hominibus*. Ergo quæ edicta cum Dei verbo pugnant, illa debent Dei verbo postponi. Deinde aliud concluditur, quā præmittitur, Nam neque subiectum neque prædicatum conclusionis est in antecedente. Quod ad Minorem attinet, illam non bona fide posuit Bellarminus. Marcianus enim dicit, neque *semel indicata*, & *rectè disposita iudicando reuoluat, tumultus aut perfidia occasionem inde querens*. Hæc Bellarminus callidè prætermisit. Ex his apparet non omnium Synodorum decreta, sed tantū ea, quæ *rectè disposita sunt*, non debere reuolui, idque non simpliciter, sed hoc non debere fieri *cum studio querendi tumultus & perfidiam*. Ergo in decreta Synodorum *non rectè disposita*, inquirere licet. Deinde etiam in decreta rectè disposita licet inquirere, *modò quis ex inquisitione non querat tumultus & perfidiam*. Nos autem Bellarmine tantū in impiorum conciliorum impia decreta inquiremus, idque cum summa modestia, & absque omni tumultu & perfidia. Deinde Bellarmine totum hoc argumentum nihil facit ad rem. Sic enim colligendum erat.

Sanctorum Conciliorum decreta rectè disposita non sunt reuoluēda. Papa est sanctum concilium

cilium. Ergo Papæ decreta non sunt reuoluenda.

At nunc vides Minorem esse falsam. Papa enim neque concilium, neq; sanctus, neque vlla pars sancti cōcilij, neque vllum cum sancto cōcilio consortium habet, multò minus sanctū cōcilium est, vt suo loco ostēdemus. Deinde etsi papæ decreta seruāda essent, tamen non omnia, sed tantū illa, quæ rectè disposita sunt, seruāda essent. Nam non existimo Bellarminum velle, vt etiam ea, quæ malè disposita sunt à Papa, seruemus. Sed vnde constabit ea rectè disposita esse? num inde, quòd à Papa profecta sunt? hoc quidem vult Bellarminus, sed blasphemum est, & impiū. Soli enim Deo competit, vt eius verbum verum esse credatur, nullam aliam ob causam, quàm quia à Deo profectum est. Sed quamdiu Pāpa non est Deus, non est necesse, vt Papæ verba, propterea quòd Papæ verba sunt, vera esse credamus. Huius autem rectè dispositionis regula est *solum, & vnicum Dei verbum*, vt rectè docuit Constantinus in Synodo Niēana. Proinde quatenus alicuius episcopi interpretatio cum Dei verbo congruit, eatenus censetur rectè disposita esse, & à nobis recipitur; quatenus autem cum Dei verbo non congruit, eatenus censetur non rectè disposita esse, & à nobis non recipitur. Vnde necessariò colligitur, illam tantū interpretationem esse rectè dispositam, quæ cum Dei verbo καὶ ἀναλογία congruit, quæ verò cum Dei verbo non congruit, eam non esse rectè dispositam, neque seruandam, etiamsi milles sit approbata à Papa Romano. Atque huc pertinet, quod inquit Grati-  
tianus

tianus, Distinct. 20. cap. Decretales. *In explicanda sacra scriptura potiores esse explanationes Augustini, & Hieronymi expositiones, quam Romanorum Pontificum, & additrationes tres. 1. quòd isti doctores sapè habuerint maiorem gratiam spiritus. 2. quòd etiam maiorem habuerint scientiam. 3. quòd etiam magis adhæreant rationi, quam ipsi pontifices.* Quod si verum est Bellarmine, falsa est tua conclusio.

Sextus testis est Valentinianus. Is apud Sozomenum, lib. 6. cap. 7. *mihi, qui ex parte plebis sum, inquit, fas non est talia curiosius scrutari. Sacerdotes, quibus ista cura sunt, inter se ipsos, quocunque velint loco, conveniant.* Inde hæc concludit.

Laici non debent Ecclesiastica tractare. Ergo Papa non potest errare in scriptura explicanda. Item episcopi tantum debent res Ecclesiasticas tractare, Ergo Papa non potest errare in Scriptura explicanda.

Ridicula argumenta & planè Iesuitica, neque digna vlla refutatione;

Septimus testis est Basilus, Is in 8. Synodo dicit Laicos debere ab Ecclesiasticis negotijs abstinere, & episcopos tantum debere res ecclesiasticas tractare.

Laici debent à rebus ecclesiasticis abstinere. Ergo Papa non potest errare in scriptura explicanda. Item soli episcopi debent res ecclesiasticas tractare, Ergo Papa non potest errare in Scriptura explicanda.

Ridicula, & iam antè à nobis refutata.

Octauus testis est Theodoricus rex Gotthorum Arrianus. Is in 6. Synodo Rom. in Synodali, inquit,

*est arbitrio, in tanto negotio sequenda præscribere, nec aliquid ad se præter reuerentiam de ecclesiasticis negotijs pertinere.*

Qui sequenda præscribit, ille non potest errare.

Concilium sequenda præscribit, Ergo papa Romanus non potest errare in scriptura explicanda.

Respondeo Maiorem esse falsam, Iam ante enim ostendimus, eos, qui sequenda præscribunt, sæpè errasse. Deinde aliud concluditur, quàm fuit in præmissis. Sequitur aut concilium non posse errare. Sed istam conclusionem esse falsam, manifestum est. Illa enim concilia, quæ papistæ habent pro legitimis, sæpè contradictoria statuerunt. Vt Nicenum primum & Tridentinum de *Papæ potestate*. Carthaginense & Laodicense de *libris Canonicis*, Africanum & Tridentinum de *Appellationibus*, & multa alia. Vnde apparet aliquam ex præmissis falsam esse. Illa est Maior, quemadmodum antè ostendimus. Deinde etiamsi hæc conclusio verà esset, tamen non iuuaret causam Bellarmini. Papa enim neque concilium, neque sanctus, neque Sancti Concilij sanctum membrum, multò minus sanctum Conciliū est, vt suo loco ostendemus. Quòd autem Bellarminus dicit ex Basilio, *Imperatores post Episcopos subscripsisse*, inde non sequitur, papam Romanum non posse errare in scriptura explicanda, sed istos Imperatores fuisse *modestos & humiles* rectè sequitur. Est igitur fallacia à non caussa, vt caussa. Atque hæc de Argumentis ab Imperatorum auctoritate petitis. Cum autem hæc



hæc media omnia, aut aliud concludant, aut nihil faciant ad rem, manifestum est papæ iudicium propter illa non esse Interpretationis regulam.

## CAPVT VII.

*Argumenta à Græcorum patrum auctoritate pro papisticæ interpretationis regula adducta refutantur.*

**A**rgumenta, quæ Bellarminus ab Imperatorum auctoritate pro papisticæ Interpretationis regula adduxit, refutauimus cap. superiori, nunc refutabimus illa, quæ à Græcorum patrum auctoritate adduxit. Primum argumentum ducitur ex Irenæo, qui docet lib. 3. cap. 2. *controuersias non posse definiri ex scripturis, quia variè ab hæreticis exponuntur.*

Quicquid dicit Irenæus, hoc est verum. Sed Irenæus dicit ex Scripturis controuersias finiri non posse. Ergo Papa non potest errare in Scriptura interpretanda.

Respondeo aliud concludi, quàm fuit in præmissis. Deinde Maiorem non esse simpliciter veram. Irenæus enim *recenset librum Herma inter Canonicos.* Euseb. Eccles. hist. lib. 5. cap. 8. patrocinator etiam *errori millenariorum.* Hieronymus in Catalogo. C. Papias, Idem in Ezechielem, cap. 36. errat etiam in ætate Christi. lib. 2. Cap. 39. & 40. Ergo non quicquid dicit Irenæus, hoc est verum. Denique & Minor est falsa. Non enim Irenæus ex sua sententia, sed ex hæreticorum sententia dicit, Scripturam posse variè explicari. Hæretici enim varias interpretatiões com-

comminiscebantur, quas se ab Apostolorum traditionibus accepisse iactabant. Hoc ita esse, manifestū est ex eodem capite. *Cū ex Scripturis arguuntur*, loquitur de hæreticis, *in accusationem conuertuntur ipsarum Scripturarum*, quia variè sint dicta, & quia non possit ex his inueniri veritas ab his, qui nesciunt traditionem. Alloquin ipse Irenæus fatetur veram sententiam ex Scriptura colligi posse. Libro enim 2. capite 46. & 47. dicit, *sanum sensum*, & *qui sine periculo est*, ipsam esse, *qui apertè & sine ambiguo*, ipsis dictionibus in Scriptura ponitur. Et lib. 3. cap. 12. *ostensiones, quæ sunt in Scripturis non possunt ostendi, nisi ex ipsis Scripturis*. Quia hoc ipso loco, postquam de constanti Ecclesiarum confessione disseruit, ad ipsam Scripturam, tanquā ad certam veritatis normam recurrit. *Reuertamur*, inquit, *ad eam, quæ est ex Scripturis, ostensionem*. lib. 3. cap. 5. Vnde colligi potest, tantum vnum esse sanū sensum Scripturarum, & controuersias ex ipsis Scripturis definiri posse, secundum Irenæum. Deinde si verum est, quod Irenæus dicit, hæreticos *iactare varias expositiones*, easque dicere se ab Apostolica traditione accepisse, videat Bellarminus, an ne papistæ hoc habeant cum hæreticis commune. Si autem Bellarminus argumentum in hunc modum format.

Quod variè exponitur, eius vera sententia est illa, quam habet Papa Romanus. Sed sacra Scriptura variè exponitur, Ergo ille est verus sensus sacrarum Scripturarum, quem affert Papa Romanus.

Tum respondeo Maiorem esse falsam. Est enim petitio principij. Deinde multi papæ attulerunt

expōsitiones, quæ ex diametro erāt contradictoriæ, & simul veræ esse non poterant, neque vnquam probabit Bellarminus Maiorem ex Irenæo. Deinde & Minor falsa est. Scriptura n. non admittit varias expōsitiones, easque omnes legitimas, neque hoc vnquam probabitur ex Irenæo. Nam suprà notauit Irenæus, *hanc esse legitimam Scripturæ explicationem, quæ est secundum scripturas, lib. 4. 63. vel quæ sine ambiguo ipsius dictionibus posita est in Scripturis. lib. 2. 46.* & docet non orthodoxos, sed hæreticos, vt iam dixi, scripturam variè explicare. Secundum Argumentum petitur ex eodem Irenæo, quòd ille lib. 3. cap. 3. *remit- tit hereticos ad Ecclesiam Romanam.*

Ad quos hæretici ab Irenæo remittuntur, illi nō possunt errare in scriptura explicāda. Sed Romana Ecclesia est illa, ad quam hæretici ab Irenæo remittuntur, Ergo Papa Rom. non potest errare in scriptura explicanda.

Respondeo Maiorem esse falsam. Nam antè ostendimus, eos sapè aberrasse, ad quos alij iudicandi remittebantur. Deinde aliud est in Conclusionē, quàm in præmissis. Si autem dicis, hoc saltem sequi, Ecclesiam Rom. non posse errare in scriptura explicanda, Respondeo hoc quidem sequi, sed propter Maioris falsitatem hoc verum esse non posse, deinde verum non esse, manifestum est: ecclesia enim Rom. quæ tempore Irenæi fuit, *immeritò damnauit Ecclesias Orientales.* Hieronymus in Catalogo, Cap. Irenæus. & Euseb. Ecclesiast. Hist. lib. 5. cap. 24. & 25. Plura exempla passim occurrunt. Deinde Irenæus non solum Romanam ecclesiam producit testem veritatis; sed

sed & Asiaticas ecclesias eodem nomine in testimonium producit, & Polycarpi testimonium eodem ordine, quo Romanam ecclesiam collocat. *Hic, inquit, docuit semper, quæ ab Apostolis didicerat, quæ & ecclesia tradidit, & sola sunt vera, & testimonium his perhibent, quæ sunt in Asia ecclesiæ omnes, & quæ usque adhuc successerunt Polycarpo.* & paulò post, *Sed &, quæ est Ephesi ecclesia, à Paulo quidem fundata, Iohanne autem permanente apud eos, usque ad Traiani tempora, testis est verus Apostolorum traditionis.* Vnde apparet Irenæum non in Ecclesia Rom. aliquam prærogatiuam, sed in doctrinæ successionem omne veritatis robur collocare. Præterea etiam si ambæ præmissæ veræ essent, tamen hoc non iuuaret causam Bellarmini. Nā licet Ecclesia Rom. quæ tempore Irenæi erat, fuerit sana in doctrina, isthinc tamen non sequitur istā colluuiem quæ nunc Romæ est, esse sanam in doctrina. Perinde n. est, ac si dicas: Cùm Petrus Antiochiæ doceret, erat isthic sana doctrina, Ergo & nūc illic sana doctrina est. Itē cùm Paulus Corinthi doceret, erat isthic sana doctrina, Ergo & nunc istic sana doctrina est. Planè eodem modo non sequitur, tēpore Irenæi, Romæ, Smirnæ, Ephesi, & in reliquis Asiaticis Ecclesijs erat sana doctrina, Ergo & nunc isthic sana doctrina est. Quemadmodum enim Ephesi, Smirne & Corinthi propter religionis corruptionem nunc sana doctrina non est, ita etiam Romæ propter religionis corruptionem nunc sana doctrina non est. Profiteantur igitur Romani eandem doctrinam, quā tempore Irenæi habuerunt, administrent eadem sacramenta, idque eodem modo, restituant totum re-

regimen ecclesiasticum, quod tempore Irenæi fuit, relinquant omnia ista, quæ tempore Irenæi ad ecclesiam non pertinebant, & fatebimur Romæ esse veram ecclesiam, neque inter nos & Romanos erit vllum dissidium. Quod autem Bellarminus existimat se hac strophâ posse euincere, vt papisticas interpretationes etiam cum Dei verbo pugnantes pro authenticis accipiamus, longè errat, & dum hoc per Irenæum probat, pròdit intolerabilem versutiam. Irenæus enim lib. 4. cap. 63. dicit, *legitimam explicationem esse eam, quæ est secundum scripturam*. Ac tales expositiones cum papa nobis offert, recipimus; cum verò alias affert, quæ non sunt *secundum scripturam*, eas cum bona venia papæ repudiamus.

Post Irenæum producit Athanasium, qui dicit in epist. ad solitariam vitam agentes, *iudicium Ecclesiæ non accipere suam auctoritatem ab Imperatore*.

Quod non accipit auctoritatem ab Imperatore, hoc accipit auctoritatem à papa. Sed ecclesiæ iudicium non accipit auctoritatē ab Imp. Ergo sententia papæ est oīs interpretationis regula.

Respondeo, planè Herculeum Argumentum. Quod enim est in conclusione, illud non est in præmissis. Deinde Maior est falsa, Multa enim sunt, quæ neque ab Imperatore, neque à papa habent auctoritatem. Ergo Maiorem esse vniuersaliter veram non est necesse. Et ob eam causam neque conclusionem veram esse posse. Deinde non fuit Athanasij sententia, authenticam interpretationem ab Ecclesia suscipere auctoritatem. Multò minus voluit Athanasius, vt authentica interpretatio suam auctoritatem

ritatem à Papa acciperet, & vt hoc commodiùs intelligatur, quæstio est, an papæ sententia sit interpretationis regula? Tu ais, nos negamus, Tu pro confirmatione tuæ sententiæ adducis ex Athanasio *quòd Ecclesie iudicium non capiat auctoritatem ab Imperatore.* Hoc utique medium est negatiuum, quomodo igitur ex eo affirmatiuam conclusionem necites? Sanè quoniam negatiuum est, sequitur *extraneum* esse, at debebat maximè *domesticum* esse. Ergo hoc totum, quod neque *antecedens*, neque *consequens* papalis interpretationis est, nihil facit ad rem. Perinde enim est ac si dicas,

Nullæ Begittæ habent donum continentie, Ergo omnes Monachi sunt casti.

Post Athanasium adducit Basilium. Is epist. 52. ad Athanasium, suadet Athanasio, vt ille scribat ad episcopum Romanum, vt ille *sua auctoritate dissoluat acta concilij Ariminensis.*

Quicquid Basilius dicit, hoc est verum, sed Basilius voluit, vt episcopus Rom. dissolueret acta concilij Ariminensis, Ergo papa non potest errare in scriptura explicanda.

Respondeo aliud esse in cōclusionem, quàm in præmissis. Deinde quod est in conclusione, illud nunquam voluit Basilius. Ille enim in Moralibus, summa 28. capite 1. dicit, *quòd non oportet simpliciter, neque citra examinationem corripere ab his, qui simulant veritatem, verum ex dato nobis à scriptura charactere vniquemque cognoscere.* Idem summa 26. cap. 1. Oportet, inquit, omne verbum, aut rem confirmare sacra Scriptura testimonio, ad certitudinem quidem & perfectionem bo-

*norm, ad confusionem verò malorum.* Vnde apparet ex Basilio nihil tale colligi posse. Si autem quis argumentum in hunc modum format.

Qui tentat acta concilij Ariminensis destruere, ille non potest errare in Scriptura explicanda. Sed papa tentat acta concilij Ariminensis destruere, Ergo papa non potest errare in scriptura explicanda.

Tum Maior non est vera. Nam non sequitur, eum qui in impio concilio euertendo laborauit, non posse in scriptura explicanda errare. Vtrumque enim nempe errare in scriptura explicanda, & laborare in impio concilio euertendo possunt esse in vno eodemque, idque simul, & eodem tempore. Deinde non solus papa in concilio eo euertendo laborauit, sed & Basilius & Athanasius, & multalij in eo concilio euertendo laborarunt. Vnde sequitur & eos non posse errare in Scriptura explicanda. Sed hoc non vult Bellarminus, ergo nec illud velle debet. Denique si maximè sequeretur episcopum Romanum, qui fuit tempore Athanasij non potuisse (quod tamen est falsissimum) errare in scriptura explicanda, nihil tamen iuuaret causam Bellarmini. Papa enim neque est episcopus, neque cum episcopo quicquam habet commune, vt suo loco ostendemus. Basilium sequitur Nazianzenus. Ille in oratione qua se excusat, quòd diu ab ecclesiastica functione abstinuerit, dicit, *oues non debere pastores pascere, neque se supra terminos eorum eleuare.* Hinc infert Bellarminus papam non posse errare in Scriptura explicanda.

Oues



Oues non debēt pastores pascere, id est, oues debent ab omni polypragmosyne abstinere,  
Ergo papa Romanus non potest errare in scriptura explicanda.

Mirabilis & prorsus Iesuitica logica, nihil enim est in consequente, quod fuit in antecedente. Et tamen, si Dijs placet, est firmum Argumentum. Sed ad rem.

Qui non debent ab ouibus pasci, illi non possunt errare in Scriptura explicanda. Sed pastores non debent ab ouibus pasci, Ergo papa Romanus non potest errare in Scriptura explicanda.

Respondeo Maiorem esse falsam. Non enim quicumq; ab ouibus pasci non debent, non possunt errare. Augustinus enim, Irenæus, Lactantius, Cyprianus, Basilius, & multi alij non debuerunt ab ouibus pasci, potuerunt tamen errare, imò errarunt etiam. Ergo & conclusio est falsa. Deinde etiam si conclusio vera esset, tamen non iuaret causam Bellarmini, nam istinc efficeretur nullum pastorem posse errare in Scriptura explicanda. Sed hoc non volunt papistæ, volunt enim solum Papam non posse errare in Scriptura explicanda, reliquos autem omnes pastores posse errare. Quod si verum est, manifestum est, hoc non esse idoneum medium ad illud probandum, quod Bellarminus intendit. Deinde totum Argumentum nihil facit ad rem. Nazianzenus enim *de solis pastoribus* loquitur, papa autem non est pastor, quem admodum suo loco ostendemus. Hæc ad Ma-

iorem. Ad Minorem dico, illam posse dupliciter intelligi, vno modo quòd oues non debēt sibi per πολυπραγμοσύνην docendi partes sumere, illud fatemur. Altero modo, quòd oues nullo modo in doctrinam pastorum inquirere debent, sed permittere pastoribus, vt quidlibet afferāt & doceant. Sed hoc negamus. Contrarium enim legimus, Act. 17. 1. Ioan. 4. Matth. 23. Cùm igitur ex his constet nos debere in doctrinam propositam inquirere, falsos doctores obseruare, & cauere, ne illorum doctrina decipiamur. Nō debet Bellarm. ægrè ferre, quòd in papæ doctrinam inquirimus, ille enim falsorum doctorem caput est. Sed & alterum argumentum ex eodem Nazianzeno affertur, is n. in oratione ad suos ciues metu perculsos dicit, *Imperatorem & ciues esse suo imperio subiectos*. Hinc infert Bellarminus papam Rom. non posse errare in scriptura explicanda.

Imperator & populus sunt Nazianzeni imperio subiecti, Ergo papa non potest errare in scriptura explicanda.

Pudet me horum argumentorum, sed ad rem.

Cuius imperio princeps & populus subiectus est, ille non potest errare in Scriptura explicanda. Sed Nazianzenus est ille, cui Imperator & populus subiectus est, Ergo papa Rom. non potest errare in scriptura explicanda.

Respondeo aliud concludi, quàm fuit in præmissis. Si dicis, hoc saltem sequi, Ergo Nazianzenus non potest errare in scriptura explicanda, tum respondeo Minorem esse ambiguam, & posse duobus modis intelligi, vno modo, quòd episcopus habet imperium

periumulare in imperatorem, & tum Minor simpliciter est falsa. Notum enim est illud, *principes gentium dominantur, vos autem non sic.* Matth. 20. v. 25. Marci 10. v. 42. Luc. 22. v. 25. Si autem Minor intelligitur de regimine spiritali, tum illa quidē est vera, sed Maior est falsa. Ambrosio enim hoc modo, subditi & princeps subiecti fuerunt, & tamen errauit. Idem de Augustino, Cypriano, & alijs dici potest. Deinde etiam si Maior vera esset, tamen nihil iuuaret causam Bellarmini, sequeretur enim nullum episcopum posse errare, omnes enim episcopi habent spirituale imperium in suos auditores, sed hoc non vult Bellarminus. Ergo hoc medium non est idoneum ad illud probandum, quod Bellarminus intendit.

Nazianzenum sequitur Chrysostomus, is homilia vltima in Iohan. dicit, *Petrus esse toti orbi à Christo magistrum præpositum.*

Petrus est toti orbi magister præpositus, Ergo papa non potest errare in Scriptura explicanda.

Equidem Bellarmine hæc strophæ Helleboro potius, quàm logicis rationibus purgandæ sunt.

Petrus est totius orbis magister. Papa non est Petrus, neque cum Petro quicquam habet commune, Ergo papa non potest errare in Scriptura explicanda.

Estne egregium hoc argumentum? Sed ad rem.

Qui est totius orbis magister, ille non potest in Scriptura explicanda errare, sed Petrus est totius orbis magister, Ergo papa non potest errare in Scriptura explicanda.

Respondeo subiectum conclusionis non esse in præmissis. Sunt igitur 4. termini. Deinde & Basilus dicitur διδάσκαλος τῶ οἰκουμένης. Theod. lib. 4. c. 16. Num inde inferet Bellarminus & Basilium non posse errare in Scriptura explicanda? Prætereà si dicis saltem sequi, Petrum non posse errare in Scriptura explicanda, hoc quidem verum est, sed non tantum, nam solus Petrus non fuit totius orbis magister, sed omnes Apostoli habuerunt hoc cum Petro commune. Si igitur hoc est idoneum argumentum, quòd quis non possit errare, sic colligendum esset.

Qui sunt totius orbis magistri, illi non possunt errare in Scriptura explicanda. Sed oēs Apostoli sunt totius orbis magistri, Ergo oēs Apostoli non possunt errare in script. explicanda.

Hoc argumentum quidem verissimum est, sed nihil ad causam Bellarmini. Papa enim non est Apostolus, neq; quicquam habet cum Apostolis cōmune. Officium enim Apostolorum fuit extraordinarium, papæ autem officium non est extraordinarium. Deinde Apostoli fuerunt diuinitus à Deo vocati, papa autem neque diuinitus neque humanitus est à Deo vocatus. At dicis, Papam esse Petri successorem. Sed hoc est falsum. Petrus enim prædicando paut oues Christi, Papa autem occidit oues Christi, Testes omnes historiæ. Deinde Petrus prædicauit doctrinam Christi, Papa autem defendit doctrinam Dæmoniorum, vt suo loco ostendemus. Ergo quod iactat de sua successione falsum est, & si maximè verum esset, Papam esse Petri successorem, tamen nihil faceret ad rem, esset n. tale argumentū.

Qui

Qui non potest errare, eius successores etiam non possunt errare. Sed Apostoli non possunt errare, Ergo eorum successores nō possunt errare.

Quod si verum est Bellarmine, sequitur nullum episcopum posse errare, omnes enim episcopi legitime vocati sunt Apostolorum successores. Cyprianus enim lib. 4. epist. 9. ad Pupianum dicit, *omnes prepositos Apostolis vicaria ordinatione succedere*. Sed hoc non vult papa Romanus. Quare igitur per hanc stropham probare contendit se non posse errare, cum neque episcopus sit, neque cum bono episcopo quicquam habeat commune? Sed ad rem. Nos dicimus Maiorem esse falsam. Nam Paulus dicit Act. 20. *fore ut post suum discessum multi lupi rapaces introeant in Ecclesiam, & eam dilacerent*. Petrus dicit, *extremis temporibus venturos esse falsos doctores*, epist. 2. cap. 2. Quin ipse Christus docet, Matth. 25. *futuros esse Pseudopphetas, qui si fieri possit, etiam electos sint decepturi*. Vnde apparet non omnes successores Apostolorum fore bonos, nedum tam bonos, ut non possint errare. Et quid opus est verbis, ipsa experientia ostendit quosdam Apostolorum successores multas hæreses sparsisse, & ecclesias quasdam funditus euertisse. At dicis, Petrus docuit Romæ, et papa docet Romæ, Ergo papa est Petri successor. Sed & Simon Magus docuit Romæ. Viderit Bellarminus, numne papa Simonis Magi potius, quam Simonis Petri successor sit.

Post Chrysostomum adducit Cyrillum, Is in thesauro apud Thomam in opusc. cont. Græcos inquit, *oēs à Papa Rom. accipere debere quid tenendū et credendū sit.*

*fit.* Sed hoc testimonium non dignabor responsione. Apud Cyrillum in Thesauro non extat. Quod ad Thomam attinet, cum dolemus non vixisse ævo feliciore. Atque hæc de argumentis, quæ Bellarminus ex græcis patribus attulit, quæ quoniam vel aliud concludunt, vel nihil faciunt ad rem, manifestum est, thesin æquè incertam esse, atque antè erat.

## CAPVT VIII.

*Argumenta à Latinorum Patrum auctoritate pro papistica interpretationis regula adducta refutantur.*

**G**Ræcos patres non patrocinari sententiæ Bellarmini ostendimus capite superiori, nunc idē de Latinis patribus ostendemus. Primo loco adducit Tertullianum, is dicit lib. de præscript. *Ergo non ad scripturas provocandum est, nec in his constituendum certamen, in quibus nulla, aut incerta victoria est.* Hinc infert papam nō posse errare in scriptura interpretanda.

Nulla certa victoria ex Dei verbo, Ergo Papa non potest errare in scriptura interpretanda.

Mirabile argumentum. Nulla enim pars consequentis cum antecedente congruit. Tamen formabimus illud syllogisticè.

Quod ex Dei verbo consequi non possumus, hoc assequemur ex papa Romano. Sed certam intelligentiam ex Dei verbo assequi non possumus, Ergo eam assequemur ex Papa Rom.

Resp. Maiorē in quibusdā verā esse, in quibusdā falsam, nullæ n. fraudes, nulla mendacia, nullæ hæreses, nulla flagitia ex Dei verbo deduci possunt. At talia

Na multa ostendi possunt ex papa Romano, sunt igitur quædam, quæ non ex Dei verbo, sed ex papa deduci possunt. Non tamen negamus esse quædam, quæ ex utroque probari possunt, ut esse hominem mortalem. Hinc apparet Maiorem secundum quid veram, secundum quid falsam esse, & hoc sufficit ad conclusionis falsitatem ostendendam. Sed neque Minor simpliciter vera est. Nam non vult Tertullianus, non posse simpliciter veram sententiam ex scripturis colligi, sed non posse *contra hæreticos* qui scripturas negant, certam sententiâ colligi ex scripturis. Quæ enim quisque principia negat, contra eum ex istis principijs disputari non potest, ut rectè inquit Tertullianus. Quod si verum est Bellarmine, quorsum tua tam operosa disputatio de falsis & peruersis principijs nobis obtrudendis? Hanc autem veram esse mentem Tertulliani constat ex eodem Tertulliano, dicit enim dicto libro, *ista hæresis non recipit quasdam scripturas, & si quas recipit, adiectionibus & subtractionibus ad dispositionem instituti sui interuertit.* Deinde idem Tertullianus dicit contra Praxeam, *Probare autem debebas tam apertè ex scripturis, quàm nos probamus.* Ibidem, *aut exhibe probationem meis similē, id est, sic Scripturas ostende.* Ex quibus sequitur Tertullianum nō simpliciter negasse, veritatem ex scripturis elici non posse, sed tantum dixisse, non posse contra eos, *qui scripturas negant*, certam victoriâ ex scripturis reportari, ut si quis ex Nouo Testamento vellet Iudæum conuincere, ille operam perderet, Iudæus enim Nouum Testamentum non admittit. Alterum Argumentum est ex eodem Tertulliano. Is



lib. de præscriptionibus. *Quid autem, inquit, prædicauerint, id est, quid illis Christus reuelauerit, et hic præscribam, non aliter probari debere nisi per easdem ecclesias, quas ipsi Apostoli condiderunt.* Hinc infert Bellarminus papam non posse errare in scriptura explicanda.

Hæretici qui scripturas negant, ac absurdos scripturarum sensus excogitant, & tamen volunt pro Christianis censerī, non possunt melius refelli, quàm ea doctrina, quam Apostolicæ ecclesiæ profitentur, Ergo papa non potest errare in scriptura explicanda.

Rursus nulla pars consequentis est, quæ cum antecedente congruit, sed flectamus argumentum ad formam.

Quod Apostolicæ ecclesiæ faciunt, hoc facit papa Romanus, sed Apostolicæ ecclesiæ verum scripturarum sensum explicant, Ergo papa Romanus non potest errare in Scriptura explicanda.

Respondeo Maiorem esse falsam. Apostolicæ enim ecclesiæ adhærent verbo Christi. papa non adhæret verbo Christi. Deinde Apostolica ecclesia verbum eo modo intellexit, quo Christus & Apostoli intellexerunt. At papa sæpè contrarium sensum adfert, ut suo loco probabimus. Cum igitur Maior falsa sit, sequitur conclusionē veram esse non posse. At dicis, Rom. ecclesiam esse Apostolicam, & propterea semper verum sensum afferre.

Apostolica ecclesia verum Scripturarum sensum affert. Rom. ecclesia est catholica, Ergo papa non potest errare in scriptura explicanda.

Respondeo

Respondeo Maiorem posse intelligi duobus modis, nempe de ea, quæ ἀπλῶς Apostolica est, atque tum Maiorem concedimus. Deinde de ea quæ κατὰ τὴν Apostolica est, & tum eam negamus. Corinthiaca enim ecclesia fuit Apostolica, & tamē habuit graues errores. Galatarum item ecclesia fuit Apostolica, & similiter habuit graues errores. Quatenus igitur ecclesiæ sunt Apostolicæ, eatenus non possunt errare, quatenus autem non sunt Apostolicæ, eatenus possunt errare. Hæc de Maiore, vnde tantum sequitur, Ecclesiam non posse errare, quatenus est Apostolica. Minorem si Bellarminus intelligit de ea ecclesia, quæ tēpore Tertulliani erat, tum concedimus eam. Romana enim ecclesia tum erat Apostolica, quemadmodum & Corinthiaca, Philippēsis & Ephesina. Si verò Minorem intelligit de eo cœtu, qui nunc est Romæ, Tum eam negamus. Romana enim præsens Synagoga non est Ecclesia Apostolica, nam non habet doctrinam Apostolicam, neque Sacramenta Apostolica, neque regimen Apostolicum, neque ministros apostolicè electos, neque vitam Apostolicā, imò nihil penè habet cum vetere Romana ecclesia commune præter locum. Qui si ad Apostolicæ ecclesiæ constitutionem sufficit, tum respondemus & Corinthi, Philippis, Ephesi, & alibi nunc esse apostolicas ecclesias. Quod si sequitur, tum non solum Romana ecclesia non potest errare in scriptura explicanda, sed reliquæ omnes ecclesiæ non possunt errare in Scriptura explicanda. si non sequitur, tum & Romana non potest nō errare in Script. explicanda. Deinde Bellarmine, hoc argumentum non nobis, sed vobis

vobis obijci debebat. Disputat enim Tertullianus contra eos, qui vel *Scripturas negabant*, vel non *perfectas esse dicebant*, vel *male explicabant*. Sic enim inquit, *Etsi aliquatenus integras præstat, nihilominus tamen diuersas expositiones commentata peruertit*. At hoc & vos facitis, præter genuinos enim libros, & apocryphos adducitis, & præter eos, multas absurdas fabulas sub nomine traditionum adducitis. Hos autem hereticos dicit conuinci posse, modò constet *de vero Scripturarum sensu*, atque eum dicit hunc esse, quem *Christus protulit, atque Apostolus docuit, quem Apostoli suis Ecclesiis primùm vna voce, deinde per epistolas tradiderunt*. Vnde colligit eam esse veram doctrinam, quæ cum illis Apostolicis ecclesijs, matricibus & originalibus fidei conspirat. Et paulò post hanc dicit esse *veram regulam, in qua incedere debemus, quam ecclesia ab Apostolis, Apostoli à Christo, Christus à Deo acceptam tradidit*. Vnde infert, non esse *admittendos hereticos ad ineundam de scripturis pronocationem, quos sine scripturis probamus, ad scripturas non pertinere*. Hæc nos reueremur & amplectimur. Maledictus enim esto, qui negat eum esse verum Scripturarum sensum, quem Deus Christo, Christus Apostolis, Apostoli Ecclesijs tradiderunt. Et quoniam scimus eum esse verum sensum, ideò negamus sensum Romani papæ esse verum. Papa enim non tenet eam doctrinam, quam Deus Christo, Christus Apostolis, Apostoli ecclesijs tradiderunt. Et quoniam primo loco produxisti Tertullianum, age definiamus hanc controuersiam ex Tertulliano. Ille dicit, *hunc esse verum sensum, quò Deus Christo, Christus Apostolis, Apostoli ecclesijs tradi-*  
*derunt.*

*derunt. Hoc fatemur. At quis est ille? Respondet Tertullianus Apostolos eum primum viva voce tradidisse, deinde literis consignasse. Ille igitur est verus sensus, qui literis consignatus est. At dicis, ille potest aliquando esse multiplex, ex illis igitur varijs sensibus, quisnam genuinus est? respondet Tertullianus in libro contra Praxeam, quis es, ut non putes accipienda, quemadmodum scripta sunt, maxime quæ non in allegorijs, sed in definitionib. certis & simplicibus habent sensum. Hanc Tertulliani decisionem si recipis, sublata est controuersia. Hunc enim dicimus esse genuinum sensum, quem verba vel figurata, vel propria præseferunt, hoc est, qui cum Dei verbo *χρὶ ἀπαλοῖται* congruit, si autem hanc repudias, frustrà nobis Tertullianum obijcis. Quod addis Romanam ecclesiã esse Apostolicarum præcipuam, non est apud Tertullianum. Tertullianus enim non dicit Romanam ecclesiã esse inter Apostolicas præcipuam, sed dicit, sic omnes Apostolica omnes primæ, dum omnes unam probant unitatem. Et paulò post, percurre, inquit, ecclesias Apostolicas, apud quas ipse *Cathedra Apostolica* adhuc suis locis præsidentur. Apud quas authentica literæ eorum recitantur, sonantes vocem, representantes faciem, proxima tibi est *Æchaia*, habes *Corinthum*, si verò non longè es à *Macedonia* habes *Philippos*, si potes in *Asiam* tendere, habes *Ephesum*, si verò *Italiam* adijceris (lego adieris) habes *Romam*, unde nobis quoque auctoritas præsto est, felix ecclesia, &c. Ex his apparet Romanam reliquis Apostolicis non præferri, sed in eodem cum illis gradu constitui. Ergo falsum tuum allegatum.*

Post Tertullianum adducit Cyprianum, is lib. 1. epist. 3. *Neque enim, inquit, aliunde hereses oborta sunt, aut nata sunt schismata, quam inde, quod Sacerdoti Dei non obtemperatur, nec unus in ecclesia ad tempus Sacerdos, & ad tempus iudex vice Christi cogitatur.* Hinc infert Bellarminus papam Romanum non posse errare in scriptura explicanda.

Qui in ecclesia episcopus vnus cogitatur, ille non potest errare in Scriptura explicanda. Sed Papa in ecclesia episcopus vnus cogitatur. Ergo papa non potest errare in Scriptura explicanda.

Respondeo medium terminum esse ambiguum. Potest enim ita intelligi, quod in tota & vniuersa ecclesia tantum vnus episcopus esse debet. Atqui ita non intellexit Cyprianus. Ponit enim se in eodem gradu cum papa Romano. Nam vocat eum fratrem suum, neque voluit illi in doctrina de non rebaptizando cedere. Manifestum igitur quod non agnouerit Cornelium pro vniuersali episcopo, neque iudicauerit eum in iudicando errare non posse. Deinde & ita accipi potest, quod in singulis particularibus ecclesijs vnus tantum debet esse episcopus. Atque hæc est mens Cypriani. Eandem enim sententiam iisdem ferè verbis repetit lib. 4. epist. 9. ad Pupianum. *Vnde, inquit, schismata & hereses oborta sunt, & oriuntur, nisi dum episcopus, qui vnus est, & ecclesia præest superba quorundam presumptione contemnitur.* Vbi citra omnem controuersiam de seipso loquitur, & dicit in singulis ecclesijs tantum vnum episcopum esse debere. Simile docet Socrates lib. 6. cap. 22. *Vna urbs, inquit, non debet duos episcopos habere.* Vnde colligo Cypria-

Cyprianum velle in omnibus & singulis ecclesijs tantum vnum episcopum esse debere, quem vniuersa fraternitas audire debet, & ex cuius contēptu hæreses & schismata nascuntur. Hoc ita posito, respondeo Maiorem esse falsam. Cyprianus enim fuit episcopus, vt & Ambrosius, & Augustinus, & tamen hi quandoque in Scriptura explicanda aberrarunt. Deinde & Minor est falsa. Papa enim hoc tempore non est episcopus, neque cum bono episcopo quicquam habet commune. Præterea si ambæ præmissæ veræ essent, tamen hoc non iuuaret causam Bellarmini. Sequeretur enim nullum episcopum posse errare in Scriptura explicanda. At hoc non vult papa Romanus, Ergo hoc medium non est idoneum ad illud probandum, quod Bellarminus intendit. Cyprianum sequitur Ambrosius. Is epist. 32. *negat Imperatores de episcopis, i. de eorum fide iudicare posse.* Hic infert Bellarminus papam non posse errare in scriptura interpretanda.

Imperator non debet de episcoporum fide iudicare, Ergo papa non potest errare in Scriptura explicanda.

Respondeo nullam esse consequentis cum antecedente cohærentiam, & argumentum antè à nobis refutatum est.

Ambrosium sequitur Hieronymus, Is in epistola ad Damasum, *discerne, inquit, si placet, obsecro, non timebo tres hypostases dicere, si iubetis.* Hinc infert Bellarminus papam non posse errare in Script. explicanda.

A quo Hieronymus petit consilium an liceat tres hypostases dicere, is non potest errare in scri-

ptura explicanda. Sed Damas. est ille, à quo Hierō. petit consilium an liceat 3. hypostasēs dicere?

Ergo papa nō potest errare in Script. explicāda.

Respondeo Maiorem non tantum esse falsam, sed etiam ridiculam. Quis enim vnquam dixit eum non posse errare, à quo quis consilium quærit? Cyprianus cum 35. episcopis *querit consilium à Felice & Aelio de Martiale & Basilide*, lib. 1. epist. 4. Magnus *consuluit Cyprian. an i qui a Novitiano baptizati erant, rebaptizari debent*. l. 1. ep. 9. Ianuarius cum 18. episcopis *consuluit Cyprianū, an i qui ab hæreticis baptizati sunt, rebaptizari debeant*, lib. 3. epist. 12. Ipse *Damasus Hieronymum de quibusdam consuluit*. Leo papa testat se aliquādo ab alijs episcopis *consilium petiisse*. ep. 17. ad episcopum Rauēnatem. Deinde Hieronymus ab alijs etiā multarum rerum explicationem petijt. In proœmio enim, epist. ad Ephes. *Alexandriam*, inquit, *nuper perrexi, ut viderem Dydimum, & ab eo in Scripturis omnibus, quæ habebam dubia, exquirerem*. Similia exempla passim occurrunt. Num hinc sequitur Felicem & Aelium non potuisse errare? num, inquam hinc sequitur Cyprianum cum baptizatos denuò baptizandos censeret, non errasse? Præterea non tantum ab episcopis Romanis, sed etiam ab alijs Episcopis consiliū petebatur. Imò ferè nullus episcopus fuit, quem non aliquis de quadam re consuluerit. Si igitur hoc argumentum obtineret, sequeretur nullum episcopum errare posse. Sed hoc non vult papa Romanus. Præterea ipsum Damasum sæpè errasse ostēdimus lib. 3. Vnde apparet conclusionem huius argumenti falsam esse, & ob eam causam aliquam premissam



missam falsam esse, Falsum enim ex vero colligi non potest. Denique ipse Hieronymus in epist. ad Galat. *Spiritus sancti*, inquit, *doctrina est, quæ Canonicis libris est prodita, contra quam si quid statuant concilia, nefas duco.* Et in Matth. cap. 23. *quod de Scripturis*, inquit, *auctoritatem non habet, hoc eadem facilitate contemnitur, quæ probatur.* Vnde apparet, non papam, sed ipsam Scripturam secundum Hieronymum esse omnis Interpretationis regulam. Postremò Damasus erat Romanæ ecclesiæ episcopus, eiusdem ecclesiæ presbyter erat Hieronymus. Quod igitur Hieronymus Damasum de voce suspecta consuluerit, inde non sequitur Damasum non potuisse errare, sed eum apud Hieronymum in magna auctoritate fuisse, rectè sequitur. Est igitur fallacia à non causa ut causa.

Hieronymum sequitur Augustinus. Is lib. 2. cont. Crescon. cap. 23. *quisquis*, inquit, *falli metuit huius obscuritate questionis, is ecclesiam de illa consulat, quam sine ulla ambiguitate Scriptura demonstrat.* Sed hæc verba dicto loco apud Augustinum non inveniuntur. Deinde nihil faciunt ad rem.

Quem de difficili re debemus consulere, ille non potest errare. Sed ecclesia est ille, quem de difficili quæstione consulere debemus. Ergo papa Romanus non potest errare in Script. explicanda.

Respondeo esse aliud in conclusione, quam in præmissis. Deinde non iuuat argumentum causam Bellarmini. Non enim docet quamlibet ecclesiam consulendam esse, sed eam, quam ostendit S. Scriptura. At quid hoc ad papam Romanum? ostendat Bellarminus præsentem Synagogam & tyrannidem Rom.

ex Scriptura, & consulemus eam. Præterea non voluit Augustinus papam Romanum esse omnis interpretationis regulam. Hoc enim eodem lib. cap. 31. *non sine causa*, inquit, *tam salubri vigilantia canon ecclesiasticus constitutus est, ad quem certi Prophetarum & Apostolorum libri pertinent, quos omnino iudicare non audemus, & secundum quos de ceteris vel fidelium vel infidelium libris libere iudicamus*. Hinc apparet non iudicium papæ, sed canonem Scripturarum esse omnis iudicii regulam. Nam si omnes fidelium libri debent secundum canonem iudicari, tum aut papæ non sunt fideles, aut illorum libri secundum canonem Scripturarum iudicari debent. Deinde quod secundum aliud iudicari debet, hoc non est omnis iudicii regula, sed est id ipsum, quod ad regulam examinatur. At papæ iudicium secundum aliud, nempe secundum canonem Scripturæ iudicari debet, Ergo papæ iudicium non est regula, sed est id ipsum, quod ad regulam examinatur.

Secundus locus est ex epist. 106. ubi Augustinus *ad omnia*, inquit, *illi nobis respondebat sicut fas erat, & oportebat Apostolicæ sedis episcopum respondere*. Hinc infert Bellarminus papam non posse errare in Scriptura explicanda.

Innocentius ita respondit ad postulata Africanorum, ut oportebat Apostolicæ sedis episcopum, Ergo nullus papa potest errare in Scriptura explicanda.

Respondeo consequentiam esse falsam. Est enim perinde ac si dicas, Plato fuit bonus philosophus, ergo nullus homo ignorat philosophiam. Deinde etsi in ista controuersia Pelagiana benè respondit

Inno

Innocentius, tamen alijs locis non benè respondit. In epist. enim regulari ad Decentium Euglibinum, *Manifestum est, inquit, in omnem Italiam, Gallias, Hispanias, Africam, Siciliam, insulasq; interiacentes nullum instituisse ecclesias, nisi eos, quò (lego quos) venerabilis Petrus, aut eius successores constituere sacerdotes.* Hoc manifestè falsum est. In Gallia enim prædicauit *Crescens*. Auctor Hieronymus in catal. C. Crescens. At Crescens non Petri, sed Pauli discipulus est. 1. ad Timoth. cap. 4. v. 10. Euseb. lib. 3. eccles. Hist. c. 4. Epiphan. cont. Alogos. In eadem Gallia docuit *Philippus*, auctor Gildas. At Philippus non à Petro, sed à Christo immediatè constitutus. Quam ob causam Pamelius eum *primum Galliarum episcopum vocat* in cap. 7. Tertull. cont. Iudæos. In Germania prædicauit *Apostolus Thomas*. Hieron. in Catal. cap. Thomas. At ille non à Petro, sed à Christo immediatè vocatus est, Matt. 28. v. 9. *Quin & Auentinus in Bolorum historia dicit, Lucium Pauli comitem Euangelium in Germania annunciaſſe.* In Anglia *Apostolus Paulus Euangelium prædicauit*, testis Theodoret. de corrigend. Græc. affect. lib. 9. In eadem insula prædicauit euangelium *Iosephus Arimatheus*, vt docet Gildas. At ille nō à Petro, sed à Philippo Apostolo ex Gallia submissus est, vt docet idem Gildas. In Italia prædicauit *Paulus Apostolus*. Act. 28. cap. v. 20. At ille nō à Petro, sed à Christo immediatè missus est, Act. 9. & ad Galat. cap. 1. In Hispania idem *Paulus* prædicauit. Chrysost. hom. 7. de laudibus Pauli. In eadem Hispania prædicauit *Iacobus Maior Apostolus*, testis Isidorus. At Iacobus non à Petro, sed ab

ipso Christo, immediatè missus est. Manifestum igitur non oēs quicunque in Italia, Gallia, Anglia, Hispania, Germania & interiacentibus insulis prædicarunt, à Petro & eius successorib. constitutos esse. Deinde Paulus, Iacobus Maior, Thomas, Philippus in prædictis regnis prædicarunt, vt iam demonstratum est. At illi omnes sunt Apostoli, Manifestum igitur plures Apostolos, quàm vnum Petrum in his regnis prædicasse. Et hæ tamen decretales epistolæ sunt fundamētum primatus Rom. Sed ad rem. Aut igitur supposititiæ sunt hæ Innocentij epistolæ, aut falsum est, quòd dicis papam ex Cathedra docentein non posse errare. Hoc enim scripsit in suis regularibus epistolis, quæ pro principio à papistis obtruduntur. Docuit igitur hoc ex Cathedra. At quod in ijs epistolis scripsit falsum est, potest igitur Papa errare etiam tum, cùm docet ex Cathedra, & ob eam causam eius iudicium non est omnis interpretationis regula. Ad ipsum argumentum non libet respondere, Est enim responsione indignum.

Tertius locus est, cap. 5. cont. epist. Fundamenti. *Ego verò, inquit, Euangelio non crederem, nisi me Catholica Ecclesia moueret auctoritas.* Hunc locum Caluinus sic interpretatur, *ego non credidissem Euangelio, nisi me ecclesie monisset auctoritas, & vult illud de præterito, non de presenti intelligendum esse.* Hanc explicationem allatrat Bellarminus, sed absque ratione. Nam paulò antè dicit Augustinus. *Si ergo inuenires aliquem, qui Euangelio non crederet, quid faceres dicenti tibi, non credo? & statim se exempli loco subiungit, ego verò non crederem, &c.* Vnde manifestum est, eum de præterito loqui

qui & non de presenti. Deinde cap. 14. eiusdem lib. eos, inquit, sequamur, qui nos inuitant prius credere, quod nondum valemus intueri, ut ipsa fide valētiores facti, quod credimus intelligere mereamur, non iam hominibus, sed in ipso Deo mentes nostras intrinsecus illuminante & confirmante. Vbi disertè dicit se hominibus credidisse, cum nondum valeret intuers. Deinde verò fide valentiorē factum non ab hominibus, sed à Deo confirmatum esse. Vnde necessariò colligo, Augustinum loqui de se vel nondū conuerso, vel nondum confirmato, & qui huic interpretationi contradicit, ille tantum ostendit pertinaciā suam. Sed esto, loquutus sit tantum Augustinus de re præsentī.

Augustinus propter ecclesiæ auctoritatem habet Euangelio fidem, Ergo papa non potest errare in scriptura explicanda.

Attende quæso Bellarmine, & vide, num vel prædicatum vel subiectum sit in antecedente. Item num inter antecedens & consequens sit vlla cohærentia. Simile est Iohan. 4. v. 42. Samaritani propter mulierem credebant in Christum, num inde sequetur nullam foeminam posse errare in Scriptura explicanda? Petrus in 1. epist. cap. 3. vult mulieres castè vivere, ut mariti per illorum conuersationem lucrifiant. Num inde rectè inferet Bellarminus, nullam mulierem castè viuente posse errare in scriptura explicanda?

Quartus locus est in præmio librorum de doct. Christ. Cogitemus, inquit, ipsum Apostolum Paulum licet diuina voce prostratum & instructum esse missum ad hominem, ut Sacramenta acciperet atque copularetur Ecclesie, & Censurionem Cornelium, quamuis exauditas ora-

*riones eius Eleemosynasq; respectas esse Angelus annunciauit, Petro tamen traditum imbuendum.*

Paulus ad hominem missus est, vt baptizaretur, & Cornelius Petro datus est instituendus, Ergo papa non potest errare in Scriptura explicanda.

Equidem Bellarmine in his argumentis tantundem est necessitatis, ac si dicas, baculus stat in angulo, Ergo papa non potest errare in Scriptura explicanda. Et tamen hæc est ista Iesuitica Theologia, quæ non tantum omnia didicit, sed sola didicit omnia, reliqui omnes scilicet ab ea dissentientes sunt fungi, indocti, stupidi, asini. Verum mi Bellarmine considera quibus conuitijs & contumelijs papistæ nos essent excepturi, si ita argumentaremur, quod si feceris, laudabis patientiam nostram, qua hæc tua legimus & refellimus. Hoc possum cum bona conscientia affirmare me tuis laboribus esse valde confirmatum. Nam cum tu homo tantæ lectionis non possis meliora argumenta afferre, satis ostendis vestræ causæ infirmitatem. Aperiat tibi Deus oculos, vt has meas responsiones possis absque præiudicio legere, ita sperarim te relicta falsitate veritatem agniturum esse. Vt autem omnibus constet, quæ sit Augustini de hac reseruentia, ex eius operibus vnum atque alterum locum adscribam. Sic igitur inquit de bono viduitatis cap. 1. *Sancta Scriptura nostræ fidei regulam figit.* Idem de Ciuit. Dei, lib. 19. cap. 18. *Ciuitas, inquit, Dei credit Scripturis sanctis, veteribus & nouis, quas Canonicas appellamus, unde fides ipsa concepta est, ex qua iustus uiuit, per quam sine dubitatione ambulamus, quam diu peregrinamur à Domino.* Idem contra literas Petilian

Petilian, lib. 3. cap. 6. *Si quis siue de Christo, siue de eius ecclesia, siue de quacunque alia re, qua pertinet ad fidem vitamq; nostram, non dicam si nos, sed quod Paulus adiecit, Si Angelus e cœlo vobis annunciauerit, præterquam quod in scripturis legalibus & Euangelicis accepistis, anathema sit. Idem de doct. Christ. Tumbat, inquit, fides si diuinarum Scripturarum vacillat auctoritas. Idem l. 2. de Baptis. cont. Donatist. c. 6. non afferamus, inquit, stateras dolosas, ubi appēdamus quod volumus, & quomodo volumus p arbitrio nostro, dicētes hoc graue est, hoc leue; sed afferamus diuinam stateram de Scripturis sanctis tanquam de Thesauris dominicis: & in illa quid sit grauius appendamus, imò non appendamus, sed a Domino appensa recognoscamus. Idem cont. Maximin. libro 3. capite 14. Sed nunc nec ego Nicanum, nec tu debes Ariminense tanquam præiudicaturus proferre concilium. Nec ego huius auctoritate, nec tu illius detineris. Scripturarum auctoritatibus non quorumcunque propriis, sed utriusque communibus testibus, res cum re, causa cum causa, ratio cum ratione seriet. Idem de Peccatorum Meritis, libro 2. capite 36. ubi de re, inquit, obscurissima disputatur, non adiuantibus diuinarum Scripturarum certis firmisque documentis, cohibere se debet humana præsumptio, nihil faciens in alteram partem declinando. Idem de Vnitate Ecclesiæ cap. 3. Non audiamus, inquit, hæc dico, hæc dicis, sed hæc dicit Dominus. Sunt certi libri Canonici, quorum auctoritati utrique consentimus, utriq; credimus, ibi queramus ecclesiam, ibi discutiamus causam nostram. Idem in eodem lib. cap. 10. Nec Catholicis, inquit, Episcopis consentiendum est, sicubi sorte falluntur ut contra Canonicas Dei Scripturas aliquid sentiant. Idē  
epist.*



epist. 19. *alios autem, inquit, ita lego, ut quanta libet sanctitate, doctrinaq; polleant non ideo verum putem, quia ipsi ita senserunt: sed quia mihi vel per illos auctores (canonicos, vel probabili ratione, q; à vero nō abhorreat, persuadere potuerunt.* Idem de Doct. Christ. lib. 3. cap. 28. *Per Scripturas, inquit, diuinas multo tutius ambulatur, quas verbis translatis occupatas cū scrutari volumus, aut hoc inde exeat, quod non habet controuersiam: aut si habet, ex eadem scriptura ubicunque inuentis & adhibitis eius testibus terminetur.* Ex his & similibus euidenter colligo ipsam Scripturam secundum Augustinū esse omnis doctrinæ, atque aded omnis interpretationis regulam. Ad reliquas allegationes ex patribus nihil respondeo, non enim libet ad eosdem ~~non~~ *non* tam sæpè idem iterare.

## CAPVT IX.

*Argumenta Bellarmini à ratione ducta refutantur.*

**A**Rgumenta quæ Bellarminus à Latinorum patrum auctoritate attulit, refutauimus, sequitur vt eius argumentum à ratione ductum diluamus. Illud est huiusmodi.

Non ignorabat Deus multas in ecclesia difficultates exorituræ circa fidem, debuit igitur iudicem aliquem ecclesiæ præuidere.

Ex hoc argumento, quod concedimus, infert istū iudicem non esse *spiritum priuatum*, neque esse ipsam *Scripturam*, neque esse *principem secularem*, Ergo esse *Papam Romanum*. Respondeo *spiritum priuatum* & *principem secularem* non esse controuersiarum iudicē, quod verò attinet ad reliqua duo membra, nempe  
Scri-

Scripturam & papam, distinctè respondeo, ac primū nego *Papam Romanum* esse controuersiarum iudicē, vel esse interpretationis regulam. Illud probabo ex argumentis, quæ Bellarminus hīc posuit, postea plenius probaturus. Primum argumentum, *quia non habet potestatem coactiuam*. Hoc eodem argumento ille probat, Spiritum priuatum non esse interpretationis iudicem. Ergo si ego possum ostendere papam non habere potestatem coactiuam, sequitur eum non esse interpretationis iudicem. Priusquam verò argumentum formabo, ostendendum est, de qua potestate loquar. Potestas enim coactiua alia est *interna*, alia *externa*. Externa non constituit controuersiarum iudicem. Nam si quicumque habet externam cogendi potestatem, esset controuersiarum iudex, tum quilibet princeps in sua ditione esset controuersiarum iudex. Sed hoc non esse verum etiam ipsi papistæ fatentur. Ergo externa cogendi potestas non facit controuersiarum iudicem. Deinde papa non habet externam cogendi potestatem. Sanè à Domino nostro Iesu Christo eā non habet, Luc. 22. 25. & Mar. 10. 42. *Reges gentium dominantur, vos autem non sic*. 1. Pet. 5. 3. *Neque dominantes cleris*. 2. Cor. 1. 24. *non quòd dominamur fidei, sed quòd administri simus*. Sed neque habet internam cogendi potestatem. Solius enim Dei est animos intus mouere, Act. 16. 14. *Deus aperuit cor Lydiae*. Ierem. 31. 33. *Indam legem meam in cordibus eorum*. Deut. 29. 4. *Neque tamen dedit Ichona uobis cor ad intelligendum, neque oculos ad uidendum, neq; aures ad audiendum, usque in diem hanc*.

Deinde peruolue totū vetus Testamentū, & disce  
Mosen

Mosen, Dauidem, Iosiam, & alios pios reges neminem ad hanc vel illam religionem coegisse, neque Prophetas docuisse, vt reges quemquam cogerent. Prophetæ adhortantur populum, dicendo, *Reuertimini*, Ezech. 18. 32. Ier. 3. 12. Tren. 3. 40. Ier. 3. 1. Neminem verò externa vi cogunt. Apostoli monēt, petunt, & obsecrant nos, vt ad Christum conuertamur, Matth. 3. 2. Marc. 1. 3. Luc. 3. 3. Rom. 12. 1. & 2. Cor. 5. 20. Neminem autem externa vi cogunt. Quin ipse Christus cum lachrymis rogauit Iudæos, vt resipiscerent. Matt. 23. 37. *Ierusalem, Ierusalem*, inquit, *quoties voluit te congregare? & noluisti*. Nullam tamen externam vim adhibuit. Doceat igitur Bellarminus, quo iure & qua auctoritate aliquem ad hanc vel illam religionem per externam vim adigat? Quin audi Bellarmine, Fides est donum Dei, Ep. 2. 8. Ergo nulla humana vi imperari potest. Et ob eam causam vanum est, quicquid de vi coactiua disputas. Potest papa per multa tormenta hominem cō adigere, vt taceat, potest etiam per externam vim efficere, vt homo aliud dicat, quàm sentit; vt autem hoc vel illud credat, non potest facere papa Romanus, est enim, vt dictum est, solius Dei, animos nostros flectere, & ad se conuertere. Quoniam autem secundum ipsum Bellarminum, ille non est controuersiarum iudex, qui istam vim non habet, necessariò sequitur, papam istarum rerum iudicem non esse. Secundum argumentum. Quia papa non est immediatè à Deo. Hoc etsi leuiculum est, valebit tamen contra Bellarminum. Nam ille dicit papam ideò esse cōtrouersiarum iudicem, quia *immediatè à Deo est*.

Si igitur ostendere possum eum non esse immediatè à Deo, sequitur eum non esse controuerfiarum iudicem. Non esse autem Papam immediatè à Deo manifestum est. Eligitur enim ab hominibus, nempe à Cardinalibus. Dicere verò illud immediatè esse à Deo, quod ab hominibus constituitur, est insanire. Deinde Platina dicit, *Syluestrum II. adiuvante Diabolo pontificatum consequutum esse, hac lege, ut post mortē totus illius esset, cuius fraudibus tantam dignitatem adeptus erat.* (In vita Sylvestri II. Idem scriptum est in *Supplemento Chronicorum ad annum Christi 997.* An verò ille, qui adiuvante Diabolo pontificatum consequutus est, sit immediatè à Deo, viderit Bellarminus. Cùm igitur ille secundum Bellarminum sit controuerfiarum iudex, qui à Deo est immediatè, & papa non sit immediatè à Deo, necessarium est, eum non esse supremum Controuerfiarum iudicem. In Peroratione dicit Bellarminus, *Episcopum tantò præstantiorem esse seculari principi, quanto cœlum terræ præstat*, atque inde infert, *Interpretationem pertinere ad principem Ecclesiasticum.* At Bellarmine, si totum Aristotelem, & omnes eius expositores perlegeres, nunquam redigeres hoc argumentum ad rectam formam. Tot enim ferè sunt errata, quot sunt verba. Quæstio enim est, an papa sit supremus controuerfiarum iudex. Medius terminus, quia Episcopus principi seculari præstat. Conclusio, ad principem Ecclesiasticum pertinet interpretatio. Si tamen hic Paralogismus ad formam Syllogisticam inflecti debet, formandus est, opinor, in hunc modum.

Qui seculari principi præstat, ad eum pertinet interpretatio

interpretatio Scripturæ. Sed Episcopus principi seculari præstat, Ergo ad solū papam pertinet interpretatio Scripturarum.

Vel in hunc modum.

Qui seculari principi præstat, ille est summus controuersiarum iudex. Sed Episcopus seculari principi præstat, Ergo solus papa est summus controuersiarum iudex.

Aliter, vt existimo, argumentum formari nequit. Respondeo verò ad Maiorem vtriusque Syllogismi, in ea nullam esse consequentiæ vim. Nam non quicumque principi seculari præstat, ille est summus controuersiarum iudex, neque ad eum pertinet Scripturarum interpretatio. Angeli enim omnes principibus secularibus præstant, Et tamen à Scriptura interpretanda in Nouo Testamento abstinuerunt, neque illud summum iudicium sibi vnquam arrogarunt. Deinde non ideo Episcopi Scripturam interpretantur, quòd principibus secularibus præstant, sed quòd Deus illis hoc officium mandauit. Ad Minorem dico, Episcopos præstare principibus in quibusdam, nō in omnibus, imò ipsos principes in quibusdam præstare Episcopis. Postremò aio conclusionem non quadrare cum præmissis. Papæ enim nulla fit mentio in antecedente. Denique ex his præmissis sequitur ad omnem Episcopum pertinere interpretationem, & omnem Episcopum esse controuersiarum indicem. Hoc ita esse affirmabit ipse Bellarminus, si rem diligenter expendet. At hoc non vult papa Romanus, ille enim sibi soli hoc arrogat. Deinde nihil facit ad rem. Nam non ad quemcunq;  
Scriptu-

Scripturarum interpretatio pertinet, ille non potest errare in Scriptura explicanda. Pertinuit enim illa ad Cyprianum, Augustinum, Hieronymum, Tertulianum, qui tamen omnes quandoque aberrarunt. Neque quicumque est controuersiarum iudex, ille semper rectè iudicat. Nam Cyprianus, Victor, Dioscorus, & alij fuerunt controuersiarum iudices, & tamen aberrarunt. Aliud enim est, vt antea dixi, *debere quod non prestat, & item aliud prestare quod debet*. Cum igitur hæc Bellarmini argumenta vel nihil faciant ad rem, vel contra eum concludant, & ille meliora afferre non possit, sequitur papam non esse omnis interpretatiōis regulam. Loco coronidis addo hanc sententiam ab ipso Bellarmino destrui. lib. enim 3. cap. 3. docet *ex solo literalis sensu peti debere argumenta efficacia, & certum esse eum sensum, qui ex verbis immediate colligitur, esse sensum Spiritus sancti*. At sensus Spiritus Sancti est verus & legitimus sensus Scripturarum. Eodem enim capite Bellarminus docet, *Scripturam debere intelligi sensu Spiritus Sancti*. Superuacuum igitur est iudiciū papæ. Nam ille sensus, qui ex verbis immediate colligitur, est legitimus, siue papa eum approbat, siue nō probat. & quilibet linguarum peritus absque papæ auxilio iudicare potest, quid verba immediate significēt. Quod ad 4. membrum attinet. Dicimus *Scripturam esse omnis interpretationis regulam*. Quæcunque enim interpretatio cum S. Scriptura congruit, illa est recta, & quæcunque discrepat, illa est falsa. Neque in æternum contrarium probabit Bellarminus. Concedimus etiam Scripturam esse omnis Interpretationis iudicē,

sed non prorsus eodem modo. Neq; valent contraria rationes, quas affert Bellarminus. Scriptura n. loquitur, etiam si non loquatur Bellarmino. Nam si epulo *Mosen & Prophetas audire debet*, Luc. 16, 29. Sequitur Mosen & Prophetas ei loqui, quomodo n. audiret eos, si non loquerentur? Deinde Augustinus dicit, *Deum nobiscum loqui, cum Scripturam legimus*. Feria 6. Ier. 1. post Domini pass. Præterea Aristot. dicit, *legem scriptam esse iudicem inanimatum*. Manifestum igitur & verbum Dei scriptum & iudicem esse. Cæterum iudex interpretationis est duplex, Superior & Inferior, Ita loquor docedi gratia. Superior est ipse Deus, hic errare non potest, Inferior est eius minister, nempe homo. Hic rursus est duplex. Alio immediate à Deo vocatus, & propterea diuinitus inspiratus, ut Prophetæ & Apostoli. Alius non immediate à Deo vocatus, ut cæteri Christiani, siue Episcopi, siue Laici, saluo tamen officiorum discrimine. Ille errare non potest. *Nam nihil loquitur, nisi quod Sp. Sanctus ei datus loqui*. Act. 2. 4. Hic verò potest errare. Exempla Tertull. Basilius, Cyprianus, Augustinus, Lactantius, Hieronymus, & alij omnes Patres. Quin ipse Gratianus hoc ex Augustino tanquam regulam protulit, Distinct. 10. *Negare, inquit, non possum, nec deo, sicut in ipsis maioribus ita multa esse in tam multis meis opusculis, quæ possunt nullo iudicio, & temeritate culpari*. Ergo non cuiusque iudicare licet de interpretatione, ille non potest errare in Scriptura explicanda, sed tum non errat, cum secundum legem scriptam, id est, scripturam iudicat. Cum verò non secundum legem scriptam iudicat, tum aberrat,

*Distinct.*



*Distinct. 10. C. ego solis, C. Quis nesciat, C. Noli, C. Neque quorumlibet.* Verùm quoniam de hac re deinde plenius dicam, ideò nunc plura non addam. Sufficiat ostendisse papam non esse omnis interpretationis iudicem, & ad omnes doctores, pastoresque legitimè vocatos pertinere interpretandi munus, omnibus item Christianis, saluo officiorum discrimine licere de interpretationibus iudicare.

## CAPVT X.

*Orthodoxa sententia de Scriptura interpretatione proponitur.*

**A**Rgumenta quibus Bellarminus probare voluit, Papam Rom. non posse errare in Script. explicanda refutauimus, sequitur vt ostēdamus papā in Scripturis explicandis errare posse, errasse etiam, tum etiam vt ostendamus, quānam sit sacrarū Scripturarum legitima interpretatio, Dicimus igitur papam posse errare in Scriptura explicanda, & probabimus illud in hunc modum.

Qui potest à Christo deuiare, & fieri hæreticus, ille potest errare in Scriptura explicanda. Sed Papa Romanus potest à Christo deuiare, & fieri hæreticus, Ergo papa potest errare in Scriptura explicanda.

Maiores est citra vllam controuersiam vera. Minorem probo. Debet enim reprehendi, si deprehendatur à fide deiuss, C. Si papa *Distinct. 40.* Et hoc reipla prestitit *Anastasius II.* Quam ob causam à Deo percussus perijt, C. *Anastas. Distinct. 19.* Et fasciculus Temp. fol. 53. Hic videtur secundus infamis papa, fauebat enim

*Nestorianis. Platina in vita Anastasij II. Hanc obrem ferunt hominem diuino nutu subito morbo correptum interuisse, Supplementū Chronicorū ad annum Christi 495. Hanc obrem, ut etiam Gratianus testatur, diuino nutu morbo statim correptus est, & cum in latrina esset, ut natura necessitati obtemperaret, intestina effudit, ut habemus Distinct. 19. C. Anastasius. Is itaque secundus papa infamis fuit. Idem fecit Achatius, quam ob causam à Gelasio excōmunicatus est. 24. Q. 1. C. Achatius. Vbi Glossa dicit, Papam posse papam ligare. Idem fecit Liberius. Ille enim favebat Arrianis, Fasciculus Temp. fol. 53. in Anastas. & fol. 48. in Liberio, quia Liberius Arrianis favebat, idēdō Felix cum Catholicis eum admonitum, & contumacem tanquam hæreticum de Ecclesia eiecerunt. Et paulō post, nota quod primum circa hæc tempora Romana ecclesia infamem Papam habuit. Damasus in Pontificali dicit, eum hæretico consensisse. Platina in vita Liberij dicit, eum cum hæreticis in rebus omnibus sensisse. Supplement. Chronicor. dicit, eum cum Arrianis sensisse. ad annū 332. Plura exempla nunc non adducam, & hæc sufficiunt ad Minoris veritatem ostendendam. Cum igitur papa hæreticus fieri possit, sequitur etiā eum in Scriptura explicanda errare posse. Secundum Argum. Quia tradit contradictoria.*

Qui docet contradictoria, ille potest errare in Scriptura explicanda. Sed papa docet contradictoria. Potest igitur papa errare in Scriptura explicanda.

Maior est extra controuersum posita, Minorem probo. In Concil. enim Carthag. 3. Can. 47. Ma-

*habacorum, Iudith, Tobie, Ecclesiasticus, & Sapientia libri sunt in Canonem relati. Idem libri in Cōcilio Laodicensi, Canon. 59. sunt extra Canonem relictī. At vtrumque concilium est à Concilio sexto generali, & à Papa approbatum. C. Quoniam. Distinct. 16. Statuit igitur papa contradictoria. Item in Concilio Sardicensi constitutum est, ut omnes Episcopi de positi appellent papam Romanum. Sed in Concilio Nicæno contrarium statutum est. Epist. Concil. Afric. ad papam cœlestinum, quæ est capite 105. Vtrumq; autem Concilium à Papa approbatum est. Ergo papa statuit contradictoria. Item papa Pelagius vetat, ne ullus Episcopus, ne Romanus quidem vniuersalis vocetur. C. Nullus. Dist. 99. Idem docet Gregorius. Cap. Ecce Distinct. eadem. At omnes papæ, qui post Bonifacium fuerunt, tantum hoc nomine vocari voluerunt. Sunt autem ista contradictoria. Plura exempla in singulis controuersijs annotabimus, & hæc sufficiunt ad Minoris veritatem ostendendam. Cum igitur papa cōtradictoria statuat, manifestum est eum quandoque in Scriptura explicanda errare posse. Tertium Argumentum, Quia papa adducit multas falsas & ineptas interpretationes, si uel ille quæstiones rationis adducit, ille potest errare in Script. explicanda. Sed si papa Romanus adducit multas falsas & ineptas, inæque interpretationes, Ergo papa potest errare in Scriptura explicanda. Maior est extra controuersiam posita. Minorem probō. Ac primum huius dicti Genes. In principio creauit Deus cœlum et terrā secundum papā Rom. vera interpretatio*

interpretatio est, *Papam esse Dominum omnium hominum*, Clement. lib. 5. de Maiorit. cap. V nam sanctam. Item huius dicti, *Deus fecit duo luminaria magna*, Genes. 1. 16. secundum papam Rom. vera expositio est *Pontificalom dignitatem esse quadragesies septies maiorem imperatoria dignitate*. De Maiorit. cap. Solitæ, & ibi Glossa. Item huius dicti Genes. 19. 9. *Ingressus es uo aduena, & iudicas?* secundum papam Romanum vera expositio est, *nullum Clericum subiectum esse civili imperio*. 11. Q. 1. C. Nullus. Itē huius dicti. Leuit. 20. 7. *Sancti estote, sicut ego sanctus sum*, secundum papam Romanum, vera expositio est, *ministerium Ecclesiæ nō debere uxorem ducere*. C. Proposuisti, Distinct. 28. Huius itē dicti, Psalm. 82. 6. *Vos Dyestis*, secundum papam Rom. vera expositio est, *non debere concilium conuocari sine papæ auctoritate*, Distinctione, 17. C. Synodum. Huius item dicti Psalm. 99. 6. *Moses & Aaron inter Sacerdotes*, secundum papam Romanum vera expositio est, *omnes Ecclesiasticos regi auctoritate Episcopi Rom.* Distinct. 22. C. Sacrosanctam. Huius itē dicti. Esaiæ 10. 3. *Ad quem fugietis pro auxilio, & ubi relinquetis gloriam vestram*, secundum papam Romanum vera expositio est, *Romanam Ecclesiam esse caput & auxilium omnium, & debere omnes iudicare, neque debere à quoquam indicari*, 9. Q. 3. C. aliorum hominū. Huius item dicti Ieremi. 1. 10. *Eccce constitui te hodie super gentes, ut exollas, & destruas*, secundum papam Rō. vera expositio est, *omnes Reges & Monarchas esse uasallos Rōm. Pontificis, atq; ipsum posse extollere quē velit, & opprimere quem velit*, de Maior. Cap. Solitæ. Huius item dicti Matthi. 7. 29. *Iesus docebat tanquām habens auctoritatem*

*auctoritatem, secundum papam Rom. vera expositio est, Papas Romanos esse Dominos suorum decretorum, & posse canonibus obedire, vel infringere 25. Q. 2. C. Idem permittente. Huius item dicti Matth. 12. 10. Christus curauit manum Sabbatho, secundum papam Roman. vera expositio est, Papas Roman. nullis legibus teneri, 25. Q. 2. C. idem permittente. Huius item dicti Mat. 16. 18. Tu es Petrus, secundum papam Rom. vera expositio est, Papam Romanum posse omnes homines iudicare, ipsum autem a nemine iudicari posse, 9. Q. 3. Cap. Aliorum hominum, Huius item dicti Matth. 17. 27. Mittere hamum, secundum papam Rom. vera expositio est, Papam omnibus hominibus in iurisdictione praeesse. 24. Q. 1. C. est aliud, Huius item dicti Matthæi 19. 6. Quos Deus coniunxit, homo non separet, secundum papam Rom. vera expositio est, neminem sine auctoritate Papa debere ab una ecclesia in aliam transferri, etiam si id Ecclesie utile sit, De Translationib. C. quanto personam, & C. Licet, Huius item dicti Luc. 22. 38. Ecce duo gladij hic, secundum papam Romanum vera expositio est, Papam habere in Ecclesia & in Republica iurisdictionem. De Iudicijs cap. Nouit. Huius item dicti Iohan. 18. 11. Recoge gladium tuum, secundum papam Romanum vera expositio est, Papam habere celestis & terrestres imperij potestatem. Clem. de Maiori. C. Vnam sanctam, Huius item dicti Iohan. 21. 16. Pasci oves meas, secundum papam Rom. vera expositio est, Papam esse supra Imperatorem, De Maiorit. C. Solitæ. Huius item dicti 1. Cor. 2. 15. Spiritualis diiudicat oia, secundum papam Rom. vera expositio est, p̄s hōes subiectos esse imperio papa, illum autem nullius imperio teneri,*

De Maiorit. C. Vnam Sanctā; Huius itē dicti, Rō. 1.  
 9. *Testis est mihi Deus, quod indefinenter meminērim ve-*  
*stri*, secundum papam Romanum vera expositio est,  
*Romanam Ecclesiam esse omnium Ecclesiarum primam,*  
*reliquas autem omnes Ecclesias Rom. Sedi subiectas esse.*  
 Distin. 22. C. Sacrosanctā & ibi Glossa. Huius item  
 dicti 1. Cor. 7. 5. *Ne fraudate alius alium, nisi si quid ex*  
*consensu ad tempus, ut vacetis ieiunio & precibus, &*  
*mutuam simul conuenite*, secundum papam Romanum  
 vera expositio est *Sacerdotes non debere uxores ducere,*  
 Distin. 82. C. Proposuiti. Huius item Dicti 1. Pet. 2.  
 13. *Subiecti estote cuius ordinationi humana,* secūdu pa-  
 pā vera expositio est, *oēs reges & principes papae subiectos*  
*esse debere,* De Maio. C. oēs. Tales sunt istę expositio-  
 nes, ex quibus totum penē corpus Canonicū exstru-  
 ctum est. Sunt autem papales. Papa enim eas produ-  
 xit, quod ex singulis scriptis doceri potest. Vult e-  
 tiam papa eas ab omnibus obseruari, 25. Q. 1. C. *Nul-*  
*li fas sit C. Violatores. C. Generali. C. omnia. Et Dist. 19. C.*  
*Sic omnes C. enimvero.* Papa item retulit eas inter Ca-  
 nonicas Scripturas, *Distinct. 19. C. Si Romanorum. C.*  
*Sic omnes. C. in Canonicis.* Deniq; vult papa, ut qui de-  
 creta ex huiusmodi expositionib. exstructa violat,  
 grauius puniatur, q̄ qui verbū Dei violat. *Nā qui Dei*  
*verbū violat, illi spes veniæ superest, qui verò hac Decre-*  
*ta violat, ei nulla spes veniæ superest.* Dist. 19. C. Si Ro-  
 manorū. Et 25. Q. 1. C. Violatores. Ex his manifestū  
 est, eas expositiones esse papales. Porro ex his & si-  
 milibus interpretationibus exstructa sunt decreta  
 papalia, & hæ ipse interpretationes sunt à papis ca-  
 nonizata; sunt igitur Cathedrales. Et quoniam Bel-  
 larminus

Iarminus docet, *Papam ex Cathedra docentem non posse errare*. Viderit ipse quomodo illud dogma, & has interpretationes defendere possit. Esse enim eas ineptas & falsas, adeo manifestum est, vt non existimem Bellarminum quamuis papæ mancipatum, adeo pudoris oblitum esse, & posteritatis iudicia contemnere, vt has ineptias & mendacia defendere ausit. Sequitur ergo papam in Scriptura explicanda errare posse. Hoc et si sufficeret, tamen ostendam ad papam non pertinere Scripturarum interpretationem, Est enim Dei & omnis numinis derisor & contemptor. de Translat. Episcop. C. Quanto, & ibi Glossa. ptum est, *Papa habet coeleste arbitrium, naturam rerum immutat, substantialia vnius rei applicando alij, de nullo potest aliquid facere, In his quæ vult, voluntas est ei pro ratione, potest supra ius dispensare, de concess. præbendæ, C. proposuit in glossa. obtinet plenitudinē potestatis, nemo debet dicere, cur ita facis, dispensat contra V. Test.* Itē dicit scēse Deū in terris, dominū dominorum, et regē regū. Negat se debere reprehēdi, etiā si mille animas detruat in Gehennam, contendit se Deum creare, & esse dominum inferorum & superiorum, permittit dici, *Dominus Deus noster Papa; item tu es omnia & super omnia, & omnis potestas tibi data est in cælo & in terra*, In Concil. Lateranensi sub Iulio adscriuit sibi nomen Dei, ac se tanquam Deum a nemine iudicari posse asseruit, Distinct. 96. C. Satis euidenter. Ex his & similibus colligo, Papam esse omnis numinis risorem atque contemptorem, & ob eam causam interpretationem Scripturarum ad eum non pertinere.



*Qualis Scripturarum interpres, & iudex esse debeat.*

**R**omanum papam posse errare, nec esse idoneū interpretem Scripturarum, ostendimus capite superiore, sequitur vt ostendamus, quisnam sit iste supremus Scripturarum interpres, & iudex? Sunt autem quatuor, quæ ab hoc interpretationis iudice requirimus. Primum, *vt non possit errare.* Secundum, *vt ab eo non possit prouocari.* Tertium, *vt non sit partialis.* Quartum, *vt partes ad obedientiam cogere possit.* Quod ad hanc obedientiam attinet, illa est tota Spirituallis, & consistit in voluntate tantum. Voluntatem autem humanam nullus homo cogere potest. Homo potest hominē cogere, vt taceat, & vt non contra loquatur, vt verò ad sensum præbeat, & voluntatem immutet, nulla humana vi efficere potest. Deinde supremus ille iudex debet talis esse, vt omnes ab alijs ad eum prouocare, nemo autem ab eo ad alium prouocare possit. Si non, sequitur ab eo prouocari posse, atque ita non erit supremus. Præterea iudex hic non debet esse partialis, hoc de omni iudice verum est, 3. Q. 1. C. *Quod suspecti.* Multo minus potest aliquis in propria causa iudex esse. 4. Q. 4. C. Nullus. Et si talis est, potest ab eo prouocari, ad eum qui partialis non est. Postremo supremus hic interpretationis iudex, debet oīs erroris expers esse, & nobis cōstare debet, eum errare non posse. Dogmata enim Theologiæ sunt necessaria & immutabiliter vera. At hæc omnia existis interpretationibus exstruuntur, Vnde sequitur & ipsas interpretationes necessarias & immutabiliter veras esse debere. Propter quod n.

aliquid necessarium & immutabiliter verum est, id ipsum necessarium & immutabiliter verum esse necesse est. Deinde de hac veritate & certitudine nobis constare debet. In omnibus enim Theologiæ dogmatis, præsertim ijs, quæ sunt cognitu necessaria, & citra quorum cognitionē salui fieri non possumus, requiritur *πληροφορία*, id est, certa quædam persuasio, vel certioratio. Coloss. 2. v. 2. Hæc aut *πληροφορία* esse non potest, nisi de dogmatum certitudine & veritate constet. Sequitur ergo ipsas interpretationes non tantū in se, sed etiam nobis immutabiliter veras esse debere. Hinc facile apparet qualem interpretationem requiramus in sacris Scripturis, nempe talem, quæ est certa, immutabiliter vera, & extra omnem controuersiam posita. Nam quemadmodum ipse textus immutabiliter verus & certus esse debet, ita eius interpretationem immutabiliter veram, & certam esse debere asserimus, alioqui non potest esse principium veræ & certæ scientiæ, quemadmodum lib. 1. ostendimus. Ex his ostendi potest, quisnam sit legitimus iudex, & quis non, item quænam sit legitima interpretatio, & quæ non. Quod ad iudicem attinet, negamus Papam esse supremum iudicē. Licet enim Canonistæ eum in Deum transformant, tamen purus putus homo tantum est, & ob eam causam nullius voluntatem cogere, vel immutare potest. Deinde omnes homines non possunt ad ipsius iudicium prouocare, Concil. Afric. Can. 95. & 105. Et ab ipsius iudicio ad aliorum iudicium prouocare licet. *Donatus enim a Meliade Episcopo Romano prouocat ad alium iudicem.* August. epist. 162. & prouocatio ista admit-

admittitur. Præterea papæ interpretatio est sæpè falsa, vt præcedenti capite ostendimus. Potest igitur errare. Postremò papa ipse est, quem adulteratæ & depravatæ religionis accusamus, vnde apparet eum reum esse. Quomodo potest igitur iudex esse, id quæ in propria causa? Concludimus ergo papam non esse supremum interpretationum iudicem. Porro solus Deus potest voluntates nostras ad suam obedientiam cogere. Ille item solus est ipsa veritas, & non potest errare, neque vllius partis studio trahitur, neque vlli hominib; ipsius iudicio prouocare licet. Ille igitur est supremus interpretationis iudex. De interpretatione est idem iudicium. Papæ enim interpretatio est sæpè falsa, vt antè ostendimus, & est id ipsum de quo disputamus. Ergo papæ interpretatio authentica, & fidei principium siue regula esse non potest. Si quis pertinacius contendit nos illud quod falsum & controuersum est, cuiusmodi est papæ interpretatio, pro principio fidei accipere debere, cum iubeo Anticyram nauigare, vt istic cerebrum purget, & deinde ex Aristotele discat, principia debere extra controuersiam posita, & immutabiliter vera esse. Si dicis Deum non posse quidem errare, eiusq; interpretationem esse veram, & extra omnem controuersiam positam, sed nihil facere ad rem. *Deum enim nihil loqui, neq; quicquam interpretari, illi responsum velim*, Deum olim immediatè suam voluntatē vel per visiones, vel per somnia, vel per apparitiones patefecisse. Deinde sanctos homines, Prophetas & Apostolos inspirasse, & per eosdem consignasse suā voluntatem literis, quas Vetus & Nouum Testamen-

tum

tum appellamus, in ijs eum adhuc loqui, & suam voluntatem interpretari. Scripturam igitur esse Dei voluntatem literis consignatam, & quæcunque interpretatio cum Scriptura congruit, eam cum Dei voluntate consentire, & esse bonam, quæcunque verò ab ea discrepat, eam à Dei voluntate dissentire, & non esse bonam. Huius Scripturæ interpretes sunt duo, duæ item interpretationes, vna externa, altera interna. Internus interpres est solus Deus, nemo enim potest nos intus docere, nisi solus Deus. Ille non potest errare. Externus est duplex. Aliqui immediatè vocati, & habentes testimonium, quod non possint errare, vt Prophetæ & Apostoli. Aliqui non vocati immediatè, neque habentes tale testimonium, vt reliqui Christiani. Illi non possunt errare. Non enim quicquam dixerunt, *nisi quod Spiritus sanctus illis dedit eloqui*. Act. 2.4. & fuerunt talibus critirijs instructi, vt omnes homines plenè persuasi essent, eos non posse errare. Hi talibus critirijs instructi non sunt, & sæpè loquuntur, quæ Sp. sanctus *illis non dat eloqui*. Possunt igitur errare. De interpretatione est idem iudicium. Illa enim interna, quæ à Deo proficiscitur, est vera. Externa autem est duplex. Vna immediatè vocatorum. Altera eorum qui non sunt immediatè vocati. Hæc potest errare, illa non potest. Quod ad iudicium interpretationis attinet, illud est duplex. Vnum summum, alterum inferius. Illud summum est solius Dei. Solus enim De<sup>9</sup> in extremo & vniuersali illo iudicio omnia, quæ *supra fundamentum extructa sunt, explorabit & q. per ignem*. Hoc inferius fit in hoc mundo, & est omniū

Christ.

Christianorum. Sed inter eos sunt certi aliqui gradus. Alij enim, vt antè dixi, sunt immediatè vocati, alij non sunt. Hi in iudicando errare possunt, illi non possunt. Illi pro iudicij norma & regula habent *diuinam inspirationem*: hi *Vetus & Nouum Testamentum* pro iudicij norma & regula habent. Neq; propterea verum est illorum iudicium, quòd ita iudicauerint; sed quia, illi, *secundum diuinam inspirationem*, hi, *secundum verbum scriptum* iudicarunt, ideò verum est illorum iudicium. Porro cuilibet Christiano licet in quasilibet interpretationes inquirere, modò hoc fiat studio proficiendi, absque omni proteruia, & peruicacia. Exemplum Berhoenses, Act. 17. Atque hæc nostra est sententia de interpretatione, Interprete, & interpretationum iudice.

## CAPVT XII.

*Orthodoxa Sententia probatur.*

**O**stendimus Scripturarum interpretes esse duplices, alios externos, alios internos. Internus est solus Deus, Esaïæ 54. 13. *Et erunt omnes cōcōti à Deo.* Ierem. 31. 33. *Indām legem meā in cordibz eorū.* Act. 16. 14. *Deus aperuit cor Lydiæ.* Hunc doctorem non posse errare extra controuersiam ponimus. Externus doctor est duplex: Alius immediatè vocatus, & habens testimonium, quòd non possit errare, vt Prophetæ & Apostoli. 2. Pet. 1. 21. *Non enim libidine hominum allata est olim Prophetia, sed inspirati à Spiritu sancto loquuti sunt sancti homines.* 2. Timot. 3. 16. *omnis scriptura est diuinitus inspirata.* Act. 2. 4. *cœperuntq; loqui alijs linguis, prout Spiritus sanctus illis dabat eloqui.* Hi non potue-

potuerunt errare. Eiusmodi enim critirijs suam doctrinam probarunt, vt omnes homines intelligerent eos à Deo pfectos esse, & errare nō posse. Alius non vocatus immediatè, neque habens tale testimoniū, vt quilibet minister, qui vel ab ipsis Apostolis institutus est, vel ijs, qui ab Apostolis instituti sunt, successit, Aēt. 20. 28. *Attendite igitur vōs ipsos, & totum gregem, in quo vos Spiritus Sanctus constituit episcopos.* 1. Pet. 5. 2. *Pascite gregem Dei, qui penes vos est, illius inspectioni vacante.* Hi omnes ratione officij, sunt æquè digni, administrant enim idem officium, idq; eodem modo, & ex eadem auctoritate, & possunt errare, Sunt enim homines, & sæpè aliquid loquūtur, quod Spiritus sanctus illis non suggerit. Ratione verò circumstantiarum nempè eruditionis, vitæ, ætatis, Joci, & similitum, alij alijs præferuntur. Doctus enim Episcopus meritò præfertur indocto, pius impio, senex iuueni, & qui in celebri loco viuit, sæpè præfertur ei, qui est in obscuro loco. Sed hæ omnes circumstantiæ nō efficiunt, quin talis episcopus errare possit. Distin. 9. C. negare, docet August. *quemadmodum in ipsis maioribus, ita in suis libris multa esse, quæ iusto iudicio reprehendi possunt.* C. ego solis Distinct. ead. docet Hieronym. *se solis scriptoribus, qui Canonici appellantur, eum honorem tribuere, vt nullum eorum scribendo errasse credat, alios autem dicit se ita legere, vt quantalibet sanctitate, quantaq; doctrina polleant, non ideo verum putet, quod illi ita senserunt, sed quod ei vel per alios auctores, vel per Canonicas & alias rationes, quod à vero non abhorreat, persuadere potuerunt.* Idem docetur C. Quis. & C. Neque. distinct. ead. *Si quis regerit papas Rom.*

Rō. his canonib. non cōprehēdi, ille sciat August. lo-  
 qui *de omnib. scriptoribus*, & Hierō. *de omnib. Episcopis*.  
 Sequitur ergo & papas Rō. his canonib. cōprehendi,  
 vel eos inter scriptores & episcopos cēseri nō debe-  
 re. Deinde in script. explicanda minor est papæ au-  
 ctoritas, quā docti & sancti alicuius doctoris, Di-  
 stinct. 20. C. Decretales. Ibi enim disertè dicitur,  
*nonnullorum pontificum constitutis, Augustini, Hierony-*  
*mi & aliorum dicta esse preferenda*. Ex his apparet tri-  
 plices esse interpretes, primum internum, nempe i-  
 psum Deum, qui errare non potest. Deinde exter-  
 nos, sed eos immediatè vocatos, *πρωφῆτας* dico. Il-  
 li Dei voluntatem explicuerunt secundum *diuinam*  
*inspirationem*, id est, prout *Spiritus illis reuelauit, & ma-*  
*nifestare iussit*. Huius interpretationis regula erat di-  
 uina inspiratio. Quando enim cum illa congruebat,  
 erat recta, & quando ab ea discrepabat, erat mala.  
 Alia nulla causa à priori allegari potest. A posteriore  
 verò fuerunt alia documenta, vt miracula, &c. per  
 quæ demonstrari potuit, illos à *Spiritu sancto actos sic*  
*loquutos esse*. Neque tamen negari potest, libros Mo-  
 sis fuisse prophetice expositionis regulam, & Vetus  
 Testamentum fuisse regulam expositionis Aposto-  
 licæ. Postremò externos & eos non immediatè vo-  
 catos: hos voco *πρωφῆτας*, horum vnica norma & re-  
 gula est verbum Dei scriptum. Debent enim omnē  
 suam doctrinam, & interpretationem ad normam  
 verbi scripti accommodare. C. noli. & C. ego solis.  
 Distinct. 9. Disertè n. dicit *se non ideò verum putare,*  
*quòd ipsi ita senserunt, sed quòd per Canonicos auctores &*  
*probabiles rationes persuadere potuerunt*. Sed frustra hoc  
 hu-



humanis rationibus probo. Ipse Deus ita præcepit 2. Pet. 1. 19. *Recte facitis, quòd attenditis sermoni prophético.* 1. Timoth. 1. 3. *Denuncia ne diuersam doctrinam doceant,* ad Gal. 1. 9. *Si quis vobis aliud euangelium annunciauerit, anathema sit.* Rom. 12. 6. *Prophetemus pro proportionem fidei,* hoc est, vt interpretatur Bellarm. *nemo vaticinetur aliquid contra fidem, neq; interpretesur scripturas in aliquem sensum catholicæ* (catholicum non pro Papistico, esset enim petitio principij; sed pro eo, quod reuera Catholicum est, accipio) *fidei contrariū,* lib. 3. cap. 10. de verb. Dei. Cum igitur omnes ministri verbum Dei doceant, & non debeant aliam doctrinam docere, quàm eam, quæ ab Apostolis & Prophetis tradita est, manifestum est, solum verb. Dei scriptum esse omnis interpretationis regulam ac normam; & ob eam causam, quæcunque interpretatio cum verbo Dei congruit, illa est vera, & quæ ab ea discrepat, ea est falsa.

## CAPVT XIII.

*Quis sit Iudex in interpretationibus diiudicandis.*

**Q**uæ sit legitima interpretatio, ostendimus capite superiore, nunc de iudice interpretationum & doctrinarum disseremus. Supremus iudex omnium interpretationum est Iesus Christus. 1. Cor. 3. 11. *Nam fundamentum aliud nemo potest ponere, præter id, quod positum est, quod est Iesus Christus, quod si quis edificet supra fundamentum hoc, aurum, argentum, lapides preciosos, ligna, fœnum, stipulam, cuiusq; opus manifestum fiet, dies enim declarabit, nam per ignem regetur, & cuiusque opus quale sit, ignis probabit.* Hoc est supremum illud iudiciū, quod solus Iesus Christus exer-

N n                      cecit

cebit. Hic iudex constituit inferiores iudices in terra, & horum aliqui sunt immediatè vocati, & habent testimonium, quod non possint errare, vt Prophetæ & Apostoli, Aliqui non sunt immediatè vocati, vt reliqui Christiani. Illi fuerunt interpretationum & doctrinarum iudices in hac vita, & non potuerunt errare. Hoc ponimus extra controuersiam. Præter Prophetas & Apostolos sunt & alij iudices doctrinarum, & illi duplices, alij publici, alij priuati. Publici, omnes ministri legitimè vocati. Priuati, singuli fideles. Ad hos omnes pertinet iudicium interpretationum in hac vita. Sed nos prius agemus de ministris, deinde de singulis fidelibus, & vt omnis æquiuocatio tollatur, accipio ministrum pro Episcopo: quicumque enim verbum Dei in Ecclesia docet, & eius sacramenta administrat, siue papa, siue presbyter, siue pastor, siue episcopus vocetur, ille mihi minister est. Hos omnes & singulos esse iudices interpretationum manifestum est. Vult enim Paulus 1. Timoth. 1. 3. *vt videant, ne diuersa doctrina doceatur.* At qui debent cauere ne diuersa doctrina doceatur, illi possunt & debent de doctrinis iudicare. Sed Titus, & per consequens omnes ministri (quod enim Tito præcipitur, hoc omnibus episcopis præcipitur) debent cauere, ne diuersa doctrina doceatur. Ergo omnes & singuli ministri debent, & possunt de doctrina iudicare. Hi omnes ratione officij habent æquè magnam dignitatem, & potestatem, & inter eos nemo superior est. Sunt enim omnes vnius ministerij ministri, ab eodem domino constituti, & propter eundem finem vocati, imò idem officium eodem modo

modo ex eiusdem auctoritate faciunt. Ratione verò circumstantiarum, nempe ætatis, eruditionis, vitæ, loci, &c. differunt, quemadmodum antè ostendimus, & historia antiquitatis testatur. Hos omnes vt in interpretando errare posse ostendimus, ita etiam in iudicando errare posse asserimus. Atque hæc de publicis iudicibus. Priuati iudices sunt singuli fideles. Hi etiam habent potestatem iudicandi de doctrinis & interpretationibus. Deus enim ita præcepit.

Quod Deus mandauit, hoc omnibus fidelibus licitum est. Sed Deus mandat, vt singuli & omnes fideles de doctrinis iudicent. Ergo omnibus & singulis fidelibus licet de doctrinis iudicare.

Maior est citra omnem controuersiam vera. Minore probo. 1. Thess. 5. 21. *omnia probate, quod bonum est retinete.* Certè qui debet omnia probare, & bonum malo relicto tenere, ille habet auctoritatem iudicandi. Sed omnes & singuli fideles, Ergo, &c. Bellarm. respondet Minorem de doctoribus tantum, non de singulis fidelibus intelligendam esse, idque probat quadam similitudine, quemadmodum, inquit, fit in *academijs*, ita etiam in ecclesia fieri debet. Sed cum liber aliquis ad *academiam* examinandus mittitur, illa examinatio non pertinet ad studiosos iuuenes, sed ad Professores istius facultatis. Planè eodem modo, quando doctrina ab Ecclesia indicatur, illud iudicium non pertinet ad singula ecclesiæ membra, sed ad solos pastores. Sed hoc argumentum ridiculum est. Liber enim iste ab ijs examinari debet, quibus ista cura imposita est. Illa autem cu-

ra nunquam studiosis, nisi ijs valde doctis, sed solis professoribus, vt plurimum imponitur, aliquando etiam ijs, qui non sunt professores. Cognoscitur autem vel ab ipsa academia, vel ab ijs, quibus academia istam curam imposuit. Aut enim Academia in qualibet facultate certos homines constituit, qui istis examinationibus præsunt, aut illi qui cupiunt in sua inquiri, à certis hominibus illud fieri petunt. Illi igitur vel quos academia cōstituit, vel quos ipsi auctores petunt, debent missum librum examinare. Nam ad eos tantum isre labor pertinet. Si quis ex alijs se ingerit, ille est πολυπράγμων. Planè eodē modo, quoscunq; Deus ad hoc interpretationis iudicium constituit, illi debent de interpretationibus iudicare, vel quod idem est, ad quos ista diiudicatio pertinet, isti debent de interpretationibus iudicare. Hoc inter nos extra cōtrouersiam est. Nunc videndum est, quinam illi sint, quibus Deus hoc mandauit. Nos dicimus omnes & singulos fideles eos esse. Bellarminus dicit, hoc solum pertinere ad solum papam Romanum, & quos papa ad eam rem constituit. Nos ex Dei verbo nostram sententiam eruemus, ac primum non est dubium, quin ad eos iudiciū hoc pertineat, quos Paulus fratres vocat; vers. 14. vbi hanc admonitionem orditur, *precamur vos fratres*. Sed omnes fideles sunt eius fratres. Ergo & ad omnes fideles pertinet hoc iudicium. Deinde vers. 12. alloquitur eos, *quibus alij in domino præsunt*. Sed illi non sunt pastores, nam hialij præsunt; sed sunt singuli fideles, illis enim alij præsunt. Denique de quibus dicit Apostolus, *quod debent agnoscere eos, qui præsunt*,

item,

item, qui debent indefinenter orare, & spiritus non extinguere, de ijs etiam dicit, quod debent omnia probare. Sed ista omnia dicuntur de singulis fidelibus. Ergo de ijs etiam dicitur, quod debent omnia probare. Hoc adeo euidentius est, ut alia probatione non sit opus. Deinde Spiritum sanctum formare fidem in omnibus fidelibus ipsi etiam Papistæ concedunt. atqui hæc fides coniuncta est cum πληροφωρίᾳ τῆς συνιέναις ἐς ἐπιστάσειν ὁ μισθὸς ὁ θιὺ καὶ τὸ χρῆμα ut ait Paulus ad Col. c. 2. v. 2. Ex hac verò συνιέναις ἐπιστάσει oritur facultas iudicandi, quinimò est ipsum illud interius iudicium Spiritus sancti. Pertinet igitur hoc iudicium necessariò ad omnes fideles, sed ut gradus inspirandi differunt: ita etiam ordines & gradus iudicandi differunt. Quos enim Spiritus ita afflat, ut ijs semper præeat, neq; vnquã deferat, eos non sibi solis, sed vniuersæ ecclesiæ iudices constituit, ita ut eorum doctrinam velit omnis doctrinæ regulam esse: Quos verò non vbique neque semper ita afflat, eos vult ita iudicare, ut iudicij sui rationem ad superiorem istam regulam dirigant. Hinc fit, ut, quia Spiritus prophetarum prophetis subiecti sunt, Paulus in ecclesia certum iudicij ordinem esse velit; & tamen quia singuli fideles à Deo docti sunt, & habent vñctionem, ideo singulis fidelibus in ijs, quæ ad fidei & salutis πληροφωρίαν spectant, datũ est de Spiritibus iudicare, an ex Deo sint? Cõstat igitur omnes fideles habere auctoritatem de doctrinis, & interpretationibus iudicandi. Hoc cùm Bellarminus videret, excogitauit aliam responsionem, & dixit, hoc iudicium tantum pertinere ad res dubias, non ad res

certas. At quis vnquam fando audiuit de rebus minimè dubijs, certis, & minimè controuersis iudiciū institui? Subiungit deinde sola dubia indigere probatione. Accipimus hoc etiam, *Addit librorum prohibitorum doctrinam esse apertè malam, & minimè dubiam; doctrinam autē Conciliorum & paparum esse apertè bonam, & minimè dubiam*, ac proinde hæc omnia non indigere probatione. Argumentum tale,

Quæ sunt manifestè bona & mala, illa non indigent probatione. Sed doctrina librorum prohibitorum est apertè mala, Doctrina autem paparum, & conciliorum est apertè bona. Ergo hæc omnia non indigent probatione.

Respondemus Minorem esse simpliciter falsam, quorundam enim prohibitorum librorum doctrina non est apertè mala, est enim hoc ipsum de quo contendimus. Bellat minus dicit eam esse apertè malam. At omnes Ecclesiæ, quæ sunt in Angliæ, Dania, Scotia, Suetia, maxima parte Germaniæ, Heluetiæ, Galliæ, Belgiæ, Poloniæ, Vngariæ, Transylvaniæ dicunt eam doctrinam esse bonam. Deinde hæc doctrina in nullo legitimo concilio vel iudicio falsitatis vllius conuicta est. Ergo vides eam non tam manifestè falsam esse, vt tu affirmas. Doctrinam paparum & conciliorum tu quidem manifestè veram esse dicis, sed iam antè ostendi, multa concilia docuisse se contradictoria, & multos papas docuisse ea, quæ sunt hæretica. Ergo non tam manifestè vera est, paparum & conciliorum doctrina, vt tu autumas. Imò Bellarmine, tu petis illud, quod est in principio. Pa-  
pas

pas enim & concilia non posse errare nondum probasti, & ob eam causam non debuisti hoc tam audacter concludere. Et vt vno verbo finiam, doctrinam protestantium dicis esse malam. At protestantes dicunt eam esse bonam. addunt se nunquam potuisse à papistis obtinere, vt in vlllo legitimo vniuersali Europæarum ecclesiarum iudicio suam doctrinam legitima disputatione assererent. Illa sanè tergiuersatio arguit eam, etiam vestro iudicio, non tam malà esse, vt vos dicitis. Si enim tam manifestè mala esset, non ita vobis ab eius defensione metueretis. Paparum & conciliorum doctrinam tu dicis esse bonam. At protestantes eandem dicunt esse malam. Et licet nulum vniuersale iudicium ea de re institutū sit, tamen disputatio Oxoniēsis, Posciacena, Lipsensis, Bernensis, & aliæ satis ostendunt, eam in se non tam veram esse, atque vos iactatis, vel. certè non tam certam esse, vt vos vultis, sed adhuc esse controuersam. Deinde Bellarmine vos damnatis libros protestantium. At causa nondum est cognita. Lutherus fuit damnatus priusquàm auditus. Hoc an ita in supremo Christi iudicio possitis defendere, vos videritis. Nostros libros prohibetis, nō quòd vos probare possitis eos malos esse, sed ne vestri homines ex ijs oculos aperiant, & vestras hæreses explodant. Vestros libros nō prohibemus, imò patimur, vt omnes eos legāt, voluant & reuoluāt. Non enim metuendum nobis est, vt quisquam ex nostris per vestros libros, modò vis absit, commoueatur, tanta est vis veritatis. An verò nostris libris aliquis commotus sit, docet Anglia, Scotia, Dania, Suetia, Polonia, Germania, Heluetia, Belgica,



Belgica, Hungaria, Transylvania, imò ipsa Italia & Hispania: Sic igitur argumentum retorqueo. Quod dubium & controuersum est, de eo habent omnes fideles iudicandi potestatem. Sed quorundam paparum & conciliorum doctrina dubia & controuersa est. Ergo de ea habent omnes protestantes iudicandi potestatem. Sed instat Bellarminus, & docet omnium conciliorum & paparum doctrinam esse manifestè bonam. Quia Paulus concilij Hierosolymitani acta iussit *non probari, sed observari*. Argum. tale, Doctrina concilij Hierosolymitani est manifestè bona. Ergo omnis omnium conciliorum & paparum doctrina est manifestè bona.

Hoc argumentum Bellarmine refutatione indignum est. Si ego cùm in schola dialecticam puer discerem, ita disputassem, vapularem equidem. Perinde enim est, ac si dicas. Aliquod animal est rationale. Ergo omne animal est rationale. Pueri dicunt à specie ad genus non valere consequentiam. Secunda probatio Minoris est 1. Iohann. 4. 1. *Nolite Spiritus extinguere, sed probate Spiritus an ex Deo sint.*

Qui debent inter Spiritus distinguere & discernere quinam ex Deo sint, illi habent potestatem iudicandi de Spiritibus, id est, de doctoribus, & de doctrina. Nam per doctrinam distinguuntur. Sed singuli fideles debent distinguere inter Spiritus & discernere, quinam Spiritus ex Deo sint. Ergo singuli fideles habent istam iudicandi potestatem.

Tertia Minoris probatio Iohan. 7. 17. *Si quis uoluerit eius uoluntatem exequi, cognoscat de doctrina utrum ex Deo sit, an ego ex me ipso loquar.* Argumentum tale,  
Qui

Qui debent cognoscere de doctrina, an ex Deo sit, illi habent auctoritatem iudicandi de doctrina. Sed omnes fideles debent cognoscere de doctrina an ex Deo sit, Ergo omnes fideles habent auctoritatem, &c.

Maiores est vera extra controuersiam. Minorem probo. Nam quicumque debent Dei voluntatem exequi, illi debent de doctrina iudicare. At non tantum ministri, sed omnes & singuli fideles debent eius voluntatem exequi. Ergo non tantum ministri, sed omnes & singuli fideles debent de doctrina eius iudicare. Bellarminus concessa Minore, respondet ad Maiorem, & dicit Christum non velle omnes & singulos fideles omnia & singula Scripturarum loca intelligere debere, sed tantum asserere, *viros bonos carere impedimentis quibusdam, propter quæ alij non possunt fidei veritatē intelligere*, quod notandum est, hoc n. illi extorquet veritas, vt fateatur viros pios posse fidei veritatē intelligere, quod si verū est, possunt etiā de ea rectē iudicare. Deinde quod ad illud attinet, sunt certi gradus in iudicio. Quā ob causā si putat neminē posse de omnib. perfectē iudicare, nisi omnia perfectē intelligat, assentior. Sed tum neque papa Romanus potest de omnibus iudicare. Nam & ille non omnia scripturarum loca perfectē intelligit. Sēper enim valet illud Augustini, *Plura nescimus quā scimus in sacris literis*. Si autem existimat neminem quicquā vllō modo iudicare posse, nisi oīa perfectē intelligat, errat. Satis enim est, si hoc intelligit, quod iudicat, etiam si omnia non intelligat. Alioqui nullus homo posset iudicare. Sunt enim multa, quæ omnes homines ignorant; Bellarminus probat suam

sententiā ex Ioh. 5. *quomodo vos potestis credere quia gloriam queritis ab inuicem.* Et Luc. 16. *Audiebant hæc oīa Pharisei qui erant auari, & deridebant eum, & putat hæc duo habere eundem sensum cum hoc loco, Cognoscat de doctrina an ex Deo sit.* Vbi ego non iudicium, quod nullum est, sed mentem desidero. Sanè Bellarmine si ita iudicas, non miror eos, qui à te tuique similibus instituuntur, ad veritatem non peruenire. Nam quid ista duo habent simile, *Pharisei propter auaritiam non poterant credere, & cupientes patris voluntatem facere, debēt de Christi doctrina iudicare, an ex Deo sit.* Item, *Iudæi propter φιλαυτίαν siue ambitionem non poterant credere, & cupientes patris voluntatem facere, debent de doctrina cognoscere, an ex Deo sit,* non necesse est vt hæc refutentur, sola enim notatione refutantur, neque tamen nego argumentum, per quod Christus suam doctrinam examinari vult, habere aliquam cū dicto Iohannis similitudinem. Quemadmodum n. Iudæi non poterant credere, quia propriam gloriam quærebant, ita Christus potuisset iudicari ex Deo non esse, si propriam & non patris gloriam quæsiuisset. Doctor enim & discipulus sunt correlatiua. Hinc accidit vt Doctor, qui nō eius, à quo mittitur, sed suam gloriam quærit, fidem non inueniat. Planè eodem modo discipulus, qui propriam gloriam quærit, doctrinæ à doctore traditæ fidem non adhibet. Hæc licet ita se habeant, tamen causam Bellarmi. non iuuant. Est enim contra eum adhuc euidentis argumentum.

Nam qui potest ex doctrina cognoscere, an aliquis suam, an verò mittentis gloriam quærat, ille

ille potest iudicare de doctrina. Sed singuli fideles possunt ex doctrina cognoscere, an aliquis suam, an verò mittentis gloriam quærat. Ergo singuli fideles possunt de doctrina iudicare.

Maiores est manifesta, Minor est in textu. Ergo conclusio non potest non vera esse. Secundum Argumentum à proprietate fidelium, Iohan. 10. 27. *Oves mee vocem meam audiunt, & sequuntur me.* Item Iohan. 10. *Alterum autem nequaquam sequentur, sed fugient ab ea, quia non norunt vocem alienorum.*

Qui audiunt vocem Domini, & eam norunt, alienorum autem vocem neque audiunt, neque norunt, item qui sequuntur Domini vocem, alienorum verò vocem non sequuntur, sed fugiunt, illi possunt iudicare de doctrina, imò iudicant de doctrina. Sed singuli fideles, &c. Ergo &c.

Bellarminus concessa Minore respondet ad Maiorem, & dicit dominum loqui de *prædestinatis, qui ante mortem sequuntur vocem Domini*. Hoc nos concedimus. Nemo enim est ovis Christi, qui non est prædestinatus ad vitam æternam. Dicit enim vers. 18. *Quod nemo tollet ovem ab eo.* Sed hos prædestinatos dicimus iudicare de doctrina. Nemo enim potest pastoris doctrinam sequi, & alieni doctrinam fugere, nisi possit unius doctrinam ab alterius doctrina distinguere. At hoc nihil aliud est, quàm iudicare de doctrina. Hoc cum videret Bellarminus, exco-  
gitavit aliam responsionem, nempe Christum loqui multis modis cum omnibus, videlicet per scripturam, vel per ar-  
canam

*canam inspirationem, vel denique per os vicariorum.* Hoc agnoscimus, & nunc præcipuè loquimur de ea voce, quæ fit per *os vicariorum*, id est, per ministros. Sed hic in idem recidis. Vicarij enim Christi viua voce Christi oues alloquuntur, & vicarij Antichristi eadem viua voce alloquuntur. At oues spreta voce Antichristi, vel vicariorum Antichristi, sequuntur vocem Christi, vel vicariorum Christi. Ergo iudicant de vtriusque doctrina.

Qui enim spreta vicariorum Antichristi voce, sequuntur vocem vicariorum Christi, illi iudicant de Christi & Antichristi doctrina. Sed oues Christi. Ergo.

Et quoniam Bellarmine in hanc controuersiam incidimus, expendè num Christus & eius Apostoli ita vnquam docuerint per bella ciuilia, per cædes, prodiciones, flammæ, vastationes, direptiones, & incendia, vt papa Romanus his annis in Germania, Gallia, Belgica, Scotia & Anglia docuit. Deinde vide quinam ex omnibus Italis, Siculis, & Hispanis esset papæ vocem sequuturus, si vis abesset. Per vim autem plebem cogere, an Apostolicum sit, potes discernere ex 2. Corinthior. 1. 24. *ἡ κριτικὴ δύναμις τῆς ἐκκλησίας ἐστὶν ἡ ἐκκλησία*. Sed hæc hæctenus. Ille viderit quam rationem sit Iesu Christo redditurus. Simile est 1. Cor. 2. 15. *Spiritualis iudicat omnia.*

Qui omnia iudicat, iudicat de doctrina. Sed Spiritualis iudicat omnia. Ergo iudicat de doctrina.

Bellarminus primùm respondet ad Maiorem, & dicit *hominem spiritualem non posse iudicare de doctrina.*

*Primò*

*Primò quia nos non sumus certi, quinã sint isti Spirituales.* Respondeo, hoc de eo iudicio verum est, cui alijs standum est. Alij enim non possunt alterius iudicio stare, nisi certi sint eum benè iudicare, & nō posse errare. Sed de iudicio singulorum hoc verum non est. Nam vt ego non teneor Bellarmini iudicio stare, ita neque ille meo stare tenetur. Possum enim ego pro me iudicare, quid sit mihi amplectendum. Sed non possum alium in meam sententiam cogere, atque hanc potestatem habent singuli spirituales: vel vt apertius loquar, Deus dedit cuilibet fidei non tantum Spiritum intelligendi, sed etiam spiritum discernendi falsam doctrinam à vera. Sed quemadmodum singuli fideles possunt veram doctrinam à falsa distinguere, ita tamen non possunt alios in suam sententiam per vim cogere, neque hoc licitum est; sed si possunt hoc iustis rationibus persuadere, debēt hoc facere, neque est necesse, vt ego certus sim de alterius spiritu, modò de meo certus sim, hoc satis est. Deinde si ille non potest iudicare, de quo alij non sunt certi, an sit spiritualis, tum neque papa, neque concilium potest iudicare, nemo enim certus est an papa sit spiritualis: imò non esse papam spiritua-  
lem, testatur vita ipsius, docet doctrina, nouit totus mundus. Sed neque concilijs (loquor de papalibus concilijs) vrgeri possumus. Ea enim esse papæ similia, ita notum est, vt negari non possit. Deinde dicit Bellarminus eos, qui sunt maximè spirituales, nō semper illustrari. vt 4. Reg. 4. *Elysans dicit, Dominus hoc celauit à me, & non indicauit mihi.* Ergo non posse iudicare de doctrina.

Qui

Qui quædam ignorat, ille non potest iudicare de doctrina. Sed maximè Spirituales quædam ignorant, Ergo maximè Spirituales non possunt iudicare de doctrina.

Respondeo, Maiorem non esse vniuersaliter verâ. In vniuersali enim iudice, qualis est Christus, requiritur omniscientia. Iudicabit enim vniuersum mundum, & omnia occulta reuelabit. Sed in his iudicibus inferioribus, hæc omniscientia non requiritur. Satis est, si homo spiritualis intelligit illud, quod iudicat, etiâ si multa alia non intelligat. Deinde si Maior est vera, Bellarmine, tum sequitur neque papam, neque cōcilium posse de doctrina iudicare. Papa n. est sæpè indoctus, & concilia sæpè ex indoctis (loquor de papalibus concilijs) monachis conflantur, vt nunc non dicam papam & concilia sibi ipsis sæpè contradicere. Deinde Bellarminus respondet ad Minorem, & dicit OMNIA non propriè accipi. Esse enim multa, quæ etiam sanctos patres, qui maximè sunt spirituales, fugiunt. Hoc ex nobis nemo negat. Imò Hemmingius, Beza, Calvinus & alij dicunt hoc *secundum subiectam materiam accipi debere*. Hinc tamen non sequitur Spiritualem non posse iudicare de doctrina. Licet enim non omnia intelligat, doctrinam tamen intelligit, & de ea loquitur Paulus. Ergo eâ à falsa doctrina distinguere potest. Tertium Argum. à Praxi veteris Ecclesiæ, Act. 17. 11. *Berboenses quotidie scrutabatur Script. an hæc ita se haberet.* Ad quos in primitiua ecclesia pertinebat iudiciū doctrinarum, ad eos illud adhuc pertinet. Sed in primitiua ecclesia illud iudicium pertinebat ad



ad singulos fideles. Ergo singuli fideles adhuc de doctrinis iudicare debent.

Bellar. concessa Minore respondet ad Maiorē, v.g. *etsi Paulus erat Apostolus, & non poterat errare, tamē eius doctrina debebat examinari, neutrum n. constabat.* Assentior. De quo n. non constat, an rectē doceat, & an errare possit, eius doctrina examinanda est. Et quoniā Berhoēnsibus de Paulo & eius doctrina nihil cōstabat, idēd rectē fecerūt, quōd eius doctrinā ad S. Scripturā examinauerint. Planē eodē modo nobis cōstat papā non esse Apostolū, cōstat itē papā posse errare, imō errare, & errasse in multis. Ergo in papę doctrinā oēs fideles inquirere, eamq; examinare debēt. Nā si eius doctrina explorāda est, de quo nō cōstat, q̄ sit Apostol⁹, & q̄ nō possit errare, tū multō magis eius doctrina explorāda est, quē cōstat nō esse Apost. quē etiā errare, & sēpē errasse certū est. Sed papa non est Apostol⁹. Papā itē sēpē errauit, & in multis adhuc errat. Ergo in eius doctrinā cuilibet fideli inquirere licet. Maior est vera, Minorē probabo in singulis cōtrouerſijs. Hoc cū videret Bellar. concedit nos in Papæ & concilij Trid. doctrinā inquirere posse, *modō fiat cū studio querendi veritatē.* At nos nullo alio studio inquirimus, imō si quis tumultuādi, aut cōiutiādi studio inquit, eū auersamur. Verūm Bellar. quoniā nos eū sincero veritatis inuestigādæ studio in concilium Tridentinum inquirimus, & in eo nullā veritatē inuenimus, idēd illud tanquam humanum commentum cum bona pace papæ, Dei verbo, in quo veritatem inuenimus, postponimus, neque vrgemus vōs, v̄t idem faciatis, tantūm petimus, ne à veritate in Dei verbo

verbo inuenta ad humana mendacia in concil. Tridentino stabilita, contra conscientiam vrgeamur. Et ob eam causam his 30. annis tot cedes, flammæ, incendia, vastationes, præditiones, latrocinia, direptiones, & exilia sustinuimus. Domine Iesu quando exurges, & iudicabis ecclesiam tuam? Deinde Bellarmine Berhoënses idedò receperunt Pauli doctrinam, quòd videbant eam in scripturis traditam esse: docete vos nihil aliud, quàm quod nos in scripturis inuenire possumus, & eadem reuerentia recipiemus vestram doctrinam, qua Berhoënses Pauli doctrinam receperunt. Si verò aliud docebitis, quàm quod in Dei verbo traditum est, & in eo perseverabitis, tum saltem patimini, vt doctrinam Iesu Christi vestris commentis præferamus. Quartum argum. Quia papa non est supra Scripturam.

Si quælibet Scripturæ interpretatio est vera propter papæ iudicium, tum papa est ante & supra Scripturæ interpretationem. Sed hoc non, Ergo neque illud.

Connexum Maioris est firmum. Propter quod enim aliquid verum est, hoc est eo, propter quod verum est, inferius & posterius. Inferius. Minor n. est eius dignitas, quod per aliud tale est, quàm illius, quod per se tale est. Posterius. Effectum enim natura causam sequitur. Minorem vrgent ipsi papistæ. Vnde apparet papæ iudicium esse vnicam & solam causam, propter quam omnis interpretatio, vel vera, vel falsa est. Quod igitur ex Dei verbo interpreta- mur, mundum à Deo esse conditum, Christum esse Dei filium, Hec idedò vera sunt, quia papa ita censuit.

Si papa ita non censuisset, vera nō essent. Causa enim posita, propter quam res est, effectum ponitur, & eadem causa ablata, effectum tollitur. Posita igitur hac papæ interpretatione ad hunc locum, *Deus fecit duo luminaria*, *Papa est quadragies septies maior, quam Imperator Romanus*. Posita inquam hac papæ interpretatione, & volūtate, illud verum est, & eadem interpretatione ablata, illud falsum est. Papæ igitur interpretatio & voluntas est omnis veritatis regula. Hoc est Bellarmine papam in Deum transformare. Nam solus Deus est ille, cuius voluntas est veritatis regula. Quicquid enim Deus vult, hoc verum est, & propterea verum est, quia Deus id vult. Sed papa est ille, cuius voluntas est veritatis regula. Quamcūque n. interpretationē papa vult, illa est vera, & quam non vult, illa nō est vera. Ergo papa est Deus. Hoc quidem vos negatis Bellarmine, et cū vobis eiusmodi ex Canonistarum libris exprobramus, dicitis vos ipsos illa ridere. At si hoc ita est, quare non anathematizatis illos libros, in quibus illa scripta sunt? Et quare tribuitis illa papæ, ex quibus illa necessariō colliguntur? Deinde hoc totum pugnat cū praxi primitivæ ecclesiæ. Berhoënses enim Act. 17. 11. non ideō amplectebantur doctrinam Pauli, quod papa Romanus ita censuisset, tum enim nullus erat papa Romanus. *Sed quia videbant illam doctrinam congruere cum Scriptura, quam quotidie scrutabātur*. Vnde sic colligo, quod tēpore Apostolorū nō fuit causa & regula veræ interpretationis, illud & nūc causa & regula veræ interpretatiōis esse nō potest. Sed tēpore Apost. papæ iudiciū non erat verę interpretatiōis causa & regula.

Ergo neq; nūc esse potest. Deindē sola script. vel eius analogia fuit eo tēpore causa & regula veræ interpretationis. Berhoēnses n. idē recipiebant interpretationē Pauli, quōd videbāt eam cum script. congruere. Præterea quod in controuersia positū, imō quod impium & falsū est, illud non potest certæ & indubitæ doctrinæ causa & regula esse. Sed papæ iudicium est in controuersia positum, & esse id ipsum falsum & impium probabimus suo loco. Ergo certum est, illud indubitæ & certæ doctrinæ causam & regulam esse non posse, & ob eam causam asserere papæ iudicium, quod nos falsum & impium esse scimus, esse piæ & veræ doctrinæ causam & regulam, perinde est, ac si quis contendat, tenebras esse lucis regulam. Frustrā igitur illud quod in principio est, pro principio allegatur. Bellarminus respondet, *Papam iudicare de Scripturis, esse a quo uocum*. Posse enim de Scriptura, & de eius interpretatione intelligi. De Scriptura, uidelicet Scripturam esse veram propter papæ iudicium. De interpretatione, uidelicet Interpretationem Scripturæ esse veram propter papæ iudicium. Illud dicit esse falsum, hoc verum. At Bellarmine, lib. 1. docuisti libros esse *Canonicos*, quōd *Papa ita censuisset*. Sed librum esse Canonicum, & librum esse verum, idem est. Si igitur liber non est verus, vel falsus propter papæ iudicium, sequitur eum neq; canonicum, neque non canonicum esse, propter papæ iudiciū. Deinde dicere librū esse verū, ppter papæ iudiciū, & libri interpretationē veram esse, ppter papæ iudiciū, idē est. Liber n. interpretat' nihil aliud est, q̃ liber explicat', vel liber fusiū & magis pspicuē enarratus.

ratus. Porrò librū nō intelligimus membranā & apices, q̄ in libro sunt, sed sensū istis apicibus cōprehensū. Sed interpretatio libri nihil aliud est, q̄ sensus explicatio, & liber interpretatus est sensus explicatus. An igitur ille sensus explicatus verus sit propter papæ iudicium, an verò sensus ille non explicatus verus sit propter papæ iudicium, ferè idem est. Deinde quod dicis, verum non est. Non enim liber aliquis ideò verus est, quòd à papa approbatus est, sed quia *diuinitus inspiratus est*, ideò verus est. Planè eodem modo sensus libri, vel eius interpretatio non ideò vera est, quia à papa approbata est, sed quia cum verbo scripto κατ' ἀναλογίαν congruit, ideò vera est. Hoc euidenter ex Act. 17. 11. colligi potest, de papa ibi nulla mentio. Quod autem dicis papam hoc modo non esse supra scripturam, sed *supra intelligentiam primariorum*, hoc primum est in principio, Scis enim & hoc inter nos controuersum esse, & ob eam causam pro principio allegari non posse. Deinde est contra Dei verbum 2. Cor. 1. 24. *non quòd dominemur fidei vestra*, 1. Pet. 5. 3. *Neque ut dominantes Cleris*. Hic addis Scripturam non capere aliquod robur à papæ iudicio, neque esse veriorē, vel certiorē propter papæ iudicium. Quorsum igitur hæc tua disputatio? Si verum est, quod dicis, tum omnia ista, quæcunq; his 4. libris de principijs disputasti, induc vna litura. Libro enim 1. cōtendisti libros Apocryphos propter papæ iudicium esse Canonicos. Libro 2. affirmasti, Vulgatam versionem propter papæ iudicium esse authenticam. Hoc libro somnias, istam interpretationem esse veram, quæ papæ probatur. Libro quarto asseris,

omnes consuetudines Romanas propter papæ approbationem esse Apostolicas, & regulam fidei. Hęc omnia inducis vna litura, cū asseris scripturam nō accipere robur à papa, neque propter papæ iudiciū fieri vel veriore, vel certiore. Postremò cū vos explicationem Scripturæ affertis, quæ congruit cum sacris literis, eam nos cum summa reuerentia suscipimus, neque de ea contendimus, tantū asserimus eam non propter papæ iudicium, vt vos vultis, sed propter analogiā cum scriptura, veram esse. Cū verò affertis interpretationem, quæ ex diametro cū scriptura pugnat, eam nos repudiamus etiā si omnes papæ eam approbassent. Quoniam igitur papæ iudicium inter nos controuersum est, manifestum est illud authenticæ doctrinæ regulam esse non posse. Quintum argumentum. Quia veritas authenticæ interpretationis non pendet ab homine.

Quod non pendet ab homine, hoc non pendet à papa Romano. Sed veritas authenticæ interpretationis S. literarum non pendet ab homine. Ergo non pendet à papa Rom.

Maior est manifesta. Minorem probo. Nostra n. fides nititur Dei verbo, & recta eius interpretatione. At sequeretur nostram fidem ab homine pendere, si veritas authenticæ interpretationis ab homine penderet. Sed hoc fieri non potest, fides enim nostra est immota. Ac proinde mobili fundamento inniti non potest. Omnis autem homo mobilis est, & mendax. Ergo fides ab eo pendere non potest. Sed ex quo consequēs non pendet, ab eo & eius antecedens pendere non potest. Fides autem est authenticæ

ticæ veritatis consequens. Quam ob causam si fides non pendet ab homine, sequitur & authenticam veritatem ab homine non pendere. Bellarminus concessa Minore respondet ad Maiorem, & dicit, *Papam non esse simpliciter hominem, & eius verbum non esse simpliciter verbum hominis, & erroribus obnoxium, sed verbum Dei.* Et ut res esset illustrior, dicit *Papa ex Cathedra loquentis verbum non esse errori obnoxium.* Pudet me Bellarmine harum principij petitionum. Ita n. ludere in re seria, imò in Dei verbo, graue crimen esse existimo. Sed ad rem. Existimo Bellarminum loqui de Cathedra Petri, & cathedram Petri accipere pro doctrina Petri. Sensus igitur est, quando papa doctrinam Petri docet, tum non errat. Quis hoc vnquam negauit? Sed papa nunc non docet doctrinam Petri, Ergo non docet ex cathedra Petri.

Qui non errat quando docet doctrinam Petri, ille nunquam errat, ne tum quidem, cùm docet contra doctrinam Petri. At papa non errat cū docet doctrinam Petri. Ergo papa nunquam errat, ne tum quidem, cùm docet contra doctrinam Petri.

Planè hoc idem est, ac si dicas, cùm Bellarminus ieiunat, tum nō edit, Ergo nunq̃ edit, ne tum quidē, cùm vel cœnat, vel prandet. Item, cùm Bellarm. dormit, tum non scribit, Ergo nunq̃ scribit, ne tum quidē cùm veritatem suo calamo perstringit. Equidem tibi probandum non erat, papam non errare, quando docet doctrinam Petri. Sed probandum tibi erat, omnem doctrinam papæ esse doctrinam Petri. Illud enim concedimus, hoc negamus, & suo loco



ostendemus, papam non Petri, sed Dæmoniorum doctrinam aliquando tradere. Bellarminus probat papam ex cathedra Petri docentem non errare, scilicet probat hoc ipsum, quod ultro cōcedimus. Iam enim falsi sumus, papam non errare, quando docet ex cathedra Petri, sed negamus eū semper ex cathedra Petri docere. Excutiamus tamen etiam hoc argumentum.

Quod Deus in Scripturis reuelauit, hoc est verū. Sed hoc, nempe papam doctrinam Petri docentem non errare tradit Deus in Scripturis, Ergo est verum.

Concedimus totum hoc argumentum, sed addimus hoc non de solo papa, sed de quolibet homine verum esse. Quicumque enim docet doctrinam Petri, ille non errat. Deinde si ille non errat, qui docet ex cathedra Petri, sequitur eum errare, qui non docet ex cathedra Petri, Nam si ille non errat, qui docet doctrinam Petri, tum ille sanè errat, qui non docet doctrinam Petri. Vnde apparet non papam, sed cathedram Petri, id est, doctrinam Petri esse normā & regulam veræ interpretationis. At hoc volumus. Probate igitur vestram doctrinam congruere cum cathedra Petri, id est, doctrina Petri, & recipiemus eam. Si verò non congruit cum cathedra Petri, tum patimini, vt eam cum bona vestra pace Petri cathedre postponamus. Bellarm. Minorem, quam ultro concedimus, probat. Act. 15. *visum est Spiritui Sancto & nobis.* Et Luc. 22. *rogavi pro te, ne deficiat fides tua.* Amplectimur has probationes, sed nihil iuuant causam Bellarmini.

Quicquid

Quicquid enim Spiritui Sancto videtur, hoc est verum. Ergo si papæ aliquid videtur, quod Spiritui Sancto videtur, hoc verum est.

Sed hinc non sequitur, verum esse quicquid papæ videtur. Nam illi sæpè aliquid videtur, quod Sp. sancto non videtur. Deinde si illud verum est, quod Sp. sancto videtur, tum illud verum non est, quod Spiritui sancto non videtur. Ac proinde non iudicium papæ, sed iudicium Spiritus sancti est regula & norma authenticæ interpretationis, & ob eam causâ, cum papæ interpretatio cum Spiritu sancto cōgruit, tum eam amplectimur; cum verò cum Spiritus sancti iudicio non congruit, tum eam reiicimus. Ut autem intelligamus, quænam sit mens Spiritus sancti, illa est nobis in S. scriptura expressa. Ergo quæ interpretatio cum S. scriptura congruit, ea est proba, & quæ cum ea non congruit, ea est mala. Altera probatio Minoris est, quod *Christus rogauit pro Petro, ne eius fides deficeret.* Sed hoc non pertinet ad papam Romanum. Multi enim papæ fuerunt, quorum fides defecit, hoc probauimus antè. Interea tamen nego multos papas esse, quorum fides deficere non potest. Multi enim sunt, qui fidem prorsus nullam habent, neque vnquam habuerunt. Docent hoc Barms, Balæus, Platina, & alij papistici doctores in illorum vitis. Horum equidem fides deficere non potest. Nam quod non est, illud deficere non potest. Hic Belharminus inuehitur in hæreticos, & dicit *eorum fidem*, id est, *doctrinam nisi iudicio proprii Spiritus.* Si hæreticos vocat protestantes, malè facit. Immerito enim eos hæreticos vocat, quos ex omnibus pa-

pistis hætenus nemo hæreseos convincere potuit. Et quod dicit, verum non est. Illorum enim doctrina non nititur iudicio proprij, vel priuati Spiritus, neque hoc vnquam in illorum libris legit Bellarminus. Sed eorum fides nititur iudicio illius Spiritus, qui in Sacris Scripturis loquitur. At ille non est priuatus, vel proprius alicuius hominis Spiritus, sed est Spiritus Dei. Vel est iste Spiritus, quo Prophetæ & Apostoli acti sunt, cùm verbum Dei literis cōsignarent. Secundum hunc Spiritum verbum Dei intelligi debet. Debet enim eodem Spiritu intelligi, quo scriptum est. Porro priuatus vel proprius alicuius hominis Spiritus est, qui cum verbo Dei pugnat, neque refert an multian pauci, an priuati an publici homines eum habeant. Quicunque enim Spiritus non congruit cum ipso Dei verbo, ille est priuatus Spiritus. Sed Spiritus papæ Romani in multis non congruit cum Dei verbo. Ergo Spiritus papæ Romani in multis est priuatus Spiritus. Minorem nos in singulis controuersijs probabimus. Maior est certa. Et ob eam causam quando papistarum interpretationes congruunt cum sacra Scriptura, recipimus eas, quando verò cum Script. non congruunt, tū eas vt à priuato Spiritu profectas Scripturæ postponimus. Hæc cū ita se habeant, frustra posthac nobiscum disputabis de Scripturarum interpretatione à papæ auctoritate. Non enim quia cum papa, sed quia cum Spiritu sancto, qui in Scripturis loquitur, vel quia cum scriptura, per quam Spiritus sanctus loquitur, congruit, ideò vera est. Et quia cum Spiritu, qui in Scripturis loquitur, vel quia cum scri-  
ptura

ptura, per quam Spiritus loquitur, non congruit, idedò falsa est. Sola igitur scripturarum congruentia est regula omnis authenticæ interpretationis, & solus Spiritus est supremus iudex omnis interpretationis, & hi c iudex errare non potest. Oēs fideles sunt iudices inferiores. Atque hi partim immediatè vocati, partim non vocati immediatè. Illi non possunt errare. Hi errant, quādo interpretantur contra scripturam, vel quando loquuntur contra mentem supremi iudicis, quæ in scripturis expressa est. Non autem errant, quando interpretantur secundū scripturam, vel quando loquuntur ex ore supremi iudicis. Sextum Argumentum. *Quia omnis Prophetia debet esse κατ' ἀναλογίαν τῷ πνεύματι*, Rom. 12. 6.

Ad quod quælibet interpretatio congruere debet, illud est norma & regula authenticæ interpretationis. Sed analogia fidei, id est, doctrina sacris literis comprehensa est illud, ad quod quælibet interpretatio congruere debet. Ergo analogia fidei, id est, doctrina sacris literis comprehensa est norma, & regula omnis interpretationis.

Bellarminus videtur hoc totum argumentū concedere, sed addit neminem magis fide abundare, quā papam, ac proinde Papam esse normam & regulam veritatis. Sed hoc totum est controuersūm, & nihil facit ad rem. Hoc videns Bellarminus affert aliam solutionem, & concessa Maiore negat Minorem, ac dicit Prophetiam hīc non accipi pro interpretatione, sed pro facultate predicendi futura. Sed hoc non est verū. Paulus enim differit hoc loco, de muneribus ordi-

narijs & perpetuis. Facultas enim prædicendi futura, neque ordinaria est, neque perpetua. Deinde prophetia hîc sumitur eodem modo, atque Corinth. 14. 29. *Propheta autem duo, &c.* Item, *potestis sigillatim omnes prophetare.* At isthic accipitur pro dono interpretandi. Hoc cum videret Bellarminus, affert aliam solutionem, & concedit prophetiam hîc accipi pro dono interpretandi, sed negat *proportionem fidei* debere coniungi cum *habentes*, sed debere coniungi cû *administremus*, vt sit sensus, *prophetiam debere administrari secundum proportionem fidei*, ita vt nemo afferat interpretationem catholice fidei contrariam. In qua explicatione si catholicum accipit pro papistico, tum accipit illud, quod est in principio. Doctrina enim papistica à nobis accusatur hærescos, & est illud, de quo controuertimus, quam ob causam norma & regula veritatis esse non potest. Si autem catholicum accipit pro eo, quod reuera catholicum est, hoc est, pro doctrina sacris literis comprehensa, tum illa sententia est vera, & si Bellarminus ita ex animo loquitur, tum inter nos de hac re non est controuersia. Doctrina enim sacris literis comprehensa est regula & norma omnis interpretationis. Sanè textus legis est regula Glossæ, & quatenus Glossa cum eo congruit, aut discrepat, eatenus est bona, vel mala. Planè eodem modo verbum Dei scriptum est regula omnis interpretationis, & quatenus hæc cum eo congruit, vel ab eo discrepat, eatenus est bona, vel mala.

Septimum Argumentum. Quia aliud Euangelium, quam quod euangelizatum est, afferri non debet, ad Galatas 1. 8.

Qui aliud Euangelium affert, quàm id quod Paulus euangelizauit, id est, quod s. literis comprehensum est, ille est anathema. Sed qui Euangelium aliter interpretatur, atque verus & genuinus eius sensus requirit, ille affert aliud Euangelium. Ergo est anathema.

Siue igitur Episcopus, siue Monachus, siue Papa aliam interpretationem affert, quàm ipse sensus præ se fert, ille secundum Paulum est anathema. Omnis igitur interpretatio debet congruere cum Euangelio, id est, cum scriptura Canonica. Deinde si primitiua ecclesia non habuit potestatem mutandi euangelium, num papa Romanus sibi hanc auctoritatem vindicabit? Et ne quis regerat papam, non *immutare euangelium*, Resp. eum immutare sensum, & hoc idem esse. Galatæ enim non mutabant *libros à Prophetis & Apostolis scriptos*, neque de eo vnquam fuerunt à Paulo accusati, sed mutarunt doctrinā à Paulo euangelizatam, idem facit papa Romanus. Eodē igitur anathemate tenetur. Vnde apparet euangelium mutari, si interpretatio cum euangelio non congruat, & illam interpretationē esse maledictam, quæ cum euangelio non congruit, ac proinde euangelium esse omnis interpretationis normam. Hic cogor repetere quod antè dixi, quando papa affert interpretationem, quæ cum euangelio congruit, nos eam cum reuerentia accipere, id quæ non propter papam, sed propter congruentiam cum Dei verbo, quando verò affert interpretationem à Dei verbo discrepantem, nos eam reijcere, etiam si omnes papæ eam approbarent. Octauum Argument. Quia Scriptura debet

debet eodem spiritu intelligi, quo scripta est.

Quo spiritu Scriptura scripta est, eodē spiritu debet intelligi. Sed est scripta spiritu Dei, Ergo & Spiritu Dei intelligi debet.

Maior etsi vera est, vno tamen atque altero testimonio à me probabitur. Hieronymus in Epist. ad Galat. cap. 1. *Qui Scripturam aliter intelligit, quam sensus Spiritus sancti efflagitat, hereticus vocari potest.* Bernhardus in orat. ad fratres de monte, *nunquam Pauli sensum ingredieris, nisi Pauli Spiritum imbiberis.* Minorem probat dictum Pauli. 2. Timoth. 3. 16. *Omnis scriptura est diuinitus inspirata.* Et 2. Pet. 1. 22. *Acti à Spiritu Dei loquuti sunt.* Hoc argumentum concedunt papistæ, sed aiunt in solo papa residere istum spiritum, & ob eam causam iudicium papæ esse regulam & normam omnis interpretationis. At hoc est illud, quod est in principio. Est enim inter nos controuersum, & ob eam causam pro principio ab altera parte afferri non potest. Deinde totus orbis clamat in papa nō spiritū Christi, sed spiritū Antichristi habitare. Prætereà si Bellarminus vnum scripturæ locū producere potest, in quo disertè scriptū est, papam nihil, nisi quod à Sp. sancto dictatur, loquuturum esse, dabo manus. Si verò hoc facere non potest, & experiētia testatur multa à papa tradi, quæ à nemine, nisi à spiritu Antichristi produci possunt, non ægrè feret Bellarminus, si papæ iudicium pro authenticæ interpretationis regula accipere nō possumus. Deinde si spiritus Christi semper habitat in papa, & papa nihilloquitur, nisi quod à spiritu Christi profectum est, sequitur spiritum Christi esse hæreticum.



reticum. Multi enim papæ fuerunt hæretici, vt antè probauimus. Deinde si quicquid à papa Romano proficiscitur, à spiritu Christi proficiscitur, tum spiritus Christi est mendax. Papa n. sibi ipsi sepè cōtradicit, & ne quis hoc vel illud prætendat, dico hoc iudicialiter factum esse. Et vt taceam de Formoso, Iohannes XXII. & Nicolaus tradunt contradictoria. Vnus enim *tradit Christum & Apostolos nihil proprij habuisse*, alter hoc *negat*, & dicit habuisse. Celestinus concedit coniugi, cuius coniux prolapsus est in hæresin, *secundas nuptias*. Inñocentius hoc *negat*. C. Quanto de diuortijs. Pelagijs statuit, vt diaconi ab vxoribus abstineant, quas ante constitutionē duxerant. C. ante Triennium, Distinct. 31. Gregorius I. neminem admittit ad eum ordinem, nisi qui castitatem vouisset. Huiusmodi multa in decretorum libris. Verùm cū contradictoria simul vera esse non possint, sequitur alterum mendacem fuisse. Iam si papa nihil dixit iudicialiter, nisi quod à spiritu Christi profectum est, sequitur & spiritum Christi esse mendacem, sed hoc est blasphemum. Relinquitur ergo papam non semper loqui secūdum spiritum Christi, ac propterea aliquando errare. At dicis, si spiritus Christi non semper est in papa, vbi igitur est? Resp. eum esse in fidelib. & mentem suam per fideles patefecisse, idq; multis modis, per aliquos n. perfectè, per aliquos imperfectè. Perfectè, per Prophetas & Apostolos. Hos impulit vt mentem & sententiam suam literis consignarent. Quod igitur cum his Prophetarum & Apostolorū literis congruit, hoc est verū & authenticum. Ac, p̄inde interpretatio cū mente

mente Sp. sancti per Prophetas & Apostolos prodita congruens, est bona, & quæ ab ea discrepat, est mala. Imperfectè & minus plenè suam voluntatem reuelavit reliquis fidelibus. 1. Iohan. 2. 20. *Et vos unitionem habetis.* Iohan. 6. *erunt omnes edocti a Deo.* 1. Cor. 2. 15, *Spiritalis iudicat omnia.* Habitat igitur Sp. sanctus in fidelibus, & ob eam causam fideles de interpretationibus iudicare possunt. Sed quoniam hi spiritum Dei non plenè acceperunt, ideò interdum in iudicando aberrant. Quando igitur secundum spiritum iudicant, tum non errant. Iudicant autem secundum spiritum, quando secundum scripturam iudicant. Spiritus enim in scriptura loquitur. Quando verò non secundum spiritum iudicant, tum aberrant. Non enim iudicant secundum scripturam, per quam spiritus loquitur. Si hoc ad papistas accommodas, recipimus eorum interpretationes, quando congruunt cum spiritu, qui in scripturis loquitur. Quando verò non congruunt, non recipimus eas. Nonum Argumentum. Quia non est tanta auctoritas papalium decretorum, quanta Canoniarum scripturarum.

Cuius interpretatio est regula authenticæ veritatis, ille est in eadem cum canonicis scripturis auctoritate. Sed papæ interpretatio est regula authenticæ veritatis. Ergo papæ interpretatio est eiusdem cum canonicis script. auctoritatis.

Hoc etsi Canones & Canonistæ affirmant, tamē adeò absurdum est, vt non existimem Bellarminum adeò posteritatis iudicium contēnere, vt hoc defendere velit. Ideo huius argumenti absurditatem non  
vrgebo

vrgebolatiùs. Decimum Argumentum. Quia primitiua ecclesia statuit vnanimiter veram regulam & normam authenticæ interpretationis esse scripturæ analogiam. Iren. lib. 4. cap. 63. *legitimam & minimè periculofam expofitionē scripturæ esse secundū ipsam scripturam.* Euseb. de Polycarpo. lib. 5. cap. 20. *Et tamen oīa hæc cum scripturis consona proferebat.* Origenes in Matth. Homilia 25. *omnis sensus, qui est extra scripturam, non est sanctus,* Basil. epistola 80. *Stemus arbitrati sacrarum scripturarum, & apud quos inueniuntur dogmata diuinis oraculis consona, illis omnis veritatis adiudicetur sententia.* Hieronymus in Matth. cap. 23. *Quod de scriptura non habet auctoritatem, hoc eadem facilitate rejicitur, qua admittitur.* Augustinus contra Crescon. libro 2. *Canon Ecclesiasticus constitutus est, ad quem Prophetarum & Apostolorum libri pertinent, secundum quos de ceteris libris, vel fidelium, vel infidelium indicamus.* Augustinus de ciuit. Dei. lib. 11. cap. 33. *Et si huius veritatem libri indagare nequimus, à regula tamen fidei, quæ per alias eiusdem auctoritatis literas fidelibus satis nota est, non aberrabimus.* Augustinus de Genesi ad literam lib. 1. capite 21. *Et cum diuinos libros legimus in tantamultitudine verorum intellectuum, qui de paucis verbis eruuntur, & sanitate Catholica fidei mununtur, id potissimum eligamus, quod certum apparuerit cum sensisse, quem legimus, si autem hoc laiet, id certè, quod circumstantias Scripturæ non impedit, & cum sana fide concordat. Si autem & circumstantia pertractati ac discuti non potest, saltem id solum, quod fides sana præscribit.* Hoc Argumentum etsi necessarium non est, tamen ex eo apparet, quæ fuerit pri-

primitiæ Ecclesiæ de hac sententia iudicium. Et vt omnia in vnum contraham cùm Dei verbum, ac recta ratio, & primitiua Ecclesia vnanimiter statuant, scripturæ analogiam esse omnis interpretationis regulam, & eam interpretationem esse bonam, quæ cū scriptura conuenit, eamque malam, quæ ab ea discrepat, nos equidem contrarium statuere nō possumus. Ac proinde quando aduersarij interpretationem afferunt, quæ cum scriptura pugnat, nos eam reijcimus, etiam si omnes papæ eam probarent, & cū ex huiusmodi interpretatione aliquod impium dogma probant, tum petunt principium, & probant illud quod incertum est, per illud, quod equè incertū est:

*Conclusio.*

Omnia principia Christianorum dogmatum sunt certa, ante concessa, extra controuersiam posita, vera, immediata, & diuina. Sed interpretatio papæ est incerta, controuersa, ab altera parte negata, falsa, inepta & humana. Interpretatio igitur papæ non est principium Christianorum dogmatum.

FINIS.

SIBRAN-

## SIBRANDI LVBBERTI

De

*Principiis Christianorum dogmatum*

Liber septimus.

*Proœmium.*

**D**E vero sensu Canonicarum scripturarum differuimus libro superiore, nunc ad Traditiones accedemus. Hæ sunt quartum principium papisticorum dogmatum. Reliqua tria non sufficiunt ad illorum dogmata defendenda. Nam neque ex lib. apocryphis, neque ex vulgata versione, neque ex papæ interpretatione possunt ea oïa defendere. Ided excogitauerunt hoc quartum, quod Eccio, Emzero, & alijs fuit ignotū. Dicunt scripturam esse imperfectam, & Traditiones docere, quæ in scriptura prætermissa sunt. Per Traditiones intelligunt omnes ritus, ceremonias, & dogmata, quæ in papistica Ecclesia sunt vsitata, & verb. Dei expressa non sunt. Dicere ergo Traditiones esse cum verbo Dei eiusdem auctoritatis, est idem, atque omnia dogmata, ceremonias, & ritus papisticos collocare in eadem cum verbo Dei auctoritate. Quod si obtinuerint, nihil erit tam impium, quod sub titulo Traditionum tueri non possint. Hinc tanti Commentarij & Apologiæ pro Traditionibus. Canus affirmat *Traditiones plus virium habere aduersus hereticos, quam Scripturam*, lib. 3. cap. 3. Idem contendit omnem

*cum hæreticis disputationem ad Traditiones referendam esse, ibidem. Hinc apparet quanta sit papistarum pro Traditionibus sollicitudo. Verùm Bellarmine, omnes Traditiones de quibus contendimus, sunt in cōtrouersia positæ. Deinde non sūnt vtrique parti cōmunes, sed alterius partis propriæ. Principia verò non sunt in controuersia posita, neque sunt alterius partis propria, sed vtrique parti communia. Deinde papistici ritus, ceremoniæ, & dogmata sunt multis erroribus contaminata. Affirmant hoc Sanazarius, Petrarcha, Mantuanus, Erasmus, Palingenius, & alij papistici doctores. Idem testantur omnes orthodoxæ Ecclesiæ, quæ sunt in Transyluania, Hungaria, Bohemia, Polonia, Liuania, Suetia, Gallia, & Heluetia. Agnouit hoc ipse papa Adrianus, Sleidan. lib. 4. in principio, papa Adrianus in bulla ad protestantes Germanos. At quòd erroribus contaminatum est, hoc veræ & certæ doctrinæ principium esse non potest. Hoc sufficeret ad totam illam tuam de Traditionibus disputationem inducendam. Sed nos vestigia tua sequentes, etiã hanc partem explicabimus, ac primum ostendemus, quid nomen significet.*

## CAPVT I.

*Quid nomen significet.*

**T**RADITIO hic non accipitur pro actione tradendi, quam propriè significat, sed pro eo quòd traditur. Et in hac significatione primum notat quidquid ab hominibus immediatè vocatis, & diuinitus inspiratis, id est, Apostolis traditum est, siue hoc factum sit viua voce, siue literis scriptis. 2. Thess. 2. 15.

*Tenete Traditiones quas accepistis, siue per sermonem siue per epistolam.* Deinde magis in specie notat ipsum Dei verbum literis comprehensum. 1. Cor. 15. 3. *Prout acceperam tradidi vobis, Christum videlicet mortuū esse pro peccatis nostris.* Cyprianus cont. epist. Stephani ad Pomp. Si ergo, inquit, aut in Euangelia precipitur, aut in Apostolorum epistolis, aut actibus continetur, obseruetur etiam hac sancta Traditio. Præterea significat & ritus literis scriptis expressos, Actorum 6. 14. *Et mutabit Traditiones, quas tradidit nobis Moses,* Basilii lib. 3. cōt. Eunom. *Hoc palam oppugnat sacri baptismatis Traditionem, euntes baptizate in nomine Patris, & Filij, & Spiritus sancti.* Tertiò significat etiā illud, quod scriptum non est, sed tantū viuā voce ab Apostolis traditum est, 2. Thess. 2. 15. *Tenete Traditiones siue per sermonem.* Irenæus lib. 3. cap. 2. *Euenit neque Traditioni neque scripturis consentire eos.* Et cū hoc modo Traditio accipitur, subdistingui potest in doctrinam ab Apostolis viuā voce traditam, & in ritus ab ijs constitutos. In doctrinam, Luc. 1. 3. *Prout tradiderunt nobis, qui in principio spectatores fuerunt.* In ritus, 1. Cor. 11. 2. *& sicut tradidi vobis, traditiones retinetis.* Atque hoc modo accipitur Traditio, quādo aliquid ab hominibus immediatē vocatis, & diuinitus inspiratis traditum significat. Porro Traditio significat & illud, quod ab hominibus non immediatē vocatis, excogitatum & traditum est. Matth. 5. 3. *Quare & vos transgredimini Traditiones Dei per Traditiones vestras.* & vers. 6. *& irritum fecistis mandatum Dei per Traditiones vestras.* Marc. 7. 8. *Nam omissio mandato Dei tenetis Traditiones hominum.* Mar. 7. 9. *Abrogatis mandatum*



*Dei, ut Traditiones vestras seruetis.* Deinde Traditio hoc modo accepta, vel congruit cum Dei verbo, vel discrepat ab eo. Congruit, ut multæ expositiones, constitutiones, & ceremoniæ à sanctis patribus, episcopis, & concilijs constitutæ. Discrepat, ut multæ item Paparum & Monachorum expositiones, constitutiones, & ceremoniæ. Porro hæc Traditio subdistinguitur in ritum humanitus inuentum, & in doctrinam ab humano cerebro profectam. In doctrinam, ut Marc. 7. 9. In ritus, Matth. 15. 2.

## CAPVT II.

*Quotuplex sit Traditio.*

**N**ominis æquiuocatione explicata, distinguemus rem ipsam in suas species. Accipimus autem Traditionem in genere pro eo, quod non literis comprehensum, sed viua voce, aut alio quolibet modo ab hominibus immediatè vocatis, & diuinitus inspiratis, vel ab ijs qui non immediatè vocati sunt, traditum est. Hanc Bellarminus duobus modis distinguit, videlicet *secundum auctores*, & *secundum materiam*. Secundum auctores, dicit eam esse triplicem, nempe *Apostolicam, Ecclesiasticam, & Diuinam*. Diuinam vocat eam, *quam Christus Apostolis tradidit*. Apostolicam vocat, *quam Apostoli ex instinctu Sp. sancti tradiderunt*. Ecclesiasticam dicit *antiquam consuetudinem, vel à prelatis vel à populis inchoatam, & paulatim tacito populorum consensu vim legis obtinentem*, id est, ut vno verbo dicam, ad Ecclesiam pertinentem. Primi generis exempla ponit *formalia & materialia Sacramentorum*. Secundi generis exempla ponit ie-

innium

*iunium quadragesima, & ieiunium quatuor temporum.* In tertio genere exempla nulla adducit. Nos distributionem ipsam prius examinabimus, deinde ad exempla progrediemur. Differentiæ hæc neque accidentaliter, neque essentialiter rem distinguunt. Simul enim coincidunt. Quicquid enim Apostoli ex diuina inspiratione fecerunt, hoc est diuinum. Apostolicum igitur & diuinum non differunt, tanquam oppositæ species; sed tanquam in genus & species. Omne enim Apostolicum est diuinum, sed non omne diuinum est Apostolicum. Porro Apostolicum & Ecclesiasticum ferè differunt eodem modo. Omne n. Apostolicum pertinet ad Ecclesiam, & est Ecclesiasticum, sed non omne Ecclesiasticum est Apostolicum. Dum igitur Traditiones in Diuinas, Ecclesiasticas, & Apostolicas distinguis, perinde facis, ac si animal distribueres in sentiens, brutum, & hinniens. Hæc de distributione. Nunc ad exempla respondebimus. *Dicis formalia & materialia Sacramentorum non esse ex Verbo scripto, sed ex tacita traditione.* At hoc est falsum, quod ut intelligatur, repetam rem illam paulò altiùs. Sacramentum citra omnem controuersiam est ex eorum numero, quæ sunt *op&ti*. Illorum fundamentum est materia, Relatio fundamenti ad terminum est forma. Fundamentum autem omnium sacramentorum est ritus à Deo institutus. In baptismo, Aspersio aquæ in nomine Patris, & Filij, & Spiritus sancti. In Cœna, Manducatio panis & vini, cum annunciatione mortis Domini. Vtrumque in Dei verbo expressum est. Illud Matth. 26. 26. Hoc Matth. 28. 19. Proinde falsum est, quod dicis, Sacra-

mentorū materialia non esse in verbo Dei expressa, sed ex tacita Traditione profecta. Terminus sacramentorum est communio Christi, & omnium eius beneficiorū, quæ per externa ista symbola nobis obsignantur & repræsentantur. Eorum forma est relatio sacramenti ad rem sacramenti, id est, ordinatio externi ritus ad testificationem in mente Dei, & eorum qui sacramentis utuntur. Sed & hoc in verbo Dei expressum est. Proinde falsum est, quod inquit Bellarminus formalia sacramentorum ex traditione, non ex verbo scripto profecta esse. Deinde si omnia materialia & formalia Sacramentorum sunt ex tacita Traditione, & non ex verbo scripto, perfidè sanè agunt papistæ, dum sua sacramenta, & eorum formalia, atque materialia ex verbo scripto probare conantur. Atque hæc de exemplis diuinæ Traditionis. Nunc ad exempla Apostolicæ traditionis, Ex hac dicit fluxisse *ieiunium Quadragesimæ*, & *ieiunium quatuor temporum*. Nos prius respondimus de ieiunio quadragesimæ, Deinde de quatuor temporum ieiunio. Bellarminus dicit illud esse ex Apostolica Traditione. Sed hoc falsum est. Apostoli enim ne γὰρ quidem de eo in suis libris, Scitè Socrates l. 5. c. 22. ὁ δὲ περὶ τούτων ἱσχυρότερος ἔχει δεῖξαι πᾶσι γινώσκοντες. Quam ob causam rectè dicit Cyprianus, *non videndum esse, quid aliqui ante nos fecerint, sed quid ille, qui ante omnes est, faciendum mandauit*. Et ut nulla dubitandi materia subsit, dicit Socrates l. 5. c. 22. Δῆλον ὡς καὶ περὶ τούτου (loquitur de ieiunio Quadragesimæ) τῇ ἰκίστῃ γνώμῃ καὶ προαιρέσει ἐκίττησαν οἱ ἀπόστολοι.. Vnde necessariò sequitur vanum esse, quod inquit Bellar. illud ex Apostolica

stolica Traditione fluxisse, Sed neque de ipsa ieiunij specie quicquā ab Apost. statutū est. Euseb. n. l. 5. c. 26. οἱ μὲν γὰρ, inquit, οἶονται μίαν ἡμέραν δεῖν αὐτὸς ἡσυχάζειν, οἱ δὲ δύο. οἱ δὲ πλείονας, οἱ δὲ τισσαρχόκοι αἴρας ὑπερβινέας ἔμμεναις συμμετρῶσι τὴν ἡμέραν αὐτῶν, &c. Idē docet Socrates lib. 5. c. 22. οἱ μὲν γὰρ ἐν ῥάμῃ τρεῖς πρὸς τῷ πάσχα ἑβδομάδας, πλὴν σαββάτου καὶ κυριακῆς, συνημέναις ἡσυχάζουσιν. οἱ δὲ ἐν ἡλυστοῖς καὶ ὅλη τῇ ἑλλάδι ἔοι ἐν ἁλῆ καὶ ἀδελφείᾳ πρὸς ἑβδομάδων ἕξ τὴν πρὸς τῷ πάσχα ἡσυχάζουσιν, τισσακόστη αὐτὴν ἐνομάζοντες, ἄλλοι πρὸς ἐπὶ τῆς ἐορτῆς ἑβδομάδων τῆς ἡσυχίας ἀρχόμενοι, καὶ τρεῖς μόνως πενθήμερους, ἐκ διπλημενῶν ἡσυχουσί, ὅθεν ἦτις καὶ αὐτοὶ τισσακόστην τὸν χρόνον τῶν καλῶσιν. & ἄλλοι δὲ ἄλλως ἐν αἴρας ἡσυχάζουσιν, διαφορὰν ἔχουσι τὴν ἑστέαν. Hoc sufficit ad vanitatē ostendendā, qua Bellar. asserit, illud 40. dierū ieiuniū esse ex Apostolica traditione. Sed neque quatuor temporum ieiunium est ex Apostolica traditione. Apostolos enim hoc reliquisse cuiuslibet iudicio docet Socrates lib. 5. cap. 22. Origenes homil. 10. in Leuit. August. ad Casulan. epist. 86. Deinde Gratianus docet *veterem Ecclesiam tantum tribus temporibus ieiunasse*, Distinct. 76. Idem docet Calixtus epist. 1. Et Bellarminus lib. 4. cap. 3. de verbo Dei. Vnde satis apparet & hoc quatuor temporum ieiunium non esse ex Apostolica Traditione profectum. Quod enim Apostolorum ætate liberum fuit, neque ab illis præceptum, & ab alijs, qui non fuerunt Apostoli, institutum est, hoc non est ex Apostolica traditione. Plura de ieiunijs dicemus, cū ad controuersiam de ieiunijs peruenimus. Tantū nunc concludo, Distributionem Bellarmini neque logicam, neque exempla vera esse. Deinde partitur Traditiones secundum materiam, &

distribuit eas in *traditiones de moribus & de fide*. Sed si loquitur de traditione non scripta, tum errat. Nulla enim est traditio de fide ad salutem necessaria, quæ non est scripta. Ioh. 20. 31. *Hæc scripta sunt, ut credatis, Iesum esse Christum filium Dei, & ut credentes habeatis vitam æternam.* Cyrill. lib. 12. cap. 68. in Iohannem. *Non igitur omnia quæ Dominus fecit, scripta sunt, sed quæ scribentes tam ad mores, quam ad dogmata putarunt sufficere: ut recta fide & operibus, ac virtute rutilantes ad regnum cælorum perueniamus.* Dum igitur Bellarminus contrarium pro fidei principio ponit, sumit illud quod est in principio. Traditionis de fide exemplum statuit, quod *Beata Maria fuerit semper virgo*. At contrarium docet Basiliius homil. de Natiuitate Domini. *Vsq̃ue ad dispensationis, inquit, mysterium necessaria erat virginitas; quod verò deinceps secutum est, nullam curiositatem rationi mysterij exhibet.* Traditionis de Moribus exemplum dicit esse, quod *certis diebus ieiunia & festa celebrentur, &c.* Sed neque hoc patrum memoria pro traditione habitum est. Socrates enim lib. 5. cap. 21. & Sozomenus lib. 7. c. 19. dicunt Apostolos *cuiuslibet concessisse liberam potestatem*. Si tamen quis pertinaciùs vserit, ille sciat Montanum esse primum, qui ieiuniorum leges imposuerit, ut docet Eusebius lib. 5. cap. 18. Postea dicit, quæ *rursus aut sunt perpetuæ, aut temporales: & vel vniuersales, vel particulares: vel necessaria, vel libera.* Si hoc refert ad traditiones, de fide & morib. simul, tum rursus errat. Omnes enim traditiones de fide, ad salutem necessariæ sunt perpetuæ, vniuersales, & necessariae, neque vlla dari potest, quæ sit temporalis, particularis

particularis & libera. Si verò has posteriores tres partitiones tantùm de ritibus intelligit, tum sunt veræ. Atque hæc de partitionibus.

## CAPVT III.

*Orthodoxa sententia de Traditionum  
varietate proponitur.*

**P**Apisticam sententiam de Traditionum varietate refutauimus capite superiore, sequitur vt orthodoxæ Ecclesiæ sententiam explicemus. Illa est huiusmodi, Traditiones omnes esse vel diuinas, vel humanas. Nam cùm omnes Traditiones, quarum in Ecclesiasticis scriptoribus mentio fit, vel à Deo, vel ab homine profectæ sint, quemadmodum cap. primo ostendimus, sequitur eas omnes vel diuinas, vel humanas esse. Diuinæ sunt vel immediatè à Deo profectæ, vel mediatè. Immediatè, vt S. Cœna, &c. Et hæ omnes sunt literis consignatæ. Nulla enim est immediatè à Deo profecta, quæ non sit literis consignata. Quæ verò mediatè à Deo per Apostolos constitutæ sunt, illæ vel pertinent ad fidem, & mores, vel ad decorum. Fidem voco ipsam doctrinam, mores dico vitæ honestatem. Hæc omnia sunt literis consignata & immutabilia. Vtrumque certius & notius, quàm vt vlla probatione opus sit. Quæ ad decorum pertinent, possunt subdiuidi, vel in essentialia decori, vel in accidentalialia. Essentiale voco illud morale, quod in decoro est, accidentalialia voco externas circumstantias. Illud est literis consignatum, & immutabile. 1. Cor. 14. 40. *Omnia decenter & ordine fiant.* Horum quædam sunt literis consignata,

debet eodem spiritu intelligi, quo scripta est.

Quo spiritu Scriptura scripta est, eodē spiritu debet intelligi. Sed est scripta spiritu Dei, Ergo & Spiritu Dei intelligi debet.

Maior etsi vera est, vno tamen atque altero testimonio à me probabitur. Hieronymus in Epist. ad Galat. cap. 1. *Qui Scripturam aliter intelligit, quam sensus Spiritus sancti efflagitat, hereticus vocari potest.* Bernhardus in orat. ad fratres de monte, *nunquam Pauli sensum ingredieris, nisi Pauli Spiritum imbiberis.* Minorem probat dictum Pauli. 2. Timoth. 3. 16. *Omnis scriptura est diuinitus inspirata.* Et 2. Pet. 1. 22. *Acti à Spiritu Dei loquuti sunt.* Hoc argumentum concedunt papistæ, sed aiunt in solo papa residere istum spiritum, & ob eam causam iudicium papæ esse regulam & normam omnis interpretationis. At hoc est illud, quod est in principio. Est enim inter nos controuersum, & ob eam causam pro principio ab altera parte afferri non potest. Deinde totus orbis clamat in papa nō spiritū Christi, sed spiritū Antichristi habitare. Prætereà si Bellarminus vnum scripturæ locū producere potest, in quo disertè scriptū est, papam nihil, nisi quod à Sp. sancto dictatur, loquuturum esse, dabo manus. Si verò hoc facere non potest, & experiētia testatur multa à papa tradi, quæ à nemine, nisi à spiritu Antichristi produci possunt, non ægrè feret Bellarminus, si papæ iudicium pro authenticæ interpretationis regula accipere nō possumus. Deinde si spiritus Christi semper habitat in papa, & papa nihilloquitur, nisi quod à spiritu Christi profectum est, sequitur spiritum Christi esse hæreticum.



reticum. Multi enim papæ fuerunt hæretici, vt antè probauimus. Deinde si quicquid à papa Romano proficiscitur, à spiritu Christi proficiscitur, tum spiritus Christi est mendax. Papa n. sibi ipsi sepè cōtradicit, & ne quis hoc vel illud prætendat, dico hoc iudicialiter factum esse. Et vt taceam de Formoso, Iohannes XXII. & Nicolaus tradunt contradictoria. Vnus enim *tradit Christum & Apostolos nihil proprij habuisse*, alter hoc *negat*, & dicit habuisse. Celestinus concedit coniugi, cuius coniux prolapsus est in hæresin, *secundas nuptias*. In hoc *negat*. C. Quanto de diuortijs. Pelagius statuit, vt diaconi ab vxoribus abstineant, quas ante constitutionē duxerant. C. ante Triennium, Distinct. 31. Gregorius I. neminem admittit ad eum ordinem, nisi qui castitatem vouisset. Huiusmodi multa in decretorum libris. Verùm cùm contradictoria simul vera esse non possint, sequitur alterum mendacem fuisse. Iam si papa nihil dixit iudicialiter, nisi quod à spiritu Christi profectum est, sequitur & spiritum Christi esse mendacem, sed hoc est blasphemum. Relinquitur ergo papam non semper loqui secūdum spiritum Christi, ac propterea aliquando errare. At dicis, si spiritus Christi non semper est in papa, vbi igitur est? Resp. eum esse in fidelib. & mentem suam per fideles patefecisse, idq; multis modis, per aliquos n. perfectè, per aliquos imperfectè. Perfectè, per Prophetas & Apostolos. Hos impulit vt mentem & sententiam suam literis consignarent. Quod igitur cum his Prophetarum & Apostolorū literis congruit, hoc est verū & authenticum. Ac, p. inde interpretatio cū mente

mente Sp. sancti per Prophetas & Apostolos prodita congruens, est bona, & quæ ab ea discrepat, est mala. Imperfectè & minus plenè suam voluntatem reuelavit reliquis fidelibus. 1. Iohan. 2. 20. *Et vos unionem habetis.* Iohan. 6. *erunt omnes edocti a Deo.* 1. Cor. 2. 15, *Spiritualis iudicat omnia.* Habitat igitur Sp. sanctus in fidelibus, & ob eam causam fideles de interpretationibus iudicare possunt. Sed quoniam hi spiritum Dei non plenè acceperunt, ideò interdum in iudicando aberrant. Quando igitur secundum spiritum iudicant, tum non errant. Iudicant autem secundum spiritum, quando secundum scripturam iudicant. Spiritus enim in scriptura loquitur. Quando verò non secundum spiritum iudicant, tum aberrant. Non enim iudicant secundum scripturam, per quam spiritus loquitur. Si hoc ad papistas accommodas, recipimus eorum interpretationes, quando congruunt cum spiritu, qui in scripturis loquitur. Quando verò non congruunt, non recipimus eas. Nonum Argumentum. Quia non est tanta auctoritas papalium decretorum, quanta Canoniarum scripturarum.

Cuius interpretatio est regula authenticæ veritatis, ille est in eadem cum canonicis scripturis auctoritate. Sed papæ interpretatio est regula authenticæ veritatis. Ergo papæ interpretatio est eiusdem cum canonicis script. auctoritatis.

Hoc etsi Canones & Canonistæ affirmant, tamè adeò absurdum est, vt non existimem Bellarminum adeò posteritatis iudicium contēnere, vt hoc defendere velit. Ideo huius argumenti absurditatem non  
vrgebo

vrgebolatiùs. Decimum Argumentum. Quia primitiua ecclesia statuit vnanimiter veram regulam & normam authenticæ interpretationis esse scripturæ analogiam. Iren. lib. 4. cap. 63. *legitimam & minime periculosam expositionē scriptura esse secundū ipsam scripturam.* Euseb. de Polycarpo. lib. 3. cap. 20. *Et tamen oīa hæc cum scripturis consona proferebat.* Origenes in Matth. Homil. 25. *omnis sensus, qui est extra scripturam, non est sanctus,* Basil. epistola 80. *Stemus arbitratu sacrarum scripturarum, & apud quos inueniuntur dogmata diuinis oraculis consona, illis omnis veritatis adiudicetur sententia.* Hieronymus in Matth. cap. 23. *Quod de scriptura non habet auctoritatem, hoc eadem facilitate rejicitur, qua admittitur.* Augustinus contra Crescon. libro 2. *Canon Ecclesiasticus constitutus est, ad quem Prophetarum & Apostolorum libri pertinent, secundum quos de ceteris libris, vel fidelium, vel infidelium indicamus.* Augustinus de ciuit. Dei. lib. 11. cap. 33. *Et si huius veritatem libri indagare nequimus, à regula tamen fidei, quæ per alias eiusdem auctoritatis literas fidelibus satis nota est, non aberrabimus.* Augustinus de Genesi ad literam lib. 1. capite 21. *Et cum diuinos libros legimus in tanta multitudine verorum intellectuum, qui de paucis verbis eruuntur, & sanitate Catholica fidei mununtur, id potissimum eligamus, quod certum apparuerit eum sensisse, quem legimus, si autem hoc latet, id certè, quod circumstantias Scriptura non impedit, & cum sana fide concordat. Si autem & circumstantia periræctat ac discussa non potest, saltem id solum, quod fides sana præscribit.* Hoc Argumentum etsi necessarium non est, tamen ex eo apparet, quæ fuerit pri-

primitiux Ecclesiæ de hac sententia iudicium. Et vt omnia in vnum contraham cùm Dei verbum, ac recta ratio, & primitiua Ecclesia vnanimiter statuunt, scripturæ analogiam esse omnis interpretationis regulam, & eam interpretationem esse bonam, quæ cū scriptura conuenit, eamque malam, quæ ab ea discrepat, nos equidem contrarium statuere nō possumus. Ac proinde quando aduersarij interpretationem afferunt, quæ cum scriptura pugnat, nos eam reijcimus, etiamsi omnes papæ eam probarent, & cū ex huiusmodi interpretatione aliquod impium dogma probant, tum petunt principium, & probant illud quod incertum est, per illud, quod equè incertū est.

*Conclusio.*

Omnia principia Christianorum dogmatum sunt certa, ante concessa, extra controuersiam posita, vera, immediata, & diuina. Sed interpretatio papæ est incerta, controuersa, ab altera parte negata, falsa, inepta & humana. Interpretatio igitur papæ non est principium Christianorum dogmatum.

FINIS.

SIBRAN-

## SIBRANDI LVBBERTI

De

*Principiis Christianorum dogmatum*

Liber septimus.

*Proœmium.*

**D**E vero sensu Canonicarum scripturarum differuimus libro superiore, nunc ad Traditiones accedemus. Hæ sunt quartum principium papisticorum dogmatum. Reliqua tria non sufficiunt ad illorum dogmata defendenda. Nam neque ex lib. apocryphis, neque ex vulgata versione, neque ex papæ interpretatione possunt ea oïa defendere. Ided excogitauerunt hoc quartum, quod Eccia, Emzero, & alijs fuit ignotû. Dicunt scripturam esse imperfectam, & Traditiones docere, quæ in scriptura prætermissa sunt. Per Traditiones intelligunt omnes ritus, ceremonias, & dogmata, quæ in papistica Ecclesia sunt vsitata, & verb. Dei expressa non sunt. Dicere ergo Traditiones esse cum verbo Dei eiusdem auctoritatis, est idem, atque omnia dogmata, ceremonias, & ritus papisticos collocare in eadem cum verbo Dei auctoritate. Quod si obtinuerint, nihil erit tam impium, quod sub titulo Traditionum tueri non possint. Hinc tanti Commentarij & Apologiæ pro Traditionibus. Canus affirmat *Traditiones plus virium habere aduersus hæreticos, quam Scripturam*, lib. 3. cap. 3. Idem contendit omnem

*cum hæreticis disputationem ad Traditiones referendam esse, ibidem. Hinc apparet quanta sit papistarum pro Traditionibus sollicitudo. Verùm Bellarmine, omnes Traditiones de quibus contendimus, sunt in cōtrouersia positæ. Deinde non sũnt vtrique parti cōmunes, sed alterius part̃s propriæ. Principia verò non sunt in controuersia posita, neque sunt alterius partis propria, sed vtrique parti communia. Deinde papistici ritus, ceremoniæ, & dogmata sunt multis erroribus contaminata. Affirmant hoc Sanazarius, Petrarcha, Mantuanus, Erasmus, Palingenius, & alij papistici doctores. Idem testantur omnes orthodoxæ Ecclesiæ, quæ sunt in Transylvania, Hungaria, Bohemia, Polonia, Liuania, Suetia, Gallia, & Heluetia. Agnouit hoc ipse papa Adrianus, Sleidan. lib. 4. in principio, papa Adrianus in bulla ad protestantes Germanos. At quòd erroribus contaminatum est, hoc veræ & certæ doctrinæ principium esse non potest. Hoc sufficeret ad totam illam tuam de Traditionibus disputationem inducendam. Sed nos vestigia tua sequentes, etiã hanc partem explicabimus, ac primùm ostendemus, quid nomen significet.*

## CAPVT. I.

*Quid nomen significet.*

**T**RADITIO hîc non accipitur pro actione tradendi, quam propriè significat, sed pro eo quod traditur. Et in hac significatione primùm notat quid ab hominibus immediatè vocatis, & diuinitus inspiratis, id est, Apostolis traditum est, siue hoc factum sit viua voce, siue literis scriptis. 2. Thess. 2. 15.

*Tenete Traditiones quas accepistis, siue per sermonem siue per epistolam. Deinde magis in specie notat ipsum Dei verbum literis comprehensum. 1. Cor. 15. 3. Prout acceperam tradidi vobis, Christum videlicet mortuum esse pro peccatis nostris. Cyprianus cont. epist. Stephani ad Pomp. Si ergo, inquit, aut in Euangelia praecepitur, aut in Apostolorum epistolis, aut actibus continetur, obseruetur etiam hac sancta Traditio. Præterea significat & ritus literis scriptis expressos, Actorum 6. 14. Et mutabit Traditiones, quas tradidit nobis Moses. Basilii lib. 3. cõt. Eunom. Hoc palam oppugnat sacri baptismatis Traditionem, euntes baptizate in nomine Patris, & Filij, & Spiritus sancti. Tertiò significat etiã illud, quod scriptum non est, sed tantum viuâ voce ab Apostolis traditum est, 2. Thess. 2. 15. Tenete Traditiones siue per sermonem. Irenæus lib. 3. cap. 2. Euenit neque Traditioni neque scripturis consentire eos. Et cum hoc modo Traditio accipitur, subdistingui potest in doctrinam ab Apostolis viuâ voce traditam, & in ritus ab ijs constitutos. In doctrinam, Luc. 1. 3. Prout tradiderunt nobis, qui in principio spectatores fuerunt. In ritus, 1. Cor. 11. 2. & sicut tradidi vobis, traditiones retinetis. Atque hoc modo accipitur Traditio, quando aliquid ab hominibus immediatè vocatis, & diuinitus inspiratis traditum significat. Porro Traditio significat & illud, quod ab hominibus non immediatè vocatis, excogitatum & traditum est. Matth. 5. 3. Quare & vos transgredimini Traditiones Dei per Traditiones vestras. & vers. 6. & irritum fecistis mandatum Dei per Traditiones vestras. Marc. 7. 8. Nam omissio mandato Dei tenetis Traditiones hominum. Mar. 7. 9. Abrogatis mandatum*



*Dei, ut Traditiones vestras seruetis.* Deinde Traditio hoc modo accepta, vel congruit cum Dei verbo, vel discrepat ab eo. Congruit, ut multæ expositiones, constitutiones, & ceremoniæ à sanctis patribus, episcopis, & concilijs constitutæ. Discrepat, ut multæ item Paparum & Monachorum expositiones, constitutiones, & ceremoniæ. Porro hæc Traditio subdistinguitur in ritum humanitus inuentum, & in doctrinam ab humano cerebro profectam. In doctrinam, ut Marc. 7. 9. In ritus, Matth. 15. 2.

## CAPVT II.

*Quotplex sit Traditio.*

**N**ominis æquiuocatione explicata, distinguemus rem ipsam in suas species. Accipimus autem Traditionem in genere pro eo, quod non literis comprehensum, sed viua voce, aut alio quolibet modo ab hominibus immediatè vocatis, & diuinitus inspiratis, vel ab ijs qui non immediatè vocati sunt, traditum est. Hanc Bellarminus duobus modis distinguit, videlicet *secundum auctores*, & *secundum materiam*. Secundum auctores, dicit eam esse triplicem, nempe *Apostolicam, Ecclesiasticam, & Diuinam*. Diuinam vocat eam, *quam Christus Apostolis tradidit*. Apostolicam vocat, *quam Apostoli ex instinctu Sp. sancti tradiderunt*. Ecclesiasticam dicit antiquam *consuetudinem, vel à prelatis vel à populis inchoatam, & paulatim tacito populorum consensu vim legis obtinentem*, id est, ut vno verbo dicam, ad Ecclesiam pertinentem. Primi generis exempla ponit *formalia & materialia Sacramentorum*. Secundi generis exempla ponit *ie-*  
iunium

*iunium quadragesima, & ieiunium quatuor temporum.* In tertio genere exempla nulla adducit. Nos distributionem ipsam prius examinabimus, deinde ad exempla progrediemur. Differentiæ hæc neque accidentaliter, neque essentialiter rem distinguunt. Simul enim coincidunt. Quicquid enim Apostoli ex diuina inspiratione fecerunt, hoc est diuinum. Apostolicum igitur & diuinum nō differunt, tanquam oppositæ species; sed tanquam genus & species. Omne enim Apostolicum est diuinum, sed non omne diuinum est Apostolicum. Porro Apostolicum & Ecclesiasticum ferè differunt eodem modo. Omne n. Apostolicum pertinet ad Ecclesiam, & est Ecclesiasticum, sed non omne Ecclesiasticum est Apostolicum. Dum igitur Traditiones in Diuinas, Ecclesiasticas, & Apostolicas distinguis, perinde facis, ac si animal distribueres in sentiens, brutum, & hinniens. Hæc de distributione. Nunc ad exempla respondemus. *Dicis formalia & materialia Sacramentorum non esse ex Verbo scripto, sed ex tacita traditione.* At hoc est falsum, quod vt intelligatur, repetam rem illam paulò altiùs. Sacramentum citra omnem contro- uersiam est ex eorum numero, quæ sunt *αἱ τρεῖς*. Illorum fundamentum est materia, Relatio fundamen- ti ad terminum est forma. Fundamentum autem omnium sacramentorum est ritus à Deo institutus. In baptismo, Asperio aquæ in nomine Patris, & Filij, & Spiritus sancti. In Cœna, Manducatio panis & vini, cum annunciatione mortis Domini. Vtrumq; in Dei verbo expressum est. Illud Matth. 26. 26. Hoc Matth. 28. 19. Proinde falsum est, quod dicis, Sacra-

stolica Traditione fluxisse, Sed neque de ipsa ieiunij specie quæquā ab Apost. statutū est. Euseb. n. l. 5. c. 26. *οἱ μὲν γὰρ, inquit, οἰονταὶ μίαν ἡμέραν δεῖν αὐτὸς νηστεύειν, οἱ δὲ δύο, οἱ δὲ πλείους, οἱ δὲ τεσσαράκοντα ὥρας ὑπερβύτας, ἢ ἡμερὰς συμμετρῶσι τὴν ἡμέραν αὐτῶν, &c.* Idē docet Socrates lib. 5. c. 22. *οἱ μὲν γὰρ ἐν ῥώμῃ τρεῖς πρὸ τῆ πάσχα ἑβδομάδας, πλὴν σαββάτου καὶ κυριακῆς, συμμεμνίας νηστεύουσιν. οἱ δὲ ἐν ἑλλενισμοῖς καὶ ὅλη τῇ ἑλλάδι, οἱ δὲ ἐν ἀλεξανδρείᾳ πρὸ ἑβδομάδων ἕξ τὴν πρὸ τῆ πάσχα νηστίαν νηστεύουσιν, τινὲς ἀκόσμη αὐτὴν ἐνομαζόντες, ἄλλοι πρὸ ἐπὶ τῆς ἐορτῆς ὀδομαδῶν τῆς νηστίας ἀρχόμενοι, καὶ τρεῖς μόνους πενθημέρους, ἐκ διαλημμάτων νηστεύοντες, ὅθεν ἦτοί τε αὐτοῖς τεσσαράκοντα τὸν χρόνον τῶτον καλεῖσιν. & ἕτεροι δὲ ἄχρις ἐν ἑκτατῇ ὥρᾳ νηστεύοντες, διὰ φοροῦ ἔχουσιν τὴν ἐστίασιν.* Hoc sufficit ad vanitatē ostendendā, qua Bellar. asserit, illud 40. dierū ieiuniū esse ex Apostolica traditione. Sed neque quatuor temporum ieiunium est ex Apostolica traditione. Apostolos enim hoc reliquisse cuiuslibet iudicio docet Socrates lib. 5. cap. 22. Origenes homil. 10. in Leuit. August. ad Casulan. epist. 86. Deinde Gratianus docet *veterem Ecclesiam tantum tribus temporibus ieiunasse*, Distinct. 76. Idem docet Calixtus epist. 1. Et Bellarminus lib. 4. cap. 3. de verbo Dei. Vnde satis apparet & hoc quatuor temporum ieiunium non esse ex Apostolica Traditione profectum. Quod enim Apostolorum ætate liberum fuit, neque ab illis præceptum, & ab alijs, qui non fuerunt Apostoli, institutum est, hoc non est ex Apostolica traditione. Plura de ieiunijs dicemus, cū ad controuersiam de ieiunijs peruenimus. Tantū nunc concludo, Distributionem Bellarmini neque logicam, neque exempla vera esse. Deinde partitur Traditiones secundum materiam, &

distribuit eas in *traditiones de moribus & de fide*. Sed si loquitur de traditione non scripta, tum errat. Nulla enim est traditio de fide ad salutem necessaria, quæ non est scripta. Ioh. 20. 31. *Hæc scripta sunt, ut credatis, Iesum esse Christum filium Dei, & ut credentes habeatis vitam æternam.* Cyrill. lib. 12. cap. 68. in Iohannem. *Non igitur omnia quæ Dominus fecit, scripta sunt, sed quæ scribentes tam ad mores, quam ad dogmata putarunt sufficere: ut recta fide & operibus, ac virtute rutilantes ad regnum cælorum perueniamus.* Dum igitur Bellarminus contrarium pro fidei principio ponit, sumit illud quod est in principio. Traditionis de fide exemplum statuit, quod *Beata Maria fuerit semper virgo*. At contrarium docet Basiliius homil. de Natiuitate Domini. *Vsq; ad dispensationis, inquit, mysterium necessaria erat virginitas; quod verò deinceps secutum est, nullam curiositatem rationi mysterij exhibet.* Traditionis de Moribus exemplum dicit esse, quod *certis diebus ieiunia & festa celebrentur, &c.* Sed neque hoc patrum memoria pro traditione habitum est. Socrates enim lib. 5. cap. 21. & Sozomenus lib. 7. c. 19. dicunt Apostolos *cuiuslibet concessisse liberam potestatem*. Si tamen quis pertinaciùs vserit, ille sciat Montanum esse primum, qui ieiuniorum leges imposuerit, ut docet Eusebius lib. 5. cap. 18. Postea dicit, quæ *rursus aut sunt perpetuæ, aut temporales: & vel vniuersales, vel particulares: vel necessaria, vel libera.* Si hoc refert ad traditiones, de fide & morib. simul, tum rursus errat. Omnes enim traditiones de fide, ad salutem necessariæ sunt perpetuæ, vniuersales, & necessariæ, neque vlla dari potest, quæ sit temporalis, particularis

particularis & libera. Si verò has posteriores tres partitiones tantùm de ritibus intelligit, tum sunt veræ. Atque hæc de partitionibus.

## CAPVT III.

*Orthodoxa sententia de Traditionum  
varietate proponitur.*

**P**Apisticam sententiam de Traditionum varietate refutauimus capite superiore, sequitur vt orthodoxæ Ecclesiæ sententiam explicemus. Illa est huiusmodi, Traditiones omnes esse vel diuinas, vel humanas. Nam cùm omnes Traditiones, quarum in Ecclesiasticis scriptoribus mentio fit, vel à Deo, vel ab homine profectæ sint, quemadmodum cap. primo ostendimus, sequitur eas omnes vel diuinas, vel humanas esse. Diuinæ sunt vel immediatè à Deo profectæ, vel mediatè. Immediatè, vt S. Cœna, &c. Et hæc omnes sunt literis consignatæ. Nulla enim est immediatè à Deo profecta, quæ non sit literis consignata. Quæ verò mediatè à Deo per Apostolos constitutæ sunt, illæ vel pertinent ad fidem; & mores, vel ad decorum. Fidem voco ipsam doctrinam, mores dico vitæ honestatem. Hæc omnia sunt literis consignata & immutabilia. Vtrumque certius & notius, quàm vt vlla probatione opus sit. Quæ ad decorum pertinent, possunt subdiuidi, vel in essentialia decori, vel in accidentalialia. Essentiale voco illud morale, quod in decoro est, accidentalialia voco externas circumstantias. Illud est literis consignatum, & immutabile. 1. Cor. 14. 40. *Omnia decenter & ordine fiant.* Horum quædam sunt literis confi-

consuetudinem suam consuetudini alterius preponere conatur? non enim mihi de libro Dei hæc recitatur use est, aut vniuersa quacunque dilatatur, Ecclesia plena voce certabit, aut ostendet eum contra fidem facere, se autem secundum fidem moresq; hinc optimos, aut se violare, aut se custodire conuincet. Violant sanè quietem & pacem suam de superflua quaestione rixando. Malletam tamen in rebus eui modi, ut & ille in huius, & hic in illius patria, ab eo quod ceteris faciunt, non abhorreret. Aliud exemplum habemus in Paulo, ille Timotheum circumcidit. Acto. 16. 3. Titum non voluit circumcidere, ad Gal. 2. 3. Quatenus verò non faciunt ad ædificationem, possunt salua consciëntia omitti, & si fortè p occasionē impediūt ædificationē, debēt omnino & necessariò omitti. Præter has Traditiones, est & alia humana Traditio quæ pugnat cum Dei verbo, & cum bona conscientia obseruari non potest. Hæc prorsus abroganda est. Atque hæc est orthodoxæ Apostolicæ ecclesiæ de Traditionum varietate sententia.

## CAPVT IV.

*De Statu controuersia.*

**Q**Uotuplex sit secundum orthodoxos Traditio, explicuimus cap. sup. Nunc ipsā controuersia aggrediemur. Ac primùm ostendemus quis sit huius controuersia status. Hunc Bellarminus ita definit, ut planè appareat eum repugnante conscientia de hac controuersia scripsisse. Dicit n. hunc esse controuersia statum, oīa ad salutē necessaria Dei verbo expressè contineri, & huius sententiæ affirmatiuam nobis tribuit, negatiuam verò sibi vendicat. Verùm Bellarminè, si propriè loqueris, & ita sentis, tum à  
via

via aberras. Non enim dicimus omnia ad salutem necessaria expressè contineri in Dei verbo. Afferimus enim quædam expressè in Dei verbo contineri, quædam necessariò ex eo deduci. Exempli gratia, Baptismus puerorum, consubstantialitas patris & filij non expressis verbis in scriptura posita sunt, sed necessariò ex ea colliguntur. Atque hæc non tantum est nostra sententia, sed & veteres idem nobiscum hæc in resentiunt. Vid. Nazianz. lib. 5. de Theolog. Basil. de vera fide. August. de Baptismo cont. Donatist. lib. 2. cap. 14. Et lib. 4. 23. Idem docent omnes nostri doctores. Chénit. in Exam. Concil. Trid. Part. 1. in 5. gen. Tradit. Calvinus lib. 1. instit. cap. 13. 5. 5. Sadel. de verb. Dei scripto. cap. 5. Si igitur Bellarminus statum controuersie se ita habere putauit, valdè errat. Si verò sciuit rem aliter se habere, tum verum est quod dixi, eum mala consciétia scribere, & dum statum controuersie peruertit, eum hoc agere, vt imperitorum iudicia peruertat. Non igitur ille est status controuersie, quem posuit Bellarminus. Sed status hoc cardine vertitur, omniáne ad salutem necessaria verbo Dei scripto siue expressè, siue non expressè contineantur. Nos aimus & dicimus, omnia quæ ad salutem necessaria sunt, verbo Dei scripto contineri, idque in hunc modum, vt vel in eo expressa sint, vel ex eo necessariò deduci possint. Papistæ hoc negant, & dicunt omnia ad salutem necessaria non contineri verbo scripto, ita, vt illa omnia neque in verbo scripto expressè posita sint, neque ex eo necessariò deduci possint. Præter hanc controuersiam Bellarminus statuit & aliam, nempe



nempè omnes Apostolicas traditiones esse omnibus hominibus, semper, & omni tempore seruandas. Quod miror homini literato excidisse. Nam prohibitio sanguinis & suffocati, Act. 15. 29. est traditio Apostolica, & iam ante multa secula desijt. Quod ipse Bellarminus negare non potest. Possem alia exempla adducere, sed hoc vnum est ita illuître, vt sit instar omnium. Quod autem ad rem attinet, dico Apostolicas traditiones alias esse de doctrina & moribus, de quibus non cōtendimus, anathema enim sit, qui eas negat obseruandas esse: alias *πρὸ τῆ προίτου*; Et in his dicimus duo esse, vnum essenziale, vtpote ipsam vtilitatem, vel ædificationem proximi: alterum accidentale, vtpote externas circumstantias: videlicet, personas, tempus, locum & materiam. Illud dicimus omnibus hominibus esse obseruandum, hoc esse à nobis referendū ad ædificationem proximi, quemadmodum antè ostendi. Cū tempore ieiunij quadragesima hospes quidam valde fessus diuerteret ad Spyridonem, & Spyridonei carnes iuberet apponi, recusauit hospes, & dixit, se Christianum esse; respondit Spyridon ταύτη μᾶλλον ἔπαραιτήσιον. Πάντα γὰρ καὶ ἀπὸ τοῦ κατὰ τοὺς. Sozomenus lib. 1. cap. 11. Eodem modo Paulus circumcidit Timotheum, & Titum non circumcidit. Verū totum hoc est superuacuum. Nam si prior controuersia decidi potest, tum hæc non est necessaria, & si prior non potest componi, tum hæc est superuacua. Bellarminus etiā tertiam controuersiam adiungit, nempè esse rationem inueniendarum Apostolicarum Traditionum. At hoc prorsus nihil facit ad rem. Cæna enim Domini est Apostolica Traditio. Nam in 1. ad Corinth. cap. 11. vers.

11.v.23. dicit *sibi à Domino traditum esse*. Quis autem negat esse rationem, qua possimus cognoscere hanc esse Apostolicam? Bellarmin. ergo hic pugnat sine aduersario. Si tamen quis rem ipsam intuetur, ille videt hunc esse cardinem controuersiæ, videlicet sintne omnes ritus, ceremoniæ, doctrinæ, & omnes doctrinæ partes, quæcunque in papistica synagoga vsurpantur, æquè obseruanda, atque scriptum Dei verbum? Nam cum de aliquo dogmate controuerso contendimus, vident papistæ, an illud ex sacris literis probare possint, si hoc facere non possunt, trās-eunt ad Apocrypha, si illa non habēt auxilium, pergunt ad versionem vulgatam, si neque illa auxilium afferre potest; pergunt ad papæ interpretationem. Verum si neque illa auxilium habet, contendunt ad vltimum effugium, nempe ad Traditionem. Hoc modo purgatorium, cœlibatum sacerdotum, intercessionem sanctorum, adorationem mortuorum, eleuationem & adorationem Dei panacei, & multa alia defendunt. Vnde apparet hunc esse verę controuersię statum inter orthodoxos & papistas. Sintne omnia ista, quæ in papistica Synagoga vsurpantur æquè obseruanda, atque verbum Dei scriptum? hoc est, an consuetudo Romanę Ecclesiæ sit Christianorum dogmatum principium? Huius negatiuam orthodoxi sustinent. Et existimo Bellarminum non ita contemnere posteritatis iudicium, vt audeat affirmatiuam tueri. Et vt omnia in pauca contraham. Quæritur primùm an omnia ad salutem necessaria verbo scripto contineantur? Nos hoc contendimus, Papistæ negant. Quæritur secundò, an omnes tra-  
ditio-

ditiones Apostolicæ sint omni tempore & loco, ab omnibus hominibus obseruandæ. Nos hoc *negat* negamus. Papistæ *ἀπαρ* affirmant. Quæritur tertio, an omnes papistici ritus, ceremoniæ & dogmata sint æquæ obseruanda, atque verbum Dei scriptum, hoc est, num consuetudo Romanæ Ecclesiæ sit Christianorum dogmatum principium? Nos negamus, Papistæ affirmant. Atque hæc de statu controuersiæ.

## CAPVT V.

*Bellarminus negat scripturam esse necessariam.*

**S**Tatum huius controuersiæ explicuimus capite superiore, sequitur vt ad Bellarmini argumenta respondeamus. Ille autem primo loco duo probanda recipit. Vnum, *Scripturam non esse necessariam*. Alterum, *Scripturam non continere sufficientem doctrinam ad salutem*. Vtrumque aliquot argumentis probare conatur, & argumenta illa inter se miscet. Nos verò separabimus argumenta eius, & prius respondebimus ad illa, quibus contendit scripturam non esse necessariam. Deinde refutabimus & illa, quibus asserit, scripturam non esse sufficientem. Primum argumentum quo probat scripturam non esse necessariam, est. *Quia Ecclesia longo tempore fuit absque scriptura.*

Sine quo Ecclesia aliquo tēpore esse potuit, illud Ecclesiæ necessariū non est. Sed sine scriptura Ecclesia aliquo tempore esse potuit. Ergo scriptura non est Ecclesiæ necessaria.

Bellar. præterita Maiore pbat Minore, & dicit *ecclesiam Iudaicā à tēpore creationis usq; ad aetate Moysi absq; script. cōseruatā esse*. Hoc cōcedimus. Fatemur n. Deū tempore

tēpore Moſis fuiſſe primū ſcriptorem libri Canonici. Deinde dicit *eccleſiam Chriſtianam longo tempore fuiſſe abſque ſcriptura*. Sed hoc falſum eſt. Tempore enim Chriſti erat vetus Teſtamentum, ex eo Chriſtus & Apoſtoli ſuam doctrinam probabant, illud & in Synagogis Iudæorum, & in Eccleſijs Chriſtianorum ſemper legebatur, Ioh. 5. *Scrutamini Scripturas*. Luc. 16. *Habent Moſen & Prophetas*. Act. 17. *Berhoëſes ſcrutabantur ſcripturam*. Vnde apparet falſum eſſe quod inquit Bellarminus, Eccleſiam Chriſti longo tempore fuiſſe abſque ſcriptura. Hæc de probationibus Bellarmini. Nunc ad Argumentum reſpondebimus, & dicimus in Maiore eſſe fallaciam à ſecūdum quid ad ſimpliciter. Et eſt perinde ac ſi dicam. Bellarmino infanti præter vbera materna nullus alius cibus erat neceſſarius. Ergo & nunc ei nullus aliſ cibus eſt neceſſarius. Item, Deus poteſt nos alere abſque cibo & potu. Ergo cibus & potus ad vitam ſuſtentandam non eſt neceſſarius. Vel, Deus poteſt nos abſque institutione & induſtria doctos reddere. Ergo neque induſtria, neque inſtitutio ad eruditionem aſſequendam ſunt neceſſaria. Vel denique in hunc modum. Moſes & Elias potuerunt vitam 40. dies abſque cibo retinere. Ergo illis cibus & potus non fuit neceſſarius. Neque tamen affirmamus ſcripturam eſſe abſolutè neceſſariam. Et ſi hoc Bellarminus vult, nulla eſt inter nos controuerſia. Si autem exiſtimat eam prorsus non eſſe neceſſariam, in graui verſatur errore, quemadmodum deinde oſtendemus.

Secundum Argumentum, *Quia gentes tempore Veteris*

*teris Testamenti absque scriptura saluati sunt.*

Sine quo gentes tempore veteris T. seruari potuerunt, illud non est necessariū. Sed scriptura non vix sunt gentes, & proinde sine ea saluatae sunt. Ergo scriptura non est necessaria.

Ad Maiorem nunc non respondebimus, sed simpliciter negamus Minorem. Act. n. 8; 27. *Aethiops legebat Esaiam*. Ptolomæus item Philadelphus rex Aegypti curauit scripturam in græcam linguam conuertere. Vnde apparet Minorem falsam esse. Neque tamen negabo maiorem cognitionem fuisse in Israele, quàm in gentilismo.

Tertium argumentum. *Quia Christus non mandauit ut aliquid scriberetur.*

Quod Christus non præcepit, hoc non est necessariū. Sed ut verbū Dei scriberetur, non præcepit Christus. Ergo scriptura non est necessaria.

Si Bellarminus Maiorem intelligit de manifesto præcepto, tum Maior nō est vera. Multa enim Deus non manifestè, sed occultè præcipit, quæ tamē sunt necessaria, 2. Pet. 1, 21. *Non enim libidine hominis allata est olim prophetia, sed acti à Spiritu Sancto locuti sunt sancti Dei homines.* Cū tamen de omnibus prophetis manifestum mandatū non exstet. Sed hoc mandatum est interna illa Spiritus Inspiratio, de qua loquitur in 2. ad Timoth. cap. 3. Deinde & Minor est simpliciter falsa. Expressum enim mandatū est, Apoc. 1, 11. *Scribe quæ vidisti.* & Apoc. 14, 13. *Audini vocem dicentem, scribo.* Si Bellarminus regerit in reliquis libris non esse expressum mandatū, Respondeo neque in omnibus libris V. T. esse expressum

mandatū. Deinde si existimat reliquos libros nullo mandato: neque manifesto, neque occulto scriptos esse, vehemēter errat. Semper enim valet illa regula, *totā scriptura est diuinitus inspirata*, hoc est, quē admodum Syrus interpres reddidit; *Scriptura est per spiritum scripta*. Cū igitur neque maior, neque minor vera sint, sequitur conclusionem veram non esse. Quartū argumentū. *Quia Iudæi vti sunt traditionibus.* Iudæi vti sunt traditionibus. Ergo Scriptura non est necessaria.

Antecedens probat Bellarminus ex testimoniis, quæ ordine expendemus. Primum est, Exod. 13, 8. *Annunciabis filio tuo in die illa, dicens, hoc est, quod fecit mihi Dominus, quando egressus sum de Ægypto.* At hoc loco loquitur Moyses de Pascha, quod est memoriale liberationis ex Ægypto. Hoc verò totum scriptum est. Secundum, Deut. 32, 7. *Interroga patrem tuum, & nuntiabit tibi, quando excelsus distribuit gentibus hereditates.* At hoc loco loquitur primū de diuisione regionum & patrum, ut inquit Varabius. Illa verò diuisiō est scripta. Genes. 11, 8. Deinde de hereditate data Israel, ut idem Varabius docet. Sed & hæc historia scripta est. Tertium, Iud. 6, 13. *Vbi nā sunt omnia mirabilia, quæ narrauerunt nobis patres nostri, dicendo, nonne de Ægypto eduxit nōs Iehoua?* At hoc loco loquitur de liberatione ex Ægypto: Ea verò tota scripta est. Quartum, Iob. 8, 8. *Interroga etatem priorem, quia ab heri sumus, & nescimus, cū velut umbra sint dies nostri.* At hoc loco Bildad nihil aliud docet, quā ipsam experientiam testari, vitam nostrā esse breuem, & tanquā vmbra. Id verò non est traditum

dictum à patribus, sed ab ipso Deo ita constitutum. Quintum, Psalm. 44. 1. *Patres nostri miraverunt nobis opus, quod operatus est in diebus illorum: Tu tua manugentes expulisti &c.* At hoc loco loquitur de extirpatione Chanaanæorum. Illa verò tota scripta est. Sextum, Psalm. 78. 3. *Quæ audiuimus & cognouimus &c.* At hoc loco loquitur de promulgatione legis, de fœdere inito cum Iacob, de liberatione ex Egypto, de donatione terræ Chanaan, & similibus. Ea verò omnia scripta sunt. Dicere autem,

Iudæi vti sunt traditionibus scriptis. Ergo Scriptura non est necessaria, est insanire. Scriptura enim nihil aliud est, quàm traditio scripta:

Deinde Iudæi habebat duplices traditiones. Vnas scriptas. Alteras non scriptas. Scriptæ Traditiones sunt ipsa scriptura. Exempla autè ex Bellarmino posui, Non scriptæ sunt illæ, quæ ab hominibus postea inventæ sunt. Matth. 23. 2. *Discipuli tui transgredimini traditionem seniorum. Non enim lauant manus, cùm panem comedunt, & similes.* Illæ sunt norma & regula omnium dogmatum in Iudaica religione, Esa. 8. 20. *Ad legem & testimonium, Act. 26. 22. Nec quicquam dicens extra ea, quæ Propheta & Moses prædixerunt.* Hæ verò non sunt regula, neque norma dogmatum. Quandoque enim pugnant cum scriptura, Matth. 23. 3. *Nos transgredimini præceptum domini per traditionem.* Ezech. 20. 18. *in præceptis patrum vestrorum non incedatis.* Et ob eandem causam hæc regula & norma est verbum scriptum. Quatenus enim cum eo congruunt, sunt tollerandæ, quatenus verò ab eo dissentiant, sunt abijciendæ. Siue igitur traditiones



in prima significatione accipis, siue in secunda, semper sequetur scripturam esse necessariam. Nam si de scriptis traditionibus accipis, tum scriptura est necessaria. Hæc enim nihil aliud est, quam scripta traditio. Si verò de non scriptis accipis, tum etiam scriptura est necessaria. Illæ enim ex scriptura dijudicandæ sunt. Manifestum igitur ipsam scripturam esse necessariam. Atque hæc sunt Bellarmini argumenta, quibus voluit probare, scripturam non esse necessariam.

## CAPVT VI.

*Scripturam esse necessariam.*

**B**ellarmini argumenta, quibus voluit probare Scripturam non esse necessariam, refutauimus capite superiore. Sequitur vt ostendamus eam esse necessariam. Priusquam autem hoc faciemus, operæ pretium erit explicare, de qua necessitate hoc intelligamus. Non igitur hoc intelligimus de absoluta necessitate, sed de ea necessitate, quam vocant ex hypothesi. Posito enim eo, quod Deus verbū suum voluit scribi, necessario scriptum est. Hoc ita esse vno atque altero argumento ostendemus. Primum argumentum. *Quia puritas Religionis absque scriptura conseruari non potuit.*

Sine quo Religionis puritas conseruari non potest, illud est necessarium. Sed sine scriptura puritas religionis conseruari non potest. Ergo Scriptura est necessaria.

Maiores libenter dabit Bellarminus, & ne quis frustra contradicat, loquor in toto hoc capite de  
neces-

necessitate hypothetica. Minorem probo. Adam  
 tanquam Episcopus in sua familia docuit suos filios  
 verum Dei cultum. Eius posterì non tantum ex  
 Cain, sed etiam ex Set, corruerunt religionem,  
 quam deinceps Enochus redintegravit. Genes. 4, 26.  
*Ille cepit inuocare nomen Domini.* Sequitur ergo Eno-  
 chum collapsam Religionem restituisse. Hinc col-  
 ligi potest, trecentesimo anno à condito orbe cul-  
 tum Dei, qui per inuocationem synecdochicis in-  
 telligitur, ferè planè interiisse. Eò enim impietatis  
 etiam Adam adhuc viuente progressi sunt nepotes  
 Adæ, vt Deum inuocare desierint. Cultum igitur  
 Dei collapsum restituit Enoch. Ille rursus tempore  
 Noë penè corruptus fuit, Genes. 6, 12. *omnis caro*  
*corrupta erat viam suam.* Noë restituit cultum Dei. Hunc  
 eius posterì ferè eadem ætate, qua diluuium conti-  
 git, rursus corruerunt. Nimrod enim fuisse Idolo-  
 latram testatur Berosus lib. 4. Sed & posterì Sem cul-  
 tum Dei corruerunt Noë adhuc viuente. *Nachor*  
*enim & Thare fuerunt Idololatric,* Num. 24, 2. Post  
 Nachor Abraham restituit cultum diuinum. Eius  
 posterì post paucos annos rursus corruerunt cul-  
 tum Dei, & facti sunt Idololatric. Ezech. 20, 8. Idó-  
 latricam Ægypticam abrogauit Moses, & restituit  
 verum Dei cultum. Sed penè eodem tempore re-  
 lapsi sunt ad Idololatricam, Exod. 32, 4. Ex his appa-  
 ret verum Dei cultum non potuisse conseruari, nisi  
 subinde sanctos homines excitasset, qui cultum col-  
 lapsum instaurassent. Hoc autem cum tam crebrò  
 facere non vellet, ipse legem, secundum quam colli-  
 voluit, cepit scribere. Exod. 31, 18. Et præcepit

Mos vt idem scriberet. Hinc manifestum est, Scripturam veteris Testamenti esse necessariam. Sed quod de Scriptura Veteris Testamenti dixi: idem de scriptura N. T. ita esse ostendam. Nam cum Apostoli viuam tantum voce docerent, subingressi sunt pseudoapostoli, qui falsam doctrinam seminabant. Ob hanc causam Apostoli conuenerunt Ierosolymæ, vt ei rei remedium inuenirent, atque istis simul congregati coeperunt scribere, idq; auctore Spiritu Sancto. Dicunt enim *visum est Spiritui Sancto nobis*. Act. 15, 24. Vnde apparet & in N. T. verum Dei cultum sine scriptura non potuisse conservari. Sequitur ergo Scripturam noui Testamenti esse necessariam. Secundum argumentum, quia Deus præcepit scribere, non potest.

Quod Deus præcepit, hoc est necessarium. Sed Deus præcepit verbum suum in V. & in N. Testamento scribi. Ergo scriptura est necessaria.

Maiorem non negabit Bellarminus. Minorem probo. Fidelis legatus non aliter explicat mandatum sui Domini, quam Dominus præcepit, & mandauit. Sed Prophetæ & Apostoli fuerunt fideles legati. Ergo Apostoli & Prophetæ non aliter explicuerunt Domini Iesu mandatū, quam ipse præceperat. Hoc ita manifestum est, vt non sperem, Bellarminum quicquam ex hoc negaturum esse. Subiungitur igitur, Apostoli non aliter explicuerunt mandatū Domini Iesu, quam Dominus mandauit & præcepit. Sed illi explicuerunt mandatum suum viuam voce & scriptis litteris. Ergo vtrumque est ex Dei mandato. Deinde manifestū mandatū exstat in sacris litteris. Apo. 1, 11. *Scribe quæ vidisti*. Apo. 14, 13. *Andini vocem dicentem,*

*scribe.*

scribe. Præterea Act. 15. ex decreto Spiritus Sancti primum scriptum Nōvū Testamenti scribitur. Matth. 28 vers. 19. Dominus iussit eos docere omnes gentes, sed hoc facere vna voce non potuerūt. Et si n. plurimas gentes adierunt, omnes tamen adire non potuerūt: neque omni tempore potuerūt. Omnes enim Apostoli ante mille quingentos annos mortui sunt. Necesse igitur scripserunt, vt absentes & posteriores scriptis docerent. Huo accedit omnem scripturam esse diuinam inspiratam, hoc est per spiritum scriptam, 2. Tim. 3, 16. Cum hoc congruit illud Augustini lib. 1. de Consensu Euangelistarum cap. vlt. *Quicquid caput operante manu facit, hoc caput fecisse censetur.* Sed Apostoli sunt membra Christi. Ergo quod illi scripserunt, hoc caput scripsit. Cum igitur ipse Christus scripserit N. T. per suos apostolos, quis negabit illud esse necessarium? Tertium. Quia nobis scriptura necessario seruanda.

Quod autem necessario seruare debemus, hoc est necessarium. Sed Scriptura nobis necessario seruanda est. Ergo Scriptura est necessaria.

Maiores in fidebitur Bellarminus, Minores in probio, 2. Thesa. 2. *Tenete traditiones siue per sermonem, siue per Epistolam.* Iohan. 22. *Hæc scripta sunt vt credatis, & vt opereletis vitam æternam habeatis.*

Quæritur Argumentum. Quia sine scriptura verum Dei cultum à falso distinguere non possumus.

Sine quo verum Dei cultum à falso distinguere non possumus, illud est necessarium. Sed sine Scriptura verum Dei cultum à falso distinguere non possumus. Ergo Scriptura est necessaria.

quod

Maio rem non negabit Beilarminus . Minorem probo, Es. 8, 20. *Ad legem & Testimonium* . Iosaphat collapsum Dei cultum instaurat ad normam libri legis, 2. Paral. 17. Ezechias item collapsum Dei cultum instaurat ad normam libri legis. 2. Paral. 31. Idem fecit Iosias, 2. Reg. 23. Idem fecit Christus. Idem fecerunt Apostoli, Act. 26, 22. Si igitur volumus feliciter errores abrogare, eodem modo nobis faciendū est . Cum igitur vera religio absque verbo scripto conseruari non potuerit, & cum verbū ex mandato Dei scriptum sit, & necessariò à nobis obseruari debeat, & cum verus Dei cultus à falso non possit distinguī, nisi ex verbo scripto, manifestum est, Scripturam esse necessariam.

## CAPVT VII.

*Bellarminus probare conatur scripturam non esse sufficientem.*

**S**cripturam esse necessariam probauimus capite superiore. Sequitur, vt Bellarmini argumenta executiamus, quibus negat integram & sufficientem salutis doctrinam contineri in scriptura. Primum eius argumentum est huiusmodi. *Quia neque totus canon sufficiens est, neque singuli libri sufficientes sunt* . Quòd singuli libri sufficientes nō sunt, hoc fatemur. Quòd verò dicit neque totum canonem sufficientem esse, hoc negamus. Ille hoc probat, *quia multi libri, qui fuerunt in canone, perierunt*.

Ille canon, ex quo aliqui libri perierūt, non continet integram & sufficientem salutis doctrinam, Sed ex isto Canone, quem nos nunc habemus,

bemus, perierunt multi libri. Ergo ille canon non continet sufficientem salutis doctrinam.

Nos primùm negamus Maiorem. Potest enim eadem doctrina vel in diversis libris scripta esse, vel potuit etiam in aliis libris iterari. Maior igitur vera non est, nisi formetur in hunc modum. Ille canon ex quo aliqui libri perierunt, non cōtinet integram & perfectam salutis doctrinam, sc. si doctrina salutis, quæ in libris perditis comprehensa erat, non exstat in aliis libris, vel iisdē verbis, vel diversis verbis, vel deniq; si ista doctrina non est in aliis libris repetita. Et ne videamur hanc rem quasi incertam prætermittere, ostendemus doctrinā salutis in V. Testamento, quod nunc exstat, perfectè contineri. Ac primùm extra controuersiam pono exstare nunc eosdem libros V. T. & prorsus eodem modo, atque tempore Christi exstabant, & qui libri nūc perditī sunt, etiam tūc perditī erant. Sed tempore Christi perfectā salutis doctrina exstabat in Canone Hebræo, Luc. 16. 29. *Habent Mosē & Prophetas, illos audiant.* quasi dicat, Si non volunt in eum locum venire, audiant Mosē & Prophetas. Vnde comprobauit Mosē & Prophetas habere perfectam doctrinam salutis. Docet enim quomodo possimus condemnationem effugere. Et ne sit necesse hoc multis argumentis probare, Apostolus disertè dicit, Act. 26, 22. *se nihil diceret extra ea, quæ Mosēs & Propheta futura predixerant.* At ille annunciauit perfectam salutis doctrinā. Sequitur ergo in Mosē & Prophetis esse perfectam salutis doctrinam. Deinde controuersia est de libris perditis. Sed sunt magni viri qui iudicant nullos

omnino libros canonicos periisse: & inter eos vir doctissimus, & sacrarum scripturarum interpres fidelissimus Franciscus Iunius; hoc docet in Commentario ad Epistolam Iudæ. Verū etiam si statuamus aliquos libros veteris Testamenti periisse, tamē ex antedictis arguementis apparet, perfectam salutis doctrinam in superstitibus libris Veteris Testamenti exstare.

Secundum arguementum: *Quia multa in Veteri Testamento non exstant, quæ tamē sunt ad salutē necessaria.*

In quo multa defunt, quæ sunt ad salutē necessaria, hoc non habet perfectam doctrinam salutis. Sed in Veteri Testamento, multa defunt, quæ sunt ad salutē necessaria. Ergo Vetus Testamentum non habet perfectam doctrinam salutis.

Minorem probat, primū, *Quia in Veteri Testamento non traditur quo modo femine purgata fuerint a peccato originali.* Non enim circumcidebantur per masculos, qui per circumcisionē liberabātur a peccato originali. Si putat Bellarminus masculos liberatōe esse a peccato originali per circumcisionē opere operato, ut aiunt, tum errat, quemadmodum suo loco ostendimus.

Quod verō ad femellas attinet, illæ non prorsus erant in circumcisæ. Circumcidebātur enim in viris. Gen. 34. 14. *Non possumus sororem nostram dare habenti in circumciso.* Ergo non audiebatur eam planē in circumcisam esse. Opponunt enim eam in circumciso. Deinde femellæ liberabātur a peccato originali per satisfactionem futuri Messiae. Magister sententiarum lib. 4. Distinct. 1. cap. 4. dicit *mulieres adultas per fidem suam, & operationem bonorum iustificatas esse, parvas per*

celestia

2 p. 2

fidem



*fidem parentum*. Quod dicit adultas per fidem propriam iustificatas esse, accipimus. Quod verò dicit paruulas per fidem parentum iustificatas esse, in Dei verbo non est. Rectissimum est dicere vtrasque per satisfactionem futuri Messiae iustificatas esse. Et hoc est expressum in sac. litteris. Es. 53. *Propter scelus populi mei percussus eum*. At non tantum adulti, sed & infantes, neque tantum in masculis, sed & femellæ ad populum Dei pertinebant. Ergo quicumque in Veteri Testamento seruati sunt, illi propter passionem Christi seruati sunt. Secundò dicit *non exstare in V. T. quomodo infantes, qui ante octauum diem moriebantur, a peccato originali liberabantur*. Sed modum istum docet Thomas, 3. 70. 4. 3. *Si tamen aliqui incircumcisi mortui sunt, eadem ratio est de his, & de his qui moriebantur ante circumcisionis institutionem*. Quod etiam intelligendum est de pueris, qui moriebantur ante octauum diem tempore legis. Hos verò sola fide Christi futuri iustificatos esse docuit argumèto præcedente. Ergo statuit istos infantes per fidem in Christum iustificatos esse. Idem docet Gregorius de cōsecrat. Dist. 4. c. Quod apud. Sed ex hac Thomæ responsione sumemus illud, quod verum est. Infantes igitur, cum non habeant fidem, rectius dicuntur per Christi satisfactionem iustificati esse, vt antè de mulieribus ostendimus. Quomodo verò illa futura iustificatio fuerit illis applicata, docebimus suo loco. Tertiò, dicit *non exstare in Veteri Testamento, quomodo Profelyti iustificati fuerint*. Sed hoc est falsum. Profelyti enim eodè modo iustificabantur, atque Iudæi. Nam quod ad pascha, sacrificia, & oblationes attinet, eadem lex erat Iudæis & profelytis, Num. 9, 14. & 15, 15. 29. 30.

& 35, 15. Vnde sequitur etiam ad ea, quæ per sacrificia significabantur, eandem vtrisque legem fuisse. Et hoc videntur ipsæ gentes non ignorasse, Num. 25, 10. *Moriatur anima mea morte Iustorum, & sitnoxissimum meum sicut ipse.* Vnde apparet Bileam existimasse se eodem modo saluandum esse (si tamen salvandus erat) quo Iudæi saluabantur. Cum igitur in veteri T. scriptum sit, quomodo mulieres & infantes, ante octauum diem mortui, item quomodo profelyti iustificati fuerint, manifestum est hanc oblectionem falsam esse. Tertium argumentum, *quia ex scriptura non constat, quinam libri sint sacra scriptura.*

Ex quo non constat, quinam libri sint sacra Scriptura, illud non continet perfectam doctrinam salutis. Sed ex verbo scripto non constat, quinam libri sint sac. Scriptura. Ergo verbum scriptum non continet perfectam salutis doctrinam.

Nos negamus Minorem. Scriptura enim ut reliqua omnia principia per se nota est. Deinde Scriptura ipsa clamat se per se notam esse, 2. Pet. 1, 19, *Scriptura est lucerna lucens in obscuro loco.* Sed quicquid in obscuro loco lucet, hoc per se notum est. Ergo Scriptura per se nota est. Psal. 119, *Lucerna pedibus meis verbum tuum.* Sed lucerna ostendens pedibus nostris viam per se nota est. Manifestum igitur scripturam per se notam esse. Hac ratione reiectum est Euangelium Bartholomæi, quia id ipsum significabat, se non esse purum Euangelium. Idem dico de Euangelio Thomæ. Quod verò ad *Epistolam ad Laodicenses* attinet, talis nunquam scripta fuit. Et cum Bellarminus hæc scriberet, credibile est, eum  
Pauli

Pauli locum non inspexisse. Dicit enim Paulus : *Ee eam qua scripta est ex Laodicea, ut vos quoq, legatis*, Col. 4, 16. h. e. non dicit legite eam, quam ego ad Laodicensis scripsi, sed quæ ex Laodicea scripta est. Quam multi putant fuisse ipsorum Laodicensium. Chrysostomus & Oecumenius ad dictum locum. Quod autem Bellarminus præten- dit : Scripturam non esse omnibus æquè notam, ergo non esse per se notam ; ridiculum est. Principia enim alia sunt naturalia, alia Spiritualia. Naturalia principia omnibus naturali- bus hominib. per se æquè nota sunt. Principia verò spiritualia tantum spiritualibus per se nota sunt. Neque refert, quod Bellarminus re- gerit, hæc principia non esse omnib. spiritualib. æquè nota. omnes enim homines non sunt æquè spirituales. Non enim accipiunt spiritum eadem mensurâ omnes, quid mi- rum igitur, Si in discernendo discrepant. Sanè non negabit Bellarminus Origenem, Eusebium, Cypria- num, Athanasium, Melitonem, Hieronymum, pa- tres Laodicensis, Nazianzenum, Epiphanium, Cy- rillum, & Augustinum habuisse eundem Spiritum sanctum. Et tamen hi omnes non idem statuunt de omnibus libris canonicis. Proinde etiam Lutherus & Calvinus potuerunt habere eundem Spiritum Chri- sti. Et tamen potuerunt de *Epistola Iacobi* contra- rium sentire.

Quartum argumentum. *Quia ex nulla alia re pos- sumus cognoscere, Quinam libri sint Canonici, quam ex traditione.*

Ex qua sola & vnica re cognoscimus quinam libri sint Canonici, absque illa scriptura non est suf- ficiens.

ficiens. Sed traditio est sola & vnica illa res, ex qua cognoscimus, quinam libri sint canonici. Ergo scriptura absq; traditiōe nō est sufficiens.

Minorem, quam negamus, probat Bellarminus aliquot testimoniis patrum, quæ ordine expendemus. Ac primū dicit hoc verum esse, *Quia Serapion apud Eusebium lib. 6. cap. 10. hoc dicit.*

Quicquid dicit Serapion, hoc verum est. Sed Serapion dicit ex nulla alia re posse cognosci, quinam libri sint Canonici, quā ex traditione. Ergo ex sola & vnica traditione cognoscitur, Quinam libri sint Canonici.

Quoniam Serapionis nihil exstat, ideo non possumus de Maiore quicquam dicere. Eam igitur in dubio relinquentes respondemus ad Minorem, & dicimus eam falsam esse. Serapion enim ne quidem Traditionis meminit. Dicit n. *γινώσκοντες, ὅτι τὰ τοιαῦτα ἡ παραδόξις.* Hoc Rufinus vertit, *scientes quod talia nobis non sunt tradita.* Deinde Serapion dicit in ipsis libris fuisse, per quod reprobari potuerunt. Ac primū dicit se *quædam falsa in eo* (loquitur de Evangelio Petri) *scripta refutasse.* Deinde dicit in eo libro fuisse *quædam secundum recti rationem, quædam aliter.* Vnde apparet Serapionem Evangelium Petri reprobasse propter falsa quædam, quibus aspersum erat.

Hinc sic colligo,

Per quæ Serapion Evangelium Petri à reliquis Canonicis distinxit, per ea ipsa & nos malos libros à Canonicis distinguere debemus. Sed Serapion distinxit Evangelium Petri à Canonicis libris, per falsa quædam & mendacia, quæ in eo

in eo posita erant. Ergo & nps ex ipsis libris petere debemus, per quod illos ab Apostolicis distinguere debemus.

Secunda probatio Minoris. Quia Clemens dicit apud Eusebium lib. 6. cap. 11, *Se secundum traditionem sibi à senioribus commendatam docere, qua nam sint vera Euangelia.*

Secundum quod Clemens docet quanam sint vera Euangelia, per illud solum cognosci possunt. Sed traditio est illud, secundum quod Clemens docet quanam sint vera Euangelia. Ergo per solam & unicam traditionem cognoscimus, quanam sint vera Euangelia.

Respondeo Maiorem non esse veram. Potest enim fieri, ut Clemens unum atque alterum argumentum allegarit, quo hoc probari potuit, reliqua prætermiserit. Et ipse Bellarminus lib. 1. cap. 2. plura argumenta protulit. Deinde & Minor falsa est. Non enim dicit Clemens se per Traditionem accepisse, quanam sint vera Euangelia, sed quo ordine sint ponenda. Et ut hoc melius videas Bellarmine, subiungam eius verba. *Exponit præterea idem Clemens in ipsis libellis de ordine Evangeliorum, traditionem sibi à senioribus presbyteris traditam. Et dicit priora esse illa Euangelia, quæ de generationibus continent, &c.*

Tertia probatio Minoris. Quia Origenes apud Eusebium lib. 6. cap. 18. *Ex Traditione didicit, quoniam libri sint Canonici.*

Illud ex quo Origenes didicit, quoniam libri sint Canonici, est solum, & unicum, ex quo hoc discere possimus. Sed traditio est illud, ex quo Origenes

Origenes hoc didicit. Ergo ex sola & unica traditione discere debemus, quinam libri sint Canonici.

Respondeo Maiorem non esse veram. Possunt n. plura argumenta esse, ex quibus hoc discere possumus, quàm illa sint, ex quibus hoc Origines didicerit. Quod verò ad Minorem attinet, fatemur, Originem dicere, *se ex traditione accepisse, quinam libri sint Canonici*. At hæc Traditio nihil aliud est, quàm Ecclesiæ Testimonium. Hoc verò nos non improbamus. Ludit igitur Bellarminus puerili quadâ æquiuocatione, qua sibi valdè placet, & plus quàm iuueniliter exsultat. Sed explicata æquiuocatione, ista in Brentium & Chemnitium insultatio corruet. Traditio in hac disputatione sonat dogma seu ritum, seu doctrinam ab aliquo traditam. Et nos non improbamus omnem traditionem, sed tantùm eam, quæ pugnat cum Dei verbo. Traditio hîc idem est, quod doctrina cōtra Dei verbum ab homine tradita. Bellarminus verò æquiuocè per traditionem significat *Historiam & Testimonium veteris Ecclesiæ*. Equidem testimonium veteris Ecclesiæ cum summa veneratione amplectimur, & diligenter exquirimus, atque expēdimus. Diligenter etiam indagamus, quidnam veteres non tantùm de libris Canoniciis, sed quid de omnibus & singulis rebus testentur. Non ita tamen, vt præter veterum Testimonium nihil ampliùs desideremus. Nam non quicquid singuli patres testantur, hoc idè verum est, quòd illi ita testantur, sæpè enim contrariù testantur, imò vnus & idem diuersis locis sæpè contrariù testatur. Sed de his aliàs.

Nunc

Nunc dicimus, nos minimè repudiare veteris Ecclesiæ testimonium. Sed tantùm repudiare doctrinas contra Dei verbum ab hominib. inventas. Dum igitur Bellarminus dogmata contra Dei verbum ab hominib. excogitata defendit sub nomine testimonij veteris Ecclesiæ, idem facit quod ille, qui de alijs interrogatus, respondebat de cepis. Præterea nos hanc Traditionem de qua loquitur Origenes, recipimus. Agnoscimus enim eos libros pro Canonicis, quos ille ponit. Sed non propterea quòd Origenes ita testatur, verùm propter longè aliam causam, quemadmodum deinde ostendemus. Nam si Origenes hoc non testatus esset, tamen isti libri fuissent canonici: & fuerunt Canonici priusquam Origenes hoc testaretur. Præterea Origenes ex traditione docet, V. T. tantũ 22. libros esse. *ἐκ ἀγνοητέον*, inquit, *ἃ εἶναι τὰς ἰνδιατάκους βίβλους, ὡς ἰβραῖοι παραδιδόασιν, δύο καὶ ἑκοσιν.* apud Euseb. lib. 6. cap. 25. Idem Machabæicos dicit *ἔξω τῶν ἁγίων*. Judith verò, Baruch, Tobiam, Sapientiam, & Ecclesiasticum ne nomine quidem dignatur. Ergo hi non sunt in Canone. Desinant igitur papistæ traditionem contra nos iactare, aut corrigāt suum Canonem ad normam huius traditionis. Idem Origenes Epistolam Iudæ & Iacobi extra Canonem relinquit. Si igitur hæc traditio vera est; non debet Bellarminus Luthero succensere, quòd epistolam Iacobi cum Pauli epistolis eandem auctoritatem habere negat. Idem dicit secundam Petri Epistolam *ἀμφισβηλλομένην*. Et dicit duas posteriores epistolas Iohannis *ἢ πάντη γνησίους εἶναι*. Si igitur hæc Traditio vera est, malè faciunt papistæ, quòd his tribus cum Epi-

R r

stolis



stolis Pauli eandem auctoritatem tribuunt. Aut igitur hoc mutant, & non irascantur Musculo, Hesufio, & aliis, qui inter eas distinguunt, aut definant traditiones contra nos iactare. Postremò ipse Origenes non voluit, vt aliquid crederemus *extra*, vel *contra* Scripturam. Libr. enim 10. in 16. cap. ad Roman. Vide, inquit, *quàm proximi periculis fiant hi, qui exerceri in diuinis litteris negligunt, ex quibus solis huiusmodi examinationis cognoscenda discretio est.* Idem Homil. 1. in Ieremiam. *Neceſſe eſt nobis ſcripturas ſanctas in Teſtimonium vocare. Senſus enim noſtri & enarrationes ſine iſs teſtibus non habent fidem.* Idē in Epist. ad Rom. in cap. 3. *Paulus doctōribus Eccleſia exemplum præbet, vt ea quæ loquuntur ad populum, non proprijs præſumptis ſententijs; ſed diuinis munita, teſtimonijs proferat. Nam ſi ipſe tantus ac talis Apoſtolus auctoritatem ſcriptorum ſuorum ſufficere poſſe non credit; niſi doceat in lege & Prophetis ſcripta eſſe, quæ docet; quanto magis nos minimi obſeruare debemus, vt non noſtras, cūm docemus, ſed ſancti Spiritus ſententias proferamus. Cūm igitur hæ probationes Minoris aut ſint falſæ; aut contra Belarminum ipſum concludant, manifeſtum eſt, ſcripturam ſufficientem eſſe.*

Quintum argumentum. Quia Baſilius lib. de Spir. ſancto cap. 27. dicit *neglectis traditionibus ſcripturam magnum detrimentum pati.*

Quicquid dicit Baſilius, hoc eſt verum. Sed Baſilius dicit ſcripturam magnum detrimentum pati, ſi traditiones negligantur. Ergo ſcriptura ſine traditionibus non eſt ſufficiens.

Nos negamus Maibrem. Nam in Concione de natiui-

natiuitate Domini dicit, *Zachariam inter altare & Templum ideo occisum esse, quòd dixerat Mariam post natiuitatem Domini esse, & manere virginem, & hoc dicit ex traditione ad se delatum esse.* At Hieronymus in 23. cap. Matthæi dicit, *hoc ex Apocryphorum somnijs haustum esse.* Et addit, *Quia hoc de scriptura non habet auctoritatem, eadem facilitate contemnitur, qua probatur.* Si hoc modo quælibet traditio debet examinari, manifestum est, nos non errare, qui recipimus omnes traditiones, quæ de scriptura habent auctoritatem, & reiicimus eas, quæ de scriptura non habent auctoritatem. Deinde negamus & Minorem. Hic n. totus liber non est eiusdem auctoris, habet enim in medio styli quandam diuersitatem, teste Erasmo in præfat. Version. Basil. Deinde ipse Basilius in genuinis suis libris hanc doctrinam destruit. Ille enim in lib. de Confess. fidei dicit *manifestum infidelitatis crimen, vel recycere aliquid, quod scriptum est, vel addere aliquid, quod non est scriptum.* Idem ibidem. *Cum Dominus noster Iesus Christus dicat, Omnes meam vocem audiunt, alienum autem non audiunt, sed fugiunt ab eo, quoniam non norunt vocem alienorum; & apostolus per humanum exemplum vehementer prohibeat aliquid diuinis scripturis vel addere, vel demere: cum dicit, Homini tamen testamentum corroboratum nemo reprobatur, aut aliquid ei superstruit, omnem igitur vocem & sententiam à domini doctrina alienam semper fugiendam esse cognouimus.* Postremo in citato loco Basilij numerantur inter cæteras, terna immersio, & stando prestandum esse. inter Pascha & Pentecosten, tanquam Traditiones, sine quibus Euangelium detrimentum pateretur. At eas non seruant

papistæ. Ergo frustra nobis objiciūt Basilium. Cū igitur de hoc libro dubitetur an totus sit Basilij, ac ipse alijs locis contrarium doceat, & ipsi papistę non obseruent illas traditiones, quę isto loco apud Basilium enumerātur: Manifestum est hoc argumento nihil concludi; ac proinde scripturam continere sufficientem doctrinam ad salutem.

Sextum argumentum. *Quia Augustinus inquit cap. 5. contra epistolam fundamenti. Ego non crederem Euangelio, nisi me Ecclesia commoueret auctoritas.*

Quod Augustinum permouit ad Euangelio credendum, sine illo Euangelium est imperfectū. Sed Ecclesię auctoritas commouit Augustinum ad Euangelio credendum. Ergo Euangelium est sine Ecclesię auctoritate imperfectū.

Respondemus Maiorem esse falsam. Nām Ioh. 4, 41. *Mulier Samaritana commouit suos populares, vt crederent Christo. Et tamen Christus erat sufficiens seruator absq; muliere ista. Planè eodē modo Ecclesia commouit Augustinum, vt crederet Euangelio. Nihilominus tamen Euangelium erat sufficiens doctrina ad salutem. Deinde vt Samaritani primū credebant Christo per mulierē: ita deinde credebant illi per se. Dicunt enim vers. 42. Non amplius credimus propter sermonē tuum, ipsi vidimus & audimus eum esse seruatorem mundi. Eodem modo Augustinus credidit Euangelio per Ecclesiam. Deinde credebāt Euangelio per se. Dicit enim cap. 14. eiusdem libri. Nos cū credimus, & fide valentiores facti sumus, id quod credimus intelligere, non iam hominibus, sed ipsi Deo intrinsecus mentem nostram illuminante & for-*

& formante. Idem Augustin. in eodem libro dicit. *Si Manichæi pro se proferre possint constantē doctrinæ veritatem, se velle & Ecclesiæ nomen, ac gentium, & populorum deserere, atque ad illos redire.* Vnde manifestū est Augustinum primū per aliud, sed jam confirmatum credidisse Euangelio per se. Neque sanè negamus Ecclesiæ integros & sanctos mores magnum afferre adiuumentum ad fidem Euangelio conciliandum. Nam & priuatæ personæ integritas plurimū facit ad infideles lucrificiendos, 1. Pet. 3, 1. *Vxores subiectæ sint proprijs viris: ut etiam, si qui non obediūt sermoni, per vxorum conuersationem absque sermone lucrifiant.* Quid mirum igitur si sanctæ Ecclesiæ testimonio fuerit commotus Augustinus? Postremò hoc intelligendum est de Primitiua Ecclesiā, cū adhuc penè eadem esset doctrina & mores, quī fuerāt tempore Apostolorum. Nam si Augustinus nunc viveret, diceret cum Driedone lib. 4. cap. 4. *Ego huius Ecclesiæ hominēs non agnoscerem esse Ecclesiā Christianam, nisi doceret me quatuor Euangeliorum auctoritas.* Quam ob causam nunc non creditur Euangelio propter Ecclesiā, sed creditur Ecclesiæ propter Euangelium. Vnde rectissimè dicitur; Euangelium esse Ecclesiæ notam. Ex his apparet Maiorem veram non esse: & ob eam causam neque conclusionem, ac proinde manere immotum, scripturam continere sufficientem doctrinam salutis.

His positis Bellarmius insultat Chemnitio, & Brehio; quòd cogantur fateri hanc traditionem Ecclesiæ esse vtilem, & probam. Sed hic ego pudorem desidero. Hęc enim Ecclesiæ traditio, quā cognosci-

mus quidam libri sint Canonici, nihil aliud est, quàm Ecclesiæ testimonium de libris Canonicis. At hoc omnes nostri doctores fatentur esse argumentum à posteriori, quò probetur quinam libri sint in Canone. Caluin. Instit. lib. 1. cap. 8. § 12. Musculus in locis. Ursinus in Proleg. in Catechism. & in locis. Bucerus in præfat. Epistol. ad Roman. Melancht. in locis: & alij innumeri doctores. Sed hic notandum est Bellarmine, hoc totum argumentum esse à posteriori tantum, & non à priori. Nam testimonium Dionysij de Ecclipsi, quæ contigit tempore Christi, nō est sola & vnica causa, ob quam illa fuerit totalis Ecclipsis: imò ne causa quidē est. Quis enim vnquam testimonium de aliqua re iam facta, eius causam, loquor de causa propriè sic dicta, esse affirmauerit? Nam eodem modo testimoniū Ecclesiæ de scriptura, nec scripturæ, nec eius certitudinis causa est, tantum abest, vt sit eius vnica causa. Iam enim verbū Dei fuit, priusquam Ecclesia de illo vnquam testata sit. Est enim perinde, ac si aurifaber testetur, purum aurum esse purum aurum. Sed nūmne aurū propter aurifabri testimoniū est purum? ne mō, ne ebrius quidem, hoc somniabit. Eodē modo nūmne verbum Dei à Prophetis & Apostolis scriptum, propter Ecclesiæ iudicium est verbum Dei? non opinor. Nam quemadmodum aurum purum est aurum purum, etiamsi omnes aurifabri hoc negarent: ita etiam verbum Dei est verbum Dei, etiamsi omnes homines id negarent. Deinde Bellarmine tota hæc disputatio nihīl facit ad rem. Per traditionem enim intelligimus doctrinam traditam, non testimonium

de ali-

de aliqua doctrina . Ludis igitur in hac æquiuocatione. Doctrinam traditam non omnem reiicimus, neque omnem recipimus; sed eam siue doctrinam traditam, siue traditionē recipimus, quæ vel in verbo Dei expressa est, vel quæ necessariò ex eo colligi potest, vel denique quæ cum eo non pugnat. Exempli gratia: Mulieres accedere ad sacram Synaxin, totidem verbis in scriptura traditū non est: tamen quoniam ex ea deduci potest, libenter recipimus. Ita procumbere in genua inter orandum, neq; expressē in Scriptura traditum est, neq; necessariò ex ea colligi potest, tamen recipimus, quia non pugnat cū scriptura. Verū hæ non sunt apud nos eodē loco: Illæ enim sunt necessariae, hæ liberae. Primū igitur facis nobis iniuriam, quòd dicis nos omnes traditiones reiicere. Deinde sophisticaris. Manifestē enim traditio in hac disputatione significat doctrinā traditam, vt iam dixi. In tuo argumento significat non doctrinam, sed testimonium de doctrina, vel alia aliqua re. Exempli gratia. Vetus & Nouum Testamentum est doctrina. De hac autem veterum testimonium est tibi traditio. At ita non loquimur, quando dicimus purgatorium esse traditionē. Non enim tum intelligimus testimonium de purgatorio, sed doctrinam ipsam. Verū Bellarmine, dum concedo esse aliquas traditiones seruandas, non tamen volo scriptura non comprehendi sufficientem doctrinam salutis. Illæ enim traditiones quæ necessarię sunt, vel sunt in scriptura expressæ, vel ex ea deduci possunt, & proinde sunt ipsa Scriptura. Reliquæ verò, quæ non sunt Scriptura expressæ, neque ex ea

deduci possunt, illæ etsi propter decorum seruandæ sunt; cùm non pugnant cùm scriptura: non tamen sunt necessariae ad salutem. Ex his apparet non fuisse necesse probare, potuisse etiam alias traditiones ad nos peruenire, si hæc ad nos peruenit. Illud enim vtrò cōcedimus, quemadmodum iam dixi. Sed illæ, si non sunt satis litteris expressæ, neque ex ijs deduci possunt, non sunt necessariae ad salutem: neque verbum Dei propter eas desinit sufficiens esse. Postremò conatur Bellarminus nos ad absurdum deducere: & dicit in hunc modum: *Hæc traditio vel est verbum Dei, vel non est. Si est verbum Dei, tum verbum scriptum non est sufficiens, sed præter illud est etiam verbum nō scriptum necessarium. Si non est verbum Dei, tum fides nostra nititur eo, quod non est verbum Dei. Sed hoc est inconnueniens. Fides enim est ex auditu, auditus per verbum Dei,* ad Rom. 10. Sed nos iam antè ostendimus aliud esse verbum Dei, & aliud esse testimoniū de verbo Dei. Libri prophetici, & Apostolici sunt verbum Dei. Hæc traditio est testimonium humanū de iis libris. Testimonium autem alicuius rei non est res ipsa, cuius testimonium est. Sed instat Bellarminus, & dicit, nostram fidem tamen niti hoc humano testimonio. Respondeo esse equiuocationem in verbo fidei. Fides enim, quam Apostolus dicit ex auditu esse, est fides iustificans: hæc autem fides, qua propter testimonium veteris Ecclesiæ credimus, librum Moysi & Prophetarum, Euangelia item quatuor, Actus Apostolorū, Epistolas, & Reuelationē esse verbum Dei, non est fides iustificans, sed tantum historicus quidam assensus, Theologi vocant fidem



fidem historicam. Nam & hanc fidem habent diaboli. Credunt enim hos libros esse verbum Dei, & tamen non habent fidem iustificantem vno verbo. Fides nostra iustificans nititur verbo Dei, fides autem historica, præter verbum Dei, nititur etiam Ecclesiæ testimonio; imò nititur etiam eo testimonio, quod prorsus humanum est. Hoc autem non est absurdum Bellarmine.

Septimum argumentum. *Quia absque traditione non possumus scripturam intelligere.*

Sine quo scripturam non possumus intelligere, absque eo Scriptura non est sufficiens. Sed sine traditione non possumus scripturam intelligere.

Ergo sine traditione scriptura non est sufficiens.

Maiores non est vera. Nam sine grammatica non possumus Rhetoricam intelligere, neque sine eadem possumus Dialecticam intelligere. Et tamen Rhetorica est ars sufficiens, & Dialectica est ars sufficiens. Non igitur sequitur, verbum Dei non esse sufficiens, etiam si concederetur, illud absque traditione intelligi non posse. In Minore est fallacia æquivocationis. Traditio enim cum Scripturæ opponitur, significat doctrinam, quæ neque in Scriptura expressa est, neque ex ea deduci potest: eaque duplex. Vna quæ cum Scriptura non pugnat, ut conuersio adorantis ad orientem. Altera, quæ cum scriptura pugnat, ut inuocatio mortuorum. Et si de hac traditione intelligit Minorem, tum illa falsa est. Hæc enim prorsus nihil confert ad Scripturam rectè intelligendam. Deinde Traditio significat illud, quod in Scriptura quidem non expressum est, sed tamen necessariò ex

ea colligi potest. Atque hæc non est diuersa à Scriptura, sed est ipsa Scriptura. Atque huc pertinet illud Nazianzeni de Theolog. or. 5. *Quadam sunt in Scriptura, & non dicuntur de Scriptura.* Et Basil. lib. de Spiritu S. cap. 27. *Non igitur syllabam & ab ipso Domini ore progressam reijcere aut expungere cuiquam fas est: & æquipollentem ipsi assumi nihil vetat.* Hæc autem Traditio nihil aliud est, quàm Explicatio veræ Ecclesiæ, aut Testimonium de veteris Ecclesiæ explicatione. Sed quando traditio ita accipitur, tum non pugnat cum nostra sententia, & eam esse necessariam non negamus. Nam libenter & diligenter inquirimus veterum interpretationes, neque negamus nos magnam vtilitatem ex ijs assequi. Verùm non volumus eam cum verbo Dei esse in eadem auctoritate. Verbo enim Dei per se credimus, traditionibus his, id est, veterum Interpretationibus per verbum Dei. Nam quando illæ cum verbo Dei congruunt, recipimus eas; quando verò cum eo non congruunt, reijcimus eas. Recte Origenes Homil. 25. in Matth. *Templum gloriæ Dei est omnis scriptura diuinitus inspirata, aurum autem positus sensus in ea.* Debemus ergo ad testimonium omnium verborum, quæ proferimus in doctrina, proferre sensum Scripturæ, quasi confirmantem quem exponimus sensum. Sicut enim omne aurum, quod fuerit extra templum, non est sanctificatum: Sic omnis sensus, qui fuerit extra diuinam scripturam (quamvis videatur quibusdam admirabilis) non est sanctus, quia non continetur à sensu Scripturæ, quæ solet eum solum sensum sanctificare, quem habet in se, sicut templum proprium aurum. Non ergo debemus ad confirmandam doctrinam ne-

stram

*fram* nostros proprios intellectus mirari, & quasi testimon-  
 ia assumere, quos unusquisque nostrum intelligit, & se-  
 cundum veritatem aestimat esse; nisi ostenderit eos sanctos  
 esse ex eo, quod in Scripturis continetur diuinis, quasi in tem-  
 plis quibusdam Dei. Deinde in Minore est fallacia à  
 secundum quid ad simpliciter. Absque veteris enim  
 Ecclesiæ interpretatione, multa difficulter, ac ne  
 vix quidem intelligimus. Ergo absque veterum In-  
 terpretatione nihil prorsus intelligimus. Non se-  
 quitur. Aut si Bellarminus putat nos absque vete-  
 rum interpretatione nihil prorsus in Dei verbo in-  
 telligere, tum negamus Minorem. Multi enim sunt;  
 qui veteres interpretes nunquam legunt, & tamen  
 scripturam mediocriter intelligunt. Hoc etsi ad hoc  
 argumentum sufficeret: tamē quoniam Bellarmino  
 libuit Minorem probare aliquot exemplis, ea exa-  
 minabimus, deinde progrediemur. Primum exem-  
 plum est *æqualitas diuinarum personarum*. Hæc do-  
 ctrina, Bellarmine, aut est sacris literis expressa,  
 vel ex ijs deduci potest: aut non est sac. literis ex-  
 pressa, neque ex eis deduci potest. Si est: Tum nihil  
 facit ad rem. Iamantē enim ostendi non tantum ver-  
 bum Dei esse, quod in scriptura expressum est: sed  
 illud etiam verbum Dei esse, quod necessariò ex ea  
 colligi potest. Si non est, tum contradicis tibi ipsi.  
 Dicis enim hoc quidem *deduci ex sac. literis, sed non ita*  
*facile*. Verum siue facile, siue non facile deducatur;  
 deducitur tamen. Est igitur dogma non *ὑπερφανές* sed  
*ἡγερπνός*, & ita iudicauit antiquitas. Tertull. contra  
 Praxeam. Epiph. hæres. 60. Ambros. de fide contra  
 Arrianos cap. 4. & cap. 5. August. contra Maxim. lib.

3. cap. 14. Secundum exemplum est *processio Spiritus Sancti à Patre & Filio*; Sed & hoc dogma vel est sacris literis expressum, aut ex iis deduci potest: vel nō est, neque ex ijs deduci potest. Si prius, tum nihil ad rem. Nam, ut antè dixi, non tantum verbū Dei est, quod in scriptura expressum est, sed & illud, quod ex ea necessariò colligi potest. Si posterius, tum contradicis tibi ipsi. Dicis enim illud *posse quidem ex scriptura colligi, sed non facile*. Colligitur igitur ex ea, ac proinde est dogma *ἐκ τῆς γραφῆς, καὶ οὐκ ἐκ τῆς ἀποκάλυψεως*, & ita iudicavit antiquitas. August. Tractat. 99. in Iohannem. Tertium exemplum est *Peccatum originale*. Quod miror homini docto excidisse. Psal. 51, 7. *Ecce in iniquitate genitus sum. Et in peccatis concepit me mater mea.* Rom. 5, 12. *Per unum hominem peccatum in mundum introiit, & per peccatum mors: & ita in omnes homines mors transiit, in quo omnes peccaverunt.* Nisi igitur quis data opera vult cœcutire, facile videt, peccatum originale esse in scriptura expressum. Quartum exemplum est, *descensus Christi ad inferos*. Hoc equidē neq; in Scriptura est, neque ex ea necessariò deduci potest. Sed nihil etiam facit ad Scripturam illustrandā. Nulla enim pars veteris & novi Testamenti est, quæ sine hoc dogmate intelligi non potest. Idem de reliquis traditionibus, quæ neq; in Scriptura expresse sunt, neque ex ea deduci possunt, sentiendum est. Cū igitur tria priora dogmata sint ipsa Scriptura, & hoc posterius nihil conferat ad Scripturam intelligendam: manifestum est scripturam sine traditionibus esse sufficientem.

Octauum argumentum. *Quia ex scriptura discere-*

*non possumus Mariam esse semper virginem.*

Ex quo non possumus discere Mariam esse semper virginem, illud non continet sufficientem doctrinam salutis. Sed ex Scriptura non possumus discere, Mariam esse semper virginem. Ergo scriptura non continet sufficientem salutis doctrinam.

Maiores non est vera. Satis enim est ad salutem, si credimus, Mariam virginē fuisse, donec peperisset. Quid postea ei contigerit, nullam curiositatem mysterij rationi exhibet. Interea tamen libenter credimus, eam nunquam defuisse virginem esse. Recte Basilius in concione de Sancta Christi natiuitate. *Et affectu, inquit, & amore, & omni ad cohabitantes pertinente studio, uxore suam esse putas, loquitur de Iosepho à nuptialibus operibus abstinuit. Non enim cognouit ipsam, inquit, donec peperisset filium suum primogenitum. Hoc porro iam suspicionem prabet, quasi postea, quam pura generationi domini, per spiritum sanctum perfecta in seruierat, debita nuptiis opera Maria non abnegarit, etiamsi hoc pietatis rationem nihil vitiet: nam usque ad dispensationis ministerium necessaria erat virginitas. Quid verò deinceps consecutum est, nullam curiositatem rationi mysterij exhibet. Deinde & Minorem negamus. Illam autem distinguimus in duo tempora: Vnum, ante partum. Alterum, post partum. Ante partum Mariam fuisse semper virginē, expresse docet sac. Scriptura. Esa. 7, 14. *Ecce virgo erit pregnans, & pariet filium, & vocabis nomen eius Emanuel.* Luc. 1, 34. *Quomodo erit istud, quandoquidem virum non cognoui.* verl. 35. *Et respondens angelus dixit ei, Spir. sanctus superueniet in te, &*  
virtus*

virtus altissimi inumbrabit te, propterea id etiam quod nascetur ex te sanctum, vocabitur filius Dei. Matth. 1. 20. Nam quod in ea genitum est, ex Spiritu Sancto est: Matt. 1, 25. & nō cognovit eam, donec peperisset filium illū suum primogenitum. Mariam igitur fuisse virginem cū pareret, disertè testantur sac. literæ. Et hoc credere est ad salutem necessarium. An verò post partum manserit virgo, hoc credere non est ad salutem necessarium. Nam, ut inquit Basilii concione de Natiuitate Domini. *Hoc pietatis rationem non vitiat. Nam usque ad dispensationis ministerium necessaria erat virginitas. Quod verò deinde sequutum est, nullam curiositatē mysterij rationi exhibet. Tamen ut ne eorum, qui Christum amant, aures suscipiant, quòd Deipara aliquando virgo esse desist, illa testimonia sufficientia putamus. Ad hoc quidem, Non cognovit eam donec peperisset filium suum: quod particula donec in multis quidē locis quandam temporis determinationem significare videtur. Reuera autem indefinitum indicat. Quale est illud, Ecce ego sum vobiscum usque ad consummationem seculi. Similia docet Ambrosius ex sac. Scripturis lib. 10. Epistolarum. Epist. 81. Vnde Sequitur, Si Ambrosius & Basilii loca Scripturę rectè adducunt, hoc etiam non ἀγασθον esse, sed ἡγασθον.*

Nonum argumentum. *Quia ex Scriptura probare non possumus pascha celebrandum esse die dominico.*

Ex quo probare non possumus Pascha celebrandum esse die Dominico, illud non continet sufficientem doctrinā salutis. Sed ex Scriptura non possumus probare Pascha celebrandum esse die Dominico. Ergo Scriptura non continet

tinēt sufficientem doctrinam salutis.

Nos negamus maiorem. Distinctio enim dierum nihil facit ad salutem. Rom. 14, 6. *Qui curat diem, domino curat: & qui non curat diem, Domino nō curat.* Gal. 4, 10. *Dies observatis & menses?* Collos. 2, 16. *Ne igitur vos damnet respectu diei festi, aut nonilunij, aut sabbathorum.* Socrates lib. 5. cap. 22. docet neque Christo, neque Apostolis fuisse propositum de diebus leges ferre. Idem docet August. de doct. Christian. lib. 4. cap. 20. Euseb. lib. 5. cap. 24. 25. & 26. docet veteres non eodē tempore observasse pascha. Hoc confirmat Socrates lib. 5. cap. 22. Quod autem Papa orientales propterea excommunicauerit, arguit Victoris arrogantiam & superbiam. Irenæus enim cum cæteris Galliæ Episcopis scribebant, eum non rectē facere, quod absunderet à corporis unitate tot ac tantas Ecclesias Dei, que morem sibi antiquitus traditum custodirent, Euseb. lib. 5. cap. 26. Eusebius dicit eum pertinaciū egisse. Ibidem. Episcopi scribebant ei, & iubebant, ut unitati stunderet. Præterea eo tempore liberum fuit, ut diuersis diebus pascha celebraretur. Polycarpus enim seruabat morem, quem Iohannes tradiderat, & Anicetus seruabat ritum, quem à superioribus acceperat. Interea tamē inter se concordiam custodiebant. Euseb. lib. 5, 26. Vnde apparet certalicuius diei observationem non esse ad salutem necessariam.

Nam quod utriq; parti liberum relinquitur, hoc non est ad salutem necessariū. Sed pascha hoc vel illo die seruare, utriq; parti liberum relinquitur. Ergo Pascha hoc vel illo die observare, non est ad salutem necessarium.

Postremo



Postremò ex hoc loco discimus, nihil esse fallaciùs traditione hac, de qua contendunt papistæ. Nam orientales dicebant Apostolos tradidisse, vt 14. die celebraretur. Occidentales item dicebant, se illud die dominico ex *traditione Apostolica* celebrare. Sed hæc duo simul vera esse non possunt. Errant igitur, vel qui hoc Iohannem tradidisse dicebant, vel errant, qui hoc à Petro traditum esse asseuerabant. Sed vtrosque errasse docet Socrates lib. 5, cap. 22. Dicit enim, *hoc non ex traditione, sed ex consuetudine natum esse*. Deinde & Minor non simpliciter vera est. Apostoli enim ferè conueniebant *prima sabbathi*, Ioh. 20. 1. Luc. 24, 1. Marc. 16. 2. Et nostrum Pascha est memoria & recordatio resurrectionis Domini. Ergo æquum iudicabant vt ista recordatio eodē die fieret, quo Dominus resurrexit, hoc est prima sabbathi. Videtur igitur hoc ipsum aliquo modo ex Scriptura colligi posse. Decimum argumentum. *Quia pædobaptismus non potest ex scriptura demonstrari.*

Ex quo pædobaptismus doceri non potest, illud non continet perfectam doctrinā salutis. Sed ex Scriptura pædobaptismus doceri non potest, Ergo Scriptura non continet perfectam doctrinam salutis.

Nos negamus Minorem. Sunt enim manifesta Scripturæ testimonia, ex quibus pædobaptismus doceri potest. Marc. 10, 14. *Sinite pueros ad me venire, & non prohibete eos, talium enim est regnum celorum.*

Quicumq; communionis Christi participes sunt, illi etiam & signi communionis Christi participes

cipes sunt. Sed infantes sunt communionis Christi participes. Ergo & Baptismi, qui est eius signum, participes sunt.

Matth. 28, 19. *Docete & baptizate eos.*

Quod ad omnia Ecclesiæ membra pertinet, hoc etiam ad infantes pertinet. Sed Baptismus ad omnia Ecclesiæ membra pertinet. Ergo & ad infantes.

Act. 2, 38. *Baptizetur unusquisque vestrum. Vobis enim & liberis vestris facta est promissio.*

Ad quos pertinet promissio, ad eos pertinet Baptismus. Sed ad liberos pertinet promissio.

Ergo & ad pueros pertinet Baptismus.

Collos. 2, 11. Baptism<sup>o</sup> successit circumcisioni. At infātes sunt circumcisi. Ergo & infātes baptizādi.

Ex his & similibus apparet pædobaptismus esse dogma ἡγγραφοῦ non ἡγεαφοῦ. Idem iudicauit antiquitas. August. contra Donatist. lib. 4. cap. 23. & 24. Cypr. lib. 3. Epist. 8.

Vndecimum argumentum, *Quia purgatorium non potest probari ex sac. literis.* Hoc verissimum est. Purgatoriū enim ex sac. literis non tantū non astruitur, sed cum ijs ex diametro pugnat, idē abijciendum: vt suo loco docebimus.

Hic tamen notandum, *purgatorium non posse ex sac. literis probari.* Quorsum igitur ista testimonia, quæ ex sac. literis ad purgatorii defensionem adducunt. Aut enim illa deprauant: aut falsum est, quod Belarminus dicit, illud ex sac. literis probari non posse.

Duodecimum argumentum. *Quia nos ipsi docemus Scripturam perfectam esse. At hoc ex Scriptura probari &*

*doceri non potest.*

Qui aliquid necessariò credendum tradunt, quod ex Scriptura probari non potest, illi ipsi fatentur scripturam non continere sufficientē doctrinam salutis. Sed nos tradimus necessariò credendum esse, Scripturam esse perfectam, & hoc ex scriptura doceri non potest. Ergo nos ostendimus scripturam non continere perfectam doctrinam salutis.

Nos negamus minorem. Scriptura enim ipsa docet, se perfectam esse. Deut. 4, 2. *Non addetis ad verbum, quod ego precipio vobis, neque diminuetis quicquam ex eo.* Et cap. 12. vers. 32. *Quicquid ego precipio vobis, custodietis ut faciatis: non addetis ad illud, neque diminuetis ex eo.*

Ad quod nihil addi, & de quo nihil detrahi debet, illud est perfectum. Sed ad verbum Dei scriptum nihil addi, neque de eo quicquam detrahi debet. Ergo verbum Dei scriptum est perfectum.

Bellarminus negat Minorem, & dicit, *illud non de verbo scripto, sed de verbo non scripto intelligendum esse.* Hoc enim dicit perfectum esse: illud non item. Sed hoc falsum est. Idem enim mandatum iteratur, Ios. 1. 7. atque ibi liber legis disertè expressus est. Idē ferè iteratur, Deut. 27, 26. *Maledictus qui non statuerit verba legis istius, faciendoea.* Sed regerit Bellarminus, hoc illud esse non scriptum. Verùm Paulus ad Gal. 3. vers. 10. disertè explicat de verbo scripto. Vnde apparet hoc dogma non esse ἀγενος, sed ἱερραγενος.

## CAPVT VIII.

*Argumentorum, quæ pro imperfectione verbi scripti  
ex scriptura petita sunt, refutatio.*

**P**rimum argumentum. Ioh. 16, 12. *Adhuc multa  
habeo, quæ vobis dicam, sed non potestis omnia portare.*  
argumentum tale,

Quos Christus non omnia docuit ad salutem necessaria, illi non potuerunt omnia ad salutem necessaria scribere. Sed Apostoli sunt isti, quos Christus non docuit omnia ad salutem necessaria. Ergo Apostoli non potuerunt omnia ad salutem necessaria scribere.

Priusquam respondeam, dicā ex Augustino Homil. 96. in Iohan. *Hereticos solere hoc argumento uti, & dicere suas immunditias, esse ea, quæ Christus ait, adhuc habeo multa dicere, sed non potestis omnia portare.* Et sanè nulla tam tetra hæresis est, quæ non ex hoc loco posset defendi. Sed nos negamus Minorem. Nam etiam si Apostolos tum non docuit Christus omnia, non sequitur eum neque postea docuisse, vers. enim 13. scriptum est. *Spiritus ille veritatis introducet vos in omnem veritatem.* Quos autem Spir. Sanctus introduxit in omnem veritatem, illi potuerunt omnia ad salutem necessaria scribere. Sed Apostoli sunt illi, quos Spir. sanctus introduxit in omnem veritatem. Ergo potuerunt omnia ad salutem necessaria scribere. Est igitur ignoratio Elenchi. Nam cum Christi dicta non possent ferre, tum non potuerunt omnia ad salutem necessaria scribere. Verum cum à Spir. sancto in omnem veritatem introducti essent, tum potuerunt omnia ad salutem necessaria scribere. Deinde si

omnes termini essent veri, sequeretur eodē modo, Apostolos non potuisse omnia ad salutem necessaria viua voce tradere. Nam

Quod Christus non docuit, hoc illi non potuerunt, neque viua voce, neque scripto tradere.

Sed Christus non docuit (loquor ex Hypothesi) omnia ad salutem necessaria. Ergo Apostoli non potuerunt omnia viua voce tradere.

At hoc pugnat cum protestatione Pauli, Act. 20, 27. *Non enim subterfugi, quo minus annuntiarem vobis omne Dei consilium.*

Qui enim omne Dei consilium annunciat, ille docet omnia ad salutem necessaria. Sed Apostoli annunciant omne Dei consilium. Ergo Apostoli docent omnia ad salutem necessaria.

Præterea. Si Christus non omnia docuit, hoc nihil iuuat traditiones papisticas. Non enim si Christus quædā reticuit, ideò traditiones papisticæ sunt illa, quæ ipse reticuit. Rectè Augustin. in Iohan. Hom. 96. *Quæcū ipse tacuerit. Quis nostrum dicet, ista, vel ista sunt? aut si dicere audeat, unde probat? Quis enim est tam vanus, tam temerarius, qui cūm dixerit etiā vera, quibus voluerit, & quæ voluerit, sine ullo testimonio diuino affirmet ea esse, quæ tunc Dominus dicere noluit? Quis hoc nostrum faciet, & non maximā temeritatis culpam incurrat, in qua nec Prophetica, nec Apostolica excellit auctoritas? Papistæ igitur cūm audeant dicere has vel illas traditiones esse ea, quæ Christus reticuit, & quæ Apostoli non potuerunt ferre? Secundum Augustinum vani sunt & temerarij.*

Secundum argumentum ex Ioh. 21, 25. *Sunt autem & alia*

*& alia multa, quæ fecit Iesus, quæ si scribantur sigillatim, nemundum quidem ipsum opinor caputurum eos, qui scriberentur, libros.* Argumentum tale,

Quod non continet omnia ista, quæ Christus fecit, illud non continet doctrinam ad salutem necessariam. Sed scriptura non continet omnia ista, quæ Christus fecit. Ergo Scriptura non continet omnia ad salutem necessaria.

Nos negamus Maiorem. Inter actiones enim & doctrinam fidei magna differentia est. Nam actiones non sunt doctrina fidei. Potuit igitur doctrina fidei integra scribi, & tamen oēs actiones non scribi. Deinde per illa, quæ Christus fecit, intelliguntur miracula, quibus Christus suam doctrinam probavit. Ea verò scripta non sunt omnia. *Quia mundus non caperet, Sed ex ijs ea scripta sunt, quæ sufficiunt ad fidem nostram confirmandam, Ioh. 20, 30. Multa igitur alia signa edidit Iesus in conspectu suorum discipulorum, quæ non sunt scripta in hoc libro. Hac autem scripta sunt, ut credatis Iesum esse Christum filium Dei, & ut credentes vitam habeatis per nomen eius.* Præterea totum argumentum nihil facit ad traditiones papisticas. Papisticæ enim traditiones non sunt illa miracula, quæ fecit Iesus. Sed illa, quæ non sunt scripta, sunt illa miracula quæ fecit Iesus. Ergo illa non scripta non sunt papisticæ traditiones. Nisi igitur probent ista miracula siue signa, quæ Iesus fecit, esse doctrinam fidei: & traditiones suas esse miracula illa non scripta, frustra laborant.

Tertium argumentum ex Actor. cap. 1, 3. *Per dies quadraginta conspectus ab ijs, & dicens, quæ ad regnum*

*Dei spectant.* Hæc negat Bellarminus scripta esse.

Quod verò non continet ea, quæ pertinent ad regnum cœlorû, hoc non continet perfectam doctrinam salutis. Sed Scriptura non continet ea, quæ ad regnû Dei spectant. Ergo Scriptura non continet perfectam doctrinam salutis.

Nos negamus Minorem. Bellarminus probat eam, quia Scriptura non continet ea, quæ Christus per quadraginta dies apud discipulos suos dixit. Sed ea pertinebant ad regnum cœlorum, Aët. 1, 3. Ergo scriptura non continet perfectam doctrinam salutis. Sed nos negamus Minorem, & ad eius probationem dicimus, Christum post resurrectionem docuisse se verè resurrexisse. Marc. 16, 14. & ministerium instituisse, Matth. 28, 19. Docuisse quomodo debuerit pati & resurgere, Luc. 24, 26. ibidem docuisse, se reuera esse Christum, vers. 39. Joh. 20, 20. Ibidem docet se debuisse pati, & resurgere à mortuis, vers. 46. & pœnitentiâ debere, ac remissionem peccatorum in nomine suo predicari, vers. 47. ibidẽ docet se velle Apostolos ex alto imbui Spiritu sancto, vers. 49. Hoc autem est docerẽ quæ ad regnum Dei pertinent. Nam Iesum esse Christum, & Iesum verè resurrexisse, & in suo nomine nos accipere Remissionem peccatorum, item debere pati & resurgere, & introire in gloriam suam. Hæc inquam, sunt ea ipsa, per quæ regnum Dei adipiscimur. Ergo sunt ea ipsa, de quibus Lucas dixit, Aët. 1, 3. Falsum igitur est, ea non esse scripta. Ac proinde falsum non omnia ad salutem necessaria esse scripta. Nam quæ pertinent ad regnû Dei, sunt scripta. Sed quæ Christus dixit à resurrectione, illa pertinent ad regnum Dei.



Dei. Ergo illa sunt scripta. Deinde si scripta non essent, nihil hoc iuuaret humanas traditiones. Dicere enim papisticas traditiones esse ea, quæ Christus post resurrectionem locutus est: est principium petere. Nam hoc incertum est; & ab aduersarijs probari non potest: & absurdum est. Papisticæ enim Traditiones multos impediunt, ne ad regnum cælorum perueniant, quemadmodum suo loco ostendemus, tantum abest, ut illa sint, quæ Christus post resurrectionem dixit.

Quartum argumentum ex 1. ad Cor. II, 2. *Laudo igitur vos fratres, quod omnia mea meministis, & sicuti tradidi vobis, traditiones retinetis.* Argumentum tale.

Quod est laudabile, hoc omnes Christiani facere debent. Sed tenere traditiones Apostolicas, est laudabile. Ergo omnes Christiani debent Apostolicas traditiones tenere.

Nos concedimus totum argumentum, idque tamen cum hac distinctione, nempe alias traditiones esse perpetuas, alias temporales. Perpetuæ sunt semper obseruandæ, ut, 1. Corinth. II. *administratio cœnæ*: temporales sunt cõ vsq; obseruandæ, quo Apostoli voluerunt, ut, Act. I. *prohibitio sanguinis, & suffocati.* Hac obseruata distinctione dicimus anathema esse, qui negant Apostolicas traditiones obseruandas esse. At inquit Bellarminus, *Si traditiones tenendæ sunt, tum Scriptura non continet perfectam doctrinam salutis.* Nam

Præter quod aliud tenendum est, illud non continet perfectam doctrinam salutis. Sed præter verbum scriptum, aliud, nempe traditiones tenendæ sunt. Ergo verbum scriptum non con-

tinet perfectam doctrinam salutis.

Respondemus, Maiorem esse falsam. Sunt enim quædam ornatus & ordinis gratia seruanda, quæ non pertinent ad doctrinam: & illa pro tempore, loco, & personis possunt mutari. Non sequitur igitur, doctrinam non esse perfectam, etiamsi quædam ceremoniæ non scriptæ sint seruandæ. Deinde totus hic locus nihil facit ad rem. Quæstio enim inter nos est, num salutis doctrina sit perfectè scripta. Nos affirmamus, tu negas. Tu tuam sententiam probas, quia aliquæ ceremoniæ non sunt scriptæ. Estne hoc egregiè disputare? Loqui autem Apostolum de ceremonijs ipse fateris. Nam dicis eum disputare de *modo orandi in Ecclesia*, hoc est, vt ego interpretor, de ritu, quem debemus in Ecclesia obseruare. Et si non fatereris, tamen verum esset, Nam Apostolus ex ijs quædam explicat vers. 4. *Vir debet aperto capite orare, mulier verò capite operto*. Sed dicis hoc simul de doctrina & ceremonijs intelligendū esse. Paulus enim dicit *omnia mea*. Sed neque sola doctrina, neq; ceremoniæ sunt ista. Respondeo, esse fallaciam figuræ dictionis. Non enim dicit, quòd *meministis omnia mea*: sed, quòd *memores estis*, siue *meministis mei per omnia*, vt rectè reddit vetus interpres. Est enim ellipsis κατὰ. Simile exemplum. 1. ad Corinth. 10, 33. καθὼς καὶ πάντα πάντων ἀρίστων. hoc est, καὶ πάντα. Hoc modo reddit Hieronymus. Quin & Syrus interpres ita explicat, *quòd in omni re memores estis mei*. Quinetiam græca phrasis videtur hoc postulare. ὅτι πάντα με μνησθή: alioqui dicendum πάντα τὰ με. Sed etiamsi daremus Apostolum loqui de doctrina.

Hoc

Hoc tamen non iuuaret causam tuam. Est n. ignoratio Elenchi. Disputas enim in hunc modum, Apostolus non scripsit perfectam salutis doctrinam ad Corinthios, Ergo ad alios non scripsit. Vel, Paulus tum non scripsit perfectam salutis doctrinam. Ergo nunquam scripsit. vel, Paulus non scripsit perfectam salutis doctrinam, Ergo reliqui Apostoli non scripserunt. Expende ipse hos paralogismos, & animadverte fraudem. Deinde est petitio principij. Nam ideo, quod Paulus non scripserit omnia ad salutem necessaria, dicere, traditiones papisticas esse id, quod Paulus tum viua voce tradidit, & non scripsit, quis sanus concedet? Necesse igitur est vt hoc oraculo diuino probes; nisi feceris, dicemus te petere illud, quod est in principio.

Quintum argumentum, ex 1. Cor. 11, 34. *Cetera cum veniam, disponam.*

Qui adhuc quædam disponet, ille non scripsit omnia ad salutem necessaria. Sed Apostolus adhuc quædam disponet. Ergo Apostolus non scripsit omnia ad salutem necessaria.

Nos negamus Minorem. Est enim ignoratio Elenchi. Apostolus tum adhuc quædam dispositurus erat, Ergo deinde non scripsit omnia ad salutem necessaria. Item, Apostolus tum quædam dispositurus erat. Ergo Paulus & reliqui apostoli non scripserunt omnia ad salutem necessaria. Deinde est fallacia consequentis. Non enim sequitur. Apostolus non perfectum Ecclesiæ ordinem constituit, Ergo doctrinam salutis non perfecte tradidit. Et si quis de doctrina intelligit, nihil tamen proficit. Non enim se-

quitur. Apostolus tum non omnia tradidit. Ergo deinde non omnia tradidit. Neque sequitur. Paulus non omnia tradidit. Ergo reliqui Apostoli non omnia tradiderunt. Deinde est petitio principij, Quæ Apostolus, disponere volebat, non sunt scripta. Ergo Missa, & similia sunt illa, &c. Nisi n. hoc immotis scripturæ testimonijs probent, semper dicemus illos petere principium. At dicit Bellarminus *nos contrarium non posse probare*. Quod miror homini logico excidisse. Ille suscepit defendere, Missam, & quinque aliorum Sacramentorum formas esse illud, quod Apostolus tum nondum tradiderat, & quod volebat disponere. Hoc verò cum non possit probare, mutat statum disputationis, & dicit nos non posse contrarium defendere. Quid hoc aliud est, quàm fateri causæ infirmitatē, & ne imperitus lector hoc animaduertat, vrget, vt nos contrariū probemus. Verùm Bellarmine, nos tuam responsionem ita accipimus, & disputamus in hunc modum,

Cum Apostolus hanc Epistolam scriberet, tum Corinthij erant *ditati omni notitia*. 1. Cor. 1, 5. hoc est. Secundum Ambrosium, *Spiritualem doctrinam scientiam affecuti erant*. Secundum Hieronymum: *ditati erant scientia Veteris & Novi Testamenti*. Sed nondum didicerant à Paulo. Missam, neque reliquorum (Baptismum & sacram Cœnam excipio) Sacramentorū formas. Ergo Missa, & reliqua non pertinent ad notitiam Christianis necessariam.

Maior est in textu. Minor est Bellarmini. Deinde, Cum Apostolus hanc Epistolam scriberet, tum tradi-

tradiderat Corinthijs illud Euangelium, per  
*quod seruandierant.* 1. Corint. 15. 2. hoc est, vt  
 Hieronymus explicat, *per quod salutē sperabant.*  
 Sed non tradidit Missam, & reliquorū (Cœ-  
 nam & Baptismū rursus excipio,) Sacramen-  
 torū formas. Ergo per illa non erant saluandi,  
 neque Corinthij per illa salutem sperabant.

Hinc sequitur, vel falsum esse, quod Apostolus  
 dicit, se doctrinam salutis illis tradidisse, vel falsum  
 esse, quod Bellarminus dicit, Missam & reliqua illa  
 esse ad salutem necessaria. Sed sit Apostolus verax.  
 Est enim fidus Apostolus ipse, qui mentiri non  
 potest. Bellarminus quis sit, ex opposito colligat.  
 Cum intellexerimus abs te, hoc non sufficere ad  
 contrarium defendendum, tum addemus aliam re-  
 sponzionē. Postremò Apostolus dicit, cap. 15. vers. 2.  
 se illis tradidisse *Euangelium, per quod saluandi erant.*  
 Si igitur secundū Bellarmini sententiam perfectam  
 salutis doctrinam non tradidit, tum illa doctrina,  
 per quam saluādi sumus, non est perfecta salutis do-  
 ctrina, sed hoc est absurdum. Aut si adhuc aliud est  
 necessarium, præter illud, quod Apostolus tradidit:  
 tum sequitur præter illam doctrinam, per quam sal-  
 uamur, adhuc aliam esse doctrinam ad salutem ne-  
 cessariam. Sed hoc est æquē absurdum. Siue igitur  
 de doctrina, siue de ceremonijs, siue de vtrisque hic  
 locus intelligitur, nihil iuuat causam Bellarmini.

Sextum argumentum est ex 2. Thess. 2, 15. *Tene-  
 traditiones, quas accepistis, siue per sermonem, siue per  
 Epistolam.*

Quod debemus seruare, hoc est. Sed traditiones  
 debe-

debemus seruare, Ergo traditiones sunt.

Concedimus totum argumentum : Et iam antè diximus esse quasdam traditiones easque seruandas. Verùm Bellarminus dicit has traditiones esse non scriptas, & esse à verbo scripto diuersas. Respondeo, hoc ex textu colligi non posse. Deinde traditiones, de quibus loquitur Apostolus, vel sunt de doctrina, vel de ritibus. Deinde vel cum doctrina scripta conueniunt, vel ab ea discrepant. Si ab ea discrepant, semper seruanda est regula. *Si vel Angelus de Cælo aliud Euangelium docuerit, anathema esto*, Galat. 1, 9. & ob eam causam nobis abijciendæ : Si verò cum scriptura conueniunt, tum illarum regula est Scriptura, & quatenus cum verbo scripto conueniunt, eatenus recipiendæ: quatenus verò ab eo discrepāt, eatenus abijciendæ. His positis respondemus Traditionem, de qua loquitur Apostolus, esse eandem cum verbo scripto. Respondet Bellarminus, hoc ineptum esse. *Quia particula disiunctiua εἰτε semper significat disiunctionem, quæ non nisi in disparatis locum habet.* Sed hoc falsum est. Nam in 1. Cor. 13, 8. *εἰτε accipitur copulatiuè εἰτε δὲ προφητεῖαι καταργηθήσονται. εἰτε γλώσσαι παύσονται.* &c. Et 1. Cor. 15, 11. *εἰτε ὑν ἰγώ, εἰτε ἱκεῖνοι, ὑτὼ κηρύσσομεν.* Col. 1. 20. *εἰτε τὰ ἐν τῇς γῆς, εἰτε τὰ ἐν τοῖς ὑεραῖς.* Hinc apparet *εἰτε* non semper significare disiunctionē, ac proinde Bellarmini exceptionem nullius momenti esse. Sed addit Bellarminus & aliam rationem. Nempe si hoc loco Traditio significat eandē doctrinā, quæ scripta est, tum sequitur totum Euangelium cōtineri epistola prima. Sed totum Euangelium non cōtinetur Epistola prima, Ergo Traditio hoc loco non significat

ficat eandem doctrinam, quæ scripta est. Ad hoc respondemus negando consequentiam. Nam non sequitur, totam doctrinam Evangelij, & omnes eius partes contineri epistola prima. Neque hoc ex 1. Epist. cap. 1. aut 2. colligi potest. In primo enim capite non docet, quòd totum Evangelium, secundum omnes eius partes ijs tradiderit; sed narrat suum Evangelium, i. annunciationem Evangelij *non constituisse locutione, sed virtute & spiritu*. In secundo verò cap. docet, quòd *cupierit illis non tantum Evangelium, sed & vitam impartiri*; & in toto capite nullum verbum est, quo ostendat se illis totum Evangelium secundum omnes partes tradidisse. Falsa est igitur hæc ratio, & falsum, quod ex ea colligitur. Hæc ad rationes Bellarmini. Nunc ostendemus hunc locum, siue intelligatur de doctrina, siue intelligatur de ritibus, non iuuare causam papisticam. Nam si dicunt verbum scriptum, non continere omnem salutis doctrinam quòd illi opponatur traditio per sermonem: respondeo neque verbum traditum continere omnem salutis doctrinam, quia ei opponitur traditio per epistolam. Sed hoc est absurdum. Ergo & illud. Deinde dicere; oia ad salutem necessaria, non sunt scripta, Ergo Traditiones Papisticæ sunt illud, quod in doctrina ad salutem necessaria non scriptum est, est principium petere. Et nisi Bellarminus Apostolicis aut propheticijs testimonijs hoc probare potest, frustra laborat. Deinde Traditiones non scriptæ, ut Papistæ docent, *sunt tacitæ, & silentio regenda*; hæc verò, de quibus Paulus loquitur, non sunt tacitæ, neque silentio tectæ, sed toti Ecclesiæ, tam Laicis, quam



quam præbyteris cognita, & proposita. Præterea Niceph. lib. 2. cap. 34. *Quæ Paulus, inquit, præsens oratione sua dilucide docuerat: eadem per compendium absens in memoriam reuocans, epistolas dedit. Ita verò ea quoque quæ secretioris mysterij, magisque abstrusa antea silentio præterierat, postea per sacra scripta sua, aut grandioris sapientie verbis, aut accurate & dilucide declarauit, aut saltem parabolarum more per anigmata adumbravit.* His præteritis, adducit Bellarminus rationem aliam, qua probat, non omnem doctrinam salutis scripta esse. Inquit enim *Apostolum tradidisse vna voce, quo tempore esset venturus Antichristus.* Sed hoc scriptum non est, Ergo omnia ad salutem necessaria non sunt scripta. Respondeo hoc ad salutem non esse necessarium. Nemo enim hoc tempore illud nouit, & tamē multi saluantur. Deinde hoc non est apud Paulum. Non enim dicit, *vos scitis, quo tempore sit venturus Antichristus,* sed dicit, *vos scitis quid eum detineat.* Deprauauit igitur Paulum in hoc loco, eodemque modo eum cum Augustino egisse affirmamus. Nam & ille lib. 20. cap. 18. de ciuitat. non dicit, *vos scitis, quo tempore venturus sit,* sed scribit & *eum quid detineat sciatis*, id est, *quid sit in mora, quæ causa sit dilationis eius, ut reueletur suo tempore sciatis.* Præterea, hoc est contra traditiones papisticas. Dicunt enim *Synagogam Romanā tenere omnes traditiones apostolicas.* Sed scire quo tempore sit Antichristus venturus (disputo ex hypothesi) est traditio apostolica. Ergo sciunt, quo tempore sit Antichristus venturus. Sed hoc disertè negant omnes papistæ. Ergo aut hæc non est traditio Apostolica, aut falsum est, quod dicunt se habere  
omnes

omnes Apostolicas traditiones. Sed ego existimo  
vtrumque falsum esse. Atque hæc de sexto argum.  
Septimum argumentum, 1. ad Timoth. 6. 20. *Depo-*  
*situm serua.* Argumentum tale,

Iubemur depositum seruare. At depositum non  
est ipsa Scriptura, sed doctrina non scripta.

Ergo doctrinam non scriptam seruare debemus.

Minor habet duo membra. Vnum, Depositum  
non est scriptura; alterum, depositum est verbum  
non scriptum. Si in primo membro scripturam ac-  
cipit pro ipsis litteris, quibus verbum Dei scriptum  
est, assentior. Si autem scripturam pro eo, quod scri-  
ptis litteris continetur, accipit, tum Minor est falsa.  
Nam, ut inquit Ambrosius ad dictum locum, *eadem*  
*admonet, ut ea quæ sunt supra dicta seruentur, & contra-*  
*ria religioni vitentur.* Cum hoc facit Tertull. de Præ-  
scriptionibus cap. 25. *Quod autem sit hoc* (de depo-  
sito loquitur) *præceptum, quæ denunciatio, ex supra &*  
*infra scriptis intelligitur.* Hinc apparet Minorem fal-  
sam esse. Deinde est fallacia consequentis; dicere,  
Depositum seruandum est. Ergo papisticæ traditio-  
nes seruandæ sunt. Dicere verò, hæc aut istæ traditio-  
nes sunt hoc depositum, est petere principium. Nisi  
enim hoc Bellarminus per Apostolorum aut Pro-  
phetarum scripta probare possit, frustra laborat.

Octauum argumentum, 2. Tim. 1, 13. *Expressam*  
*formam teneto sanorum sermonum, quos à me audiisti.*  
Argumentum tale,

Iubemur expressam sermonum formam tenere.

At illa forma non est Scriptura, sed papisticæ  
quædam traditiones. Ergo debemus papisti-

cas traditiones tenere.

Minor rursus est bimembris. Vnum; expressa sermonum forma non est scriptura. Alterum, expressa sermonum forma est traditio. Si per Scripturam intelligit membranam externam, assentior. Si verò per Scripturam intelligit ipsam doctrinam, quæ ea continetur: tum Minor est falsa. Ipsa enim doctrina, quæ in sac. Scripturis continetur, est hæc expressa sermonum forma. Theophy. *Non enim solum ex meis litteris, sed etiam ex ore meo hæc percepisti. Haudquaquam itaque existimemus Pauli Epistolas mancas esse, perinde ac si non sint cuncta complexa.* Hoc ferè iisdem verbis docet Ambrosius ad dictum locum, & Tertullian. de præscriptionibus cap. 25. Deinde dicere papisticas traditiones esse hanc sermonum formam, est petitio principij.

Nonum argumentum, ex 2. Timoth. 2, 2. *Et quæ audiuisti à me coram multis testibus, ea committe fidelibus.*

Audita sunt custodienda, Verùm traditiones papisticæ sunt audita illa. Ergo quædã non scripta, nempe traditiones papisticæ sunt seruandæ.

Respondeo, Minor est falsa. Nam cum dicit *Hæc, de eis dicit, de quibus in præsentia scribebat.* Tertull. de præscript. cap. 25. Deinde, dicere, papisticas traditiones esse illa, quæ Apostolus mādauit seruari, est principium petere. Et vt semel finiam. Hæc Apostoli dicta, aut de ritibus intelligenda sunt, aut de doctrina. Si de ritibus; tum nihil ad rem. Illi enim ꝑ tempore, & alijs circumstantijs possunt mutari: Neque sunt ad salutem necessarij. Si verò de doctrina; tum de eadē, quæ scripta est, vel de diuersa. Si de diuersa,  
anathema

anathema est. Ad Gal. 1, 9. Ergo si de doctrina, de eadem intelligi debent. At traditiones, quę cum doctrina scripta conueniunt, non reiicimus, & illas, quę cum doctrina scripta pugnant, non recipimus. Est igitur verbum scriptum omniũ traditionum vnica norma & regula.

Decimum argumentum, 2. Iohan. 12. *Cũ multa haberem scribenda ad vos, nolui atramento & charta: sed spero me venturum ad vos, & presentem presentibus locuturum, ut gaudium nostrum sit completum.*

Iohannes multa non scripsit. Hęc sunt traditiones papisticę. Ergo obseruandę.

Respondeo, argumentum non posse redigi ad formam, & est fallacia consequentis. Nam, quędam Iohannes non scripsit. Ergo quędam ad salutem necessaria non scripsit. Item Iohannes quędā non scripsit. Ergo reliqui Apostoli non scripserunt. Deinde est petitio principij, dicere, Traditiones papisticas esse ea, quę Iohannes non scripsit. Nisi enim Bellarminus per aliquem apostolum probare poterit, fidẽ non merebitur. Atque hinc apparet pro Traditionibus nihil solidum allatum esse: sed eas adhuc quę incertas esse, atque antè fuerunt.

## CAPVT IX.

*Ex quibusdam Papis & Concilijs probat, Traditiones aliquas esse.*

**A**Rgumenta, quę Bellarminus pro Traditionibus ex sac. literis adduxerat, refutauimus capite superiori. Nunc excutiemus ea, quę à paparum & conciliorum auctoritate adduxit. Primum est ex

Fabiano. Ille in Epist. 2. ad Orientales, dicit, *præcessores suos à sanctis Apostolis accepisse, Christum in eadem nocte, qua proditus est, docuisse, quomodo Chrisma confici debeat*. At de Chrismate nihil in scriptura legitur. Ergo quædam, quæ in scriptura non exstant, sunt credenda, tanquam ad salutem necessaria. Respondeo istas Epistolas ineptas esse. Dicit enim primam epistolam scriptam esse, *Maximino & Africano consulis*. Sed hi duo mortui sunt, biennio priusquam Antherus moreretur. Ergo falsum est hanc epistolam esse à Papa Fabiano scriptam; vel esse eo tempore scriptam. Ego utrumque fallum esse iudico. Deinde dicitur ibidem, ex Pontificali Damasi, *eum 14. annis fuisse Episcopum*. Sed historiæ vix 12. concedunt. Prætereà Fabianus est à promiscua plebe electus. Damasus in pontificali, si hæc oïa obseruanda sunt. Quare non faciunt idem papistæ? Postremò dicit in eadem epistola, *omnes debere à suis provincialibus iudicari, nisi fuerit appellatum*, sc. ad Papam Romanum. Sed hoc falsum esse norunt omnes ij, qui vel extremis labijs gustarunt historias. Nam eo tempore, neque papa arrogabat appellationes ad se fieri, neque quisquam Episcoporum hoc ei concessisset. Denique *interdicte secularibus, ut non accusent sacerdotes*. Ridiculū; Nam eo tempore nullam Iurisdictionem secularem habebat Papa Romanus; imò omnes Episcopi tum nihil poterant, nisi persecutiones pati, & perferre. Deniq; idem Fabianus *scripsit Epistolam ad Hilarium*; cum tamen Fabianus ferè ducentis annis mortuus sit, priusquam Hilarius nasceretur. Hinc apparet, quanta fides huic personato Fabiano adhibenda sit. Sanè tantundem

tundem fidei etiam in Chrismate meretur. Nisi igitur Bellarminus meliores testes adducere possit, nihil iuuabitur à Fabiano suo. Alter testis est, Innocentius primus. Is in Epist. 1. dicit, *si Instituta Ecclesiastica, ut sunt a beatis apostolis tradita, integra vellent seruari Domini Sacerdotes, nulla diuersitas, nulla varietas in ipsis ordinibus, & consecrationibus haberetur.* Sed hoc Testimonium nihil facit ad rem. Nam nos non contendimus de Apostolicis traditionibus; sed de papisticis. Illas recipimus; has reiicimus. Deinde Traditiones, quas ille Apostolicas esse nominat, nos propter eum tales esse, non credimus. Nam idem Innocentius in eadem epistola docet, *in Italia, Gallia, Hispania, Sicilia, Africa, & Insulis interiacentibus, neminem docuisse, nisi quem Petrus constituerat.* Sed hoc falsum est. Paulus enim dicit se omnia loca usque ad Illyrium impleuisse, Rom. 15. Et hic à Petro institutus non fuit. Lucius Pauli comes Germaniæ docuit. Auentinus in Hist. Boiorum. *Paulus misit Titum in Dalmatiam,* 2. Timoth. 4. *Lazarus, Nathanael & Saturninus primū nunciauerunt Euangelium in Gallia,* ut quædam Historiz tradunt. *Paulus instituit Angliam,* Theodoret. de corrigendis Græcorum affectibus. Deinde docet in istis nominatis prouincijs nullum Apostolum docuisse, quàm Petrum. Sed hoc falsum est. Nam & Paulus Roma docuit; Quod nemo negare potest: & Marcus, ut omnes affirmant veteres. Ex his apparet, quantum fidei huic Innocentio tribuendum sit. Nisi igitur Bellarminus meliores testes habeat, manebunt traditiones æquè incertæ, atq; antè erant. Sextus testis est Leo. Sed ille est multis annis posterior. Ergo ad

illum non respondebo.

Post papas adducit concilia. Ac primùm adducit conciliū Nicænum, i. *Quia illud ex doctrina nō scripta condemnauit Arrium.* Argumentum tale,

Quod fecit cōcilium Nicænum, hoc & nos facere debemus. Sed conciliū Nicænum condemnauit hæresin ex doctrina non scripta, hoc est, ex traditionibus. Ergo & nos ex doctrina non scripta, hoc est, ex traditionibus hæreses dammare debemus.

Nos respondemus Maiorem non esse simpliciter veram. Nam & conciliū Nicænum, se mutuis conuiitijs penè conscidit. Quod non opinor nobis imitandum esse. Deinde Minor est simpliciter falsa. Episcopi enim ex scriptura allegarunt testimonia, quibus Arrij hæresin iugularūt. Theodoret. lib. 1. cap. 8. Idem docet Bellarminus lib. 4. cap. 11. de verbo Dei. pag. 314. lin. 5. *In illis* (loquitur de cōcilio Nicæno) *questionib. quæ tunc erant, extabāt in Scriptura clarissima testimonia.* At hic sui oblitus contrariū docet, & pugnādi cupid⁹ dicit illa verba ὁμοῦσιον τῷ πατρὶ τὸ ὕὸν εἶναι, nō exstare in scriptura. Sed respōdēt patres Nicæni, τὰ πρὸς ἡμῖν πάντα ταύτῃ ἔχει γὰρ σημασίαν, hoc est, *Allegata omnia scriptura testimonia idē significāt.* Vnde apparet patres nihil docuisse ex traditione non scripta, sed necessariam scripturarum explicationem attulisse, vel dixisse illud, quod necessariò ex scriptura colligi potest. Et ne aliquid viderentur immutasse, addunt patres, *suos ante se idem iisdem verbis docuisse.* Faciant idem papistæ, doceant nihil, nisi quod necessariò ex scriptura probari potest; & non contradicetur



CHRISTIAN. DOGMATVM. Cap. 10. 661  
dicetur illis à nobis.

Secundum Concilium est Nicœnum secundum,  
Et Constantinopolitanum octauum, ad quæ nihil  
respondebimus. Cogermur enim eadem iterare.  
Ad easdem enim strophas refutandas, idem meritò  
respondetur.

CAPVT X.

*Argumenta Bellarmini ex patrum auctoritate de-  
sumpta, excutuntur.*

**A**Rgumenta Bellarmini à Paparum & concilio-  
rum auctoritate desumpta refutauimus, cap.  
superiore: nunc argumenta, quæ à Patrum auctori-  
tate ducuntur, excutiemus. Ac primum producit  
Ignatium. Qui apud Euseb. lib. 3, 36. dicit, *ut tena-  
cius adhæreant Apostolorum traditionibus, quas traditi-  
ones cautelâ gratia, ne quid apud posteros remaneret in-  
certi, etiam scriptas se reliquisse asserit.*

Quod Ignatius scripsit, hoc ab Apostolis scriptū  
non est. Sed Ignatius inquit adhærendum esse  
Apostolorum traditionibus. Ergo Apostolo-  
rum traditiones ab Apostolis scriptæ nō sunt.

Respondeo esse aliud in cōclusionē, quàm in prę-  
missis. Sequitur enim *Apostolorum traditionibus ad-  
hærendum esse*, non esse scriptum ab Apostolis. Sed &  
Maior falsa est. Nam Paulus scribit, *tene te traditionē,*  
*sive per Epistolam, sive per sermonē*, 2. Thes. 2, 15. At hoc  
idem est, quod inquit Ignatius; *adhærete Apostolorum*  
*traditioni*. Deinde & Minor falsa est. Non enim di-  
cit Ignatius. *Adhærete traditionibus*. Sed *traditioni*,  
*ex apostolorum*. Deinde Ignatius istic loquitur de doctrina.

Dicit enim, *se Evangelicis cohortationibus docuisse, ut in fide persisterent, ut obseruarent ab hæreticorum cōtagys, ut Apostolorum Traditioni adhererent.* Deinde dicit Polycarpus in fine eiusdem capituli, *Epistolas Ignatii continere perfectam de fide & patientia instructionem:* Et ut omnem dubitandi materiam tolleret, addit, *Secundū Domini præceptum.* Verū Bellarmine hæc doctrina, quam istis epistolis tradidit Ignatius, aut est eadem cum doctrina scripta, aut alia quā doctrina scripta. Si alia, tum Anathema est, ad Galat. 1, 9. Si eadem; tum non contradicimus, sed hoc tantū dicimus, verbum Dei scriptum esse eius normam, & regulam. Hæc ad Ignatium sufficerent. Sed quoniam in patribus valde exultas, excutiam tibi Ignatium. Ac primum dicit Eusebius, *Ignatium istas traditiones, quibus omnes homines adherere debent, scripsisse. ut essent pro cautela, & ne quid apud posteros incertum remaneret.* Et Polycarpus in eodem capite docet, *istas epistolas continere perfectam de fide & patientia instructionem secundum Domini præceptum.* Hinc apparet eum omnes traditiones conscripsisse.

Quod continet perfectam fidei instructionem secundum præceptum Domini, & eas traditiones, quibus omnes adherere debent, & quæ contra hæreticos sunt loco cautelæ, nec quicquam apud posteros incertum relinquunt; illud continet in vniuersum omnem doctrinam scriptam, & non scriptam. Sed Epistolę Ignatii continent perfectam fidei instructionem, & eas traditiones, quibus omnes adherere debent, & quæ contra hæreticos sunt loco cautelæ,

telæ, nec apud posteros quicquam incertum relinquunt. Ergo Ignatij Epistolæ continent in vniuersum omnem doctrinam scriptam, & non scriptam.

Major est citra omnem controuersiam vera. Qui enim omnia ita accuratè scripsit, vt nihil incerti reliquerit, & omnem fidei instructionem complexus sit, ille omnem doctrinam scriptam & non scriptam complexus est. Minor est in capite à Bellarmino allegato. Verùm quod continet omnes traditiones, præter id nullæ aliæ traditiones sunt recipiendæ. Sed Ignatij Epistolæ continent omnes traditiones. Ergo præter eas, nullæ aliæ recipiendæ sunt. At hoc non vult Bellarminus. Ergo frustra nobis obijcit Ignatium. Deinde hæ Epistolæ magna ex parte non sunt Ignatij. Hieronymus enim in Catal. Scriptorum Ecclesiasticorum. C. Ignatius, *tantum numerat septem*. Et sanè non plures numerat Euseb. lib. 3. cap. 36. At nunc extat duodecim. Manifestum igitur, magnam partem istarum Epistolarum esse supposititiam. Denique istæ epistolæ, quæ extant, sunt deprauatæ. Polycarpus n. apud Euseb. lib. 3. 36. dicit, se ab Ignatio per Epistolam rogatum esse, *vt Epistolam seraret ad Philippenses*. Sed hoc in Ignatij Epistola ad Polycarpum nunc non exstat. Ergo aut Eusebius, & Polycarpus apud eum testantur falsum: aut Epistola ad Polycarpum est corrupta. Deinde Theodoretus dialogo 3. affert testimonium ex Epistola Ignatij ad Smirnenses. Sed & hoc in illa Epistola nunc non exstat. Vnde sequitur, aut Theodoretum allegare falsum, aut Ignatij Epistolam ad Smirnenses esse cor-

ruptam. Sed & Hieronymus in 3. dialog. cont. Pelagian. dicit: *Ignatius vir Apostolicus, & Martyr scribit audacter: elegit dominus Apostolos, qui super omnes homines, peccatores erant. At hoc nunc in eius epistolis non reperitur. Hinc apparet, has Epistolas deprauatas, & corruptas esse. Præterea non quicquid dicit Ignatius, hoc verum est. Nam in Epistola ad Philippenf. dicit eum esse Christi interfectorem, qui se inquit die dominico. Sed hoc fallum esse, & ratio docet, & papistæ fatentur. Postremò, si omnia vera sunt, quæ Ignatius in ijs Epistolis docet, tum nullus Episcopus subest papæ Romano. In epist. enim ad Philadelphenses docet, nullum Episcopum ulli Episcopo subesse, neque teneri ulli Episcopo rationem reddere, nisi Christo. In eadem Epistola dicit, Episcopum debere ab Ecclesia eligi. Si hoc verum est, tum Papa non legitime eligitur: nam non eligitur ab Ecclesia. Cùm igitur papistæ plures vrgeant traditiones, quàm Ignatius, cumque Ignatij epistolæ sint magna ex partæ supposititiæ, & deprauatæ: manifestum est eum contra nos adduci non debere. Et cùm ipsi Papistæ non velint ea seruare, quæ Ignatius præcipit; malè faciunt, dum nos eius auctoritateurgent, qua ipsi teneri non volunt. Atque hæc de Ignatio. Secundus pater est Dionysius Areopagita, qui cap. 1. Hierarch. Ecclesiast. scribit, *primi illi nostri sacerdotalis muneris duces summa illa, & supersubstantialia, partim scriptis, partim non scriptis Institutionibus suis nobis tradiderunt.* Argumentum tale,*

Quicquid dicit Dionysius, hoc verum est. Sed ille dicit Apostolos illa supersubstantialia partim scriptis,



scriberet, delirasse. Prætereà hi libri non sunt Areopagitæ istius. Eusebius enim lib. 4. cap. 23. eorū nullam facit mentionem. Sed neque Hieronymus in Catologo eorum mentionem facit. Hieronymus enumerat aliquot epistolas sub nomine Dionysij, sed ille Dionysius est Corinthiorum Episcopus, non ille Areopagita. Plura vide apud Erasum. & Valam in 17. cap. Actor. & apud VVittakerum, cont. Duræum. Postremò hic Dionysius dicit cap. 3. Hierarch. *Christianos singulis diebus sumpsisse Eucharistiam; idem docet lectionem scripturæ, & preces publicas factas esse lingua vernacula.* Si omnes Dionysij traditiones obseruandæ sunt, quare has non obseruant papistæ? Si ipsi negligunt quæ volunt, quare nos eius auctoritate vrgent? Et vt vno verbo dicam, cum neque Maior, neq; Minor vera sit, sequitur & conclusionē veram esse non posse. Et cum hi libri istius Areopagitæ non sint, sequitur nos supposititij alicuius libri auctoritate vrgeri non debere.

Tertius Pater est Egesippus. Hunc Euseb. lib. 4. cap. 3. dicit *Traditiones Apostolicas quinque libris comprehendisse.*

Quod scripsit Egesippus, hoc non scripserunt Apostoli. Sed Egesippus scripsit quinque libris integerrimam Apostolicæ prædicationis traditionem. Euseb. lib. 4. 8. Ergo quædam traditiones non scriptæ sunt ad salutem necessariæ.

Respondeo aliud esse in conclusionē quàm in præmissis. Sequitur enim Apostolos non scripsisse traditionem Apostolicæ prædicationis. Sed hoc est falsum. Ergo falsum ex quo hoc cōsequitur. Deinde

Maior

Maiores in argumento non est vera. Apostoli n. ipsi scripserunt suæ prædicationis traditionē. Ergo Egesippus scripsit eam materiā, quam Apostoli. Deinde argumentum nihil facit ad rem. Testatur enim Hieronymus in Catal. C. Egesippus, *eum omnes Ecclesiasticorum a passione Domini usque ad suam ætatem contexuisse historias*. Quid hoc ad traditiones? Postremò huius libri non supersunt, quod Bellarminus fateatur. Cùm igitur eius libri non amplius supersint, & scripserit eadem, quæ Apostoli, & aliarum rerum historias attexuerit, manifestum est, eum nobis non aduersari. Apostolicæ enim prædicationis traditionem libenter accipimus.

Quartus pater est Polycarpus. Irenæus apud Eusebium lib. 5. cap. 20. *multa auduit à Polycarpo de virtutibus Domini & doctrina, quæ non in chartis, sed in animo scribebat*.

Quæ Irenæus à Polycarpo audita non in charta, sed in animo scribebat, illa non sunt ab Apostolis in charta scripta, Sed Irenæus quædam dicta de Domini doctrina & virtutibus à Polycarpo audita non in charta, sed in corde scribebat. Ergo quæ de Domini doctrina & virtutibus ad salutem necessaria sunt, non sunt ab Apostolis scripta.

Respondemus Maiorem falsam esse. In animo n. & in charta scribere, non sunt opposita. Nam ea verba, quæ Dominus ad Matrem suam dixit, *Maria in animo scripsit*, Apostoli in charta, Luc. 2, 51. Debemus oēs in corde scribere, quæ Apostoli in membrana scripserunt, neque est dubiū, quin Apostoli illud in corde, & in charta  
simul



simul scripserint. Hinc apparet hæc non rectè opponi, ac si simul vera esse non possent. Quod ad Minorem attinet, dicit, Eusebius *Polycarpi dicta fuisse de Christi doctrina & virtutibus, & fuisse sac. Scripturis consona*. At ista omnia à nobis probantur; sed papisticæ traditiones non sunt Scripturæ consonæ. Ista enim, quæ Scripturæ consona sunt, possunt ex scriptura doceri. Sed papisticæ traditiones non possunt ex scriptura doceri. Ergo papisticæ Traditiones non sunt scripturis consonæ. Deinde Polycarpus scripsit *de doctrina Christi*; papisticæ autem traditiones sæpè continēt aniles fabulas, & somnia otiosorum hominum, quæ non sunt de doctrina Christi. Respondet Bellarminus *non omnia scriptura consona posse probari ex Scriptura*, omnia enim veritati cōsona, esse scripturæ consona, sed non omnia veritati consona posse probari ex Scriptura. Ergo non omnia Scripturæ consona, posse probari ex Scriptura. Hoc miror homini docto excidisse. Omnis enim veritas nō est Scripturæ consona, neque dissona. Quædam enim est dissona, quædam consona, vt Bellarminum Iesu socium oppugnare editis libris Catholicam veritatē, veritati consonum est. Verum enim esse agnoscit tota Gallia, Anglia, Scotia, Germania, Heluetia, Belgica, Dania, & innumeræ regiones, Sed tamen hoc ipsum Scripturæ dissonum est. Socium n. Iesu oppugnare doctrinam Iesu, non est Scripturæ consonum. Hinc apparet esse aliquid veritati consonū, quod Scripturæ consonum non est, causa istius rei est, quod veritas latius patet, quàm Scriptura. Frustrā igitur Bellarminus oppugnat Chemnitium.

Deinde

Deinde Eusebius normam & regulam dictorū Polycarpi tradit *Consonantiam cum sac. Scripturis*. Nam cum Irenæus reijceret Florini dogmata ex Polycarpi auctoritate addit rationem, *quia non erant consona Ecclesiastica fidei*. Ergo quæ dicta, scripta & tradita Scripturæ sunt consona, ea recipimus. Quæ verò sunt dissona à Scriptura, ea reijcimus. Si hoc non fert Bellarminus, reijciat Polycarpum, reijciat Irenæum, reijciat Eusebium, reijciat nos omnes.

Quintus pater est Iustinus. Ille in fine 2. Apolog. dicit *postridie Saturni, qui Solis dicitur, cum Apostolis, discipulisque suis apparuisset, hac illis tradidit, quæ vobis quoque considerata permittimus*.

Quæ Iustinus Imperatori, & alijs considerata permittit, illa non sunt ab Apostolis scripta. Sed Iesum Christum resurrexisse die Solis, & crucifixum esse die Veneris, & similia, sunt illa, quæ Iustinus illis considerata permittit. Ergo quædam ab Apostolis scripta non sunt, quæ ad salutem requiruntur.

Respondemus aliud esse in conclusione, quàm in præmissis. Sequitur enim, *Christum resurrexisse die Solis non esse scriptum ab Apostolis*. Sed hoc est falsum. Ergo falsum, ex quo hoc consequitur. Deinde & Maior falsa est. Idem enim & Iustinus istic scribit, & Apostoli ante scripserunt. Deinde dicit de ijs, quæ *Christus Apostolos docuit, μαθηταὶς ἰδὶδαὶ ταῦτα*. At ea libenter recipimus. Et si papistæ non docebunt alia, quàm quæ Christus Apostolos docuit, colemus pacem cum ijs.

Sextus pater est Clemens. Is apud Euseb. lib. 6.

cap. 11.

cap. 11. in libello de Pascha dicit *sibi extorqueri à fratribus, ut ea, quæ à Presbyteris. i. à successorib. Apostolorum sola voce sibi tradita sunt, describeret in libris, & posteris traderet.*

Quæ Apostoli sola voce tradiderunt, ea non scripserunt. Sed quasdam traditiones sola voce tradiderunt. Ergo aliquæ Traditiones non sunt ab Apostolis scriptæ.

Respondeo nos posse totum argumentum concedere. Quosdam enim ritus & ceremonias ab Apostolis institutas non esse scriptas non negamus. Sed eas non iudicamus omnibus hominibus, neq; omni tempore, & loco necessarias. Voluerunt enim Apostoli in ijs esse summam libertatem, neq; quicquam in ijs spectauerunt, quàm publicam vtilitatem, & ædificationem. Voluerunt igitur eas seruari, quatenus illud expediret. Exemplum, *Prohibitio suffocati*, Act. 15. Si verò Bellarminus hoc intelligit de ijs, quæ ad salutem necessaria sunt, tum formandū argumentum in hunc modum,

Quicquid Clemens dicit, hoc verum est. Sed Clemens dicit, Apostolos quasdam Traditiones sola voce tradidisse. Ergo præter scripturam sunt aliquæ Traditiones non scriptæ ad salutem necessariæ.

Respondeo aliud cōcludi, quàm fuit in præmissis. Non n. ex hoc argumento sequitur quasdam traditiones ad salutem necessarias non esse scriptas; sed sequitur, Ergo verum est Apostolos quædam sola voce tradidisse. Deinde & Maior falsa est. Nam non quicquid dicit Clemens, hoc verum est. Lib. 5. cap. 15. dicit illa verba, qui tãgit mecū in patina, is est, qui me traditurus

diturus est, à Christo dicta esse quinq; diebus ante Pascha. Sed Matthæus 26, 31. dicit Christum ea eadē nocte dixisse, qua proditus est. Idē in 1. lib. Stromat. dicit, Christū per unum annum tantum docuisse. Sed omnes Evangelistæ vnanimiter testantur, eum per tres annos & dimidium docuisse, vel vt alij iudicant, per quatuor annos & dimidium. In eodem libro scribit gentes per Philosophiam seruatas esse. Sed hoc manifestè oppugnant Apostoli. Dicunt enim non esse aliud nomen sub cælo, per quod possimus salui fieri, quam per nomen Iesu Christi. Idem lib. 3. dicit; Christum neque verè esuruisse, neque verè sitiuisse, sed tantum secundum opinionem. Sed hoc impugnant manifestè sacræ litteræ. Ex his Maiorem falsam esse apparet. Sed neq; Minor vera. Nam illud *Sola voce*, non est apud Eusebium. Extat quidem apud Latinum interpretem, sed de suo additum, in Græco enim non est. Præterea illæ traditiones, quas conscripsit Clemens, aut fuerunt de doctrina, aut de ritibus. Si de ritibus, tum fuerunt libera, & ad salutem non necessaria. Si de doctrina, tum fuit in ijs eadem doctrina iterata, quam Apostoli litteris tradiderūt, vel alia. Si eadem. Ergo eius norma & regula est sac. Scriptura; si alia, tum Apostolus ad Galatas dicit eam anathema esse. Deinde ipsis Clementis libris non est multum tribuendum, sunt n. *inter eos, qui Catholicis vitandi sunt*. Distinct. 15. cap. Sancta. Deinde Epiphani. hæres. 30. dicit hereticos olim multa sumpsisse ex libris Clementis. Quamobrem in concilio Constantinopolitano sexto c. 2. damnati sunt. Postremò ipsi Episcopi non seruant Clementis traditiones. Dicit enim Can. 5. *Episcopus*

aut presbyter, aut diaconus uxorem suam prae-texture religionis non abiecit, Si abiecit, segregetur a communione, si perseverauerit, deponitur. Cant. 6. dicit, Episcopus, aut presbyter, aut diaconus curas seculares non suscipito, alioquin deponitur. Postremò liber Clementis de palchate prorsus periit. Ergo affirmare non possumus, quas traditiones scripserit. Cùm igitur Clemens multa falsa nomine traditionum inculcarit, & falsò à Bellarmino allegetur, & eius liber nunc non exstet, manifestum est, eum contra Scripturam pro traditionibus allegari non posse.

Septimus pater est Origenes. Ille in cap. 6. ad Roman. dicit *padobaptismum esse ex Apostolorum traditione*. Sed hæc traditio est scripta, quemadmodum ante ostendi, necessariò enim ex scriptura deducitur, & nos eam libenter recipimus. Idem Homil. 5. in Numeros dicit, *in Ecclesiasticis observationib. esse multa, quæ omnes servare debent, quorum tamen ratio non omnibus patet*. Et hoc possumus concedere, Bellarmine. Nam non est inter nos quæstio, num omnes qui pertinent ad Ecclesiam, intelligant omnes Ecclesiasticas observationes: Sed quæstio est, num sint aliquæ traditiones ad salutem necessariæ, quæ vel non sunt scriptæ, vel non necessariò ex scriptura deduci possunt. Vt autem videas, quàm parum tibi faueat Origenes, vnum atque alterum locum ex eo producam. Ille igitur Homil. 25. in Matth. *Ad Testamentum omnium verborum, quæ in doctrina proferimus, debemus sensum scriptura proferre, quasi confirmantem, quem exponimus, sensum*. Sicut enim omne aurum, quod fuerit extra templum, non est sanctificatum; sic omnis sensus,

*sensus, qui fuerit extra diuinam Scripturam, quamuis admirabilis videatur quibusdam, non est sanctus, quia non continetur a sensu scripturae. Idem Homil. 1. in Ierem. Neceſſe nobis eſt ſcripturas ſanctas in Teſtimonium vocare. Senſus enim noſtri, & enarrationes ſine hiſ teſtibus non habent fidem. Eodem modo, Bellarmine. Qualcunque traditiones ex Scriptura probare, vel ex ijs deducere potes, eas libeter recipiemus, quas verò ex ſcriptura probare non potes, eas prout putamus expedire Eccleſiæ, vel accipiemus, vel reſpuemus.*

Octauus teſtis eſt Euſebius. Is in Euangelica demonſtrat. lib. 1. cap. 8. dicit *Apoſtolos quadam Chriſti mandata palam tradiſſe omnib. quadã occultaiſſe & tradiſſe perfectiorib.* Sed hoc ex diametro pugnat cum doctrina Chriſti. Ille enim dicit, *quæ in auribus audiuiſtis, ea ſuper tecta domorum predicare*, Matth. 10, 27. Luc. 12, 3. hoc eſt, quemadmodum Hieronymus interpretatur, *Quod vos didiciſtis abſcondite, hoc publice loquimini*; Et iſtam occultioſiorem doctrinam prorsus repudiat Tertull. de præſcriptionibus cap. 25. & 26. Cùm igitur Euſebius Chriſti doctrinæ palam contradicat, à nobis hac in re recipi non debet.

Nonus teſtis eſt Athanaſius. Is dicit in lib. de Decretis. Nicceni concilii, *ſe ſuam ſententiam* (loquitur *πρὸς τὸν βουλον*, ) *a Patribus per manus traditam accepiſſe.* Sed illud dogma eſt in Scriptura expreſſum, quemadmodum antè oſtendi; Ideo libenter à nobis admittitur. Imò non hoc tantum, ſed quicquid Bellarminus ex Scripturis vel probare, vel educere poteſt, æquè libenter admittimus. Et vt videas, quàm parum tibi faucat Athanaſius, ille contra gentes inquit,

*sufficiant sacra, & diuinitus inspirata scriptura ad omnem Instructionem veritatis.*

Decimus Pater est Basilius. Ille in lib. de Spir. sancto, cap. 27. *Dogmata, quæ in Ecclesia seruantur, partim ex conscripta doctrina habemus, partim ex traditione Apostolorum in mysterio ad nos delata accepimus. Quæ utraque eandem ad pietatem vim habent, & nemo his contradicit, qui vel mediocrem Ecclesiasticarum rerum experientiam habet.*

Quicquid dicit Basilius, hoc est verum. Sed Basilius dicit dogmata Ecclesiastica partim scripta esse, partim non scripta, & utraque ad pietatem habere eandem vim. Ergo quædam dogmata Ecclesiastica sunt scripta, quædam non sunt scripta, & utraque ad pietatem habent eandem vim.

Respondeo Maiorem esse falsam. Nam Basil. in orat. de Natiuit. Domini, dicit *Zachariam patrem Iohannis, esse eum, qui inter altare & templum est occisus.* Sed hoc est falsum. Deinde ad Minorem respondemus, primùm Basilium loqui de ritibus, quos fate-mur non omnes scriptos esse, non autē de doctrina. Respondet Bellarminus, *eum de ritibus, & de doctrina simul loqui.* Quia inter cætera dicit, *quod credimus in Patrem, & Filium, hoc non scriptum, sed ex traditione esse.* Verùm si Basilius hoc seriò scripsit, tùm errauit; hoc enim scriptum est. Ioh. 14, 1. *Creditis in Deum, & in me credite.* Aut igitur Basilius loquitur de ritibus tantùm, aut errauit in eodem capite, ac proinde nobis non sequendus. Deinde hic liber est deprauatus in medio, vt testatur Erasmus. Ergo non potest ex hoc



hoc libro cognosci, quæ sit vera & genuina Basilij sententia. Ad hoc respondet Bellarminus, *Damasce- num hoc non vidisse, & fuisse Erasmo doctiorem*. Verùm an Damascenus sit Erasmo doctior, iudicet doctio- res. Quòd autem Damascenus hoc non vidit, causa est, quòd eum non satis attentè legit. Verùm si hæc responsio non sufficit Bellarmino, tum oppono *Basilium non controuersum* Basilio controuerso. Ille igitur in sermone de fidei confessione. *Si fidelis est Do- minus in omnibus sermonibus suis, & fidelia omnia man- data eius, manifesta est elapsio à fide, & superbia crimen, aut reprobare quid ex his quæ scripta sunt, aut superinduce- re quid ex non scriptis*. Cùm Christus dixerit, *Oues mee vocem meam audiunt, alienum autem non sequentur, sed fugient, quia non nouerunt vocem eius*. Idem in Mora- lib. summa 72. cap. 1. pronunciat, quòd oporteat audi- tores eruditos in scripturis probare ea, quæ à doctioribus di- cuntur: & quæ quidem consona sunt scripturis suscipere, quæ verò aliena, reijcere, & ad illam regulam accommo- dat sententiam illam, Gal. *Si Angelus è cælo euangeli- zauerit vobis, præter id, quod predicauimus vobis, ana- thema sit*. Idem ibidem, Sum. 80, cap. 22. *Quid est pro- prium credentis: nihil audere, reprobare aut insuper addere*. Si n. omne quod non est ex fide peccatum est, fides autem ex au- ditu est, auditus autem per verbum Dei, omne quod est ex- tra scripturam diuinitus inspiratum, quia non est ex fide, peccatum est. Idem Epist. 80. *Non putamus iustum esse obtinere apud ipsos consuetudinem, legem, ac regulam fa- cere recta doctrine*. Igitur Scriptura diuinitus inspirata arbitet à nobis constitutatur, & apud quem inuenta fue- rint dogmata diuinis sermonibus concordantia, his omnino

*etiam veritatis suffragium accedit.* Ex his apparet, Bellarmine, quàm parum Basilius faciat pro vestris traditionibus contra & extra Dei verbum excogitatis. Postremò ipsi Papistæ nunc non observant traditiones à Basilio istic numeratas. Quare igitur nos urgēt ad illud servandum, quod ipsi tenere recusant?

Vndecimus Pater est Nazianzenus. Is in orat. 1. ad Iulian. ait, *Semiratum esse Ecclesie doctrinam, sed maxime figuras, quas traditione acceptas Ecclesia servat.* Respondeo hoc nihil facere ad rem. Non enim inter nos quæstio est, propter quas res doctrina Ecclesiæ sit Nazianzeno mirabilis visa, Sed an Scriptura sac. contineat omnia ad salutem necessaria, an verò non contineat omnia ad salutem necessaria.

Duodecimus Pater est Chrysostomus. Ille in 2. ad Thess. 2. inquit, *Pater quòd non omnia per Epistolas tradiderint Apostoli, sed multa sine litteris. Eadem verò fide digna sunt tam ista, quàm illa.* Verùm ego Chrysostomum Chrysostomo oppono. Ille enim Homil. 49. in Matth. *Nulla probatio potest esse vera Christianitatis, neque aliud refugium potest Christianorum fidei veritatem cognoscere volentiū, nisi Scriptura divina.* & paulò post, *Christiani qui sunt in Christianitate volentes firmitatem accipere fidei, ad nullam rem fugiant nisi ad scripturas.* Idem in Plal. 95. *Si quid dicitur absque scriptura, auditorum cogitatio claudicat. Verùm ubi è Scriptura divina vocis prodit testimonium, & loquentis sermonem, & audientis animum confirmat.* Si hæc responsio non sufficit Bellarmino, respōdeo illas traditiones, de quibus loquitur Chrysostomus, vel esse de doctrina, vel de ritibus. Si de ritibus, tum non pertinent ad præsen-

presentem disputationem. Si de doctrina: tum sunt idem cum doctrina scripta: vel aliud. Si idem, recipimus eas, sed ita vt à nobis per scripturam diiudicentur & examinentur. Si aliud, dicimus eas esse anathema cum Apostolo, ad Gal. 1, 9. Quod verò atinet ad traditionem ex 3. Homil. ad Philipp. allegatam, ad eam respondebimus suo loco.

Decimus tertius pater est Theophilus. Ille lib. 1. & 3. dicit *legem Ieiuniorum esse Apostolicam traditionem*. Respondeo in Ieiunio esse duo, internū, nempe ipsam ieiunij substantiam, & externum, nempe hoc vel illo modo ieiunare, videlicet hoc vel illo die, tempore, loco, & his vel illis cibis abstinere. Si nunc de ipso morali loquitur, quod est in Ieiunio, tum fatemur eum verum dicere. Si verò de externis circumstantijs loquitur, nempe de certis Ieiuniorum temporibus & cibis, &c. tum illud est falsum. Contrarium enim in sac. litteris est reuelatum, Collos. 2, 16. *Nemo vos iudicet in cibo & potu*. Et Gal. 4, 10. *Dies observatis & menses?* Sic igitur disputo.

Quod cum Apostolorum scriptis manifestè ex diametro pugnat, illud non est ex traditione Apostolica. Sed certis diebus Ieiunare, & à certis cibis abstinere manifestè pugnat cum doctrina Apostolorum. Ergo non est traditio Apostolica.

Deinde Apollonius apud Eusebium lib. 5. cap. 18. dicit *Ieiunij leges primum à Montano editas esse*. Præterea Apostoli hoc liberum reliquerūt, vt antè probatum est.

Decimus quartus pater est Cyfillus. Verum Bel-

larminus debuit ex eo aliquas traditiones proferre. Quod cum non fecit, non opus est his immorari: Veruntamen Cyrillus parum iuuat traditiones papisticas contra Dei verbum excogitatas. Quarta enim Cateches. dicit, *in rebus ad fidem pertinentibus nihil omnino extra Scripturam statuendum esse*. Equidē hoc libenter amplectimur, et si Bellarmino, & alijs papistis idem placet, tum inter nos hæc controuersia est composita. Hoc vnum enim volumus, vt in rebus ad fidem pertinentibus nihil extra Scripturam statuatur.

Decimus quintus pater est Epiphanius. Is hæres. 55. inquit; *Termini nobis positi sunt, & fundamenta, & edificatio fidei, & Apostolorum traditiones, & scriptura sacra, & successiones doctrinae, & undique veritas Dei munita est, vt nemo decipiat novis fabulis*. Respondeo hoc intelligendum esse de ijs traditionib. quæ cum Scriptura congruunt, vel ex ijs deduci possunt. Nam cum Melchizedechianos eodē capite refutat, dicit, *ἐκ ἰχθὺς διὰ τὰς τὰς πρὸς τὴν γὰρ καὶ ἰδιαιτέρας*. Si hoc non satis facit Bellarmino, tum traditio de alia doctrina, q̃ de ea, qnam Apostoli scripserunt, intelligenda est. Sed si hoc volūt, audiant Paulū ad Galat. cap. 1. vers. 9. dicentem, *Si vel Angelus è cælo vobis aliud Euangelium euangelizauerit, anathema sit*.

Vltimo loco adducit Damascenum. Sed ille est recentior, & sibi non cōstat. Aliquando enim valdè extollit traditiones non scriptas. Aliquando verò dicit in scriptura comprehendī necessaria. Disertè enim dicit de fide Orthod. lib. 1. cap. 1. *Cuncta quæ tradita sunt nobis per Legem, & per Prophetas, & Aposto-*  
los,

*los, & Euangelistas suscipimus, nihil ultra illa perquirentes. Atque hæc de Patribus Græcis. Et vt totam hanc disputationem in pauca contraham, dicimus nos omnes eas traditiones, quas Apostoli in verbo suo expresserunt, vel quæ necessariò ex verbo Dei deduci possunt, libenter recipere: eas verò, quæ ex Dei verbo deduci non possunt, modò non pugnent cum Dei verbo, non aspernari; imò vsurpare etiam eas, quando, & quatenus Ecclesiæ vtile est. Quæcunque verò Traditiones cum verbo Dei pugnant, eas nequaquam recipimus, quantumuis splendidos titulos & auctores præ se ferant. Hæc de Patribus Græcis. Nunc de Latinis. primo loco producit Tertullianum de corona militis, cap. 4. *Harum & aliarum eiusmodi disciplinarum, si legem expostulas scripturarum, nullam inuenies, traditio tibi præstendetur auctrix.**

Argumentum tale,

Quicquid dixit Tertullianus, id est verum. Sed Tertullianus dicit, quasdam disciplinas non scriptas, sed traditas esse. Ergo quædam traditiones non scriptæ sunt ad salutem necessariae, vel omnia ad salutem necessaria non sunt scripta.

Respondemus Maiorem esse falsam, & ne hoc particularibus erroribus cogar probare, ostendam in genere. Hieronymus cont. Heluid. dicit *Tertullianum non esse Ecclesiæ hominem*. Eodem modo & nos possemus respondere. Nam cum Hieronymus vrgeretur Tertulliani auctoritate, reiicit totum argumentum, dicendo, *de Tertulliano nihil amplius dico, quàm Ecclesiæ hominē non fuisse*. Idem in Catal. C. Tertullianus, dicit *cum in Montani dogma cecidisse, & in*

*multis libris meminisse nouæ Prophetiæ, & specialiter scrip-  
 pisse aduersum Ecclesiā. Hilar. canone 5. in Matth. Ter-  
 tullianus de hac re apertissima scripsit volumina, sed conse-  
 quens error hominis detraxit scriptis probabilibus aucto-  
 ritatem. Quam ob causam Tertullianus inter eos  
 numeratus est, qui Catholicis sint vitandi, C. Sancta  
 Distinct. 15. Deinde in conclusione plus est, quàm  
 in præmissis. Nam ex hoc argumento non sequitur,  
 aliqua ad salutem necessaria non esse scripta, sed tra-  
 dita; sed quasdam disciplinas non esse scriptas, sed  
 traditas, loquitur autem de corona. At illa non  
 pertinet ad salutem, & apud multos fuit adiaphora.  
 Et hoc tempore prorsus est licita. Deinde cap. præ-  
 cedente notat, ex eodem fonte esse ternam immersio-  
 nem, orare stando, non ieiunandum diebus Dominicis.  
 Hæc & similia aut sunt ad salutem necessaria, aut non  
 sunt. Si sunt, tùm ex omnibus papistis nemo seruari  
 potest: nemo enim ex papistis ea obseruat. Si non  
 sunt, tum non rectè nobis opponitur Tertullianus.  
 Non enim de rebus indifferentibus, sed de rebus ad  
 salutem necessarijs disputamus. Deinde non nega-  
 mus quosdam ritus non esse scriptos. Sed neq; Mi-  
 nori multum tribuendum est. Nam hunc librū scri-  
 psit postquam in hæresin prolapsus esset. Est n. scri-  
 ptus contra Ecclesiā, cap. 1. dicit. *Noui & Pastores  
 eorum in pace leones, in prelio ceruos.* Quare dixit eorum.  
 Certè si Tertullianus adhuc de Ecclesiā fuisset, ho-  
 nestiùs locutus fuisset, aut saltem dixisset, *nostros*  
 Eodem capite, *Musitant denique tam bonam & lon-  
 gam pacem sibi periclitari.* Quinam illi? Certè pastores  
 Ecclesiæ, ad quam si tum pertinuit Tertullianus, au-  
 vald*

valdè mali fuerunt, aut Tertullianus valdè iniquus in eos. Denique in eodè capite dicit: *Planè superest, ut etiam martyria recusare meditentur, qui prophetias eiusdem Sp. Sancti respuerunt*. Aut loquitur de Prophetijs scriptis, aut de nouis Montani prophetijs non scriptis. Si de scriptis, tum contradicit sibi ipsi. Capite enim quarto dicit *harum disciplinarum nullam scriptam legem inueniri*. Loquitur igitur de prophetijs Montani. Manifestum igitur Tertullianum fuisse hæreticum, cùm hunc librum scriberet. Sed nūmne, Bellarmine, pro traditione ad salutē necessaria obtrudes, quod hæreticus ex Montani prophetijs produxit? Postremò loquitur de pastoribus Romanis. Si verò illi tales fuerunt tempore isto, quales Tertullianus eos describit, quis nunc mirabitur eos præter nudum nomen sibi nihil reseruasse? Secundus locus est ex lib. 1. cont. Marcionem cap. 21. sed eum non notat, & id prudenter. Nihil enim dicit Tertullianus, quod eum iuuare possit. Similiter & locū ex 2. ad Vxorem, de velandis virginibus, cum silentio præterit. Postremò annotat & locum ex libro de præscriptionib. vbi dicit *hereticos non ex Scriptura, sed ex traditionibus refutandos esse*. Quod equidem miror. Nihil enim fortius est ad papistas refutandos, quàm liber Tertulliani de præscriptionibus. Ille eo libro disputat contra eos, qui vel Scripturas non recipiunt, vel eas mutilant, vel aliquid apponūt, & eos docet non ex Scriptura refutandos esse. Qui n. Scripturas negāt, illi ex ijs refutari non possunt, principia enim debent esse extra controuersiam posita. Dicit igitur eos ex traditionibus refutandos esse. At ex qui-



bus traditionibus? Respondet Tertullianus cap. 21. *quam Ecclesia ab Apostolis, Apostoli à Christo, Christus à Deo accepit, hanc esse veram doctrinam, quam antè Traditionē appellauit. At quænam est illa? Respondet Tertullianus eodem cap. quam apostoli predicauerunt, primum uia uoce, postea per Epistolas. At hanc traditionem qui non recipit, anathema sit. Hanc esse veram Tertulliani sententiam constat ex lib. de Resurrect. carnis: Anfer, inquit, hereticis, quæ cum Ethnicis sapiunt, ut de solis scripturis suas quæstiones sistant, & stare non poterunt. Et in lib. cont. Hermogen. Adoro Scripturæ plenitudinem, scriptum esse doceat Hermogenis disciplina, si non est scriptum, timeat Vt illud, adijcipientibus vel detrahentibus destinatum.*

Secundus pater est Cyprianus. Ille dicit lib. 1. Epist. 12. *Vngi quoque necesse est eum, qui baptizatus est, ut accepto Chrismate? .i. unctione, esse unctus Dei, & habere in se Christi gratiam possit. Hoc nihil iuuat papisticas traditiones. Nam eodem capite dicit, eos, qui ab hereticis baptizati sunt, debere denuò baptizari. Num hoc etiam ab Apostolis traditum est? non opinor. Imò accidit Cypriano, quod nostris aduersarijs. Ille enim vnum errorem probauit per alium. Nam uoluit probare, hæreticos non habere Baptismum verum, quia non possunt ungere. Planè eodem modo nostri aduersarij probant scripturam non continere omnia illa, quæ sunt ad salutem necessaria. Quia Ecclesia Romana multis ritibus & Ceremonijs utitur quæ non sunt scriptæ. Deinde Cyprianus ad Pompeium, ea, inquit, facienda esse, quæ scripta sunt, Denotatur. Ostendat Bellarminus, ubi scriptum sit, oleum in Ba*

in Baptismo adhibendum esse , aut desinat Cyprianum contra nos vrgeri. Secundum Cypriani Testimonium est ex lib. 2. Epist. 3. *Admonitos autem nos scias, ut in calice offerendo, dominica traditio seruetur, neque aliud fiat à nobis, quam quod pro nobis dominus prior fecit, ut calix, qui in commemorationem eius offertur, mixtus vino offeratur.*

Quicquid dicit Cyprianus, hoc est verum. Sed Cyprianus dicit, vinum aqua misceri in Eucharistia, esse traditionem Domini. Ergo quædam ad salutem necessaria non sunt scripta. Vel, Quædam Traditiones non scriptæ sunt ad salutem necessariæ.

Respondeo aliud concludi, quàm præmittitur. Tantùm enim sequitur. Ergo vinum aqua misceri in Eucharistia, esse Traditionem domini. Sed hoc non est tam firmum, quàm dicit Cyprianus. Thomas n. dicit in tertia parte quæst. 74. Art. 6. in responsione generali. *Respondeo dicendum, quòd vino, quòd offertur in hoc sacramento, debet aqua misceri, primò quidem propter institutionem. Probabiliter enim creditur, quòd Dominus instituerit hoc sacramentum in vino aqua permixto, secundum morem istius terre. Unde prouerb. 9. dicitur bibite vinum, quod miscui vobis. Eodem modo, si vina apud nos absque aqua bibi non possent, non negarim illud moderatè diluendum esse. Vbi verò tam generosum non est, respondeo cum eodem Thoma, P. 3. Quæst. 74. artic. 8. in Responsione vniuersal. parum aquæ apponendum esse. Deinde si aqua tam esset necessaria, ut Eucharistia non sit sacramentũ, nisi aqua adsit; tum malè Thomas P. 3. Q. 74. Art. 7. negauit aquam esse de  
neces-*

*necessitate huius sacramenti. Nam si Christus æquè instituit aquam, atque vinum, & panem? tum aqua est de Sacramenti necessitate. Vinû enim & panis sunt de Sacramenti necessitate. Sed neque maior vera est. Multa enim dixit Cyprianus, quæ ipsi etiam aduersarij falsa esse fatentur. Prætereà papistæ non possunt fortius repelli, quàm ex hac epistola. Dicit enim ab Evangelicis præceptis omnino recedendum non esse; & eadem, quæ magister docuit & fecit, discipulos quoque facere & obseruare debere constantius & fortius: Alio in loco beatus Apostolus docet, dicens, Miror quòd tam citò dimittamini ab eo, qui vos vocauit ad gratiam, ad aliud Euangelium, nisi sunt aliqui, qui vos turbant, & volunt conuertere Euangelium Christi. Sed licet nos aut Angelus à cælo aliud annunciet; præterquam quod annunciamus vobis, anathema sit. Arrige hîc aures Bellarmine, & annuncia idem quod Apostoli annunciarûnt, aut Cypriani Anathema extimesce. Postremò Cyprianus ex aliquot Scripturæ testimonijs probat hanc traditionem. Videtur igitur secundum Cyprianum esse scripta traditio. Ab hac opinione nō abhorret Thomas P. 3. Q. 74. A. 6. in Resp. Generali; dicit vinum aqua miscendum esse, quia hoc conuenit representationi dominice passionis. Vnde dicit Alexander Papa: Non debet in calice domini, aut solum vinum, aut aqua sola offerri, sed utrumque permixtum: quia utrumque ex latere eius passionis sua profluxisse legitur. Quod si ita est, non est quod Bellarminus Chemnitium carpat, qui hoc de scripta traditione explicat, sed si vult quemquam carpere, carpat Cyprianum, carpat Alexandrum Papam, carpat Thomam, Illi enim idem dicunt,*

dicunt, quod Chemnitius. Idē Cyprianus ad Pompeium contra Epistolam Stephani, satis disertè dicit, *non omnem Traditionem seruandam esse, sed eam que in Euangelio, Apostolorum Epistolis, & Actibus fundatur.* In eadem Epistola dicit *obstinationem esse, humanam Traditionem antepondere diuin. dispositioni.* In eadem Epistola, *Nec consuetudo, que apud quosdam irrepserat, impedire debet, quo minus veritas praualeat & vincat. Nam consuetudo sine veritate, vetustas erroris est; propter quod relicto errore, sequimini veritatem.* Si ista regula obtinet, iacent papisticæ Traditiones omnes, quæ extra Dei verbum scriptum excogitatæ sunt.

Tertius pater est Hilarius. Ille dicit in libro cont. Constantium; *Nolo verba, que non sunt scripta legi. Respondeo. Hic tantum rogo quis Apostolus iubeat, quis Apostolica predicationis vetet formam? dic prius, si rectè dici putas, nolo aduersus noua venena, nouas medicamentorum compositiones.* Bellarminus his verbis duo ab Hilario significari asserit. Vnum, predicationē consubstantialitatis patris & filij, esse Apostolica predicationis; licet expressè non sit scriptum, filium esse patri consubstantialem. Alterum, nomen *ipsoius* esse quidem nouum, sed tamen retinendum, licet non sit scriptum, quia est Apostolica predicationi conforme. At mi Bellarmine nos vtrumque fatemur. Scimus, enim, ea, & quæ in scriptura expressa sunt, & quæ necessariò ex ea deduci possunt, esse in eadem auctoritate. Concedimus igitur, id retinendum esse, neque hoc tantum, sed quasunque traditiones Bellarminus sac. literis conformes probare potest, eas recipimus, quæ verò ijs non sunt conformes, eas reijcimus. Hilarius enim  
hîc

hic regulam Traditionum ponit, nempe *conformitatem cum sacris litteris*. Propterea etiam dicit vocem *quosdam* retinendam esse. Ergo quicquid cum illis conforme est, recipiendum est, quod non cum illis conforme est, illud abijciendū est. Hæc regula Hilarij si obtinet, perierunt oēs papisticæ traditiones.

Quartus pater est Ambrosius, Ille lib. de initiatione cap. 1. & 6. item lib. 1. de Sacrament. cap. 1. & 2. *explicat multos ritus in Sacramentis, qui non sunt scripti*. Sed nos non de ritibus disputamus. Fatemur enim multos ritus non esse scriptos. Sermon. 35. 34. 36. *docet quadragesimam à Christo præceptā*. Sed de quadragesima satis responsum est, & plenius dicemus de ea suo loco. Hoc nunc taceri non debet; Ambrosium hîc allegatum pugnare cum Bellarmino. Bellarminus enim suprà dixit *quadragesimam esse ab Apostolis institutā*. At Ambrosius hîc dicit, *eam à Christo præceptam esse*. Idem Ambros. Sermon. 36. dicit *symbolum Apostolicum esse Traditionem*. Fateor, sed scriptam, nihil enim est in symbolo, quod scriptum non est. Deinde Ambrosius dicit lib. 3. Hexam. cap. 3. *Quod aperte scripturarum auctoritate non didici, quasi secretum prætereo*. Et lib. 1. Hexam. cap. 6. *Satis est ad scientiam, quod scripturarum divinarum series comprehendit*. Non rectè igitur cōtra nos allegatur Ambrosius. Nam secundum eum Scriptura continet perfectam scientiam.

Quintus pater est Hieronymus. Ille in Epist. ad Marcell. inquit, *nos unam quadragesimam ex Apostolica traditione, tempore nobis congruo, ieiunamus*. Sed de Ieiunio antè diximus. Et aduersus Luciferianos hæreticos,

ræticos, *Multa, inquit, quæ per traditiones in Ecclesia observantur, auctoritatem sibi scriptæ legis usurparunt.* Resp. orthodoxus: *Non quidē abnūo hāc esse Ecclesiārū consuetudinem, sed quale est, ut leges Ecclesiæ, ad heresim transferas?* Sed hīc loquitur Hieronymus de ritibus, nos autem disputamus de doctrina fidei, ad salutem necessaria. Fidei autem doctrinam totam contineri fac. litteris docuit Hieronymus satis manifestè, Ad Tit. 1. *Sine auctoritate Scripturarum garrulitas non habet fidem.* Idem ad Galat. *Spiritus Sancti doctrina est, quæ canonicis libris prodita est: cōtra quam si quid statuerunt concilia, nefas duco.* Idem in Matth. cap. 23. *Quod de Scripturis non habet auctoritatem, eadem facilitate contemnitur, quæ probatur.*

Sextus Pater est Augustinus. Ille Epist. 118. cap. 1. *Illæ autem, quæ non scriptæ, sed traditæ custodimus, quæ quidem toto terrarum orbe traditæ observantur, dantur intelligi vel ab ipsis Apostolis, vel plenarijs concilijs, quorū est in Ecclesia saluberrima auctoritas, commendata atque statuta retineri, sicuti quod Domini passio & resurrectio, & ascensio in cælum, & aduentus de cælo Spiritus Sancti, anniuersaria solennitate celebrantur: & si quid aliud occurrerit, quod seruetur ab vniuersa, quacunque se diffundit Ecclesia.*

Quoniam magna est Augustini auctoritas in Ecclesia: idē diligentiū ad eum respōdebo. Quæstio inter nos est Bellarmine, an quædam Traditiones non scriptæ sint ad salutem necessariæ? Tu ais. Ego nego. Tu tuam sententiam probas. *Quia illa, quæ vniuersa Ecclesia seruat, ea vel ab Apostolis, vel à cōcilijs plenarijs commendata sunt.* Argumentum tale,

Quæ-

Quæcunque à concilijs, vel ab Apostolis prodita sunt, illa sunt necessaria ad salutem. Sed quæ vniuersa Ecclesia tenet, illa vel ab Apostolis, vel à Concilijs tradita sunt. Erga quæcunque vniuersa Ecclesia tenet, illa sunt necessaria ad salutem. Hinc

Aliud infero. Quæcunque ab vniuersa Ecclesia seruantur illa sunt necessaria ad salutem. Sed quædam traditiones non scriptæ ab vniuersa Ecclesia seruantur. Ergo quædam Traditiones non scriptæ sunt ad salutem necessariæ. Et per consequens scriptura non continet integram doctrinam salutis.

Priusquam hoc argumentum excutiamus, videndum est. de qua re loquatur Augustinus, ne videamur extra seipsum vagari. Augustinus igitur docet sanuarium, quid agendum sit in ijs, in quibus consuetudines regionum & Ecclesiarum variant, & in quibus consentiunt, puta de Sacramenti ritibus, festis diebus, Ieiunio & Eucharistia; verum non de ipso ieiunio, neque de ipsa Eucharistia, sed quo die vel tempore sint celebranda. Hæc omnia distribuit in tres classes. Quædam scilicet scripta sunt, quædam non sunt scripta. Non scripta sunt duplicia, alia vniuersalia, & obseruantur à tota Ecclesia, quædam particularia, & obseruantur à particularibus Ecclesijs, cap. i. In primo ordine ponit Sacramenta, *Dominus*, inquit, *Sacramentis numero paucissimis, obseruatione facillimis, significatione prestantissimis, societatem noui populi colligauit. Sicuti est baptisumus Trinitatis nomine consecratus, communicatio corporis & sanguinis ipsius, & si*  
quid



*quid aliud in scripturis canonicis commendatur . Hinc apparet, Bellarmine, omnia Sacramenta noui Testamenti esse scripta. Si igitur apud vos in aliquo precepto est Augustinus, abolete ea Sacramenta, quæ non sunt scripta . De horum, quæ scripta sunt, obseruatione, respondet Augustinus cap. 5. Ad hæc itaque ita respondeo, ut quid horum sit faciendum, si diuina Scriptura præscribit auctoritas, non sit dubitandum, quin ita facere debeamus, ut legimus . In secundo ordine ponit certum diem celebrationis Passionis, & Ascensionis Domini, item Missionis Spir. sancti. Illa autem, inquit, quæ non scripta, sed tradita custodimus, quæ quidem toto terrarum orbe obseruantur, dantur intelligi vel ab ipsis Apostolis, vel à plenarijs Concilijs, quorum est in Ecclesia saluberrima auctoritas, commendata atque statuta retineri, sicuti quod Domini passio & resurrectio, & ascensio in cælum, & aduentus de cælo Spiritus Sancti, anniuersaria sollemnitate celebrantur. Et si quid aliud tale occurrerit, quod seruetur ab vniuersa, quacumq; se diffundit, Ecclesia. cap. 1. Vnde apparet eum non loqui de doctrina, sed de obseruatione dierum, postquam enim aliquos dies enumerasset, addit generalem clausulam, & si quid aliud tale. Ad hoc respondet cap. 5. Similiter etiam obseruandum si quid horum per totum orbem frequentat Ecclesia. Nam hoc quin ita faciendum sit, disputare, insolentissima insania est. In tertia classe ponit certos dies Ieiunij, & Eucharistiæ. Alia verò, inquit, quæ per loca terrarum, regionesque variantur, sicuti est, quod alij ieiunant sabbatho, alij verò non; alij quotidie communicant corpori, & sanguini dominico, alij certis diebus communicant: alibi nullus dies intermittitur, quo non offeratur,*

*tur, alibi Sabbatho tantum & Dominico, & si quid aliud  
 huiusmodi animaduerti potest. cap. 2. Ad hoc respōdet  
 ibidem. Totum hoc genus rerum liberā habet obserua-  
 tiones, nec disciplina vlla est in his melior grāui, prudentiā  
 Christiano, quā vti eo modo agat, quo agere videtur Ec-  
 clesiam, ad quamcunque fortē deuenerit. Vbi annoto non  
 voluisse Augustinū, eas prorsus liberās esse, ita vt qli-  
 libet, in quibuslibet locis eas vel obseruaret, vel non  
 obseruaret. Sed ita esse liberās, vt vbi nō obseruabā-  
 tur, possent liberē omitti, vbi verō obseruabātur non  
 possent liberē omitti, sed propter scandalum vitan-  
 dum in eo loco seruandas esse. cap: n. 2. dicit; *Quod  
 enim neque contra fidem, neque contra bonos mores inui-  
 gatur, indifferenter est habendum, & pro eorum, inter quos  
 viuunt, societate seruandum est. Et in eodem cap. cum  
 Romam venio, Ieiuno sabbatho, cum hic sum, non ieiuno.  
 Sic etiam tu, ad quam fortē Ecclesiam veneris, eius morem  
 serua, si cuiquam non vis esse scandalo, nec quemquam tibi.*  
 Hanc esse veram mentem Augustini, fatebitur ipse  
 Bellarminus. Iam excutiemus argumentum, & prius  
 respōdebimus ad syllogismum principalem, deinde  
 ad eum, qui ex eo ducitur. Ac primū negamus  
 Maiorem. Nam non quicquid ab Apostolis, & con-  
 cilijs traditum est, hoc est ad salutem necessarium  
 Inter cetera enim tradiderunt multos ritus, qui sunt  
 indifferentes, & pro ratione temporum, personarum  
 & locorum possunt mutari, & tales multi in vete  
 Ecclesia fuerunt in vsu, qui tamen nunc à papistis  
 non obseruantur: Hoc non negabit Bellarminus.  
 Hæc igitur Maior corrigenda est; & dicendum  
 Quædam ab Apostolis, & Concilijs tradita sunt  
 salute*

lutem necessaria. Quam ob causam & conclusio debet esse particularis. Ergo quædam, quæ ab vniuersa Ecclesia obseruantur, sunt ad salutem necessaria. Ex tali autem cōclusionē proximus syllogismus colligi non potest. Verūm ne erret Bellarminus, dum dico quædam à concilijs tradita esse ad salutem necessaria, non volo, concilia alia quædam ad salutem necessaria tradidisse, præter ea, quæ scripta sunt, sed eadem, quæ scripta sunt, vel iterasse, vel explicasse. Hæc ad Maiorem. Nunc ad Minorem; quæ proflus nihil facit ad rem, quam agit Bellarminus. Et quoniam ostendit se maximè niti isto principio, quod vniuersa tenet Ecclesia, hoc est seruandum, age excutiamus hoc principium. Augustinus dicit. *quod vniuersa tenet Ecclesia, hoc vel ab Apostolis, vel à Concilijs accepit.* Ergo seruandū. Ergo, inquit Bellarminus, *quod Ecclesia Romana tenet, hoc ab Apostolis & Concilijs accepit, & ob eam causam seruandum.* Argumentum tale.

Quod tenet vniuersa Ecclesia, hoc ab Apostolis vel Concilijs profectum est. Sed Romana Ecclesia est vniuersa Ecclesia. Ergo. Hanc esse mentem tuam, Bellarmine non negabis.

Verūm in Minore est petitio principij. Romanam n. Ecclesiā esse vniuersam Ecclesiā, est inter nos controuersum, & nos, hoc esse falsum, ostendemus suo loco. Hæc de principali syllogismo, nūc ad illum, qui ex eo ducitur. Ac primū negamus Maiorē. Eam n. non esse vniuersaliter veram ostendimus antè. Cū verò Maior particulariter formatur, tum sunt puræ particulares. Hæc ad argumentum, nunc quædam de re ipsa. Totum argumentum nihil facit ad rem.

Nos enim disceptamus de doctrina fidei, Augustinus verò disputat de obseruatione quorundam dierum. Hoc disertè dicit. Et ne Bellarminus dicat & doctrinam fidei sub ista parte comprehendere, addit Augustinus generalè clausulam. *Et si quid aliud tale.* Qua clausula omnis doctrina fidei excluditur. Nulla enim doctrina fidei, est aliud tale. Ergo Augustinus frustrà contra nos adducitur. Deinde hæ dierum obseruationes non sunt necessariae ad salutem, sed reipsa sunt indifferentes. Quòd verò tenendæ sunt, non fit propter salutem, sed propter vitationem scandali. Hoc quoniam negat Bellarminus, diligentius explicandum videtur. Ac primùm eius responsio examinanda est. *Alia verò*, inquit ex Augustino, *quæ per loca terrarum regionumq; variantur, liberas habent obseruationes.* Si Bellarminus hoc de quolibet loco intelligit, tum errat, & pugnat cum Augustino. Augustinus enim vult, vt ea seruentur, in ijs locis, in quibus instituta sunt. Hoc probauit antè. Vnde apparet, & particulares obseruationes esse necessarias secundum Augustinum. Sed qua necessitate? num salutis? Non; sed necessitate scandali. Disertè enim dicit cap. 2. *ad quam veneris Ecclesiam, eius morem serua, si cuiquam non vis esse scandalo, nec quemquam tibi.* Sunt igitur istæ particulares obseruationes necessariae propter scandali vitationem. At hoc modò & istæ vniuersales obseruationes sunt tantùm necessariae. Nam quod particulares requirunt in ijs locis, in quibus institutæ sunt, hoc vniuersales requirunt in omnibus locis. Sed particulares in ijs locis, in quibus institutæ sunt, requirunt obseruationem

tionem propter scandali vitationem. Ergo istæ vniuersales requirunt in omnibus locis obseruationem propter scandali vitationem. Per se igitur sunt liberæ, propter scandalum sunt seruandæ. Hoc cùm Brentius diceret, debuisses acquiescere. Verùm quia tibi libuit contra Brentium insurgere; age asseremus nostram sententiam argumentis Bellarminiana exceptione maioribus. Augustinus adducit exemplum solenne *de Pascha*, quod & Bellarmin<sup>9</sup> allegat. Pascha igitur certo die obseruare, dico per se liberum esse & indifferens, propter scandali vitationem esse necessarium. Hoc probabo ex 5. lib. Euseb. Eccl. Hist. capit. 24. cùm enim inter Asiaticos & Europæos orta esset contentio de die Paschatis, in qua Victor Romanus *pertinaciter & non rectè* (vtor verbis Eusebij) postea egit, ita lis composita est, vt Asiatici retinerent suum morem, & Europæi retinerent item suum morem, & colerent inter se concordiam. Idem narrat Socrates lib. 9. Tripart. hist. cap. 28. Sed hoc Anicetus & Polycarpus facere non potuissent, si certi diei obseruatio esset ad salutem necessaria. Neq; tamen huc ego disputo, quòd improbem istum ritum. Verùm enim alicuius rei vsum ostendere, non est rem improbare. Et quòd ad rem ipsam attinet, dico necessarium esse ad salutem, recordari passionis domini, & commemorare eius beneficia. Sed hoc facere certo aliquo die, non est necessarium propter salutem, sed tantùm propter ordinem. Et vt vno verbo dicam, quasunque obseruationes neque cum fide, neque cum bonis moribus pugnantes obseruat vniuersa Ecclesia, eas cum Augustino libèter in omnib.

locis obseruabimus; & quas obseruationes neque cum fide, neque cum bonis moribus pugnantes obseruat hæc vel illa Ecclesia, eas cum Augustino libenter obseruabimus in ijs Ecclesijs, in quibus seruantur. Verùm ne quis statim inferat, hoc vel illud Apostolicum esse, quoniam ab Ecclesia seruatur, inquiram in illud paulò diligentius. Nemo tamen existimet hæc in Augustinum fieri: eius enim memoria est apud me in benedictione. Sed tantùm veritatis indagandæ studio facio. Augustinus dicit *obseruationem certi diei paschæ obseruari ab vniuersa Ecclesia, ideo esse vel ab Apostolis, vel a concilijs plenarijs profectam*. Hinc facit Bellarminus vniuersalem regulâ: *Omnia quæ vniuersa Ecclesia obseruat, ea esse Apostolica*. Verùm tempore Polycarpi & Aniceti, Apostoli nullum certum diem statuerunt. Polycarpus enim & Anicetus prætendebant traditiones maiorum. Euseb. lib. 5. cap. 24. Eccles. Hist. *Neque enim aut Anicetus Polycarpo suadere potuit, ut non obseruaret ea, quæ nouerat Iohannem discipulum Domini, vel reliquos Apostolos, cum quibus semper fuerat, obseruasse: neque rursus Polycarpus Aniceto persuasit, ea deserere, quæ ille dicebat a se maiorum more seruari*. Neq; eo tempore in vllò concilio de ea re actum erat. Nam tempore Polycarpi in Ecclesia Christiana nullum concilium, præter illud Hierosolymitanum, in quo Apostoli fuerunt, habitum fuit. In eo verò de hac re nihil actum est: vt constat ex eius actis, quæ referuntur à Luca, cap. 15. Act. Apostolicorû. Sequitur ergo certi diei paschæ obseruationem non esse ab Apostolis profectam. Et ne criminetur Bellarminus, me detrahere Augustino,

stino, respondeo ipsum Augustinum hoc videre, & ob eam causam dubitanter loqui, *vel* ab Apostolis, *vel* à Concilijs. Hoc potest esse verum de concilijs, quæ Polycarpum sequuta sunt, de præcedentibus verum non est. Hinc apparet neque omnia Apostolica esse ad salutem necessaria, & aliquas vniuersales obseruationes non esse Apostolicas, neque valere argumentum ab vniuersali Ecclesia ad Romanam Ecclesiam. Frustrà igitur ex his principijs pugnat Bellarminus. Alterum argumentum ex eodem Augustino ex lib. 2. de Baptismo *cōtra* Donatistas, cap. 7. *Quam consuetudinem credo ex Apostolica traditione venientem, sicut multa non inueniuntur in litteris eorum, neque in concilijs posterorum, & tamen, quia custodiuntur per vniuersam Ecclesiam, non nisi ab Apostolis tradita, & commendata creduntur.* Simile est apud Augustinum lib. 4. cap. 6. & cap. 24. & lib. 5. cap. 23. & in alijs locis. Ex his locis infert Bellarminus, quædam non scripta esse ad salutē necessaria. Argumentum tale.

Quod vniuersa Ecclesia tenet, hoc ad salutem est necessarium, Sed quædam non scripta tenet vniuersa Ecclesia. Ergo quædam non scripta sunt ad salutem necessaria.

Maiorem huius argumenti esse falsam docuimus argumēto superiore. Ergo & conclusio vera esse non potest. Sed ad rem. Controuersia est apud Augustinum; Num illi, qui ab hæreticis baptizati sunt, rebaptizari debeant. Et respondebat Augustinus, quod non. Iam quæritur de principio ex quo Augustinus hoc probat, & affert primū Scripturam. Deinde consuetudinem Ecclesiæ. Negat enim ana-



baptismum fieri debere, primum quia contra Scripturam est; deinde quia contra consuetudinem Ecclesiæ est. Primam conclusionem ponit, lib. 5. contra Donatistas cap. 23. *Contra mandatum Dei est, quod venientes ab hæreticis, si cum istis baptismum Christi acceperunt, baptizantur, quia Scripturarum testimonijs non solum ostenditur, sed plane ostenditur multos pseudoChristianos, quamvis non habent eandem charitatem cum sanctis, sine qua nihil prosunt, quacunque sancta habere potuerunt, baptismum tamen commune habere cum sanctis.* Hoc autem probasse Augustinum ex scriptura manifestum est. Epist. 203. *Vellet ergo Samaritanus, quem Samaritani circumciderunt, fieri Iudeus, vacaret certe iterationis audacia, & id quod apud hæresin factum erat, quod praeceperat Deus, non abolere, sed approbare cogermur. Quod si in carne circumcisi hominis non inuenirem locum, ubi circumcisionem repeterem, quia unum est illud membrum, multò minus inuenitur locus in corde, ubi Baptismus Christi repetatur.* Argumentum à Circumcisione ad Baptismum. Vt Circumcisio ab hæreticis facta non poterat iterari; ita & baptismus, qui Circumcisioni successit, ab hæreticis factus non potuit iterari. Deinde Augustin. in sententijs, Sentent. 330. *Unanimitas est de masculo & femina, alia est de Deo & Ecclesia, & ipse duo singulares sunt; ut ergo uterque non potest repeti, ita nec baptismus.* Simile in Ios. lib. 6. quest. 6. Præterea lib. de vera & falsa pœnitentia, cap. 3. *Qui baptizatur, mortem Crucis & sepultura Christi representat, in immersione sua, In signo enim Crucis, quisquis in aqua submergitur, & submersus sepultus ostenditur, Rom. 6. Sicut enim semel Christus crucifixus est, sic Baptismus iterandus*

*iterandum non est.* Argumentum à re ad signum. Hunc esse legitimum Augustini ratiocinandi modum nemo negabit, qui extra præiudicium de hac re cogitabit. Imò ipse Bellarminus fatetur non fuisse controuersiam de facto, sed de Iure. Ius autem est mandatum Dei. Et quia contra mandatum Dei est, cōtra Ius est. Licet autem hoc non est palam in verbo Dei positum, tamen manifestè ex Dei verbo colligi potest. Hæc satis essent ad Bellarmini argumentum ex Augustino. Tamen quoniam dicit Bellarminus quæstionem esse, an hæreticorum baptisma sit verum baptisma? Hoc etiam probat Augustinus ex Scriptura libro quæstionum sexaginta sex. quæst. 59. *Vnum Baptisma est & hæreticorum, & Ecclesia, eorum videlicet, qui in nomine Patris, & Filii, & Spiritus sancti baptizantur.* Ephes. 4.

Baptisma quo in nomine Patris & Filij & Spiritus sancti baptizamur, vnum Baptisma est. Sed illud quo hæretici & illi, qui sunt in Ecclesia baptizantur, sit in nomine Patris, & Filij, & Sp. sancti. Ergo illud, quo hæretici & Catholici baptizantur vnum Baptisma est.

Item de Baptismo contra Donatistas lib. 1. cap. 1. *Extra Catholicam Ecclesiam dari potest baptismus, quem admodum extra eam haberi potest. Nullus autem illorum negat habere Baptismum etiam Apostatas, quibus utique redeuntibus, & per poenitentiam conuersis, dum non reditur, amitti non potuisse iudicatur. Et rationem reddit lib. 1. cap. 2. ibidem. Isti in quibusdam rebus nobiscum sunt, in quibusdam verò à nobis exierunt. Proinde illa, in quibus nobiscum sunt, eos agere non vetamus, in quibus*

*antem nobiscum non sunt, ut veniendo accipiant, & redendo recipiant adhortamur.* Plura ex iisdem libris colligi possunt. Propter hæc verò apodictica argumēta ex Scriptura collecta, dicit lib. 4. cap. 7. *Quia bene perspectis ex utroque latere disputationibus, & scripturarum testimonijs, potest etiam dici, quod veritas declaravi, hoc sequimur.* Et lib. 1. cap. 7. *Ne videar argumentis agere, ex Evangelio profero certa documenta.* Concludo igitur Augustinum ex Scriptura probasse, hæreticorū Baptisma in nomine Patris, & Filij, & Spiritus sancti consecratum, esse verum Baptisma; Concludo item Augustinum ex Scriptura probasse hominem ab hæretico baptizatum non esse rebaptizandum. His ita positis non negamus, Ecclesiæ consuetudinem multum facere ad fidem nostram confirmandam. Nam quòd ex Dei verbo deducere possimus, etsi illud ita esse per se credere debebamus; tamen valdè commouemur Ecclesiæ consuetudine, quando scilicet ea cum Dei verbo congruit. Neque fuisset necesse, ut Bellarminus hoc tam anxie probaret. Omnem enim consuetudinē cum Dei verbo congruentē libenter admittimus. Fatemur etiam, ubi res ex Dei verbo probata fuit, eam secundariò ex perpetua Ecclesiæ cōsuetudine probari posse. Dicere verò rem quamlibet propter solam consuetudinem, vel bonam, vel malam esse, magna temeritas est. Est enim aliqua consuetudo mala. Distinct. 11. cap. consuetudinis. *Consuetudinis, vsusque longæ non vilis auctoritas est, verum non vsque adeò valitura momento: ut aut rationē vincat, aut legem ipsam. Cum verò nec sacris Canonibus, nec humanis legibus consuetudo obuiare monstratur; incon-*

*conclusa*

*concessa consuetudo seruata est. Et C. consuetudinem, eadem. Consuetudinem laudamus, qua contra fidem Catholicam nihil usurpare dignoscitur. Et, cap. Frustrà, Distinct. 8. Frustrà, inquit, quidam, qui ratione vincuntur, consuetudinem nobis obiciunt, quasi cōsuetudo maior sit veritate: aut non sit in spiritualib. sequendum, quòd melius à Spir. Sancto reuelatum est. Hoc plane verum est, quod ratio & veritas consuetudini preponenda sint. Sed si consuetudinis veritas suffragatur, nihil oportet firmitus retineri. Similia C. Consuetudo. C. Si solus. C. Mala. C. veritate. C. Si cōsuetudinem. C. qui contempta, Distinct. eadem. Hinc apparet non quamlibet consuetudinem esse veram, neque consuetudinem esse regulam dogmatum Christianorum, sed sacrā Scripturam esse regulam & Christianorum dogmatum, & omnium consuetudinum. Proinde omnis consuetudo ex Dei verbo examinanda est, & quādo cum Dei verbo congruit, tum est recipienda, quando verò ab ea discrepat, tum est reiicienda. Deinde à consuetudine, quæ fuit tempore Augustini in vniuersa Ecclesia, argumentari ad cōsuetudinem Ecclesiæ Romanæ, quæ nunc est, est primum, à genere ad speciem affirmatiuè argumentari. Deinde est petere illud, quod est in principio. Pleræque enim consuetudines primitiuè Ecclesiæ cum Dei verbo cōgruebant: Papisticarum verò consuetudinum pleræque à Dei verbo discrepant. Hanc esse veram mentem Augustini manifestum est. Dicit enim de vnitatis Ecclesiæ cap. 3. *Non audiamus, hæc dico, hæc dicis: Sed hæc dicit Dominus. Sunt certi libri Domini, quorum auctoritati utrique consentimus, utrique credimus, ibi quæra-**

*mus Ecclesiam, ibi discutiamus causam nostram, &c.*

## CAPVT XI.

*Refutantur argumenta Bellarmini à ratione producta.*

**A**Rgumenta quæ Bellarminus ex patribus cōtra nos adduxit, refutauimus capite superiore. Sequitur vt examinemus ea, quæ à ratione petiunt? Primum argumentum. *Quia aliqui hæretici reiecerunt Traditiones.* Argumentum tale.

Quod aliqui hæretici reiiciunt, hoc est fundamentum fidei. Sed aliqui hæretici reiecerunt Traditiones. Ergo Traditiones sunt fundamentum fidei.

Hoc argumentum est ridiculum. Nam si conclusio est vniuersalis, est manifestè falsā. Si autem particularis, tūc nihil contra nos concluditur. Verbum enim Dei prius viua voce traditum, & deinde scriptum esse fundamentū fidei nunquam negauimus. Deinde Maior est falsā. Non enim quicquid reiiciunt hæretici, bonum est, neque quicquid retinent, malum est. Multa enim bonā sc̃pè reiiciūt, & quandoque aliquid bonum retinent. Deinde Minor est assyllogistos. Aliqui enim hæretici reiecerunt Traditiones, & aliqui probarunt Traditiones, & per eas Dei verbum violarunt, Matth. 15. 3. 6. Marc. 7, 3. 9. 13. Col. 2. 8.

Secundum Argumentum. *Quia omnes gentes habent consuetudines non scriptas.* Argumentum tale.

Quod omnes gentes habent, hoc est principium fidei. Sed omnes gentes habent, aliquas consuetudines non scriptas. Ergo aliquæ consuetudines

tudines non scriptæ sunt principium fidei.

Argumentum est ineptum. Bellarminus prætermiſſa Maiore, in qua Crinomenon est, probat Minorem, de qua nulla controuersia est. Nos autem negamus Maiorem, neque vnquam eam probabit Bellarminus. Sequeretur enim ex ea omnes gentes habuisse fidem, quod falsissimum est. Si autem Bellarminus ita format argumentum. Quemadmodum fit in omni Republica, ita etiam est in Ecclesia Christiana. Sed in omni Repub. sunt quædam leges non scriptæ. Ergo & in Ecclesia est aliqua doctrina fidei non scripta, Tum est æquè ridiculum. Maior enim est simpliciter falsa. Deut. 4, 8. *Quæ est gens ita magna, cui sint statuta, & iudicia iusta, sicut est vniuersa lex ista, quam ego do coram vobis hodie.* Reliquorum igitur populorum leges fuerunt imperfectæ. Lex autem Iudaica est perfecta. Hoc disertè dicit Dauid, Ps. 119. *Lex Iehouæ perfecta est.* Et ob eam causam noluit ad eam quicquam addi, neque ab eâ quicquam detrahi. Minoris probationem non dignamur responsione. Ex cap. enim Matth. 16, & 7. Marci manifestum est, Iudæorum Traditiones esse malas. Hieronymus in Habacuc cap. 2. dicit eas esse *stercora*. Tertium Argumentum. *Quia Philosophi non omnia sua sapientia mysteria scripserunt.* Quemadmodum faciunt Philosophi, eodem modo & Prophetæ & Apostoli fecerunt. Sed Philosophi non scripserunt omnia sua mysteria. Ergo & Apostoli, ac Prophetæ non scripserunt omnia sua mysteria. Bellarminus præterit Maiorē, quæ est controuersa, & probat Minorem, quæ non est controuersa. Nos autē negamus Maiorem. Nam  
& Phi-

& Philosophi non agnouerunt Christum; num propterea Apostoli & Prophetæ Christum non agnouerunt? 1. Corinth. 1, 21.

Quartum Argumentum. *Quia consuetudo habet vim legis scriptæ.* C. consuetudo, Dist. 11. De consuetudine satis diximus capite superiore, cum ad secundam rationem ex Augustino responderemus.

Quintum Argumentum. *Quia Ecclesiæ est maior dignitas, quam aliarum sectarum.*

Si omnia ad salutem necessaria essent scripta, tum Ecclesiæ non esset maior dignitas, quam aliarum sectarum. Sed Ecclesiæ est maior dignitas, Ergo omnia ad salutem necessaria non sunt scripta.

Hoc item argumentum est ridiculum, & videtur Bellarminus ignorare, in qua re vera prærogatiua Ecclesiæ sita sit. Illa verò non consistit in ridiculis, & dubijs incertisq; (cuiusmodi sunt papisticæ Traditiones) Traditionib. Sed in cognitione, quæ cum *πληροφορία* coniuncta est. Nudam enim scientiam non tantum habent fideles, sed & infideles, imò ipse Satan. Iacob. 2. 19. *Diaboli credunt & cōtremiscunt*: Nequicquam est istorum papisticorum mysteriorum, quod Satan non nouit. Est enim quorundam ex ijs auctor. Vel, quod Bellarminus mihi non negabit, totam scripturam, & omnes Papisticas Traditiones historicè nouit Satan. Si igitur in hac re sita est Ecclesiæ prærogatiua, viderit Bellarminus, in qua re Ecclesia Satanæ præstet? Sed eius prærogatiua in ea re sita non est. Habet enim hoc cum impijs hominibus & impuris spiritibus commune. Verum in alia re

hæc



hæc prærogatiua sita est, quæ est Ecclesiæ propria; nempe in cognitione, quæ coniuncta est cum *πληροφορία*. Hæc tantum ad fideles pertinet. Cum igitur Maior falsa sit, Sequitur & conclusionem veram esse non posse. Sextum Argumentum. *Quia quædam mysteria Christiana non debent reuelari.* Quod non debet reuelari, hoc non est scriptum. Sed quædam mysteria Christianæ religionis non debent reuelari. Ergo quædam mysteria ad fidem necessaria non sunt scripta. Nos negamus Minorem. Bellarminus probat eam. 1. *Quia in missa sunt quædam silentio occulta.* Respondeo, hoc esse petere illud, quod est in principio. Nos enim non loquimur de eementitis Missæ sacris; sed loquimur de ijs, quæ Christus ad salutem & fidem nostram instituit. Quod verò ad Eucharistiam attinet, eius ritus, & substantia, & quæcunque ad eam pertinent, sufficienter ab Evangelistis, & à Paulo descripta sunt. Deinde Apostolus ait, 1. Cor. 2. *sapientia loquimur inter perfectos.* Præterea hoc modo hæretici argumentantur apud Tertull. de Præscript. Et apud Irenæum lib. 3. cap. 2. Ex his omnibus apparet, omnes traditiones esse reiiciendas, quæ pugnant cum Scriptura, eas verò retinendas, quæ non pugnant cum Scriptura, & sunt ad ædificationem utiles. Constat item Scripturam esse omnium Traditionum normam & regulam: denique omnia ad salutem necessaria, vel expressè contineri in Scriptura, vel iustis rationibus ex ea deduci posse. Ritus item omnes ex Scriptura examinandos, & ad ædificationem referendos esse. Vnde sequitur aduersarios principium petere, quoties aliquid probant per Traditionem,

tionem, quæ vel in Scriptura expressa non est, vel ex ea deduci non potest, vel denique cum Scriptura pugnat, & controuersum probare per cōtrouersum.

## CAPVT XII.

*Regula Bellarmini, quibus Traditiones dijudicari vult, examinantur.*

**S**Vperiore capite excussimus argumenta à re, quæ Bellarminus pro traditionibus attulit. Nunc examinabimus eius regulas, quibus omnes Traditiones dijudicari vult.

Prima Regula. Quando *vniversa Ecclesia aliquid amplectitur, tanquam dogma fidei, quod non reperitur in Scripturis diuinis, hoc est ex Apostolorum Traditione.* Hanc Regulam probat, quia Ecclesia non potest errare. Hoc iam refutauim⁹ antè, & prolixius suo loco refutabimus. Quantum verò ad præsentem locum attinet, dicimus eum petere principium. Deinde exempla non quadrant. Primum exemplum est, *Perpetua Virginitas Mariæ Matris Domini.* Sed hoc non semper tenuit vniversa Ecclesia. Basil. Homil. de Natiuitat. Domini. Deinde implicat contradictionem. Dicit enim, *nihil esse de fide, nisi quod Deus per Prophetas, & Apostolos reuelauit, vel quod euidenter inde deducitur.* Sed hoc Deus neque per Prophetas, neque per Apostolos reuelauit, neque euidenter ex eorum scriptis deduci potest, neque primitiua Ecclesia ita iudicauit. Alterum exemplum est *Canon Scriptura.* De eo etſi ſufficienter diſſerui-  
mus primo libro, tamen quædã iteranda ſunt. Dicit enim Canonem, quem ſequitur Synagoga Romana,  
eſſe

esse receptū ab vniuersa Ecclesia, & ob eam causam  
 esse Apostolicū. Verū Ecclesia, quæ Apostolos se-  
 quuta est, non tenuit istū Canonem. Ioseph. n. lib. 1.  
 cont. Appion. longè aliter numerat. Idē facit Euseb.  
 lib. 3. Cap. 8. Et Melito apud Euseb. lib. 4. cap. 26.  
 Sed neq; Origenes numerat eum Canonem, Euseb.  
 lib. 6. cap. 18. Neque Cyprianus in Symbolo: Neq;  
 Athanasius in Synopsi: neque Nazianzenus in Car-  
 minibus de genuinis sac. Scripturæ libris: neque Hi-  
 larius in præfat. in Psalm. neq; Hieronymus in Pro-  
 logo Galeato: neque Concilium Laodiceum C. 59.  
 Vnde necessariò sequitur, aut Romanam Ecclesiam  
 non esse veram Ecclesiam, aut antiquam istam Ec-  
 clesiam non fuisse veram Ecclesiam. Nam si Ecclesia  
 non potest errare, & ille errat, qui Traditiones Apo-  
 stolicas, quæ sunt fidei dogmata, vel negligit, vel  
 corrumpit, necesse est, vel Romanenses non esse ve-  
 ram Ecclesiam, vel primitiuam Ecclesiam, in qua  
 Melito, Origines, Cyprianus, Athanasius, Nazian-  
 zenus, Hieronymus, & Patres Laodicensi vixerunt,  
 non esse veram Ecclesiam. Eligat Bellarminus,  
 quod volet.

Secunda Regula est. *Quando vniuersa Ecclesia alia-  
 quid seruat, quod nemo constituere potuit, nisi Deus.* Pro-  
 bat eandem regulam, eodem modo, vt priorē. Eius  
 exemplum ponit *pedobaptismum, & baptismum hereti-  
 corum* esse ratum. Sed hæc exempla non quadrant.  
 Bellarminus enim loquitur de ijs Traditionib. quæ  
 prorsus non scriptæ sunt. Hæ verò scriptæ sunt,  
 non quidē explicitè, Sed ita, vt vtraq; ex Dei verbo  
 necessariò deduci possit, quemadmodum antè pro-

bauimus. Quod autem dicit *Ecclesiam non posse baptismo auctoritatem dare, nisi eam à Christo habeat*, Hoc verum est. Et inde inferimus Matrimonium, & reliqua ementita sacramenta non habere auctoritatem ab Ecclesia Romana, quia eam à Christo non habent.

Tertia regula est. *Id quod in vniuersa Ecclesia, & omnibus retro temporibus obseruatum est, merito ab Apostolis creditur institutum.* Huius exemplum ponit. *Quadragesimam.* Respondeo nullum dogma inter papistas & nos controuersum esse, in quo vniuersa Ecclesia omnibus retro temporibus diuersum à nobis sensit. Quod ad Quadragesimam attinet, constitueram hoc loco nihil de ea loqui, ne ordinem disputationis turbarem. Cogor tamen Bellarmino aliquid respondere: Dico igitur, vel Quadragesimam papisticam non esse Traditionem Apostolorum, & Ecclesiam papisticam non esse veram Ecclesiam; vel primitiuam Ecclesiam non esse veram Ecclesiam, & Quadragesimam Ecclesie Primitiue non esse Traditionem Apostolorum. Ratio est manifesta. Primitiua enim Ecclesia non habuit talem Quadragesimam, qualem habet Synagoga papistica. Hoc demonstrauimus antè. Si igitur non est vera Traditio Apostolica, quam tenet vniuersa Ecclesia? tum Quadragesima papistica non est Traditio Apostolica. Nam eam non tenuit tota primitiua Ecclesia. Aut si illa non est vera Ecclesia, quæ non habet Traditiones Apostolicas: tum vel primitiua Ecclesia non est vera Ecclesia, vel Synagoga Romana non est vera Ecclesia. Nam quam Quadragesimam Papistæ habent, eam non habent omnes petores; & quam veteres habue-

habuerunt, ea non est ipsa, quam habent papistæ. Deinde tres hæ regulæ non sunt veræ. Potest enim tota visibilis Ecclesia errare, & moribus & doctrina, quemadmodum suo tempore probabimus. Alterum exemplum est *cultus imaginum*, quem constituit Synodus Ephesina secunda. Respondemus eam Synodum impiam esse; ac proinde nos eius auctoritate non teneri.

Quarta Regula. *Quod omnes patres vel in unum locum congregati, vel in diuersis locis de eadem re scribentes unanimiter dicunt ab Apostolis constitutum esse, hoc est ab Apostolis traditum.* Sed nullum dogma inter nos & papistas controuersum est, de quo omnes Patres cum papistis idem dicunt. Deinde omnes patres nunquam fuerunt in generali concilio congregati. Postremò dicimus generale Cōcilium posse errare, & sæpè errasse, quemadmodū suo loco ostendemus.

Quinta regula. *Quod tenet ista Ecclesia, in qua est continua successio ab Apostolis, hoc est verum.* Hoc scilicet est illud, de quo contendimus: Nempe quicquid tenet Romana Ecclesia, hoc est ab Apostolis traditum. Verum Bellarmine, Si puer in scholis tecum disputans diceret, Domine presbyter ego tecum disputabo, modò concedas omnia vera esse, quæ ego dico, an non diceres ridiculum esse. Iudica igitur, quid de vobis sentiat totus mundus. Nos accusamus Romanam Synagogam multarum hæreseum, & hoc probatum fuit in disputatione Lipsica, Posfiacena, Oxoniensi, & alijs innumerabilibus, Vos ponitis pro principio, *verum esse, quicquid tenet Romana Ecclesia.* Si gustasti vnquam principia dialecti-

ces, responde, nūmne hoc sit, quod pueri in scholis discunt, petere illud, quod est in principio. Hoc de tuis regulis. Nos verò nullam ex omnibus ijs agnoscimus. Ergo vt vestræ Traditiones sunt cōtrouersę: ita etiam hæ regulæ sunt controuersæ. Si autem libet, recipe vnā regulam diuinā pro quinque tuis lesbijs. Nos dicimus *unicam & solam Sacram Scripturam esse regulam & normam omnium papisticarum traditionum*. Ac proinde quatenus cum hac regula congruunt, sunt bonæ, quatenus verò ab hac regula discrepant, sunt malæ. Atque hæc de his regulis.

## CAPVT XIII.

*Verbum Dei continere perfectam doctrinam salutis probatur ex Dei verbo.*

**S**Vperioribus capitibus. refutauimus argumenta, quibus Bellarminus probare conatus est, verbum Dei scriptum non continere perfectam doctrinam salutis. Sequitur vt nunc nostram sententiam & explicemus, & probemus. Nos verò dicimus omnē doctrinā fidei, & quicquid ad salutem necessarium est, contineri in verbo Dei scripto. Argumenta quibus hoc probamus, sunt hæc. Primum, Quia non debemus ad verbum scriptum quicquam addere, nec ab eo quicquam detrahere. Argumentum tale, Ad quod nihil debemus addere, & de quo nihil debemus detrahere, hoc est perfectū, & omnibus numeris absolutum. Sed ad verbum Dei scriptū nihil debemus addere, nec ab eo quicquā detrahere. Ergo verbum Dei scriptum est perfectū, & omnibus suis numeris absolutum.

Perfe-

Perfectio verbi Dei in eo cōsistit, quodd continet integram doctrinam salutis. Verbum enim Dei est doctrina salutis. Ioh. 20, 31. Rom. 1, 16. Si igitur perfectum est, continet perfectam doctrinam salutis. Si verò non continet perfectam doctrinam salutis, non est perfectum. Bellarminus concessa Maiore negat Minorem. Nos probamus Minorem. Deut. 4, 2. *Non addetis ad verbum quod ego precipio vobis, neque diminuetis quicquam ex eo*, Et 12, 32. *Quicquid ego precipio vobis, custodietis ut faciatis, non addetis ad illud, neque diminuetis ex eo*. Bellarminus respondet, primò, Mosē nō loqui de verbo scripto, sed de verbo viva voce tradito. Hoc verò esse perfectum, illud non item. Vīdendum igitur, num Mosēs agat de verbo scripto, an verò de verbo non scripto. Ac primum extra controuersiam pono, Mosē agere de eo verbo, quod à Dōmino audiuerat, & quod populus obseruare debebat, Exod. 24, 3. *Venit ergo Mosēs, & narrauit populo omnia verba Iehoua, omniaque iudicia: & respondit totus populus voce una, & dixerunt, omnia verba, quae locutus est Iehoua, faciemus*. Deut. 28, 1. *ut custodias omnia praecepta, quae tibi precipio hodie*. Deut. 27, 26. *Maledictus qui non statuerit verba legis istius, faciendo illa*. Deut. 12, 46. *Ponite cor vestrum ad omnia verba, quae ego testificor aduersum vos hodie, ut precipiatis ea filiis vestris, ut custodiant, & faciant omnia verba legis istius*. De hoc inquam verbo, cuius Mosēs his locis meminit, loqui Mosē, extra controuersiam pono. Quod nisi Bellarminus concesserit, erit aliquod Dei verbum, quod neque Deus Mosē praecepit, neque populus obseruare debuit. Vtrumque absurdum. Loquitur



igitur Moses de eo verbo, quod Deus præcepit, & populus obseruare debuit. Sed hoc est scriptum. Nam ubi ille dixit. Exod. 24, 3. *Venit ergo Moyses, & narravit populo omnia verba Iehoua, omniaq; iudicia: &c.* ibi paulò post in eod. cap. vers. 4. dicit, & *scripsit Moyses omnia verba Iehoua.* Deinde verbum illud, de quo Moses loquitur, est hoc, de quo scriptum est. Deut. 27. 26. *Maledictus qui non statuerit verba legis huius.* Sed hoc est scriptum. Paulus enim ad Galat. cap. 3. 10. hoc explicans, inquit. *Execrabilis quisquis nõ manserit in omnibus, quæ scripta sunt in libro legis.* Præterea de quo dicit Moses, Deut. 28, 1. *Ut custodias omnia præcepta, quæ ego tibi præcipio hodie,* hoc est verbum id, de quo loquimur, sed illud est scriptum. Dicit enim eodem cap. vers. 58. *Nisi custodieris ut facias omnia verba legis istius, quæ scripta sunt in libro isto.* Vnde necessario sequitur, Mosen loqui de verbo scripto. Quin Deus hoc disertè docet apud Ios. cap. 1. vers. 8. *Non recedat liber iste ab ore tuo, sed mediteris in eo diè ac nocte, ut custodias, & facias secundum omne, quod scriptum est in eo.* Idem docet Iosue cap. 23, 6. *Ut custodiat, & faciat quicquid scriptum est in libro legis Moyses, ut non recedatis ab eo, neque ad dextram, neque ad sinistram.* Concludo igitur, Mosen loqui de verbo scripto. Hac responsione Bellarminus deiectus queritaliam; nempe Deum non mandare, ut nihil aliud seruemus, quàm id, quod ille nobis præcepit, sed ut in eo, quod præcepit, nihil mutemus, vel addendo vel minuendo. Sed hoc est simpliciter falsum: disertè enim dicit, *Quod præcipio tibi, hoc tantum facito, nec addas quicquid, neque minuas.* Deut. 12, 32. Vox enim exclusiua, in primo

primo membro, & vox generalis in secundo membro, omnē istam Bellarmini glossam tollit. Deinde illa Glossa licet falsa sit: tamen Bellarminum non iuvat. Traditiones enim, de quibus cum papistis contendimus, mutarunt ea, quæ Deus præcepit, imò planè ex diametro cum Dei verbo pugnant, ut suo loco ostendemus. Postremò si Deus præcepit, ut in eo, quod nobis mandauit, nihil mutemus, addendo vel minuendo; tum verbum scriptum est Lydius lapis, & regula omnium istarum rerum, quæ præter verbum Dei obseruantur. Ac proinde quatenus Traditiones congruunt ad istam regulam, sunt tollerandæ, quatenus verò non congruunt, sunt abijciendæ. Sed hoc vult Bellarminus. Ergo pugnat cum sua glossa. Et si hæ responsiones veræ sunt: tamen libuit Bellarmino suam sententiam aliquo argumēto probare, quod excutiemus. Dicit, *Licere aliquid ad verbum scriptum addere. Quia Prophetæ & Apostoli addiderunt.*

Quod enim Prophetæ & Apostoli ex officio sibi mandato fecerunt, hoc est & papæ licitum. Sed Prophetæ & Apostoli ex officio sibi mandato addiderunt aliquid ad scripta Moïsis. Ergo addere aliquid ad verbū scriptū est papæ licitū.

Nos negamus Maiorem, Nam non quicquid licuit Prophetis & Apostolis, hoc licet papæ. Illi enim fuerunt ex Deo, papa non est ex Deo. Illi fuerunt à Deo immediatè vocati, papa verò neq; mediatè, neq; immediatè vocatus est, ut suo loco ostendemus. Denique Prophetæ & Apostoli habuerunt Testimonium, quod non possint errare in doctrina,

Papa verò hoc Testimonium non habet. Imò vt illi veritatem propagauerunt, ita papa veritatem oppugnat, vt suo loco demonstrabimus. Dicimus igitur maiorem esse fallam. Deinde & Minor non est simpliciter vera. Est enim ambigua. Addere enim significat, aliquid apponere, quod prius prorsus nō erat; deinde addere significat, id quod prius erat, clariùs explicare, vel ad id, quod prius erat, clariorem explicationē adiungere. Thom. par. 3. quæst. 60. Art. 8. Arg. 1. Hęc ita nota sunt, vt p̄batione non sit opus. Si de priore significatione agit Bellarminus, tum Minor est simpliciter falsa. Doctrina enim, quam prophetæ tradiderunt, illa non est alia doctrina, quàm illa, quam Moses tradidit. Sed prorsus eadem. Esaias enim 8. 20. *Ad Legem & Testimoniū.* Si Esaias omnia vult ad legem examinari, neque quicquam in doctrina fidei recipi, quàm illud, quod scriptū erat in lege: tum sequitur à prophetis non aliud in doctrina fidei tradi, quàm Moses ante tradiderat. Deinde Iosias cultum Dei restituit ad exemplum in lege præscriptum, 2. Reg. 23, 3. Et Esdras Neh. 8, 1. Hinc apparet prophetas non tradidisse aliam doctrinam, quàm quæ est in Mose. Sed ne Apostoli quidē aliam doctrinam tradiderūt, quàm quæ in V. T. erat, Paulus enim apud Luc. Act. 26, 22. protestatur se nihil docuisse *extra ea, quæ sunt in Mose & Prophetis.* Et hoc per enumerationem omnium articulorū Symboli Apostolici demonstrari potest. Nam omnes articuli fidei in Mose comprehenduntur, & omnis doctrina Apostolorum continetur Symbolo Apostolico. Ergo omnis doctrina Apostolorum etiam in specie

specie continetur in Mose. Deinde Christus & Apostoli semper ex Mose, & Prophetis suam doctrinam probarunt, Luc. 24, 27. *Et incipiens à Mose & ab omnibus Prophetis interpretabatur illis in omnibus Scripturis, quæ de se scriptæ erant, Act. 28, 23. Suadens eis, quæ de Christo sunt, ex Mose & Prophetis à mane ad vespæram.* Præterea, Apostolos non docuisse aliam doctrinam, quàm eam, quam Moses & Prophetæ antè tradiderant, constat ex Act. 17. 11. Beroënses enim scrutabantur scripturam, & Pauli conciones ad scripturam examinabant, & quoniam eas cum scriptura congruere videbant, idè recipiebant. Vnde manifestè sequitur Apostolorum, & Prophetarum doctrinam non diuersam esse, sed eandem. Postremò idem iudicauit primitiua Ecclesia. Iust. in Quæst. *Quid est lex? est Euangelium prænunciatū. Quid est, Euangelium? Est lex impleta.* Eodem modo Irenæus lib. 4. cap. 66. *Legite diligentius Euangelium ab Apostolis nobis datum, & legite diligentius Prophetas; & inuenietis uniuersam actionem, & omnem doctrinam, & omnem passionem Domini prædictam in ipsis.* Hieronymus in epist. ad Damasum. *Quicquid in V. T. legitur, hoc idem in Euangelio reperimus, & quod in Euangelio fuerit lectitatum, hoc ex V. T. auctoritate deducitur.* Vnde sequitur non aliam doctrinam positam esse in N. T. quàm quæ in V. T. erat. Si igitur addere intelligitur in prima significatione, falsa est minor. Si verò addere intelligitur in secunda significatione, tunc pugnat sine aduersario. Fatemur enim N. T. esse explicationem V. T. Nomen enim Testamentum nihil aliud est, quàm impletio & explicatio V. T. Ab hoc item responsione

deiectus Bellarminus, excogitat tertiam & dicit *Vetus Testamentum explicari per Nouum, & N. Testamentum potentia esse in veteri, vel in vniuersali, & eodē modo Traditiones esse in Nouo Testamento*. Sed quod dicit falsum est. Vetus enim Testamentum non tantum potentia continet nouum, neque tantum in vniuersali; sed etiam actu, & in singulari. Nullus enim est articulus fidei in N. Testamento, qui non expressus sit in V. Testamento. Hoc per inductionē omnium articulorum posset ostendi. Et Christus atque Apostoli hoc suo exemplo comprobarunt. Nullum enim ferē caput est in quatuor Euangelijs, vbi non scriptum est, *hoc factum est, vt impleretur, quod scriptum erat*. Irenæus lib. 4. cap. 66. *Legite diligentius Prophetas, & inuenietis vniuersam actionem, & omnem doctrinam, & omnem passionem Domini nostri predicatam in ipsis*. Deinde Traditiones papisticæ non explicant N. Testamentum, sed illud obscurāt, imō illud, vt ar phrasi Christi, *irritum faciunt*. Nam ex diametro pugnant cum verbo Dei, vt suo loco ostendemus. Præterea si Traditiones papisticæ sunt explicationes N. Testamenti, vt vult Bellarminus, tum illorum regula & norma est N. Testamentum. Omnis enim textus est suæ glossæ regula, & quatenus cum eo glossa congruit, est bona, quatenus cum eo non congruit, est mala. Eodem modo, quatenus Traditiones cum N. Testamento congruunt, sunt bonæ, quatenus ab eo discrepant, sunt malæ. Sed hoc non vult Bellarminus. Implicat se igitur contradictione. Hæc etsi vera sunt: tamen libuit Bellarmino suam sententiam tribus argumentis probare, quæ nobis examinanda sunt.

sunt. Primum argumentum, *Quia quemadmodum arbor est in semine, ita traditiones sunt in N. Testamento.* Sed hoc argumentum iudicamus indignum esse responsione. Secundum Argumentum, *Quia prohibitio sanguinis & suffocati non est, in V. Testamento. Nusquam enim in V. Testamento scriptum est, non licere Testamenti noui tempore edere sanguinem & suffocatum.* At hoc diserte scriptum est, Act. 15. Sed quod dicit, est falsum. Scandalum enim in Veteri T. prohibitum est. Num. 31. 16. Prouerb. 28, 10. At infirmi Iudæi per esum suffocati offendeabantur. Ergo hoc fuit vetitum. Et vt hoc commodiùs intelligatur, in isto præcepto fuerunt duo, vnum morale, alterum circumstantiale. Illud fuit vetitum, & adhuc est vetitum, & est immutabile. Hoc verò non est vetitum, & pro ratione temporum, locorum & personarum mutatur. Infirmitas igitur offendere simpliciter, fuit vetitum. Hoc verò per esum suffocati facere, non est vetitum. Verùm cum se talis daret occasio, vt aliquis per esum suffocati offenderetur, tum illud etiam erat vetitum. Vbi verò talis occasio non ampliùs metuenda erat, tum desinebat esse vetitum. Tertium argumentum, *Quia Sacramenta N. Testamenti nusquam sunt in V. Testamento mandata.* Est igitur aliqua doctrina fidei Noui Test. quæ non fuit in V. Testam. Sed Antecedens falsum est. Paulus enim in 1. ad Cor. cap. 10, 2. dicit *omnes in Moysen baptizatos esse nube & mari, & omnes eandem escam Spiritualem edisse, & omnes eundem potum Spiritualem bibisse.* Vnde apparet Baptismum & Sac. Cœnam etiam fuisse in V. T. Quod autem reliqua papistica Sacramenta quinque  
non

non sunt in V. Testamento, inde non sequitur aliam esse doctrinam fidei in N. Testamento, atque in Veteri; Sed ista Sacramenta falsa esse, & à Christo minime instituta rectè sequitur. Hinc igitur apparet Veteris & N. Testamenti eandem doctrinam esse. Quia igitur ad vetus nihil addi licuit, manifestum est, & ad nouum aliquid addi, illicitum esse.

Secundum argumentum, Quia non debemus quicquam euangelizare præter id, quod ab Apostolis euangelizatum est.

Illa doctrina, præter quam aliud nihil debemus docere, perfectam habet salutis doctrinam. Sed Euangelium scriptum est illud, præter quod aliud nihil debemus docere. Ergo Euangelium scriptum habet perfectam salutis doctrinam.

Doctrinæ Euangelicæ perfectio est, ut antè dixi, continere doctrinam salutis. Aduersarius concessa Maiore, negat Minorem. Ac primùm respondet ad subiectum Minoris, & dicit *hoc non de Euangelio scripto, sed de Euangelio tradito accipiendum esse*. Videndum igitur, de quo Euangelio loquatur Paulus, an de Tradito, an verò de scripto. Bellarminus dicit eum loqui de Euangelio non scripto, sed tradito, quia, inquit, *quod euangelizauius vobis; non autem quod scripsimus vobis*. Argumentum tale,

Quod euangelizatum est, hoc habet perfectam doctrinam salutis. Sed quod scriptum est, hoc non habet perfectam doctrinam salutis. Ergo quod scriptum est, hoc non est illud, quod euangelizatum est.

Hor-



Horresco referens hoc argumentum. Quid responderemus Machometanis, quando audient, nos habere aliud Euangelium, quàm illud, quod scriptum est? Quod si veteres hæretici reuiuiscerent, qui idem affirmant, an non in manibus haberent victoriam contra orthodoxos? Verum mihi hoc tempore disputare, non queritari propositum est. Negamus igitur Minorem, & dicimus Euangelium à Paulo euangelizatum esse scriptum. Prima ratio. Quia ipsi Apostoli affirmant se omnia illa scribere, quæ Iesus docuit & fecit. Luc. 1, 3. *Visum est etiam mihi omnia scribere, ut agnoscas earum rerum veritatem, quas auditione accepisti, 1. Ioh. 1. 3. Quod vidimus, & audimus, hoc annunciamus vobis, & hæc scribimus vobis.* Argumentum tale,

Dicta & facta Christi sunt scripta. Sed quæ Apostoli euangelizarunt, ea sunt dicta & facta Christi. Ergo quod Apostoli euangelizarunt, hoc est scriptum.

Maior est manifesta ex locis suprâ notatis. Minor potest probari ex omnibus concionibus Apostolorum. At dicet Bellarminus, *non omnia dicta & facta Christi esse scripta*: Hoc non negamus. Sed responderemus ea scripta esse, quæ ad salutem sufficiunt, Ioh. 20. 31. August. in Iohan. Tractat. 49. *Dominus Christus multa dixit & fecit, quæ scripta non sunt, electa autem sunt, quæ saluti credentium sufficere videbantur.* Ac proinde scriptum Euangelium continet omnia, quæ ad salutem necessaria sunt. Secunda ratio, Quia Apostoli idem scripserunt, quod prædicarunt. Phil. 3, 1. *Eadem scribere vobis me quidem haud piget: vobis autem tutum est.*

est. 1. Ioh. 1. 4. *Et hac scribimus vobis.* 2. Pet. 1, 12. *Non negligam vos de istis semper commonefacere.* Vnde euidenter colligo, Apostolos eandem doctrinam prædicasse, & scripsisse. Sed prædicarunt Euangelium Christi. Ergo & scripserunt Euangelium Christi. Tertia ratio, *Quia Apostoli nihil predicarunt, nisi quod in V. Testamento scriptum erat.* Rom. 1, 1. *Separatus ad Euangelium Dei, quod antè promiserat per prophetas suos.* Vnde apparet Euangelium iam ante à prophetis prænunciatum fuisse. Et ne quis hoc de prophetijs non scriptis accipiat; addit Paulus in *Scripturis Sanctis.* Deinde Beroënses quotidie scrutabantur *Scripturas, an hac ita se haberent,* vt Paulus & Silas euangelizabant, Aët. 17, 11. Manifestum igitur, eos nihil annunciasse, nisi quod scriptum erat. Ob hanc causam Paulus asseuerat, *se nihil dicere extra ea, quæ sunt in Mose & Prophetis,* Aët. 26, 22. Rursus igitur euidenter colligo, illud quod Paulus euangelizabat, scriptum esse, imò nihil quicquam ab eo euangelizatum esse, nisi quod scriptum erat. Quarta ratio, Quia eodem modo iudicauit primitiua Ecclesia. August. cont. literas Pertilianilib. 3. cap. 6. *Si quis siue de Christo, siue de eius Ecclesia, siue de quacunque alia re, quæ pertinet ad fidem, vitamq; nostram, non dicam, si nos, sed quod Paulus adiecit, Si angelus è celo vobis euangelizauerit, præterquam quod in scripturis legalibus & euangelicis (nota, in scripturis) accepistis, anathema sit.* Basiliius in Moralib. Summa 72. C. 1. *Quòd oportet auditores eruditos in scriptura probare ea, quæ à doctores proponuntur, & quæ quidem consona sunt scripturis suscipere, quæ verò aliena reicere, & eos, qui in talibus doctrinis persequerant,*

seuerant, vehementius auersari. Tertull. de præscript. C. 5. Nobis uero nihil ex nostro arbitrio inducere licet, sed nec eligere, quod aliquis de arbitrio suo induxerit, Apostolos Domini habemus auctores, qui nec ipsi quicquam ex suo arbitrio, quod inducerent, elegerunt; sed acceptam à Christo doctrinam fideliter nationibus assignauerunt. Itaque etsi Angelus è cælo nobis aliter euangelizaret, anathema diceretur à nobis. Cōcludimus igitur, Apostolū loqui de Euangelio scripto. Sed instat Bellarminus, & dicit Augustinum & Basiliū non dicere, hic agi de Euangelio scripto. Primum, Quia non ex professo tractant hunc textum. Sed hoc nihil facit ad rem. Siue enim ex professo hunc textum tractent, siue non tractent eum ex professo, perinde est. Deinde dicit Basiliū & Augustinum non uelle, nihil addendum esse præter illud, quod scriptum est, sed tantum uelle, nihil contrarium illi, quod scriptum est, addendum esse. Sed hoc est nugari. Augustinus enim dicit, in nulla re, siue Christum, siue Ecclesiam, siue fidē, siue uitam spectes, in nulla inquam re quicquam euangelizandum esse præter id, quod scriptum est. An hoc non satis clarum est? At omnes papisticæ Traditiones, de quibus contendimus, sunt præter id, quod scriptum est. Ergo Anathemati obnoxie. Basilius uero dicit, doctos auditores tantum debere ea recipere, quæ scripturis consona sunt, reliqua ut ἁλλότριον reijcere. Sed omnes papisticæ Traditiones, de quibus contendimus, non sunt scripturis consonæ, ergo ut ἁλλότριαι, reijciendæ. Deinde quod dicunt, falsum est. Augustinus enim non dicit, Contra id, sed præter id. Et si concederemus, tantum illud, quod contrarium est, recipiendū non esse

esse: hoc tamen non iuuaret causam Bellarmini. Omnes enim papisticæ Traditiones, de quib. contendimus, sunt Euangelio scripto contrariæ, vt suo loco ostendemus. Deinde quicquid traditur præter Dei verbum, tanquam necessarium ad salutem, hoc est contra Dei verbum. Doctrina enim salutis non est multiplex; sed vnica tantum. At illa est integrè & perfectè scripta in sac. litteris. Quicquid igitur præterid, quod in sac. literis est, traditur, tanquam necessarium ad salutem, hoc est contra illam doctrinam salutis. Quod verò dicit Traditiones etiam ex hoc loco, tanquam ab Apostolis euangelizatas necessarias esse: Respondemus nos omnes istas Traditiones, quas Apostoli euangelizarunt, recipere. Sed hoc nihil iuuat papisticas Traditiones, nam illas non euangelizarunt Apostoli. Vt verò eas, quas Apostoli euangelizarunt, ab ijs, quas Monachi in suis speluncis coaxarunt, possimus distinguere, obseruabimus regulam Basilij. Quæ sunt *consona sac. litteris*; ea recipimus, quæ verò non sunt consona sac. litteris, illa sunt *ἑτερογενή*, & à nobis reijciuntur. Ab hac igitur responsione deiectus Bellarminus, excogitauit aliã; & dicit *κατὰ* non significare hoc loco *præter*, sed *cōtrà*. Proinde non quicquid est præter verbum scriptum, sed quicquid contra verbum scriptum est, reijciendum esse; & ob eam causam licere alia dogmata cudere, neque referre, an sint præter doctrinam scriptam, sed tantum attendendum esse, an sint contra Dei verbum. Sed hîc Bellarminus se implicat contradictione. Hoc enim eodem libro, cap. 9. regula prima dicit; *nihil esse de fide, nisi quod Deus per Apostolos*

aut Prophetas reuelauit, aut quod euidenter inde deducitur. Non enim nouis reuelationibus nunc regitur Ecclesia, sed in ijs permanet, quæ tradiderunt illi, qui ministri fuerunt sermonis. Et propterea dicitur Ephesi. 2. edificata super fundamentum Prophetarum & Apostolorum. At nunc dicit, non prohiberi noua dogmata & præcepta. Deinde illud totum, quod post Apostolos excogitatum est, vel est ex arbitrio sacrarum scripturarum, per quas nobis Spir. s. loquitur, vel non est. Si est de arbitrio sac. Scripturarum, tum non est præter Scripturam, ac propterea recipiendum. Si non est ex arbitrio Sacrarum Scripturarum, tum est præter scripturam, & ex arbitrio nostro, ac proinde eadem facilitate reiiciendum, qua admittitur. Hæc etsi vera sunt, & meritò in controuersiam deduci non debent: libuit tamen Bellarmino suam sententiam aliquot argutijs confirmare, quas ordine expendemus. Prima; *Quia Apostolus post hanc epistolam multa alia scripsit, & Iohannes suum Euangelium, & Reuelationem scripsit post hanc Epistolam.* Sed respondeo, eos nullam aliam fidei & salutis doctrinam scripsisse, quàm quæ iam antè scripta erat. Proinde quod ad salutis & fidei doctrinam attinet, non scripserunt alia, sed eadē, hoc probatū est antè. Secunda. *Quia agit contra eos, qui legalia seruanda esse asseriebant. At illa non sunt præter, sed contra scripturam.* Respondeo, sunt præter & contra simul. Tertia, *Quia eadem vox apud Paulum ad Rom. 16, 17. vertitur per contra.* Sed hoc nihil probat. Non enim sequitur, hæc vox isthic sonat contra. Ergo & hoc loco. Potest enim in diuersis locis diuersam habere significationem. Quarta:

quia patres explicant per contra. Sed hoc est falsum, ut ostendemus. Hieronymus enim legit *præter* & interpretatur *præter*. Idem facit Ambrosius. Theophylactus dicit non *contrarium*, sed *præter*.

Tertium Argumentum. Quia ex verbo scripto possumus vitam æternam habere.

Per quod possumus vitam æternam habere, illud continet perfectam doctrinam salutis. Sed per verbum scriptum possumus vitam æternam habere. Ergo continet perfectam doctrinam salutis.

Bellarminus concessa Maiore, negat Minorem. Nos probamus eam ex Iohan. cap. 20. 30. *Multa igitur etiam alia signa edidit Iesus in discipulorum suorum conspectu, quæ non sunt scripta in hoc libro. Hæc autem scripta sunt, ut credatis Iesum esse Christum, & ut credentes vitam habeatis per nomen eius.* Cum igitur ea, quæ scripta sunt, possint in nobis fidem gignere, & quidem eam fidem, quam vita æterna sequitur: necessario sequitur, verbo scripto ea comprehensa esse, quæ ad vitam æternam assequendam sufficiunt. Bellarminus respondet, *Iohannem non loqui de doctrina, sed de solis miraculis.* Videndum igitur, an Iohannes loquatur de solis miraculis. Bellarminus ait, nos negamus. Et ratio est. Quia Iohannes dicit ea scripta esse, quæ ad fidem salutiferam gignendam sufficiunt. Sola autem miracula non sufficiunt, ad fidem salutiferam gignendam. Ergo non loquitur de solis miraculis. Minor est vera. Maiorem probo. Dicit enim; *Hæc scripta sunt, ut credatis, & ut credentes vitam æternam habeatis.* August. Tractat. 49. in Iohan. ea electa sunt

*sunt ut scriberentur, quæ salutis scribentium sufficere videbantur.* Cyrill. in Iohan. lib. 12. cap. 68. dicit ea scripta esse, quæ ad mores & dogmata sufficiunt, ut recta fide, operibus, ac virtute utilantes, ad regnum cælorum perveniamus. Dum igitur Chemnitium hæc docentem ineptum vocat, non Chemnitium, sed Iohannē, Cyrillum & Augustinū ineptos vocat. Quod enim dicit Chemnitius, hoc illis auctoribus dicit. Deinde loquitur Euāgelista de fine totius Euangelij, nempe de vita æterna. Ergo non de solis miraculis. Nam vita æterna non est finis solorum miraculorum.

Illa scripta à se esse dicit Iohannes, quorum finis est vita æterna. Sed vita æterna non est finis solorum miraculorum. Ergo non dicit sola miracula à se scripta esse.

Minor est certa. Maiorem probo. Iohan. 20, 30. *Hæc scripta sunt, ut credatis, & credentes habeatis vitam æternam.* Cyrill. in Iohan. lib. 12. cap. 61. *Quasi repetendo intentionem Euangelij manifestat, ut enim credatis, & credentes habeatis vitam æternam, hæc mihi edita sunt.* August. in Iohan. Tractat. 122. *Hoc capitulum veluti libri huius indicat finem.* Cùm igitur sola miracula fidem gignere non possint, & vita æterna non sit finis solorum miraculorū, manifestum est Iohannem non agere de solis miraculis. Hoc cùm videret Belarminus, excogitavit aliam responsionem, & dixit, Iohannem loqui tantum de rebus à se scriptis; Illas autem non continere perfectam doctrinam salutis, vel reliquos libros esse supernacuos. Videndum igitur primum, num Iohannes agat de suo libro tantum, deinde de consequentia. Ad primum quod attinet, dico me hic ni-



hil definire velle: dicere tamen credibilius esse, vt hoc de toto scripturæ corpore intelligatur, & ita explicat Cyrillus in Iohan. lib. 12. cap. 68. *Non igitur omnia, quæ Dominus fecit, conscripta sunt, sed quæ scribentes tam ad mores, quàm ad dogmata putarunt sufficere.* Si de solo Iohanne intelligeret, non diceret, *scribentes.* Sed vt vt sit, loquitur Iohannes de eo scripto, quod ad fidem & vitam æternâ sufficit. Siue igitur loquatur de suo libro tantum, siue de toto corpore, statuat Bellarminus. Neutra enim sententia videtur esse impia. Tota enim scriptura continet perfectam doctrinam salutis, & Euangelium Iohannis continet perfectam doctrinam salutis. Si enim aliquis, vel ita viueret, vel ita crederet, vt Iohannes docet, saluus fieret. Hoc de antecedente, nunc ad consequentiam. Eam verò proflus negamus. Nam non sequitur: Euangelium Iohannis continet perfectam doctrinam salutis. Ergo reliqui libri sunt superuacui. Nam libri Mosis continent perfectam doctrinam salutis; neq; tamen prophetarum libri sunt superuacui. Item, Vetus Testamentum cōtinēt perfectam doctrinam salutis; Num propterea Nouum Testamentum superuacuum erit? Imò Bellarmine Moses continet perfectam salutis doctrinam, & Vetus Testamentū continet perfectam doctrinam salutis, sed non æquè perspicuè. In prophetis enim fuerunt multa illustrata, quæ in Mose fuerunt obscuriora. Ita Vetus Testamentum continet perfectam doctrinam salutis, & nouum & vetus simul continet perfectam doctrinam salutis, sed non æquè perspicuè. Quædam enim in N.T. sunt illustriora, quàm in Veteri Testamento

mento antè fuerunt. Planè eodem modo dicere possemus, Euangelium Iohannis continet perfectā doctrinam salutis, & tota Biblia continent perfectam doctrinam salutis; Sed non æquè luculenter. Quædam enim in alijs libris fusiùs explicata sunt, quàm in Iohanne. Veruntamen vt in antecedente nihil volui definire, ita tamen immodestè facit Bellarminus, quòd Chemnitium mendacij insimulat, cùm tamen nihil aliud dicat, quàm Cyrillus ante eum dixerat. Hæc de Antecedente. Nunc ad consequens. Bellarminus dicit istis verbis, *vt credatis, & credentes habeatis vitam æternam, non significari, illa signa sufficere ad vitam æternam, sed illa ad hoc referri, & ordinari, & esse vnum ex medijs requisitis ad salutem, etsi solùm non sufficiat.* Verùm iam antè ostendimus, illud Hæc de solis signis intelligi non debere. Quod verò dicit, per ea, quæ scripta sunt, non haberi salutem, sed tantùm eò referri, esse enim ex medijs requisitis ad salutem, etsi solum non sufficiat. Si hoc in genere de omnib. ijs, quæ scripta sunt, intelligit, est falsum. Iohannes n. dicit *hæc scripta esse, vt habeamus vitam æternam.* Aut igitur habemus vitam æternam per ea, quæ scripta sunt, aut errauit Iohannes, dum dicit hæc scripta esse, *vt vitam æternam habeamus.* Deinde sola ea, quæ scripta sunt, sunt medium ad vitam, & hoc his verbis expressum est, nempe credere Iesum esse Christum filium Dei. Hæc est illa salutis doctrina, credendo enim Iesum esse Christum salutem assequimur. Illud verò scriptum esse, manifestum est. Non igitur poterit negare, perfectam salutis doctrinam scriptam esse. Ad cùm per ea, quæ scripta sunt, ha-

beamus vitam æternam, statuimus sacra Scriptura plenam & perfectam salutis doctrinam comprehensam esse. Post hæc respondet ad dicta Augustini & Cyrilli, & dicit *eos loqui de solis dictis & factis Christi, hæc verò non sufficere ad salutem*. Quod miror Bellarmino excidere potuisse. Christus enim perfectus salutis doctor toto quadriennio docuit ea quæ pertinebant ad salutem, & salutis doctrinam ab eo perfectè doctam esse extra controuersiam pono. At dicta Christi sunt illa, quæ Christus docuit, & hæc scripta sunt. Quis igitur negabit perfectam salutis doctrinam scriptam esse? Argumentum tale, Ea quæ Christus dixit, comprehendunt perfectam salutis doctrinam. Sed ea quæ Christus dixit, sunt scripta. Ergo ea quæ scripta sunt, continent perfectam doctrinam salutis. Maiorem extra controuersiam pono. Minorem ex Augustino & Cyrillo asserit Bellarminus. Hoc etsi ita se habet: tamen contrà nititur Bellarminus, & dicit *sola dicta & facta Christi non sufficere ad salutem*. Nam alioqui omnes libri V. T. item acta Apostolorum, & Epistole Petri, Pauli, Iacobi & Indæ essent superuacua: Sed hoc non sequitur. Vtrumque n. consistere potest: nempe ea, quæ Christus dixit, ad salutem sufficere, & tamen reliquos libros esse necessarios. Dicta enim Christi, & ea, quæ ad Christi dicta pertinent, per eos libros explicantur. De Veteri T. hoc probō. Si Mose crederetis, & mihi crederetis. Nam Mose de me dixit. Et Luc. 24. cepit illis explicare, quæ de illo erant in Mose & Prophetis. De libris Noui Testamenti ita verum est, vt res probatione non egeat. Paulus enim ad Rom. 1. vers. 1. dicit se ad Euangelium Christi

*Christi separatum esse, & Actor. 28. suadebat Iesum esse Christum. Cùm igitur omnes V. & N. Testamenti libri Christum doceant, manifestum est, hanc Bellarmini argumentationem esse infirmam. Deinde Bellarminus se inuoluit. Dicit n. eos patres voluisse scripta esse sufficienter, non omnia absolute, sed omnia dicta & facta Christi. Verùm si vult eam esse mentem horum patrum, non omnia quæ ad salutem sufficiunt, esse scripta, sed omnia quæ scripta sunt, sufficienter scripta esse, tum errat. Dilertè enim dicunt ea scripta esse, quæ credentium salutem sufficiunt, item quæ ad mores & ad dogmata sufficiunt. Deinde se implicat. Illud n. sufficienter est ex eorū numero, quæ sunt ad aliquid. Quicquid enim sufficienter factum est, ad aliquid sufficienter factū est. Dicat nunc Bellarminus quidnam illud sit, ad quod dicta Christi sufficienter scripta sunt? Et si Augustinum interrogabit, videbit nihil aliud esse, quàm salutem credentium. Si Cyrillum interrogabit, videbit illud nihil aliud esse, quàm mores & dogmata. Si verò Iohannem interrogabit, respondet Iohannes, illud esse fidem, & vitam æternā. Concludo igitur, Quoniam dicta Christi sufficienter scripta sint, & illud sufficienter ad nihil aliud possit referri, quàm ad fidem & salutem. omnia quæ ad fidem & salutem faciunt, sufficienter scripta esse. Hoc cùm ita se habeat, vanum est, quod Bellarminus regerit, illa, quæ ad salutem necessaria sunt, esse quidem scripta, sed in vniuersali, quia Euangelium monet, ut in rebus dubijs Ecclesiam consulamus. Unde vult colligi, non omnia ad salutem necessaria expressa esse sac. litteris. Sed partim expressa esse sac. litteris, partim ex Ecclesia decretis*

*petenda esse*. Hoc n. implicat contradictionem. Nam si ex Ecclesię decretis petenda sunt, tum non sunt sufficienter scripta, Sed sunt sufficiēter scripta, etiam Bellarmino teste. Ergo ex Ecclesię decretis nō sunt petenda. Deinde ad illud, *Dic Ecclesia*, iam antè respondimus, & ostendimus illud neque ad Synagoga Romanam, neque illud, quod Ecclesię dicere debemus; ad Traditiones pertinere.

Quartum argumentum. Quia scriptura est utilis ad Doctrinam, ad Redargutionē, ad Correctionem, ad Institutionem, 2. Tim. 3, 16.

Quod est ita utile ad doctrinam, ad redargutionem, ad correctionem, ad institutionem, ut perficiat hominem Dei, & ad omne opus bonum sufficienter instituat, hoc continet sufficientem doctrinam salutis. Sed tota Scriptura est ita utilis, ad doctrinam, ad redargutionem, ad correctionem, ad Institutionem, ut perficiat hominem Dei, & ad omne opus bonum sufficienter instituat. Ergo tota scriptura continet perfectam doctrinam salutis.

Bellarminus primum concedit totum argumentum, addita hac ex explicatione, tota Scriptura continet perfectam doctrinam salutis, *partim quòd illa sit in Scriptura expressa, partim quòd Scriptura ostendat, unde debeat peti, nempe à Papa Romano, & eius Synagoga*. Sed hoc sæpè diximus esse principium petere. Deinde implicat contradictionem. Nam hæ duæ propositiones, Scriptura perficit hominē Dei, & sufficienter instruit ad quodlibet opus bonum, & Scriptura non perficit hominem Dei, neque sufficienter instruit

instruit hominem Dei ad quodlibet opus bonum, sed ablegat eum ad Papam Roman. & eius Synagogam, ut ab ijs perfectè instituatur, sunt contradictoria, & simul vera esse non possunt. Hoc cum Bellarminus videret, excogitauit aliam responsionem, & negat minorem 1. Quia Paulus dicit, *Omnis scriptura*. Hinc deducit nos ad absurdum, dicens, *Si omnis scriptura est ita utilis ad ista: tum etiā singuli libri ita ad illa utiles sunt*. Ex vniuersali enim affirmatiua rectè infertur particularis affirmatiua. *Sed singuli libri nō sunt ita ad ista utiles*. Ergo *neque omnis Scriptura*. Verūm Bellarmine, illud non contra nos affertur, sed cōtra Dei verbū: & melius fuisset Dei verbo acquiescere, quàm contra illud argutari. Deinde antecedens tuū falsum est. Nam *omnis* hīc significat *tota*. Versu enim præcedente loquitur de toto scripturæ corpore. *Sacras litteras nouisti à puero, quate possunt sapientem reddere ad salutem*. 2. Tim. 3, 15. Vnde hoc argumentum colligo.

Quod potest aliquem sapientem reddere ad salutem, hoc continet perfectam doctrinam salutis. Sed scripturæ possunt aliquem sapientem reddere ad salutem. Ergo scripturæ continent perfectam doctrinam salutis.

Maiorem nemo negabit, qui mentem habet, minor est in textu. Deinde talis est communis loquēdi consuetudo, Ephes. 4, 6. *Ex quo totum corpus congruenter coagmentatū*. Ad verbum *omne corpus*. Hīc etiam vetus interpres vertit *omne*. Similia loca passim occurrūt. Omnis igitur Scriptura posita pro tota Scriptura. Secundò respondet illud, *omnis Scriptura, de*

*tota Scriptura, intelligi non posse. Nam Apocalypsis Iohannis & Euangelium Iohannis tum nondum exstabant. Ac hoc non est respondere, sed effugium petere. Loquitur enim de eo corpore scripturę, quod tum exstabat, & hoc poterat hominem Dei perficere, & ad omne opus bonum instruere. Neque obest, quod Euangelium Iohannis, & Reuelatio eiusdem deinceps accesserunt. Nam isti libri non addiderunt aliam doctrinam, quàm prius tradita erat, Sed illam, quę prius tradita erat, magis explicuerunt. Ergo quod Scriptura antè facere potuit, hoc deinde luculentiùs facere potuit. Tertiò, probat hoc non de tota Scriptura intelligendum esse, quia quod Apostolus de tota dicit, quòd tota Scriptura possit hominem perficere, hoc paulò antè de parte, nempe de V. Testamento affirmavit. Sacra, inquit, litterę possunt te sapientem reddere ad salutem. Verùm Bellarmine, nihil fortius est ad Scripturę perfectionem probandam, quàm hoc ipsum. Nam quod potest hominem sapientem reddere ad salutem, hoc continet perfectam salutis doctrinam. Sed V. T. potest hominem sapientem reddere ad salutem. Ergo V. T. continet perfectam doctrinam salutis. Maior citra controuersiam vera est. Minor est in textu. Hinc verò deduco. Si vetus Testamentum continet perfectam doctrinam salutis; tum Vetus & N. simul continent perfectam doctrinam salutis. Sed primum. Ergo secundum. Posthęc addit Bellarmine rationem Chemnitij, quā ille probauit, hoc non de omni Scriptura, sed de tota intelligendum esse. Quia quęlibet Scriptura non est utilis ad doctrinam, ad redargutionē, ad correctionem, &*



nem, & ad institutionem. Hæc negat Bellarminus, & dicit *quemlibet librum ad hæc quatuor utilem esse*. Hoc probat; quia secunda Epistola Iohannis est breuissimū Scriptum in Canone, & tamen ad hæc quatuor utilis est. Sed illa sola & vnica epistola non est ita utilis, vt perficiat hominem Dei, & eum ad omne opus bonum sufficienter instruat. Malè igitur carpis Chemnitiū, & vt hoc commodiùs intelligatur. Quælibet scriptura est ita utilis ad ista quatuor, vt hominem Dei perficiat, aut non est. Si non est, tum iniuste mordes Chemnitium. Si est, tum contra conscientiam oppugnas doctrinam nostrā. Elige quod voles. Deinde, quod dicis, ridiculum est. Non enim quilibet liber Noui & V. Testamenti potest Scriptura dici; Sed & quodlibet dictum V. & Noui Testamenti potest Scriptura dici, Marc. 13, 28. *Et impleta est Scriptura, quæ dicit, Et cum sceleratis numeratus est.* Luc. 4, 21. *Hodie impleta est hæc Scriptura audientib. vobis.* Loquitur autem de dicto, Esa. 61, 1. Spiritus Domini super me, &c. Iohan. 17, 12. *Et nemo ex vris perijt, nisi filius perditionis, vt impleretur Scriptura,* Ioh. 19, 24. *vt scriptura impleretur, dicens, partiti sunt vestimenta mea sibi, & super vestem miserunt sortem.* Hinc manifestum est, etiam paruum dictum vocari scripturam. Quodlibet autem dictum ad hæc quatuor non ita utile est. Ergo Bellarminus potiùs debuisset hæc priùs magis expendere, quàm Chemnitium immeritò perstringere. Hæc ad subiectum. Nunc respondet Bellarminus ad prædicatum; & dicit, *illud utile est, nunquam significabit sufficiens est.* Ergo nullum utile est sufficiens. Quod miror.

Omne

Omne enim sufficiens est utile . Ergo saltem pueri agnoscunt, aliquod utile esse sufficiens, quicquid dicat Bellarminus . Deinde Apostolus non tantum dicit, Scripturam utilem esse, sed addit, eam etiam perficere, & ad omne opus bonum sufficienter instruere. Coniungit igitur cum utilitate sufficientiam . Nam quod ita utile est, ut simul perficiat & perfecte instruat. Hoc est sufficiens. Sed scriptura ita utilis est, ut simul perficiat, & perfecte instruat. Ergo Scriptura est sufficiens. Hoc cum Bellarminus solvere non posset, ridet, & dicit, *cibus ad nutriendum utilis est, & tamen solus ad nutriendum non sufficit.* Eodem modo Scriptura ad hæc utilis est. Et tamen sola ad hæc non sufficit. Verum Bellarminine scimus, non quicquid ad nutriendum utile est, hoc solum ad nutriendum sufficere . Sed quod ad nutriendum utile est, & simul hominem naturalem perficit, & perfecte instruit, hoc solum sufficit ad nutriendum, & hoc concedent omnes medici, & phylici. Ergo quod utile est ad doctrinam etc. & simul perficit hominem Dei, & perfecte instruit, hoc sufficienter instituit hominem Dei. Et ut hoc commodius intelligatur, Scripturæ perficiunt hominem Dei, & eum sufficienter instruunt ad omne opus bonum. Homo Dei dicitur propheta, & voluntatis Dei interpres. Hoc pono extra controversiam. Ergo Scripturæ perficiunt ministrum Ecclesiæ, & eum ad omne opus bonum sufficienter instruunt. Quod verò doctorem Ecclesiæ perficit, & ad omne opus bonum sufficienter instruit, hoc continet omnia ista, quæ sunt ad salutem necessaria. Minister enim, ut homo Dei, debet alios ista docere, quæ sunt ad salutem

lutem necessaria. Ergo ipse ista scire debet. Deinde quod ministro illa omnia suggerit, quæ populū docet, hoc continet perfectam salutis doctrinam. Sed Scriptura ministro omnia ista suggerit, tradit enim ea, quæ pertinent ad doctrinam, ad redargutionem, ad correptionem, ad Institutionem, & his quatuor capitibus ista omnia comprehensa sunt. Deinde ne quis adhuc quidpiam requirat, dicit scripturam hæc ita præstare, vt hominem Dei perficiat, & ad omne opus bonum sufficienter instruat. Vnde sic colligo,

Quòd omne illud, quod homo Dei docere debet, suggerit, hoc continet perfectam doctrinam salutis, Sed Scriptura suggerit omnia illa, quæ homo Dei docere debet. Ergo Scriptura continet perfectam doctrinam salutis.

Maiorem extra controuersiam pono. Minor est vera, aut falsum est, quod inquit Paulus, Scripturam posse *Timotheum sapientem reddere ad salutem*; item scripturā posse hominē Dei *perficere & sufficienter instruere, &c.* Idem iudicauit Antiquitas. Sanè, Chrysostomus & Theophylactus hunc locum ita interpretantur.

Quartum Argumentum, Quia Christus damnat omnem doctrinam hominum.

Omnis doctrina hominum abiicienda. Sed omnis Traditio præter Scripturam excogitata, est doctrina hominū. Ergo omnis Traditio præter Scripturam excogitata abiicienda.

Maior probatur. Matth. 15, 9. *Sed frustra me collunt, docentes doctrinas, quæ sunt mādata hominum.* Belarminus respōdet ad Minorem, & dicit *Christum non Moysi & Prophetarum, sed recentiorum quorundā Traditiones,*

*ditiones, quæ erant contra scripturam, reuocare. At hoc est pro nobis. Nam & nos non Christi & Apostolorum, sed aliorum hominum Traditiones, easque præter Scripturam excogitatas reprehendimus. Neque iuuat, quod aduersarius docet, quosdam patres dicere eas esse Apostolicas. Hoc enim non omnes faterentur, & qui hoc dicunt, faciunt propterea, ut ijs auctoritatem concilient.*

Quintum argumentum, Quia Apostoli eadem, & omnia scripserunt, quæ prædicarunt.

Apostoli prædicarunt perfectam doctrinam salutis.

Sed quæ prædicarunt, eadē & scripserunt. Ergo

Apostoli scripserunt perfectam doctrinam salutis.

Maiorem extra controuersiam pono. Minorem probo, 1. Iohan. 1, 4. *Quod uidimus, hoc annunciamus vobis.* Luc. 1, 1. *Visum est mihi omnia ad te scribere, ut cognoscas earum rerum, quas auditione accepisti, veritatē.* Unde apparet Apostolos omnia ista scripsisse, quæ auditores audierunt. Sed vi relationis auditores omnia ista audiuerunt, quæ Apostoli prædicarunt. Ergo quæ Apostoli prædicarunt, eadē & scripserunt. idem ante de Paulo & Petro probauimus ex patribus.

Sextum Argumentum, Quia Scriptura docet, quomodo possimus æternam damnationē effugere.

Quod docet quomodo possimus æternam damnationem effugere, hoc continet perfectam doctrinam salutis. Sed scriptura docet, quomodo

possimus æternam damnationē effugere. Ergo

Scriptura continet perfectam doctrinam salutis.

Maior est extra controuersiam. Effugere enim damnationem, est saluari. Quicumque enim non in

æter-

æternum damnantur, illi saluantur. Ergo quod docet, quomodo possimus damnationem effugere, hoc docet, quomodo possimus saluari. Minorem probo, Luc. 16, 29. *Habent Moſen & Prophetas, illos audiant*. Epulo debebat ſuos admoneri, ne in iſtam miſeriam venirent. Reſpondet Abraham illos per Moſen & Prophetas doceri, quomodo poſſint hoc periculum effugere. Deinde iubet, *ut Moſen & Prophetas audiant*, neque vlllo alio modo eos erudiri voluit. Vnde manifeſtum eſt, vel Abrahamum fuiſſe valde imitem & inhumanũ, vel per Moſen & Prophetas perfectè doceri, quomodo poſſimus damnationem vitare. Atque hinc concludo ſolam & vnicam ſacram Scripturam continere perfectam ſalutis doctrinam. Hinc vocatur *potentia Dei ad ſalutem*, Rom. 1, 16.

Septimum Argumentum, Quia in Scriptura habemus vitam æternam.

In quo habemus vitam æternã, hoc continet perfectam doctrinam ſalutis. Sed in Scriptura habemus vitam æternam. Ergo Scriptura continet perfectam doctrinam ſalutis.

Maiores extra controuerſiam eſt. Minorem probo, Iohan. 5, 39. *Scrutamini ſcripturas, quia videmini in ijs vitam æternam habere*.

Octauum Argumentum. Quia continet omnem doctrinam, & omnia facta Chriſti.

Quæ Chriſtus fecit, & docuit, illa continent perfectam doctrinam ſalutis. Sed illa omnia ſcripta ſunt, Ergo quæ ſcripta ſunt, illa continent perfectam doctrinam ſalutis.

Maiores

Maiores extra controuersiam est. Minor probatur. Act. 1. vers. 1. *Primum librum confeci de omnibus, quæ cepit Iesus facere & docere.*

Nonum Argumentum. Quia omnia dicta Apostolorum sunt in Mose & Prophetis.

Dicta Apostolorum continent perfectam doctrinam salutis. Sed dicta Apostolorum sunt in Mose & Prophetis. Ergo in Mose, & Prophetis est perfecta doctrina salutis.

Maiores est extra controuersiam. Minorem probo. Act. 26. 22. *Nihil dicense extra ea, quæ sunt in Mose & Prophetis.* Hoc verò de scripto tantum intelligi potest. Nam nisi Apostolus de scripto dixisset, excepissent Iudæi, non penes Apostolum, sed penes se esse veras Traditiones. cum igitur verbo scripto nihil addendum neque quicquam detrahendum sit, & cum in Scriptura habeamus vitam æternam, eaque utilis sit ad doct. redarg. correct. & institut. cum denique perficiat hominē Dei, & ad omne opus bonum perfectē instruat. Deniq; cum Christus damnet omnē doctrinam hominum; & cum Scriptura omnia ista contineat, quæ Christus docuit. Postremò cum oīa Apostolorum verba sint in Mose & Prophetis, manifestum est, scripturam continere perfectam doctrinam salutis.

#### CAPVT XIIII.

*Probatur ex patribus verbum Dei continere perfectam doctrinam salutis.*

**H**Æc testimonia allegamus, non quòd existimemus à patribus apodicticum argumentum produci

produci posse . Sed vt ostendamus , quid nam primitiua Ecclesia de hac resenserit . Irenæus igitur lib. tertio cap. 1. *Non enim per alios dispositionem salutis cognouimus , quàm per eos , per quos Euangelium peruenit ad nos . Quod quidem tunc præconiauerunt , postea verò per Dei voluntatem in Scripturis nobis tradiderunt , fundamentum & columnam fidei nostra futurũ .* His Irenæus docet Apostolos idem scripsisse , quod prædicarunt , & hoc ipsum , quod ab illis scriptum est esse fundamentum & columnam fidei .

Quod Apostoli prædicarunt , hoc continet perfectam salutis doctrinam . Sed quod prædicarunt , hoc scripserunt . Ergo quod scripserunt , hoc continet perfectam salutis doctrinam .

Bellarminus primùm negat Minorem , & dicit *Apostolũ quaddã scripsisse , quæ prædicauit , sed non omnia .* At hoc pugnat cum Irenæo . Disertè enim dicit eos scripsisse quod præconiauerunt . Deinde dicit lib. 2. c. 47. *Credere autem hac talia debemus Deo , qui & nos fecit , reuerentissime scientes , quia scriptura quiddẽ perfecta sunt , quippe à verbo Dei , & spiritu eius dicta .* Hoc cum videret Bellarminus , concedit Minorem , & respondet ad Maiorem per distinctionem in hunc modum : *Quædam esse omnibus hominibus ad salutem necessaria , Quædam non esse omnibus hominibus ad salutem necessaria .* Deinde infert ea , quæ omnibus hominibus ad salutem necessaria sunt . esse scripta , quæ verò non sunt omnibus hominibus ad salutem necessaria , non esse scripta . Sed hæc distinctio est simpliciter falsa . Nam vt inquit Paulus ad Ephes. cap. 4. §. *Vnus Dominus , una Fides , unum Baptisma , &c .* Eadem igitur omnibus ad salutem neces-



saria sunt. Deinde, quod dicitea, *que omnibus ad salutem necessaria sunt, scripta esse*, hoc nobis sufficit, neque plus desideramus. Verum igitur est, etiam Bellarmino concedente, ea, quæ omnibus hominibus ad salutem necessaria sunt, scripta esse, h.e. ea omnia esse scripta, per quæ omnes homines salui fieri possunt. Deinde dicit, *esse alia quadam ad salutem necessaria, que non sunt scripta*. Sed hoc implicat contradictionem. Per quod enim omnes homines salui fieri possunt, hoc tantum est ad salutem necessariū, sed per illud, quod scriptū est, omnes homines salui fieri possunt. Ergo illud quod scriptum est, hoc tantum est ad salutem necessarium. Vel in hunc modū; Absq; quo omnes homines salui fieri possunt, illud non est ad salutem necessarium: Sed absque eo, quod scriptum nō est, omnes homines salui fieri possunt. Ergo illud, quod scriptum non est, non est ad salutem necessariū. Hoc etsi verissimum est: tamen probat suum argumentum duabus rationibus. Vna, Quia illi, qui Act. 3, 41. baptizabantur, *dicuntur perseuerasse in Apostolorum doctrina*. Sed perseuerare in Apostolorum doctrina, est alia ista discere, *que non simpliciter ad salutem necessaria sunt*. Ergo sunt quadam non scripta ad salutem necessaria. Hoc genus argumenti, Bellarmine, non noui, & indignum est, cui respondeatur. Sufficit dicere, in Apostolorum doctrina perseuerare, non esse, non scripta discere. Secunda ratio, Quia Paulus 1. ad Thessal. 3, 10. cupit videre Thessalonicentes, *ut suppleret, quod eorum fidei deerat*. Respondeo, aut fides hic significat fidem iustificantem, aut doctrinam. Si fidem iustificantem, tum nihil ad rem. Non enim dicimus

dicimus hominis fidem esse perfectam, sed verbum Dei scriptum esse perfectum. Si doctrinam significat, tum est fallacia consequentis. Nam non sequitur, Thessalonicenses non omnia didicerunt, Ergo Apostoli non omnia docuerunt. Secundò respondet *Apostolum alia ad salutem necessaria docuisse omnes, alia ad salutem necessaria docuisse episcopos, eaque, quae omnibus ad salutem necessaria sunt, scripta esse: quae verò episcopis ad salutem necessaria sunt, non esse scripta.* Sed hoc est falsum. Vna enim tantum via ad salutem, vna salus, vnum medium ad salutem, vna fides, vnus saluator, vnus Christus. Deinde implicat contradictionem. Illud enim, *Tenete Traditiones.* 2. Tim. 2, 15. pertinet ad omnes homines, tam idiotas, quam Episcopos, vt & illud, *laudo vos, quòd Traditiones retinetis.* 1. Cor. 11, 2. Aut igitur errat Bellarminus, dum dicit Traditionum cognitionē ad solos Episcopos pertinere, aut errauit Paulus, qui has Traditiones ab omnibus hominibus seruari vult. Eligat Bellarminus, quod volet. Hoc etsi ita est, probat tamen suam opinionem tribus argumentis, i. *Quia Paulus seorsim enocauit Episcopos.* Act. 20, 17. Sed istos nihil aliud docuit, quàm *conuersionem ad Deum, & fidem in Dominum nostrum Iesum Christum,* vers. 21. Sed haec omnia scripta sunt. Deinde Episcopi debebant plura scire, quam laici, nō propter salutē, sed propter officiū. 2. *Quia dixit,* 2. Tim. 2, 2. *Hec committe fidelib. hominib. qui idonei sunt ad alios docendos.* Sed haec oīa scripta sunt. Tertull. de Praescript. c. 25. *Nam, cum dicit haec, de ijs dicit, de quibus in praesenti scribebat. De oculis autē & de absentibus apud conscientia, nō haec, sed illa dixisset.* 3. *Quia docet* 1. Cor.

2, 6. *Sapientiam loquimur inter perfectos.* Hoc argumentum mutuatus est Bellarminus ab hæreticis. Quærat igitur eius refutationem apud Irenæum lib. 3. cap. 2. Cum igitur Bellarmini distinctio sit cōtra Scripturam, & eius probationes sint infirmæ, ac ipse fateatur illa omnia scripta esse, quæ sunt omnibus necessaria ad salutem, lib. 4. cap. 11. fol. 306. v. 18. Sequitur perfectam salutis doctrinam sac. litteris comprehensam esse. Nam si illa scripta sunt, quæ sunt omnibus necessaria ad salutem, tum etiam illa scripta sunt, quæ sunt episcopis ad salutem necessaria.

Secundus testis est Origenes. Is Homil. 1. in Ieremiam docet. *Neceſſe nobis est scripturas sanctas in Testimonium vocare. Sensus enim nostri, & orationes nostræ sine his testibus non habent fidem.* Et si illud, quod in superiore argumēto nobis concessit Bellarminus, nobis satis est, nempe illa oīa scripta esse, quæ sūt omnib. necessaria ad salutē: tamē pgem<sup>us</sup> ad reliqua respondere.

Sine quo sensus nostri, & rationes nostræ non habent fidem, hoc est regula fidei. Sed sine Scriptura sensus nostri, & rationes nostræ non habent fidem. Ergo Scriptura est regula fidei.

Bellarminus ad hoc argumentum nihil respōdet: tantum dicit hoc de obscuris intelligendum esse. Illa enim non nisi ex Scriptura probari posse. Sed hoc est falsum. In tertio enim capite ad Rom. dicit *Paulum præbere doctioribus exemplum, ut ea, quæ loquuntur ad populum, non proprijs præsumptis sententijs, sed diuinis munita testimonijs proferant.* Loquitur igitur Origenes in genere de omnibus. Deinde est ridiculum, imò contradictorium, dicere, quæ omnibus sunt necessaria ad salutem,

lutem, ea esse in Scriptura; quæ verò Episcopis ad salutem necessaria sunt, ea non esse in Scriptura, sed in Traditionibus, & tamen obscuriora per Traditiones, non per Scripturam explicari.

Tertius testis est Constantinus magnus. Ille apud Theodoret. lib. 1. cap. 7. *Evangelici & Apostolici libri, & antiquorum prophetarum oracula, planè instruunt nos, quid de rebus diuinis sentiendum sit. Proinde hostili posita discordia, ex verbis diuinitus inspiratis sumamus questionum explanationes.* His duo dicit. Vnum: sac. Scripturas nos planè instruere, quid de rebus diuinis sentiendum sit. Alterum: Quæstionum solutiones ex sac. Scripturis petendas esse. Argumentum tale.

Quod nos planè instruit de rebus diuinis, & ex quo quæstionum solutiones petere debemus, hoc continet perfectam doctrinam salutis. Sed sac. Scriptura nos planè instruit de rebus diuinis, & ex ea omnium quæstionum decisiones petere debemus. Ergo sac. Scriptura continet perfectam doctrinam salutis.

Bellarminus primùm dicit. *Constantinum Magnum non fuisse Episcopum, sed hoc nihil facit ad rem.* Siue enim fuerit Episcopus, siue non fuerit, hoc ipsum tamen benè ab eo dictum est. Deinde ista vox non est Constantini. est enim approbata à tota Synodo. Licet igitur à Constantino prolata sit, tamen post Synodi approbationem, totius Synodi esse censetur. Præterea, omnes docti vno ore laudant & prædicant hoc dictum: & quod scio, ante hunc diem nemo præter solum Bellarminum inuentus est, qui illud vituperauit. Cùm igitur toti Synodo, & tam multis pijs

Episcopis probatum sit hoc Constantini dictum, immeritò eleuatur à Bellarmino. Deinde Bellarminus admittit auctoritatem dicti, & dicit eas quæstiones, *quæ ad naturam Dei pertinent, posse ex Scripturis dissolui.* Sed hoc non est ad mentem Constantini. Eth enim loquitur tantum de ijs quæstionibus, quæ ad naturam Dei pertinent, Afferit tamen omnes in vniuersum quæstiones Theologicas posse ex Scriptura solui. Alioquin non firma esset imperatoris ratio. Sic enim dicit, Quod nos planè instruit de diuinis rebus, ex eo debemus quæstionum solutiones petere. Sed sac. Scriptura. Ergo, Concludo igitur omnes quæstiones de rebus diuinis ex scriptura dissolui posse. Quod addit Bellarminus, *quæstiones posse decidi ex scriptura, secundum traditionē non scriptam intellecta,* si intelligit Traditiones Romanas, tum petit illud, quod est in principio, & totum illud argumentum est à nobis iam antè refutatum. Quod postremò dicit, *patres non potuisse Arrium ex verbo scripto refutare, ac proinde refutasse eum ex traditionibus,* facit sanctis patribus iniuriam, & ostendit, se patrum disputationes de hac re non legisse. Deinde non dicit verum. Theodoretus enim lib. 1. cap. 8. & Socrates lib. 1. cap. 6. testantur Arrianos ex scripturis damnatos esse.

Quartus testis est Athanasius. Is contra gentes dicit; *sufficiunt sanctæ Scriptura ad omnem veritatis instructionem.*

Quod sufficit ad veritatis instructionē, hoc continet perfectam doctrinam salutis. Sed sacra scriptura. Ergo.

Bellarminus respōdet ad Minorem, & dicit istam  
vocem,

vocem, omnem, in Athanasio non exstare. Sed sensus æquè euidens est. Dicit enim Athanasius; *sufficiunt equidem per se sac. litera & diuinitus inspirata, ad veritatis instructionem*, Hoc idem est, quod inquit Chemnitius. Deinde dicit Athanasium tantum dicere, *ad duarum questionum instructionem sufficere scripturam*, non ad omnes questiones. Sed hoc est falsum. Loquitur enim in genere, *pie quidem*, inquit, *religionis & veritatis, de vniuerso ratio cognitioque non tam indiget humana institutione, quam ipsa se suis notis, indicijque prodit.* Tertiò dicit *Scripturam sufficere ad iudicationem veritatis, sed non sine interpretatione patrum.* Sed & hoc est falsum. Dicit enim, *pie religionis & veritatis de vniuerso rationem & cognitionem per Christi doctrinam se sole clariùs demonstrare.* Deinde dicit, *nam quamuis tu hæc ipsa queas ex sac. Scripturis colligere, tamen alios benignè audis.* Hinc apparet religionis vniuersæ cognitionem ex solis sac. scripturis cognosci posse. Tandem addit, *Sufficiunt quidem per se, tum sacra & diuinitus inspirata litera, ad veritatis indicationem, tum plurimi de eadem re libri à sanctis, magistris scripti, quos si quis euoluat, intelliget aliquo modo Scripturarum mentem, & forsasse eam, quam cupit, scripturarum cognitionem adipiscitur.* At hoc, Bellarmine, non est scripturam absq; patrum interpretatione intelligi non posse; Sed patrum explicationem prodesse ad scripturam intelligendam, quod non negamus.

Quintus testis est Basilus Magnus. Is in sermone de fidei confessione dicit, *Infidelitatis argumentum est, & signum superbia certissimum, si quis eorum, que scripta sunt, aliquid velit reijcere, aut eorum, que non scripta*

*sunt introducere.*

Ad quod nihil debemus addere, & de quo nihil debemus detrahere, hoc continet perfectam salutis doctrinam. Sed scriptura. Ergo.

Respondet Bellarminus ad Minorem, & dicit *Basilium tantum vetare, ne aliquid contrarium ad sac. Scripturam adijciatur.* Sed hoc est falsum. Nihil n. omnino doceri vult, nisi quod est in scriptura. *Et Apostolus in exemplo humano vehementius contradixit apponere, aut detrahere aliquid in divinis scripturis, dum ait: Tamen hominis confirmatum Testamentum nemo reprob. it, aut aliquid addit.* Omnem itaque alienam à doctrina domini vocem & sententiam vitare statuimus. Vnde apparet eum non tantum non velle, ut aliquid contrarium doceatur, sed etiam nolle, ut aliquid alienum doceatur. cum quo congruit illud, quod est summa 72. cap. 1. *Oportet auditores eruditos in scripturis, probare ea quæ à doctoribus dicuntur, & quæ quidem consona sunt scripturis recipere, quæ verò aliena, reycere.* Distribuit igitur omnia, quæcunque de rebus divinis dicuntur in duas classes: nempe in *consona cum Scripturis*, & in *aliena*; Consona debent recipi, aliena abijci. Et hoc manifestius docet in Moral: Summa 80. cap. 22. *credentis proprium est in tali certitudine coaffici ad potentiam dictorum, & nihil audere reprobare, aut insuper addere. Si enim omne, quod non ex fide est, peccatum est, velut Apostolus ait, fides autem ex auditu est, auditus autem per verbum Dei: omne, quod extra diviniùs inspiratam Scripturam est, ex fide non est, & proinde peccatum est.* Quicquid igitur secundum Basilium non tantum contra scripturam est, sed etiam extra  
Scriptu-



*Scripturam est, peccatum est.* Deinde si omnia dogmata debent scripturæ consona esse, manifestum est scripturam esse omnium dogmatū regulam. Illud enim, cui aliquid consonum est, est consoni regula; & ob eam causā omnia debent ad scripturā examinari. Si congruunt cum scriptura, sunt suscipienda, si non congruunt, sunt reiicienda. Vana igitur omnis Belarmini ad hoc dictum responsio: Deinde dicit Belarminus, Basilium loqui *de Traditionibus à priuatis hominibus excogitatis; non de ijs, quas vniuersa Ecclesia ab Apostolis per successionem accepit.* Respondeo, Belarminū hīc ludere. Loquitur enim Basilius de omni eo, quod est extra Dei verbum, siue sit ab hoc, vel illo, siue à priuatis, siue à publicis hominibus excogitatum. Quod verò addit de Apostolicis Traditionibus, tales nullas habēt papistę, quas nos negamus. Non enī Traditiones à nobis oppugnantur, quas Ecclesia ab Apostolis accepit, sed oppugnamus eas, quę pugnant cum Apostolica doctrina, vel quę sunt extra Apostolicam doctrinam. Quicquid enim in sac. litteris non disertè expressum est, & tamen rectè ex ijs deduci potest, hoc nos non negamus. Quod verò addit, ipsum Basilium in eadē oratione de fide dicere, *se usum esse sæpè Sermonibus non scriptis sed cum Scriptura consentientibus*, hoc falsum est. Non enim dicit se usum esse sermonibus, sed dicit *se usum esse vocibus.* Talis vox est *ῥημάτων*. Talia verò & nos nō negamus. Manifestè enim ex scriptura deduci possunt. Proben papistę sua dogmata omnia ex scripturis, & pacē colemus cum illis. Alter locus est epist. 80. *Non putamus iustum esse, obtinentē apud ipsos consuetudinem,*

legem ac regulam facere recta doctrina. Si enim fortis res est ad rectitudinis demonstrationē, oportet & nos omnino illos sequi. Igitur Scriptura diuinitus inspirata arbitra nobis constituatur, & apud quos inuenta fuerint dogmata diuinis sermonibus concordantia, his omnino etiam veritatis suffragium accedet. Respondet Bellarminus, Basilium non agere de traditionibus in vniuersa Ecclesia receptis, sed tantum de Traditionibus particularibus. Sed hoc est falsum, Basilius enim in genere dicit, apud quos inuenta fuerint dogmata Scripturis consona. Vult igitur omnes consuetudines ad Dei verbum examinandas esse. Nam si illi consonæ sunt, vult eas recipi; si congruæ non sunt, vult eas repelli. Deinde omnes Traditiones papisticæ, de quib. nos eos accusamus, vel non habent testimonium à primitiua Ecclesia, vel constat eas olim non eodem modo ab omnibus obseruatas fuisse; Sed in alijs locis aliter atque aliter fuisse obseruatas, quemadmodum suo loco ostendemus. Proinde si discrepantes consuetudines sunt ex Dei verbo censendæ, tum omnes papisticæ Traditiones sunt ex Dei verbo censendæ. Fuerunt enim omnes istæ olim discrepantes.

Sextus Testis est Chrysostomus. Is Homil. 1. in Matth. dicit, *Scripturis opus esse, quia multi Euangelium corrumpunt.* Et Homil. 13. in Genes. dicit. *Scriptura non sinit hominem errare.* Ibid. *Ad amussum Canonem fac. Scripturæ sequamur.* Homil. 3. in 2. ad Thess. *Quæcunque necessaria sunt, illa sunt in Scripturis manifesta.* Ad hæc omnia dicit Bellarminus, quorsum hæc? nempe horsum. Si Euangelium ideo scriptum est, vt non corrumperetur, tum totum scriptum est. Et si Scriptura

ptura non finit hominem errare, tum debemus scripturam sequi. Item, si scriptura est canon, tum omnia dogmata ad eam, tanquam ad Canonem examinanda sunt. Deniq; si illa sunt manifesta in Scripturis, quæ sunt necessaria, tum scriptura potest esse iudex dogmatum controuerforum de rebus necessarijs, & Laici possunt eam cum fructu legere. Deinde allegat illum locum ex Homil. 49. in Matth. *Tunc qui in Iudea sunt, fugiunt ad montes, Montes autem sunt Scriptura Prophetarum & Apostolorum.* Ad hunc locum respondet, *eum non esse Chrysostomi.* Neque hoc ego simpliciter affirmo, sed tamen dicto tam pio satisfactum non est, & in editione Parisiensi expungi non debuit. Nam si ita tractatis patres, Bellarmine, ut, cum aliquid in ijs contra vos est, illud expungatis, quis non affirmabit vestram causam nisi corruptione & mutilatione patrum defendi non posse. Deinde idem docet Augustinus in libro de Pastoribus cap. 11. Dicit enim *constituit montes Israel. Auctores diuinarum Scripturarum, ibi pascite, ut sermone pascatis, quicquid inde audiueritis, hoc vobis bene sapiat, quicquid extra est, respuite, ne erretis in nebula, Audite vocem pastoris, colligite vos ad montes sac. Scripture.* Et quæ sequuntur. Si igitur respuere debemus, quicquid est extra Scripturam, perierunt omnes papisticæ Traditiones. Sunt enim omnes extra Scripturam. Idem Chrysost. inquit in Psal. 98. *Si quid dicatur extra scripturam, auditorum oratio claudicat, nunc annuens, nunc hesitant.* Verum ubi ex Scriptura diuina vocis prodijt Testimonium, & loquentis sermonem, & audientis animum, confirmat. Respondet Bellarminus, Chrysostomum

vello

*velle illud, quod ex propria inuentione dicitur, non tam facile persuadere, quàm quod ex scripturis dicitur. A hoc nihil aliud est, quàm ostendere, se non posse respondere. Non enim hoc vult Chrysostomus, sed vult nihil extra scripturam dicendum esse, quia non vult auditoris animũ hæsitare. Deinde paulò antè dixit, non oportet quicquam dicere sine testibus. Intelligit autem Testimonium sac. scripturarum. Sed quicquid extra scripturam dicitur, hoc sine testibus dicitur. Ergo extra Scripturam nihil dicendũ. Idem dicit Homil. 13. in 2. ad Corinth. Cũ habeamus omnium exactissimam trutinam, gnomonem, & regulam, diuinarũ legum assertionem, oro vos omnes, vt relinquatis, quid huic, vel illi videatur, & de his ex scripturis hac omnia inquirete. Respondet Bellarminus Chrysostomum non loqui de dogmatis fidei, sed de opinione carnalium, qui anteponunt opes paupertati. Sed hoc est falsum. Loquitur enim de hac re, sed non sola. Dicit enim nos omnium habere exactissimam trutinam, & omnia ex Scripturis inquirenda esse. Ergo non tantũ de ea re loquitur, vt vult Bellarminus. Cũ igitur omnia ex Scriptura exquiri debeant, manifestum est, Scripturam esse perfectam. Cũ item scriptura sit omnium trutina, gnomon, & regula, sequitur omnia dogmata ad eam examinari debere. Idem Chrysost. dicit in cap. 22. Matth. in Comment. Quicquid queritur ad salutem, totum iam impletum est in scripturis. Respondet Bellarminus, Chrysostomum loqui de vitiorum remedys, & dicere, nullum vitium esse, ad quod sanandum non reperitur in Scriptura remedium. Sed quid velit Chrysostomus adedò certum est & liquidum, vt illa Bellarmini responsio*

sponsio parum ad rem faciat.

Septimus testis est Cyrillus. Is in libro de recta fide ad Reginas ait; *Neceſſarium nobis eſt, diuinas ſequi litteras, & in nullo ab earũ præſcripto diſcedere.* Reſpondet Bellarminus, *licere noua dogmata tradere, ſed non licere dogmata Scriptura contraria tradere.* Sed & illi, qui noua dogmata præter ea, quæ ſunt in Scriptura tradunt, ab ſcripturarum præſcripto diſcedunt. Exemplum manifeſtum apud Matth. cap. 15, 2. Ibi n. lotio manuum ex traditione accepta, reprehenditur: & tamen non eſt per ſe ſcripturæ contraria. Deinde Cyrillus dicit, *omnia illa, quæ ad fidem, mores, & dogmata ſufficiunt, ſcripta eſſe,* in Iohan. cap. ult. lib. 12. Non igitur opus eſt, vt nouum quid adiſciatur. Idẽ dicit Homil. 5. in Leuit. *Ego puto in hoc biduo duo Teſtamenta poſſe intelligi, in quibus licet omne verbum, quod ad Deum pertinet requiri & diſcuti, atque ex iſſis omnem rerum ſcientiam capi. Si quid autem ſuperfuerit, quod ſcriptura diuina non decernat; nullam aliam debere tertiã Scripturam, ad auctoritatem ſcientiæ ſuſcipi.* Bellarminus reſpondet, hunc librum non eſſe Cyrilli, ſed Origenis. Sed hoc non refert. Vtriuſque enim par auctoritas. Nam quando eorũ ſcripta cum Dei verbo congruunt, tum perinde eſt, vtum Cyrillus an Origenes dixerit, & cum à Dei verbo diſcrepant, tum etiã perinde eſt, quis dixerit. Deinde dicit Cyrillum hoc loco non excludere verbum Dei non ſcriptum. Sed ſolũ excludere tertiã Scripturam. Sed hoc tantũ eſt efugium querere, cum reſpondere non poſſis. Dicite enim omne verbum, quod ad Deum pertinet, in vtroque Teſtamento requiri, & diſcuti poſſe. Ergo per contrapositionem

sitionem, quod non est in his duobus Testamentis, hoc non pertinet ad Deum. Viderit Bellarminus, ad quem pertineat e mentitæ papistarum Traditiones. Nam non sunt in illis Testamentis.

Octauus testis est Theophilus. In 2. n. Paschali ille ait, *'Diabolici Spiritus est, extra diuinarum Scripturarum auctoritatem, aliquid diuinum putare*. Respōdet Bellarminus, *cum loqui de libris Apocryphis, quos quidam pro diuinis supponebant*. Sed Theophilus in genere dicit: *Omne illud, quod est extra Scripturas, non esse diuinum*. Cū igitur Traditiones sint extra Scripturas; sequitur eas non esse diuinas. Deinde dicit Bellarminus *ineptum esse, quod de singularitate dicitur, ad aliam rem torquere*. Hoc quidem verum est, Bellarmine. Excutiamus igitur, num commodè à Chemnitio hoc positum sit. Theophilus voluit ostendere libros Apocryphos non esse diuinos: medium posuit, quia sunt extra scripturas. Iam Maior formāda est, vel vniuersaliter, vel particulariter. Si particulariter; Nempe quædam extra scripturam non sunt diuina. Sed Apocryphi. Ergo. tum fuisset ei meritò responsum, esse puras particulares. Proinde, vt ratio procederet, Maior vniuersaliter formanda erat, videlicet. Quicquid est extra scripturam, hoc non est diuinum. Sed libri Apocryphi. Ergo &c. Hanc esse veram mentē Theophili, dabunt omnes, qui librum inspexerūt. Ergo non ineptus Chemnitius, qui hoc ita addixit; sed ineptus est, ne quid grauius dicam, qui hoc in tanta luce videre non potuit, vel peruersus, qui hoc videre noluit.

Nonus testis est Apollinaris. Ille apud Euseb. lib.

s. cap. 18.

5. cap. 18. dicit se longo tempore distulisse scribere contra *Montani heresin*, ne videretur aliquid addere verbo *Euangelico*. Bellarminus respōdet, hac non esse in omnibus libris. At sunt in Græco. Et hoc sufficit. Secundò dicit non dicere Apollinarem, verbo scripto. Sed hoc per se intelligitur. Dicit enim se metuere, vt adderet aliquid *Euangelico Novi Testamenti sermoni*, quod non nisi de verbo scripto intelligi potest. Tertiò respondet intelligi *additionē noni dogmatis contrarij*. Sed hoc est ridiculū. Nam non metuit, vt aliquid verbo Dei contrarium scriberet, sed metuit, vt aliquis suum librum pro Canonico arriperet; quemadmodū multi Montani libros pro Canonicis accipiebant. Deinde dicit *Euangelico Novi Testamenti verbo nihil addi, & nihil detrahi debere*. Dicit igitur Euangelium Novi Testamenti verbum esse perfectum, & omnibus numeris absolutum, ac proinde omnia dogmata ex eo solo diiudicanda esse.

## CAPVT XV.

*Idem ex Patribus Latinis probatur.*

**H**Actenus de Græcis patribus; nunc de Latinis. Ac primo loco Tertullianus. Is lib. cont. Hermogen. cap. 22. dicit: *Adoro Scripturæ plenitudinem, scriptum esse doceat Hermogenis officina. Si non est scriptū, timeat vā illud, adycientibus vel detrahentib. destinatum.*

Omni non scripto metuendum vā illud, adijcentibus, & detrahentibus destinatū. Sed Traditiones papisticæ sunt non scriptæ. Ergo Traditionibus papisticis metuendum vā illud. Respondet Bellarminus ad Maiorem, & docet



*eam esse individualem*. Hoc etiam antè aliquando respondit: & palam ostendit, se reuera nihil respondere posse. Nam si Tertullianus voluit, illa, *Si non est scriptum, metuat vè illud adijcientibus & detrahentibus destinatum*, tantùm de vna re intelligi, inefficax, imò ineptum fuit eius argumentum. Fuit enim à puris particularibus, propter quod etiam pueri in scholis vapulant, videlicet. Alicui non scriptò metuendum vè illud. Sed hoc est non scriptum. Ergo huic metuendum vè illud. Et si Bellarminus hoc ex animo scripsit, reducendus est ad scholas Logicorù, vt discat illud, quod pueri impunè ignorare non possunt. Si autem sciens & volens ita scripsit, viderit, quid sit Deo in vltimo Iudicio responsurus. Sed ad rem. Hermogenes dicebat mundum esse ex præexistente materia conditum. Tertullianus hoc negabat. Medium, quo Tertullianus utebatur; quia non erat scriptum. Argumentum Tertulliani tale. Quod non est scriptum, hoc est reiiciendum. Sed mundum esse ex præexistente materia conditum, non est scriptum. Ergo reiiciendum. Eodem modo & nos dicimus, quod non est scriptum, est reiiciendum. Sed Traditiones non sunt scriptæ. Ergo reiiciendæ. Hoc argumentũ neque Bellarminus, neque vllus papista refutabit, nisi palam omnem omnium patrum & ipsius scripturæ auctoritatẽ velit reiicere.

Secundus testis est Cyprianus. Ille in Epist. ad Pompeium dicit; *unde est ista Traditio? virum de Dominica & Evangelica auctoritate descendens, an de Apostolorum mandatis, atque Epistolis veniens?* Ea enim facienda esse, quæ scripta sunt, testatur Deus, & proponit ad Iosue,

Iosue dicens, *non recedet liber legis ex ore tuo. Siquidur, aut in Euangelio præcipitur, aut in Apostolorum Epistolis & Actibus continetur, obseruetur etiam hac sancta Traditio.* Argumentum tale.

Quod non est in verbo scripto, hoc non est obseruandum. Sed papisticæ Traditiones non sunt in verbo scripto. Ergo Papisticæ Traditiones non sunt obseruandæ.

Respondet Bellarminus ad Minorem, & dicit *Cyprianum defendisse errorem, cum hac scriberet. Sed hoc nihil ad rem. In eo enim non errabat, quòd omnia ex scripturis probāda esse dicebat; sed in eo errabat, quòd putabat rebaptizationem hereticorum esse in scriptura. Et hoc docet Augustinus lib. 5. de Baptismo contra Donatistas cap. 26. Quod autem nos admonet, ut ad fontē (loquitur de Cypriano) recurramus. i. ad Apostolorum traditionem, & inde canalem in nostra tempora dirigamus, optimum est, & sine dubitatione faciendum.* Hinc apparet principiū Cypriani non esse malum, sed illud esse malum, quod ex hoc principio educere conabatur. Argumentatur enim in hunc modum.

Quod in scriptura non præcipitur, hoc non est faciendum. Sed venientes ab hæreticis non Baptizari, non præcipitur in Scriptura. Ergo venientes ab hæreticis non sunt nō baptizādi.

Hic verò errabat Cyprianus non in Maiore, nam illa est verissima: sed in Minore. Deinde dicit Bellarminus *Augustinum refellere hanc Epistolam lib. 5. cont. Donatist.* Hoc verum est *κατὰ τὴν*. Sed Augustinus tantum Minorem prædicti Syllogismi refellit,

maiolem verò approbat, vt antè demonstraui. Hoc cùm videret Bellarminus, redit ad suum coccyismū : nempe Cyprianum *non in genere dixisse, de omni re non scripta, sed tantum de aliqua re non scripta*. Verum hoc indignum est, cui tam sæpe respondeatur, & ostendit, quemadmodum iam dixi, se non posse ad argumentum respondere.

Tertius Testis est Hieronymus. Ille in Matth. cap. 23. *Quod de Scripturis auctoritatem non habet, eadem facilitate contemnitur, qua probatur*. Argum. tale.

Quod de Scriptura non habet auctoritatem, hoc eadem facilitate contemnitur qua approbatur. Sed Traditiones. Ergo.

Bellarminus cùm nihil possit respondere, dicit *locum hunc infideliter allegatum esse*. Sed hoc non docet. Deinde repetit veterem Coccyismum; *nempe hoc non in genere, sed tantum de una re, nempe de Sacharia accipiendum esse*. Verum, aut hoc falsum est, aut Hieronymus disputat ex puris particularibus. Quæstio enim est; num Sacharias pater Iohannis, sit ille, qui occisus est inter Altare & Templum. Hieronymus hoc negat. Medium, quo vitur, est, quia illud non habet de scriptura auctoritatem. Argumentum tale. Quod de Scriptura non habet auctoritatem, hoc eadem facilitate contemnitur, qua approbatur. Sed an Sacharias ille, fuerit pater Iohannis, de scriptura auctoritatem non habet. Ergo eadem facilitate contemnitur, qua approbatur. Si aliter format Hieronymus, admittit paralogismum ex puris particularibus, & est ineptus. Hoc ita esse nunquam refutabit Bellarminus. Idem dicit in 1. cap. Aggæi, *que absque*

*auctoritate & testimonijs scripturarum, quasi traditione Apostolica, sponte reperiunt, atque confingunt, percutit gladius Dei.* Argumentum tale. Quicquid absque auctoritate & testimonijs scripturarum cōfingitur, illud gladio Dei percutiendum est. Sed Traditiones papisticæ absque auctoritate & testimonijs scripturarum confictæ sunt. Ergo gladio Dei percutiendæ. Respondet Bellarminus, hoc tantum intelligendum esse de ijs, qui ipsi aliquid confingunt, & tamen volunt illud esse ex Apostolica Traditione. Sed hoc nobis sufficit. Talia enim sunt Papistica, quæ nos oppugnamus, vt Ieiuniorum certa tempora, & variæ obseruationes, humi dormitiones, tres quadragesimæ, *ἑξοφυσία*, & similia. Deinde illud solum non est in Hieronymo, sed à Bellarmino appositum. Hieronymus enim agit in genere. Quicquid de scripturæ auctoritate, & Testimonijs non est, illud gladio Dei percutiendum. Sed Ieiuniorum certa tempora, *ἑξοφυσία*, humi dormitiones, & alia non sunt ex Scripturæ auctoritate. Ergo gladio Dei percutienda. Idem docet in Psal. 86. *Vt exceptis Apostolis quicquid postea aliud dicetur, non habeat auctoritatem, abscindatur.*

Quicquid aliud est, quàm illud, quod dixerunt Apostoli, abscindendum. Sed Traditiones Papisticæ sunt aliud, quàm illud, quod dixerunt Apostoli. Ergo abscindendæ.

Bellarminus cum non possit respondere, iterat veterem coccysmum, nempe Hieronymum velle, vt nihil contrarium scripturis doceatur. Hoc quidem verum est, sed non solum. Non enim tantum vult, vt nihil contrarium doceatur: Sed etiam, vt nihil

*aliud, quemadmodum antè ostendimus.*

Quartus testis est Augustinus. Is lib. 2. de doct. Christ. cap. 9. *In ijs enim, inquit, quæ aperte in Scriptura posita sunt, inueniuntur illa omnia, quæ continent fidem, moresq; viuendi, spem scilicet, atque charitatem.*

Quæ fidem & mores viuendi continent, illa continent perfectam doctrinam salutis. Sed scriptura fidem, & mores viuendi continet. Ergo Scriptura continet perfectam salutis doctrinā.

Bellarminus respondet ad Minorem, & dicit *scripturam continere omnia ista dogmata, quæ omnib. hominibus simpliciter necessaria sunt.* Sed hoc est satis.

Nam quod continet illud, quod omnibus hominibus simpliciter necessarium est ad salutem, hoc continet perfectam salutis doctrinam. Sed scriptura. Ergo.

Minor est Bellarmini, Major est vera. Nam quod omnibus hominibus simpliciter necessarium est ad salutem, hoc sufficit omnibus hominibus ad salutē. Si igitur scriptura hoc continet, quod omnibus hominibus ad salutem sufficit, manifestum est, plenam & perfectam doctrinā salutis esse in scriptura. Quid igitur contradicunt? Deinde, si scriptura ista omnia continet, quæ omnibus hominibus sunt simpliciter ad salutem necessaria, hoc est, per quæ omnes homines salui fieri possunt, Sequitur Traditiones nullis hominibus esse simpliciter necessarias ad salutem; sequitur item omnes homines absq; Traditionibus saluos fieri posse. Imò, sine quo omnes homines salui fieri possunt, hoc non est ad salutem necessariū. Sed sine Traditionibus. Ergo. Quorsum igitur Traditiones?

tiones? Nos illud, quod hic Bellarminus regessit, libenter recipimus, neque opus fuisset probatione. Quoniam tamen probationem attulit, nos eam expendemus. August. lib. 2. cap. 36. dicit. *Credo quod etiam hinc diuinorum eloquiorum clarissima auctoritas esset, si homo illud sine dispendio salutis ignorare non posset.* Ergo infert non omnia ex scriptura sumi posse, sed opus esse Traditione. Illud prius cōcedimus. Sed addit Augustinus, *illa sine dispendio salutis ignorari posse.* Hoc posterius negamus. Nam & illa ex Traditione cognoscere non possumus. Docet enim Augustinus in eodem capite, *ubi enim de re obscurissima disputatur, non adiuvantibus diuinarum scripturarum certis clarisq; documentis, cohibere se debet humana presumptio, nihil faciens in partem alteram declinando.* Quod non dixisset, si existimasset nos ea ex Traditionibus discere posse, quæ ex scriptura discere non possumus. Relinquitur igitur, omnia ad salutem necessaria ex scriptura disci posse. Idem August. dicit lib. 3. contra litteras Petilianī cap. 6. *Si quis siue de Christo, siue de eius Ecclesia, siue de quacunque alia re, quæ pertinet ad fidem vitamque nostram, non dicam si nos, sed quod Paulus adiecit, si Angelus e cœlo vobis euangelizauerit, præterquam quod in scripturis euangelicis & legalibus accepistis, anathema sit.*

Quicquid præter scripturam est, est anathema. Sed Traditiones papisticæ sunt præterquam illud, quod scriptum est. Sunt igitur anathema.

Bellarminus cum non possit respondere, dicit se ante docuisse, præterquam esse idem quod contra. Verum mi Iesuita; Præterquā est aliud, quā cōtra. Deinde

in scriptura non tantum illud, quod contrarium est damnatur: Sed etiam illud, quod aliud siue preter est, quemadmodum antè prolixè ostendimus. Idem docet de bono viduitatis cap. 1. *Sancta scriptura nostra doctrina regulam figit, &c.* Et paulò post. *Non sit ergo mihi aliud te docere, nisi verba tibi doctoris exponere, & de ijs, quod Dominus dederit, disputare.* Bellarminus cum nihil posset respondere, iterat veterem coccysum, & dicit hoc non in genere, sed tantum de viduitate intelligendum esse. Sed illud refutauimus iam sæpè. Nam Augustinus aut loquitur in genere, aut argumentatur ex puris particularibus, quod est ineptire. Hoc cum videret Bellarminus, affert nouam solutionem, nempe esse intelligendum de ijs, qui nouas doctrinas effingunt. Hoc est verum Bellarmine. Omnis n. doctrina, quæ non est in Scriptura, est noua doctrina. Verum hoc modo flagellas omnes Traditiones papisticas. Ille enim, quoniam non sunt in Scriptura, sunt nouæ doctrinæ, ac proinde abijciendæ. Idem dicit lib. 3. cont. Maximin. cap. 14. Sed nunc nec ego Nicænum, nec tu debes Ariminense, tanquam præiudicaturus præferre concilium. Nec ego huius auctoritate, nec tu illius teneris. Scripturarum auctoritatibus non quorumcunque proprijs, sed vtrique communibus testibus, res cum re, causa cum causa, ratio cum ratione certet. Argumentum tale.

Quod controuersum, alterius partis proprium, & non vtrique parti commune est; illud non potest principium esse. Sed Traditiones papisticæ sunt controuersæ, alterius partis propriæ & non vtrique parti communes. Ergo Traditiones



tiones non possunt esse principium alicuius dogmatis.

Bellarminus cùm non possit respondere, *negat hoc dicto oppugnari Traditiones*. Verùm iudicet posteritas, an hoc argumento impugnentur Traditiones papisticæ. Ad hæc dicta, cùm neque Bellarminus, neque quisquam papista potuerit respōdere, non existimo necesse esse plura adiungere. Multa enim sciens & volens prætereo. Deinde dicit de hac re, quam hoc loco tractat Augustinus, *exstare illustria testimonia in sac. Scriptura*. Sed hoc implicat contradictionem. Nam antè negavit, *patres potuisse Arrianos ex scriptura convincere, ideo coactos fuisse ad Traditiones confugere*. Hic verò dicit contrarium. Quod verò addit, hoc sapit plus quàm iuuenilem arrogantium. Primum dicit, *se duplo plura Testimonia patrum pro Traditionibus allegasse, quam nos*. Quasi in multitudine allegationū sita sit veritas, & non potiùs expendendum, quàm appositè fuerint allegata. Deinde dicit, *nos cogi faceri, esse aliquas Traditiones*. Quasi verò nomen Traditiones non sit *quævis*, & nos propterea papisticas Traditiones agnoscamus, quòd veras agnoscimus. Deinde ex hac re nostra ingenuitas iudicari potest. Quæ enim scimus vera esse, ealibenter admittimus. Postremò dicit *se non posse adigi ex vlla parte, ut affirmet traditiones non esse necessarias*. Modestus homo. Paulus dicit *sacras literas posse nos sapientes reddere in sainte*. Idem dicit *eas reddere hominem Dei perfectè instructum ad omne opus bonum*. Athanasius dicit *sanc. tam Scripturam sufficere ad veritatis instructionem*. Basiliius dicit *nos debere ea, quæ scripturis consona sunt*  
Bbb 4      recipere,

recipere, & quæ aliena sunt reijcere. Idem dicit infidelitatis & superbia argumentum esse aliquid eorum quæ scripta sunt, abijcere, & eorum quæ scripta non sunt introducere. Idem dicit ex peccato esse, quod est extra diuinitus inspiratam Scripturam. Idem dicit Scripturam diuinitus inspiratam esse arbitrum constituendum, & apud quem inuenta fuerint dogmata diuinis sermonibus concordantia, ei veritatis suffragium accedere debere. Cyrillus dicit omnia illa, quæ ad fidem, mores & dogmata sufficiunt, scripta esse. Origines dicit omne verbum, quod ad Deum pertinet, discuti ab utroque Testamento. Theophilus dicit Diabolici Spiritus esse extra diuinarum Scripturarum auctoritatem aliquid diuinum putare. Hieronymus dicit, quod de Scripturis auctoritatem non habet, eadem facilitate posse repudiari, quæ admittitur. Idem dicit gladium Dei percutere ista, quæ absque testimonijs Scripturæ quasi Apostolica traditione recipiuntur. Augustinus dicit, in ijs, quæ aperte in Scriptura posita sunt, inueniri omnia illa, quæ continent fidem moresque viuendi. Idem dicit anathema esse quicumque de Christo, siue de Ecclesia, siue de quacunque alia re, quæ pertinet ad fidem vitamque nostram, euangelizauerit præterquam quod Euangelicis & legalibus Scripturis traditum est. Et tamen Bellarminus dicit se nulla ex parte adigi posse, ut affirmet traditiones, nempe eas, de quibus nos contendimus, non esse necessarias. Estne hoc insigne exemplum Iesuiticæ modestiæ?

## CAPVT XVI.

*Idem à ratione probatur.*

**C**Apite superiore ostendimus ex patribus Latinis, verbo Dei scripto comprehensam esse perfectam

fectam doctrinam salutis; Sequitur vt idem aliquot rationibus ostendamus. Prima ratio est: Quia absq; scriptura traditiones tam diu cōseruari nō potuerūt.

Quod non est scriptum, id tam longo tempore cōseruari non potest. Sed traditiones nō sunt scriptæ: Ergo tam longo tempore cōseruari non potuerunt.

Bellarminus negat Maiorem. Et dicit, *Deus longiore tempore cōseruauit Ecclesiam. Ergo etiam Traditiones à tempore Apostolorum, vsque ad hac tempora cōseruare potuit.* Sed est magna differentia. Ecclesiæ enim cōseruationem promisit Deus; Traditionum verò cōseruationem promisit nusquam. Deinde Ecclesiam Deo curæ esse, certum est; Traditiones verò ei curæ esse inter nos cōtrouersum est. Dicere igitur, Traditiones cōseruari, quia Deo curæ sunt, est illud petere, quod est in principio. Postremò dicere, Deum posse Traditiones cōseruare. Ergo cōseruauit, non est magni momenti. A posse enim ad esse non valet consequentia. Deus potest facere, vt Bellarminus fiat Papa Romanus. Ergo fiet Papa. Non sequitur, opinor; & si Bellarminus sibi hoc persuasit, hallucinabitur. Deinde dicit. *Sicut Deus potuit seruare Traditiones ab Adamo ad Moysen, & Scripturam à Moysen ad Christum, ita potuit & Traditiones cōseruare à Christo vsque ad nostram ætatem.* Sed illud est longè diuersum. Traditiones enim ab Adam ad Moysen sunt Dei verbum, quod perire non potest. Traditiones verò Papisticæ, de quibus nos contendimus, sunt doctrinæ hominum. Deinde Traditiones ab Adam ad Moysen non semper integræ cōseruatæ

sunt, Gen. 4, 26. *Tunc ceptum est invocari nomē Iehoue,* hoc est, quemadmodum Vatablus explicat, *tunc ceptus restitui cultus divinus, qui propter impietatem penē interi-*  
*erat, Genes. 6, 12. Omnis caro corrumperat viam suam su-*  
*pra terram.* Deinde post diluvium posterū Sem cor-  
 ruperunt Traditiones Dei, adhuc Noā vivente. *Na-*  
*chorenū & Thare servaverunt Dys alienis. Ios. 24, 2. Et*  
*Laban iurat per Deos Nachor. Gen. 31, 53. Quin ipsi*  
*filij Iacob coluerunt idola cū essent in Aegypto.*  
*Ezech. 20, 8. Et ut Colophonem addam. Cū Mo-*  
*ses esset in monte, & acciperet legem Domini, totus*  
*populus Traditiones corrupit, & coluit idola. Exo.*  
*32, 1. Vnde apparet, Traditiones ab Adam ad Mo-*  
*sen non fuisse integrē cōservatas. Deinde Deus sub-*  
*inde aliquem excitavit ante Mosen, qui collapsum*  
*Dei cultum restitueret, ut Set, Enoch, Noach, Abra-*  
*ham. Post Apostolos verō non fuisse novas revelationes*  
*concedit Bellarminus. Deinde, si iudicasset Deus Tra-*  
*ditiones commodē servari potuisse, non scripsisset,*  
*sed quoniam videbat verbum suum vivā voce tradi-*  
*tum, non tam facile cōservari posse, idē scripsit, &*  
*scribi iussit, Exod. 17, 14. Scribe hec ad monumentum*  
*in libro, Psalm. 102, 19. Scribatur hoc ad memoriam po-*  
*sterorum, Luc. 1. Visum est mihi hec omnia scribere, ut*  
*habeas earum rerum, quas auditione accepisti a p̄p̄leia.*  
 Concludimus igitur, Traditiones non scriptas dif-  
 ficulter cōservari posse. Hoc cū videret Bellar-  
 minus, excogitavit aliam responsionem, & dicit,  
*Traditiones in patrum libris scriptas esse. Sed quod est in*  
*patrum scriptis, hoc non habet eandem auctoritatē,*  
*quā illud quod est in Scriptura divina. Nisi igitur Bel-*  
 larminus

larminus probet eandem auctoritatem esse. Scripto-  
rum Patrum, & Canonicorum, frustra laborat. Nam  
quod Apostoli dicunt, *se à Domino accepisse*, hoc est  
verum, non enim potuerunt mentiri. Sed non quic-  
quid dicunt patres, verum est. Ezech. 20. *In statutis*  
*patrum vestrorum nolite ambulare*, Psal. 106. *Errauimus*  
*cum patribus nostris*. Augustin. *Multa huiusmodi pro-*  
*pter nonnullorum sanctorum, vel turbulentorum scandala*  
*deuitanda liberius improbare non audeo*. Hieronymus  
cont. Heluid. dicit *se rhetoricatum esse, & in morem de-*  
*clamatorium paululum luisse*. Quid verbis opus est,  
hoc docet antilogia, quæ sæpè est in patribus. Nam  
quod vnus pater dicit, hoc alter negat; imò sæpè ac-  
cidit, vt vnus & idem, quod in vno loco negauit, il-  
lud in alio loco approbet. Hoc cum videret Bellar-  
minus, excogitauit aliam responsionem, & dicit *Tradi-*  
*ditiones in continuo usu positas esse*. Sed hoc est falsum.  
Multæ enim Traditiones paucis cognitæ sunt, &  
nisi rarissimè vsurpantur, neque nunc & olim eodem  
sunt, neque eodem modo obseruatæ, quemadmodum  
suo tempore demonstrabimus. Quod verò de linguis  
vulgaribus addit, est ridiculū. Illæ enim sunt omnib.  
hominib. in vsu. Traditiones. nō sunt omnib. homi-  
nib. in vsu. Deinde implicat contradictionē. Nunc  
n. dicit *linguas vulgares cōseruari*; antè dixit *eas singulis*  
*etatibus immutari*. Cap. 15. lib. 2. Argum. 6. Conciliet  
ista Bellarminus. Hoc cum videret Bellarminus, ex-  
cogitauit aliam responsionem, & dicit *Traditiones esse*  
*antiquis monumentis incisas*: & exemplum profert de  
*ara Baleali in Flandria destructa*. Hoc exemplum qui-  
dem mihi ignotum est. Interea certum est tempore  
Christi,

Christi, Apostolorum, & primorum patrum non fuisse aras, quicquid dicat Bellarminus. Origen. lib. 4. cōtra Celsū. *Obijcit nobis, quòd non habeamus imagines, aut aras, aut templa.* Arnob. lib. 4. cont. gentes, *Accusatis nos, quòd nec templa habeamus, nec aras, nec imagines.* Hoc cū videret Bellarminus, excogitauit aliam responsionem, & dicit, *quoniam multa semper hæreses fuerunt, ideo etiam semper docti viri excitati sunt, qui Traditiones è tenebris eruerent, ut per eas hæreticos refellerent.* Sed hoc est ridiculū. Nulla enim vnquam hæresis per Traditionem non scriptam refutata est; neque Bellarminus vllum exemplum producere potest. Deinde multi errores, per Traditiones in Ecclesiam introducti sunt, vt Imagines, earū cultus, mortuorū inuocationes, *ἐπιλαθροποιίαι* & similia. Postremò nulla hæresis per Traditionem non scriptam refutari potuit. Euseb. lib. 5. cap. 24. *Neque enim aut Anicetus Polycarpo persuadere potuit, ut non obseruaret ea, quæ nouerat Iohannem discipulum Domini nostri, vel ceteros Apostolos, cum quibus semper fuerat, obseruasse; neque rursus Polycarpus Aniceto persuasit ea deserere, quæ ille dicebat à se maiorum more obseruari.*

Secundum Argumentū; Quia Scriptura est regula fidei, & quoniam est opus Dei, & omnia opera Dei sunt perfecta, est regula perfecta.

Omnis regula est regulato adæquata. Sed verbum scriptum est regula, fides regulatū. Ergo verbum scriptum est fidei adæquatum. At quod est fidei adæquatum, hoc sufficit ad fidem gi-  
gnendam & conseruandam. Sed verbum scri-  
ptum. Ergo.

Bel-

Bellarminus primùm negat Minorem, & dicit, *non esse Scriptura proprium, ut sit regula*. Nos more nostro eius rationes priùs expendemus, deinde sententiam nostram probabimus. Prima eius ratio. *Quia Scriptura multa continet, quæ non sunt necessario credenda, hoc est, quæ per se non pertinent ad fidem.*

Quod continet aliquid non pertinens ad fidem, hoc non est fidei adæquatum. Sed Scriptura continet aliquid non pertinens ad fidem. Ergo Scriptura non est fidei adæquata.

Respondeo ad Minorem, & dico fidem dupliciter considerari: vno modo, quatenus fides fit, generatur, augetur, & confirmatur: altero modo, quatenus per fidem meritum Christi apprehendimus, & Iustificamur. Si secundo modo accipis fidem, tum concedimus esse multa in Scriptura, quæ simpliciter ad fidem non pertinent. Interea tamen illa omnia, quæ ad fidem hoc modo acceptam simpliciter pertinent, sunt in Scriptura, quemadmodum nos antè ostendimus, & Bellarminus affirmavit lib. 4. cap. 11. in Resp. ad dictum Irenæi. Si verò fidem primo modo accipis, tum Minor falsa est. Quicquid enim scriptum est, facit ad fidem generandam, augendam & confirmandam. Atque hoc modo sacra Scriptura non tantum est fidei regula, sed est etiam regula omnis doctrinæ, ex qua fides nascitur. Huc pertinet illud ad Roman. 15. *Quæcunque scripta sunt, ad nostram doctrinam scripta sunt*, 2. Tim. 3, 16. *Tota Scriptura est diuinitus inspirata, & utilis ad doctrinam, redargutionem, institutionem & correptionem*. Et tantum abest, ut hæc Testimonia



ftimonia faciant pro Bellarmino, vt noſtram ſenten-  
tiam omnino confirment. Omnis enim correptio,  
redargutio, inſtitutio, & doctrina, debet ad ſcriptu-  
ram, tanquam ad regulam accommodari, cum quaſi  
congruit, eſt proba, Si non congruit, eſt mala. Hinc  
concludimus, omnem & ſolam ſcripturam eſſe regu-  
lam doctrinæ fidei. Quicquid enim eſt in ſcriptura,  
pertinet ad fidei doctrinam, & quod non eſt in ſcri-  
ptura, hoc non pertinet ad fidei doctrinā. Secunda  
ratio. *Quia multa pertinent ad fidem, quæ non ſunt in  
Scriptura.*

Quod non continet omnia illa, quæ ſunt ad fidem  
neceſſaria, hoc non eſt fidei regula. Sed ſcri-  
ptura non continet omnia illa, quæ ſunt ad fi-  
dem neceſſaria. Ergo Scriptura non eſt fi-  
dei regula.

Bellarminus non probat Minorem, ſed relegat  
nos ad priora, in quibus ſe eam probaſſe dicit. Ergo  
& nos nunc tantū negamus Minorem. Et quoniam  
iſta priora ſunt à nobis ſatis refutata, non eſt neceſſe  
plura verba de hac re facere, niſi Bellarminus ſcri-  
pturarū inſufficientiā alijs argumentis probet, atque  
hactenus fecit.

Tertia ratio. Quia *Scriptura non eſt opus continuum.*

Omnis regula eſt continua. Scriptura non eſt  
continua. Ergo ſcriptura non eſt regula.

Nos respondemus primū, Maiorem veram eſſe,  
de regulis Mechanicis, de alijs non item. Corpus  
enim ciuile eſt regula Iuris ciuilis, & tamen non eſt  
hoc modo continuum. Continet enim & hitorias  
quaſdam, & res ſacras. Deinde & Minor eſt falſa.

*prociſi*

*Sacra*

Sacraenim scriptura, hoc est, Vetus & Nouum Testamentum non tantum continet cōtinuam doctrinam, sed etiam eandem. Act. 26, 22. Quod verò in illa sint quædam historiæ, conciones, carmina, vaticinia, leges, promissiones, & similia, illa omnia ad vnum scopum referuntur, nempe vt *spem habeamus* Rom. 15. Hæc sunt Bellarmini argumenta, quibus negat sac. Scripturam esse regulam. Nunc immotis rationibus ostendemus, eam esse regulam. Ac primum ipsa Scriptura dicit se esse regulam, Psalm. 119. *Lucerna pedibus meis verbum tuum.* Psal. cod. vers. 132. *Dirige pedes meos in sermone tuo.* Ios. 1. 7. *Serua legem meam, neque declina ab ea, neque ad dextram, neque ad sinistram.* Deut. 12, 32. *Quod præcipio tibi, hoc facito Domino, nec addas quicquam, nec minuas.* Argum. tale.

Ad quod omnes gressus .i. actiones nostras dirigere, & ad quod omnes actiones nostras accommodare, & à quo non discedere debemus, illud est regula. Sed verbum scriptum. Ergo.

Maiorem nemo negabit, qui mentem habet, minor est in allegatis textibus. Deinde omnes doctores, Græci & Latini à tempore Apostolorum vsque ad hanc ætatem vocarunt scripturam *Canonicam*, neque quisquam fuit ante Bellarminum, qui dixerit istam appellationē esse malā. August. cont. Crescon. lib. 2, cap. 32. *Ego huius epistole auctoritate non teneor, quia litteras Cypriani non vt Canonicas habeo, sed eas ex Canonicis considero, & quod in eis diuinarum scripturarū auctoritati congruit, cum laude eius recipio, quod autem non congruit, cum pace eius respicio.* Idem in Epist. 29. ad Hieronymum; *Ego solis es Scripturarum libris, qui iuxta*  
*Canonicis*

*Canonici appellantur, hunc timorem & honorem didici*  
*deferre, ut nullum eorum auctorem scribendo aliquid er-*  
*rasse, firmissimè credam, alios autem ita legam, ut quan-*  
*talibet sanctitate doctrinâq; polleant, non idè verum pu-*  
*tem, quia ipsi ita senserunt, sed quia mihi vel per illos aucto-*  
*res Canonicos, vel probabili ratione, quod a veritate nō ab-*  
*horreret, persuadere potuerunt. Idem in Epist. 112. ad*  
*Paulinum. Si diuinarum Scripturarum, earum sc. quæ*  
*Canonice in Ecclesia appellantur, perspicua aliquid firma-*  
*tur auctoritate, sine vlla dubitatione credendum est. Alys*  
*verò testibus & testimonijs, quibus aliquid credendum esse*  
*suadetur, tibi credere vel non credere liceat, quantum ea mo-*  
*menti ad faciendam fidem vel habere, vel non habere per-*  
*penderis. Atque hoc modo omnes Ecclesiæ vnanimi-*  
*ter omnibus temporibus & locis sac. Scripturam ap-*  
*pellarunt. Si iam vera est ista Maxima, quam posuit*  
*Bellarminus lib. 2. cap. 15. Illud verum esse, quod uni-*  
*uersa tenet Ecclesia, tum Bellarmini hæc responsio*  
*falsa est. Deinde Bellarminus se hîc implicat contra-*  
*ditione. Nam istic dixit, omnem vniuersalis Ecclesiæ*  
*observationē esse veram. Hîc verò negat sac. Scripturam*  
*esse Canonem fidei, cū tamen hoc vniuersa teneat*  
*Ecclesia. Tertio ratio, Quia omnes ferè patres non*  
*tantum vocant Scripturam Canonicam, sed etiam*  
*Canonem. Tertullian. contra Hermogen. dicit sac.*  
*Scripturam esse regulam veritatis. Basiliius dicit sacram*  
*Scripturam esse normam rectitudinis, & normam verita-*  
*tis. Cyprianus in Symbolo. Hæc sunt quæ patres in Ca-*  
*nonem concluderunt. August. cont. Cresco. lib. 2, 31.*  
*Nos nullam facimus Cypriano iniuriam, cū eius quasi-*  
*libet litteras à Canonica diuinarum scripturarum auctori-*  
*tate*

ritate distinguimus. Neque enim sine causa, tam salubri  
vigilantia canon Ecclesiasticus constitutus est, ad quem certi  
Prophetarum & Apostolorum libri pertinent, quos omnino  
iudicare non audemus, & secundum quos de ceteris literis  
vel fidelium, vel infidelium iudicamus. Thom. in 1. ad  
Timoth. 6. lect. 1. Doctrina Prophetarum & Aposto-  
lorum Canonica dicitur, quia est quasi regula intellectus  
nostri. August. de bono Viduitatis, cap. 1. Sacra scri-  
ptura nostra doctrina regulam praefigit. Chrysost. in 2. ad  
Corinth. Homil. 13. Cum habeamus omnium exactissi-  
mam regulam & normam, diuinarum legum assertionem,  
oro vos omnes, ut relinquatis. quid huic vel illi videatur, &  
de his ex Scripturis hac omnia inquirent. Huc pertinent  
& testimonia ad superiorem rationem allegata. De-  
inde hoc implicat contradictionem. Hic enim dicit,  
non esse scriptura proprium, ut sit regula, & lib. 1. cap. 2.  
docuit Propheticos & Apostolicos libros esse certam &  
firmam regulam fidei. Hoc cum videret Bellarminus,  
concedit Scripturam esse fidei regulam, Sed adijcit  
eam esse tantum partialem regulam, non integram. Inte-  
gram regulam esse dicit verbum Dei. Hoc verum esse  
duplex; aliud scriptum, aliud non scriptum. Hinc in-  
fert, verbum scriptum non esse totalem regulam, sed tan-  
tum partialem. Sed nos antea docuimus, idem esse ver-  
bum, quod traditum est, & quod scriptum est. Ergo  
hoc frustra est. Deinde partialem regulam statuere  
absurdum est. Regula enim vel κανὼν (ut recte ex Va-  
rino docuit Chemnitius) ἵνα μέγας ἀδελφότης, πᾶσι  
πρόσθιεν καὶ ἀφ' αἰρέσεων μετὰ μᾶς ἐπιδικόμενον. Chrysostom.  
Homil. 13. in 2. ad Corinth. docet hanc regulam esse  
exactissimam. Oecumenius in 3. ad Philip. Fides est in-

star Canonis. *Quemadmodum si à Canone aliquid abstuleris, vel ei aliquid addideris, totum canonem corrupisti; sic etiam in fide.* Theophylact. ibidem. *Regula neque appositionem habet, neque ablationem.* Aut igitur sac. Scriptura nō est regula, aut est pfecta regula, & talis, cui nihil addi, neque quicquam detrahi debet. Sed est regula. Ergo perfecta regula, neque ei quicquam addi, nec detrahi potest. Cū igitur sac. Scriptura sit regula, & talis regula, cui nihil addi vel detrahi possit, superuacuae sunt omnes Traditiones. Tertia ratio. Quia ex Traditionibus nihil certi cognosci potest. Pugnat n. inter se. Tertullianus n. in libro cōtra Pſychi. laudat *ἐν ποφύλῳ*. Hieronym⁹ eam vituperat, in 1. cap. Agg. Tertull. lib. cont. Iudæos c. 8. Et Clemens 1. Stromat. dicunt *Christū mortuū esse, Anno 30 sue atatis.* Irenæus lib. 2. cap. 40. dicit eum *Anno atatis sue quinquagesimo mortuum esse.* Vtrumq; falsum. De Paschate docuisse Romanos & Asiaticos contrariū & utrosq; suam sententiam defendisse ex Traditione, docet Euseb. lib. 5, 24. *De quadragesimis,* ibidem. Et apud Socratem. Basilii ex traditione docet *Zachariam inter Templum & aram occisum, esse patrē Iohannis.* Hieronymus hoc ridet in 23. cap. Matth. Tertuil. de corona, dicit *nefas esse Sabbato ieiunare.* Ignatius dicit, *Sabbato ieiunare, & Christum, occidere, idē esse,* a d. Philipp. At aliud Passim obseruatur. Hieronym. Serm. de Natiuitat. Christi, dicit, *sive hoc die natus sit Christus, siue baptizatus, diuersa fertur hominum opinio.* At vtrumque nunc sine vlla dubitatione asseritur. Nunc omnes cum summa asseueratione statuunt, *corpus Mariae cum summo honore assumptum esse.*

esse. Sed Hieronymus illud inter *ἀνέκδοτα* refert, lib. de Assumptione Marię Virginis ad Paulam & Eustochium. Et Epiphanius dicit se hoc ignorare in hæres. Antidicom. Basilius dicit *inter Pascha & Pentecosten stando precandum esse* de Spir. S. cap. 27. At hoc nunc negligitur. Tertullianus docet, *infanti recens nato, mel & lac dandum esse*, de corona, sed & hoc nunc contemnitur. Quid? quod ipsę Traditiones non ab hæreticis, sed & ab ipsis orthodoxis patribus positę, sint sæpè falsę. Vt illa de Zacharia apud Basilium. de Spir. sancto cap. 27. Et illa de morte Domini, apud Clement. Stromat. 1. Et apud Tertull. cont. Iud. cap. 5. & apud Irenęum lib. 2. cap. 4. & multa Similia. Quod verò dicit, in scriptura idem fieri posse, falsum est. Scriptura enim se suis notis manifestat, & illustrat, quod non faciunt Traditiones. Deinde Scriptura in se habet, per quod ab adulterinis distinguitur. Hoc in Traditionib. non habet locum. Nam sæpè ambę, licet contrarię sint, falsę sunt. Fateor tamen, faciliè Traditiones probas à prauis distingui posse, nempe quando ad regulam sacrarum Scripturarum examinantur. Quod verò dicit, *Ecclesiam posse falsas Traditiones à veris distinguere*, si de Romana Ecclesia loquitur, tum petit illud, quod est in principio. Romana enim Ecclesia nobis falsas Traditiones inuexit, & adhuc obtrudit. Ergo earum iudex esse non potest. Quod verò dicit *Ecclesiam nunquam falsam Traditionem vel librum pro Canonicis accepisse*, si intelligit de Ecclesia Romana, est falsum. Illa enim epistolas Decretales recepit inter Canonicas, & obseruat certa tempora Ieiuniorum, quod Patres dicunt ab hære-

ticis excogitatū esse, & esse cōtra morē primitiue Ec-  
clesiæ. Quinta ratio. Quia verbū Dei scriptū est *Testa-  
mentū Dei*. Sed ad hoīs Testamētū cōfirmatū addere  
nihil licet, Gal. 3, 15. Basil. de fidei cōfess. Ergo ad Dei  
Testam. confirmatū aliquid addere, vel ab eo aliquid  
detrahēre, graue facinus esse arbitramur. Sexta & vl-  
tima ratio. Quia hæretici, cū ex scripturis cōsistere non  
possent, docuerūt Christū docuisse quadā palām, quadā oc-  
culā. Iren. 1, 23. Basilid. Et 24. Carpocrat. Idē docet  
Tertul. de præscript. Resp. Bellarm. *hæreticos esse ortho-  
doxorum simias, itaq; & suas Traditiones occultare, quem-  
admodum orthodoxi faciunt. Sed illorum occulta differre  
fine. Quæ n. ab orthodoxis occultantur, ideo occultari, quia  
Laici illorum nō sunt capaces, quæ verò ab hæreticis occul-  
tātur, ideo occultari, quia sunt turpia*. Et adducit exem-  
plū de Manichæis ex Augustino, de Hæresib. cap. 26.  
Verūm si quis diceret Papistas propter eandē causā  
suas Traditiōes occultare, ille fortē nō aberraret, sūt  
n. qui affirmāt hostiā papisticā cōfici ex adipe canino,  
quod si verum est, sanē nō est multò melius. Sed vt  
vt sit, sacra Christiana nō sunt occultāda. Christus n.  
disertē dicit, Math. c. 10. vers. 17. *Quod dico vobis in te-  
nebris, hoc dicite in luce; & quod dixi vobis in aurem, hoc  
predicāte sup̄ tecta*. Hoc est vt Hieron. interp. *quod au-  
diuistis absconditē, publicē loquimini; quod audiuistis in par-  
uulo Indæ loco, hoc vos in vniuersis urbib⁹, & in toto mūdo  
audaciter dicite*. Eodē modo hoc explicat Tertull. de  
præscript. cap. 26. *Dominus palā dixit, sine significatione  
taciti Sacramētis, si quid in tenebris; & in abscondito audisēt,  
in luce & in tectis predicarent*. Et Theophyl. ad dictum  
locū, *quæ ex me audiuiſtis, ea dicite cum summa liber-  
tate, &*




*tate, & summa vocis claritate, ut omnes audiant.* Deinde implicat contradictionē. Hic n. vult Traditiones nō pertinere ad oēs; & antè voluit Traditiones defendere per istū locū, *Tenete Traditiones*. At hoc dictum ptinet ad oēs fideles, vt antè ostensum est. Aut igitur hoc, aut illo loco errat Bellarm. Ego eum in vtroq; ertasse existimo. Cū igitur Traditiones tam longo tempore conseruari nō possint, & verbū Dei scriptū sit, vt esset fidei & morū regula; Deinde cum verbū scriptū sit Testam. Dei, cū deniq; ipsę Traditiones sint sæpe falsę, & heretici iactēt occultas Traditiones, cū ex Script. cōsistere nō possunt. Manifestū est nō Traditiones, sed verbū Dei scriptū esse regulā oīs Christianæ religionis, & ob eā causā cōtinere ista oīa, q̄ sunt ad salutē necessaria, ob eandemq; causā cū papistę aliquod controuersum dogma ex Traditionib. probant, tum petunt principiū, & quod controuersum est, probant per illud, quod æquē cōtrouersum est.

## CONCLUSIO.

Principia Christianorū dogmatum sunt certa, extra omnem controuersiam posita, indubitata, vera, & diuina. Sed Papisticę Traditiones sunt incertę, in controuersia positę, dubię, ridiculę, ineptę, falsę, & humanę. Ergo papisticę Traditiones nō possunt esse principiū Christianorū dogmatū. Soli autem viginti duo libri V. T. Hebraicę scripti, & viginti septē libri N. T. gręcę scripti, sunt certi, indubitati, extra cōtrouersiam positi, immediatē veri, & diuini. Ergo hi viginti duo V. T. & viginti septē libri N. T. sunt principiū Christianorum dogmatum. Ac proinde ex iis tantū firmę & immotę rationes in dogmate controuerso peti possunt.

F I N I S.



# INDEX PRÆCIPVARVM RERVM.

*Primus numerus paginam, alter lineam significat.*

Additio Estheræ non est principium fidei, pag. 51. lin. 14. A patribus rejiciitur, 52. 24. Non est Canonica, 50. 12. Est græce Scripta, 56. 12. A Iosepho conficta, 57. 2. Pugnat cum scriptura, 59. 11. Pugnat cum veritate Historiæ, 62. 5. Post Artaxerxis etate scripta, 63. 24.

Additiones Danielis non sunt principium Christianorum dogmatum, 67. 30. Sunt Græce scriptæ, 69. 18. Pugnant cum Scriptura, 69. 23. Sunt ab Habacuc scriptæ, 72. 5. Non fuerunt in Canone Hebræo, 72. 19. Tempore primitivæ Ecclesiæ non fuerunt in canone Christiano, 72. 12.

Apocryphi libri non sunt ab Apostolis canonici iudicati, 30. 19. Non sunt canonici, 33. 19. Non sunt à Prophetis scripti, 34. 5.

Non omne Apostolicum, quod Patres Apostolis tribuunt, 30. 4.

Baruch non est principium Christianorum dogmatum, 65. 2. Non est Ieremiæ, 66. 3. Non est canonicus, 67. 3. Pugnat cum Canonica Scriptura, 67. 4. Est græce scriptus, 67. 8. Non fuit tempore primitivæ Ecclesiæ in canone Christiano, 67. 14.

Canon Scripturæ V. T. 19. 6. Quomodo cognoscendum an liber sit canonicus, 18. 13. 40. 20. Post Artaxerxen scriptum non est in canone, 19. 13. Iudæi & Christiani idē sentiūt de canone, 20. 16. Antiquitatis testimonium de canone, 20. 21. vsque ad 26. 9. Canonum duplex, 27. 2. Canonici fidei sūt in eadē auctoritate, 27. 24. Canonicum idem quod Ecclesiasticum, 28. 18. Canonem collegit Esdras, 35. 29. Christianus canon ex Iudaico factus, 37. 13. Canon

Iudaicus tempore Christi fuit perfectus, 37. 31. Est à Christo & Apostolis tacite approbatus, 38. 26. 39. 8. Canon Christianus & Iudaicus idē, 39. 23. Ante Nicænam Synodum fuit certus Scripturæ canon, 42. 15. Nullum concilium post Apostolos habitum potest librum non Canonicum in canonem referre, 8. 27. 42. 13. Papa id potest librum non Canonicum Canonicum facere, 47. 13. Canonica auctoritatis veracula, 49. 17. Criteriæ Bellarmini, quibus papa iudicat aliquem librum Canonicum esse, 50. 6. Patres describunt Canonem Christianum, 36. 3.

Concilium Carthaginense non est causa canonicæ auctoritatis, 9. 8.

Concilium Tridentinum non est causa canonicæ auctoritatis, 11. 17. Non est legitimum, 11. 24. vsq; ad 15. 14.

Ecclesiasticum non idem quod Canonicum, 32. 24.

Non omne quod in Ecclesia legitur Canonicum, 34. 6. 68. 7.

Ecclesiasticus non est canonicus, 114. 15. Non est principium fidei, 112. 6.

Editiones Ecclesiastici inter se pugnant, 114. 17. Aetate Euergetis scriptus, 115. 14. Græce scriptus, 115. 24. Nunquā fuit in canone Hebræo 114. 6.

Hieronymus non est Auctor vulgaris versionis, 115. 12. Hieronymus erravit, 36. 30.

Habitus textus V. T. authenticus, 145. 25. Antequam Christi non est corruptus, 148. 1. Post ætatem Christi authenticus, 150. 25.

Iudith non est Canonica, 19. 23. Est corrupta, 91. 4. Non est à Nicæna Synodo in Canonem relata, 36. 19. Pugnat cum canon. Script.

94. 17. Nunquā contigit, 94. 21.

Status controuersiz de interp. Scripti. 422. 6. Argumēta ex V. T. Pro interpretatione Papæ refutatur. 423. 3. Argumenta p eadē ex N. T. refutantur, 437. 18. Argumenta pro eadem à praxi Ecclesiæ refutatur. 432. 28. Argumēta pro eadem à Papa refutantur, 490. 1. Argumenta p eadē ab Imperatore refutantur, 493. 5. Argumenta p eadem à Græcis Patrib. refutatur, 512. 6. Argum. p eadem à Latinis Patrib. refutatur, 524. 8. Arg. p eadē à ratione refutantur, 540. 20.

Supremus interpr. Iudex quis? 556. 8. Legitimus interpretationū Iudex, 557. 25. Orthodoxa sententia de interpr. Iudice, 561. 25.

Legitimus scripturarū intérpres. 557. 8. Interpretatio, 557. 18. Interpretationis regula, 545. 25. 560. 12. Papa potest errare in scriptura interpr. 547. 17. Papæ interpr. inepta, 549. 20.

Marci Euangelium nō est Latine scriptum, 168. 18.

Machabæorum libri non sunt principium fidei, 117. 6. Non sunt in Canone, 119. 11. Nō sunt à Propheta scripti, 119. 13. Illorum auctor Iosephus, 120. 11. Sunt gentilis libri compendiū, pugnat cum veritat. Historiæ, 121. 2. Sunt græcè scripti, 122. 5. Nō sunt in Canone Hebræo, 122. 10. Pugnat cū Scriptura, 122. 20.

Status controuersiz de obscuritate scripturæ, 339. 4. Argum. p Scripturæ obscuritate ex Dei verbo refutantur, 339. 18. Arg. pro eadē ex Patrib. refutatur, 350. 10. Argum. à re sumpta refutantur, 357. 27. Orthodoxorū sentētia De scripturæ obscuritate, 362. 25.

Papa Hereticus, 547. 26. Non habet vim coactiuam, 541. 5. Non

est immediatē à Deo. 541. 28. Errat in scriptura explicāda, 547. 17.

Docet contradictoria, 548. 2. Eius interpretatio inepta. 559. 20. Preces ignota lingua factæ inutiles, 305. 20.

Principia quales esse debeant. r. Status controuersiz de principiis, 8. 10. Principium Orthodoxorū, 7. 4. Principium Papistarum, 6. 10. Regulæ Papistic. Tradit. 704. 8. Sapientia non est principium fidei, 104. 24. Non est canonica, 108. 20. Græcè scripta, 108. 30. Eius auctor, Philo. 109. 2.

Sensum scripturæ legitimum ex scriptura colligi posse probatur ex scriptura, 362. 27. Idem probatur ex patrib. 377. 8. Idem probatur ratione, 383. 20.

Status cōtrouersiz de multiplici scripturarum sensu. 394. 8. Arg. pro eo refutatur, 395. 8. Proprius & figurat<sup>us</sup> sensus, 397. 23. Sensus spiritualis, 399. 3. Sensus allegoricus, 399. 28. Tropologicus, 403. 10. Anagogicus, 404. 10. Allegoricus. Tropologicus & Anagogicus non sunt legitimi sensus. 405. 15. Allegoriz & Tropologiz etiam in profanis scriptorib. 407. 27. Legitimus scripturarum sensus tantum est vnus. 409. 10.

Sacra publica debent vernacula lingua fieri. 291. 1. 293. 5. Christus & Apostoli administrarunt sacra lingua audientibus nota. 329. 20.

Scripturam legere licet omnib. hominib. 240. 16. Argum. contraria refutantur, 247. 1. Scripturam in linguas vernaculas vertere licet, 240. 1. Rationes contrariæ refutatur. 252. 21. Scriptura secundum Papistas nō est sufficiens, 616. 20. Rationes contra eius sufficientiam refutantur, 616. 30. Rationes ex Scriptura petitz refutantur.

# INDEX.

tantur, 643. 5. Rationes ex Concilijs & papis contra eandem rem refutantur, 657. 30. A ratione ducta cōtra eandē refutatur, 700. 14.

Scriptura continet perfectā doctrinā salutis, 708. 14. Probatur ex Scriptura, 709. 1. Probatur ex Patrib. Græcis, 736. 30. Probatur ex Patrib. Latinis, 751. 20. Probatur ratiōe, 760. 28. Scriptura an sit necessaria, 607. 10. vsq; 612. 12.

Tobias non est principiū fidei, 73. 2. Est corruptus, 75. 1. Eius editiones inter se pugnant, 80. 18. Docet vana, 83. 1.

Traditio quid significet, 594. 25.

Quotuplex, 596. 13. Status cōtroversiz de Traditionibus, 603. 27.

Vulgata versio Barbara, 156. 17. De Hebræo detrahit, 159. 3. Ad Hebræū textū apponit, 160. 1. Hebræū puerit, 162. 7. Nō habet ita, vt Hieronymus transfudit, 163. 21. Non est Authentica, 176. 3. 190. 15. Versiones Latinæ innumere, 185. 19. Vulgata versio non est vetus Italica, 179. 21. Propter Ecclesiæ approbationē non est authentica, 192. 12. Ex Græco & Hebræo emendanda, 225. 30. & 196. 17.

FINIS.

Errata, quæ inter excudendum admissa sunt, sic corrige, reliqua ipse facilè videbis.

Pag. 12. lin. 12. lege, *Caveant*, l. 26. Accusatori. pag. 13. lin. 1. Dele non. l. 16. Post postremò, lege, et, 4. quæst. 4. C. contra. 28. 31. col. 32. 20. at. 39. 25. dele, illi. 45. 11. post qui, lege, ante Augustinum vixerunt, &. 67. 13. post esse, lege, non. 105. 11. dele, Lactantij & Clementis. l. 23. petiuerunt, l. 27. Concilium. 138. 4. legitur. 149. 18. indicant. 169. 18. utique. 189. 25. congruat. 204. 11. כִּי. 208. 21. תַּפְנֵה. 209. 15. כִּי־ס. 210. 7. possunt. 218. 15. שְׂמֵתִים. 227. 9. habuerit. 258. 4. Novi Testamenti. 313. 7. gratias. 355. 20. densissimam. 369. 14. scripta. 385. 11. fuerit. 387. 13. velata. 423. 67. lege 8. 425. 15. quicumque. 439. 8. Paulo post enim ostendemus. 444. 18. rectum. 452. 22. dele, incertum. 458. 14. possunt. 466. 1. esse. 468. 2. quam. 486. 11. ἀληθῶς. 488. 29. pro Sotomenus lib. 6. cap. 2. lege Socrates, lib. 4. cap. 11. 492. 22. pro, Bonifacium, lege, Celestinum. 500. 23. ex. 509. 19. recte. 526. 10. Apostolica. 517. post subiectum, adde, consequentis. 698. 24. παράγγελλμα. 613. 20. pro Num. lege los. 617. 23. docent. 619. 25. pro Iustificatio, lege, satisfactio. 659. 30. pro, sextus, lege, Tertius. 660. 21. τῶ τὸν. 693. 19. 38. 696. 10. communem. 719. 29. dicit. 724. 29. continent. 728. 29. dele, ex. 738. 1. salutem. 740. 17. doctoribus.

Porro ad huiusmodi descriptiones opus est ingenti Bibliotheca, tali verò ego destitutor, itaque sæpe alienis libris, ijsq; de eadem re varijs, uti coactus sum, prout igitur illi variant, ita sæpe numerus capitum, in Testimoniorum citationibus variat, hoc te etiam, lecter, scire volui.

FINIS.





10-3-2



